

Staatl. Bibliothek
Regensburg

Hft. Erd. 380

Ad usum
J.

Bartholomaei Heuss
S. Ord. H. Gradm.
Conventus Patibonensis
1769

Constat in albis
si.
Compactura -

DE ILLUSTRISSIMIS VIRIS
PP.

PETRO MARTYRE
SANSIO

Episcopo Mauricastrensi,

ET

FRANCISCO SERRANO

Electo Episcopo Tipasitanorum,

Deque PP.

JOHANNE ALCOBERO,
JOACHIMO ROYO,

ET

FRANCISCO DIAZIO

ORDINIS PRÆDICATORUM

*Fo-chei in Fo-kiena Sinarum Provincia
Martyrio perfunctis*

COMMENTARIUS.



ROMÆ MDCCLIII.

TYPIS HIERONYMI MAINARDI.
SUPERIORUM FACULTATE.

DE M...
P...
S...
Episcopo...

FRANCISCO SERRANO
Episcopo...
JOHANNES ALBERTO
JOACHIMO ROYO

FRANCISCO DIAZ
ORDINIS...
COMMENTARIUS

ROME MDCCIII
T...

Statl. Bibliothek
Regensburg

In Dei Filio sibi Dilectis Patri-
bus, Fratribus, ac Sororibus
Ordinis FF. Prædicatorum

FR. ANTONINUS BREMOND

Sacræ Theologiæ Professor,

Ejusdemque Ordinis universi humilis
Magister Generalis, & Servus

*Salutem, & studium propagandæ
Religionis.*



Um crebris nun-
ciis, litterisque
gravissimorum Vi-
rorum de Petro
Martyre Sanzio
Episcopo Mauricastrensi, fociis-
que Dominicanis in Fo-kiena Si-
narum Provincia Christiani no-
minis causa aut gladio percussis,
aut vi calcis, laqueove necatis
intellectum esset, eaque de re

BENEDICTUS XIV. Pontifex
Maximus, semel atque iterum
orationem ad Senatum S. R. E.
Cardinalium habuisset, nostro
quidem muneri satisfacturi, bi-
nas ad vos epistolas dedimus,
quibus non solum quæ fortissimi
Martyres supremo præsertim vi-
tæ tempore strenue, præclareque
gesserant, complexi; sed vos
etiam majorem in modum hortati
sumus, ut eorum, quos instituti
socios habuissetis, virtutem ani-
mi, studiumque tuendæ, ampli-
ficandæque religionis imitarem-
ini. Sed quoniam nobis tam bre-
vibus litteris indicare vix, des-
cribere autem vel minimam par-
tem incommodorum, quæ illi
perpeffi essent, ne vix quidem
licuerat, curandum continuo
judicavimus, ut de vita, cer-
taminibus, triumphisque eorum
italica lingua commentarii per-
scriberentur. Quem sane com-
men-

mentariorum librum , ut diligenter , accurateque perscriptus , nobisque jubentibus una cum Alloquutionibus BENEDICTI XIV. Pont. Max. , cumque nostris litteris publicatus fuit , quum summa omnium voluntate exceptum comperissemus , prospexissemusque , si translatus in eam linguam fuisset , quæ a plerisque vestrum intelligeretur , maximo vobis usui , utilitatique futurum , latinum fieri , vulgarique volumus , ne qua in re vestris commodis defuisse videremur . Atque is quidem ipse est liber , quem vobis hoc volumine exhibemus , testem erga Martyres pietatis , & curæ , sollicitudinisque erga vos nostræ . Addidimus autem huic litteras ab eodem Pontifice incredibili gravitate , singularibusque benevolentia significationibus his paucis mensibus ad Philippinenses

no-

nostros scriptas , propterea quod
nihil esse prætermittendum arbi-
traremur , quod ad decus , am-
plitudinemque Ordinis pertine-
ret . Cumque alter Commenta-
rius de moribus , fortitudineque
Francisci Gili de Federich , &
Matthæi Alonfi Lezinianæ Do-
minicanorum , qui in Tunqui-
nensi Regno martyrio perfuncti
fuerant , ab amplissimo viro Hi-
lario Ordinis Eremit. S. August.
Episcopo Coricensi , Vicarioque
in eis regionibus Apostolico con-
scriptus , curaque Decessoris no-
stri editus Romæ ante annos sep-
tem fuisset , eum item latinum
factum postremo loco adjunxi-
mus , sperantes fore , ut quo plu-
res vobis propositi ad imitan-
dum duces fuissent , eo magis ad
virtutem colendam incitarentini.
His igitur veluti monitoribus
usi , dum legentes dicta , factaque
tantorum virorum, qui pro Chri-
sto

sto summa cum sui , vestrique
gloria pugnarunt , admiramini ,
id contendite , uti , neglectis pe-
rituris quibusque rebus , ipsius-
que etiam mortalis vitæ amore
contemto , inflammati studio cu-
randæ salutis , felicitatisque ho-
minum sempiternæ , eorum esse
videamini non magis instituti so-
cietate , quam virtutis imitatio-
ne fratres . Valete Nostri , So-
ciorumque memores in sacrificiis,
& precationibus vestris .

IMPRIMATUR.

Si videbitur Reverendiss. P. Magistro
Sac. Palat. Apost.

*F. M. de Rubeis Patriarcha Con-
stantinop. Vicesg.*



IMPRIMATUR.

Fr. Vincentius Elena Rever. P. Mag.
Sac. Palat. Apost. Socius.



D E

PETRO MARTYRE
SANSIO,
SOCIISQUE MARTYRIBUS
COMMENTARIUS.



Inensium , quorum est amplissima in extrema Asiae continenti regio, salus jam usque ab anno MDXVII. singulari Dominicanis curæ fuit , quo parati Francisci Peresii Andradae opera sunt , institutique ad eos commeatus . Itaque anno MDLVI Gaspar a Cruce Lusitanus Ordinis Prædicatorum eo primus

De Dominicanorum in Sinarum Imperii adventu .

mus omnium importandæ religionis christianæ causa contendit, uberioreſque cepisset laborum fructus, nisi veriti Mandarini, ne auctoritate, diligentiaque viri, deorum, quos colebant, superstitio deleteretur, eum in carcerem conjiciendum, deindeque Imperii finibus exterminandum curassent. Sed hoc tam contrario exitu rerum debilitari, frangique non potuit studium propagandæ religionis, & virtus Dominicanorum. Anno MDLXXVII. P. Bartholommæus Lopesius una cum sociis ex eodem Ordine duobus Macai Cœnobium extrui fecit, ut cum inde brevior trajectus, tum facilis sacrorum christianorum introductio in Provincias Sinarum esset. Anno MDXC. P. Johānes a Castro Provinciæ Insularum Philippinarum Præfectus, & P. Michael Benavidesius, qui post Archiepiscopus Manilæ fuit, quum loqui finice didicissent, inquirendoque de incolarū ejus regionis moribus cognoscent, duorum Sinensium ductu, quos ipsi ad religionis veræ cultum adduxerant, mysteriisque initiaverant christianorum, in urbes Sinensium penetrarunt, ac loqui statim de Christo cœperunt, inque institutis, decretisque nostris explicandis continenter, magna spe referendi fructus permoti, versati sunt, quoad apud Mandarinos accusati, diuque Hay-tengi in carcere asservati, posteaquam summa cum

re-

religionis veræ laude, coram iudicibus, palam sese christianos esse confessi sunt, iussi tandem fuerunt, ut inde exulatum abire ne cunctarentur. His extremo fere seculo decimo sexto P. Didacus Aduartus, deindeque anno MDCXII. PP. Thomas Major, & Bartholommæus Martineſius ſucceſſerunt; cumque gravissimis difficultatibus, quæ obſtabant, quo minus ſuſceptus a Dominicanis labor, ſucceſſus proſperos haberet, expugnari eorum conſtantia non potuiſſet, hoc demum PP. Angelus Cocchius Florentinus, & Johannes Baptiſta Moraleſius Hiſpanus annis MDCXXXI. & MDCXXXIII. obtinuerunt, ut in Fo-Kiena Provincia Prædicatores ſedem ſtabilem, certumque domicilium collocarent. Nec diu poſt, cum hoc Dominici aſſidue eniterentur, ac laborarent, ut ethnici, quorum ingens erat in Provincia multitudo, a ſuperſtitione deterrerentur, eam ſibi ſocius quidam eorum gloriam comparavit, ut pro Chriſti Servatoris nomine extremo ſupplicio afficeretur.

II. Fuit is quidem P. Franciſcus Capillas primus Imperii Sinenſis Martyr, qui Fo-gani XVIII. Kalendas februarii an. MDCXLVIII. gladio percuſſus fuit. Eſt autem huius, aliorumque ex eodem Ordine quatuor Martyrum, qui in finitimis regionibus veritatis tuendæ cauſſa interie-

P. Franciſcus
Capillas O.P.
primus in Si-
nenſi Imperio
Martyr fuit.

4 DE MARTYR. SINENS.

runt, a BENEDICTO XIV P. M. in ea, quam ad Cardinales de rebus, quas descripturi mox sumus, habuit, oratione, cum laude facta mentio. Jam inde autem ab eo tempore Dominicani numquam ab instituendis Sinensibus, qui Provinciam incolebant, cessarunt, adeo ut non modo cum pax vigeret, sed etiam cum ethnicorum furore tempestates in Christianos concitarentur, etsi semper multis, magnisque incommodis premebantur, eos in vera, sanctaque doctrina confirmare pergerent. Atque in ea re agenda inter tot illustres viros insignem sunt aliqui gloriam consequuti, qui singulari constantia, fortitudineque animi maximas, christiani nominis causa, perpeffi fuerunt calamitates, quorum res strenue, præclareque gestæ plurimum ad christianæ reipublicæ utilitatem conferrent, nisi, quo minus indicentur, brevitatis operis esset impedimento.

De Petro Martyre Sancto Episcopo Mauricastræ, deque Sociis Domini. canis, qui in Sinam contulerunt Evangelium promulgatum.

III. Postremis hisce temporibus, hoc est anno MDCCXLVI. diligentem operam amplificandæ in Provincia, in qua jampridem florere cœperat, christianæ religioni dabant vir illustrissimus P. Petrus Martyr Sanctus Episcopus Mauricastræ, & Vicarius Apostolicus, P. Franciscus Serranus, qui post Episcopus est dictus Tipasitanorum, P. Joachimus Royus, P. Johannes Alcoberus, & P. Franciscus Dia-

ORDINIS PRÆDIC.

S

Diazus Hispani e Dominicanorum Sanctissimi Rosarii, quæ est in Insulis Philippinis, Provincia. Hi omnes missi a Præfecto Provinciæ impensa Regis Hispaniarum in Sinam fuerunt doctrinam Christi superstitionis illis gentibus nunciatum.

Anni jam plures intercefferant, ex quo tempore, cum nullam intermissionem officii fecissent, in ea regione, quæ credita fidei eorum erat, orthodoxam religionem propagare cœperant, cum orta repente in christianos ethnicorum odio, malevolentiaque tempestas fuit, quæ illis attulit opportunitatem morte magna cum gloria coronandi vitam, quam in apostolicis laboribus sustinendis contriverant. Sed antequam res ab iisdem præclare gestas narrare aggrediamur, ratio ipsa hortari videtur, ut, commemoratione rerum, quæ propriæ cujusque eorum essent, lectores, quinam hi fuerint Christi Athletæ, intelligant.

IV. Petrus Martyr Sansius, patre Andrea Sansio, & Catharina Jorda matre, Asci, quod est Tortosensis dioceseos oppidum, in Catalonia Principatu natus est. Cum mater in partu vehementer laborasset, periculumque, ne infans interiret, esset, mysteriis religionis christianæ initiatus in domo paterna fuit. Additæ post cæremoniæ in parochiali templo, ritusque, qui adjungi baptismo

Petri Martyris Episcopi Mauricastrensis elogium.

6 DE MARTYR. SINENS.

consuerunt , III. non. septembres anno MDCLXXX. fuerunt . Patruus qui *Sacellarius* major , ut vocant , Cathedralis Ecclesiæ Ilerdensis erat , vir pius imprimis , quocum in ea urbe degebat , cuique traditus fuerat in disciplinam , id summo opere curavit , ut recte Petrus adolescens institueretur . Expletis iis generibus studiorum , quibus prima ætas informari ad doctrinam , virtutemque solet , in Ilerdensi Cœnobio Prædicatorum Ordini nomen dedit , Petrusque Martyr vocatus est , cum antea Petrus Iosephus appellaretur ; cumque annum ipsum studiose in Constitutionum Ordinis , virtutisque cultu transegisset , summa Patrum , socio- rumque voluntate , suam Deo *solemni* , ut dicimus , *professione* obligavit fidem prid. non julias anno MDCXCVIII. Sed ubi XII. kalendas octobres anno MDCCIV. consecratus Sacerdos est , illustriora , maioraque studii salutis animarum , magnæque erga homines ceteros caritatis argumenta dedit , tuncque potissimum , cum anno MDCCVII. arctissima obsidione Ilerda teneretur , quo tempore neglectis laboribus , atque periculis , in quæ sese adductum intuebatur , perstitit in suscepto munere conciliandi divino numini eos , qui *Sacramento penitentiae* expiari peterent . Cumque facere in ea , quæ erga Deum est , pietate maiores progressus

fus cuperet, contulit sese ad Cæsaraugustanum Coenobium S. Ildephonfi, ubi legum Ordinis, atque institutionum cultus imprimis viget, quo in Coenobio vocari sese divinitus intellexit ad Provinciam insularum Philippinarum, ut operam ethnicis ad Christum adducendis daret. Ubi ex Deo primum, adhibitis precibus, deindeque ex piis, doctisque viris, recte ne esset facturus, si relictâ patria ad ethnicos abiisset, quæsiuit; quod in animum induxerat, perfecit, ac Cæsaraugusta XII. kal. sext. anno MDCCXII. discessit. Cum Gades venisset, correptus febris est. Vix ea se liberatum senserat, cum, etsi medicus sustineri ab eo itineris incommoda non posse diceret, tamen Deo, in quo spem suam omnem collocarat, duce, superatis difficultatibus, quæ impediiebant, quo minus susceptum iter prosequeretur, navem statim, atque vela sunt data, conscendit. Initio januarii mensis anno MDCCXIII. ad Mexicum pervenit, nonisque martii Acapulcum maris pacifici portum tenuit, ubi rursum febris agitari cœpit. Sed quum debilitas corporis tanta non esset, ut eum a suscepto consilio remoraretur, nonis aprilis nactus opportunum ad navigandum tempus, iterum navigationi sese commisit, cumque nautas in magna rerum christianarum ignoratione versari comperisset,

8 DE MARTYR. SINENS.

set, tam longo itinere, tempus omne in
iis docendis, instituendisque consumpsit.
Post, ubi III. idus junias Marianas, seu
Latronum insulas vidit, invehitque est
XII. kal. aug. in Philippinarum mare;
extremo augusto mense Manilam, quæ
urbs est earundem Insularum princeps,
appulit. Peracto itinere, ut pedem in
ædes Prædicatorum intulit, prima illius
cogitatio, curaque fuit ad sacellum, in
quo imago Beatæ Virginis Rosarii collo-
cata erat, adire, eamque venerari, cujus
quidem aspectu, ut idem scribere solebat,
oblitus incommodorum omnium, quæ
passus jam usque ab eo tempore fuisset, quo
Cæsaraugusta profectus Manilam venerat,
novos sibi datos fuisse spiritus sensit, qui-
bus multo plura perpeti deinceps libenter
posset. Biennium fere in Philippinis in-
sulis consumpsit, quo tempore cum loqui
sinice didicisset, est enim hoc genus lin-
guæ insularis propter Sinensium, qui ibi-
dem versantur, multitudinem notum,
prid. idus junias an. MDCCXV socio
P. Paulo Matthæu Cœnobii item Ilerden-
sis alumno, in navim ethnicorum con-
scendit, in Sinamque navigavit, ac III.
kal. julias, qui dies SS. Petro, & Pau-
lo Apostolis sacer erat, ad Fo Kie-
næ Provinciæ Hia-muenum portum
pervenit, paulloque post a Patribus Pro-
vinciæ Philippinarum renunciatus Si-
nen-

nenſium Prædicatorum Propræfectus fuit. Jam annus erat quartus ac decimus, ex quo ſummo commodo populi Sinenſis, Sedisque Apoſtolicæ voluntate propagare chriſtianam religionem in ea regione cœperat; hujus namque ſedis auctoritate conſtitutus erat *Vicarius Apoſtolicus* Fo-Kiëæ Provinciæ; cū an. MDCCXXIX. ſæva in chriſtianum nomen tempeſtas exorta eſt: cumque Petrus intellexiſſet, conquiri ſeſe ab hoſtibus ad necem, ac niſi fuga ſaluti ſuæ proſpexiſſet, ſpem evadendi nullam eſſe videret, Chriſti Servatoris conſilium ſequutus, qui, ſi inimici religionis nos infeſtentur, alio fugiendum dixit, Quan cheu-fu, quo in oppido ſolum, quod Europæ incolæ Cantonum vocant, Chriſtianis doctoribus impune agere licebat, contendit. Ibidem cum moraretur, rogatus, ac pene coactus a P. Archangelo Miralta Clerico Regulari graviffimo viro, Sacræque Congregationis de Propaganda Fide Procuratore, qui juſſus ab eadem fuerat, ut P. Petro Martyri Sanſio, ne Diœceſano quidem certiore facto, imponi manus a quocumque Epifcopo catholico curaret, die S. Matthiæ Apoſtolo ſacra an. MDCCXX. ab Epifcopo Nan Kingenſi, adſiſtentibus Epifcopis Pe Kingenſi, & Macaenſi, conſecratus Epifcopus Mauricaſtrenſis fuit. Biennio poſt, nempe XV. kal ſeptem-

10 DE MARTYR. SINENS.

ptembres anno MDCCXXII. una cum Doctoribus Christianis, qui ex Europa venerant, triginta sex coactus Cantono Macaum excedere exulatum, cum annos fere sex in eo exilio exegisset, quo tempore, quantum doctrina, virtuteque valeret, ostendit, tandem VII. idus majas anno MDCCXXVIII. in Fo Kienū revertit, quo illum studiū confirmandæ, dilatandæque religionis, divinaque providentia quæ ipsi coronā martyrii decreverat, revocabāt.

Sinenſibus, quos ad christiana sacra adduxerat, restitutus, quamquam ætatis flexu adversa valetudine laborare coepisset, sese totum curandæ animarum saluti dedit, nullam rerum earum prætermittens, quas colere jam usque ab juventute aggressus fuerat. Laneis perpetuo vestibus ita, ut præscriptum lege Dominicanis est, usus, continenter a carniū esu abstinuit ad annum fere quintum, vel sextum ante quam martyr decederet, quo tempore, ipsis ut vesceretur, morborum gravitate coactus est, moremque media quaque nocte surgendi, recitandique matutinas preces summa religione servavit. Cumque studiose curaret, nequa ab se intermissio officii fieret, numquam ab ministrandis sacramentis cessavit, adeout an. MDCCXLII. etsi vomitu sanguinis premebatur, corporeque infirmo erat, tamen a suscepta institutione numquam desisteret.

Qua-

Quare cum litteras a P. Royo accepisset, quibus significabatur, cessandum a labore esse, quoad sanitatem recuperasset, se namque illius loco, ut res quæque recte administrarentur, diligentissime curaturum, ita respondit: hoc certe & ago, & agam, tametsi mihi esset ob laborem ejusmodi moriundum. Itaque una mors finem ipsi laborum attulit.

V. Franciscus Serranus Francisco Serrano, & Maria Friaſia honestis parentibus Guenexæ vico Guadicensis in Granatensi Regno diœcesis natus, mysteriisque religionis christianæ an. MDCXCV. prid. nonas decembres initiatus est. Exactis sub parentum cura pueritiæ annis, in Regio Granatensi S. Crucis Cœnobio indutus vestibus Prædicatorum est, opportunoque tempore ita, ut instituta Ordinis postulant, X. kal. majas an. MDCCXIV cum annum nonum ac decimum ætatis ageret, suam Deo obstringens fidem, promisit sese dicto audientem, castum, ac pauperem perpetuo futurum. Eluxere continuo in adolescente virtutes, quibus illius erat ornatus animus, omnesque in eo liberale ingenium, morum candorem, contemptum sui, pacem, modestiam, patientiam, inque rebus quibusque gerendis honestatem, & gravitatem admirabantur; adeo ut multi illius æquales, qui adhuc vivunt, non solum abhorruisse virum ab eo

De Francisco
Serrano ele-
cto Episcopo
Tipasitanorū.

genere colloquiorum, quibus ejusdem integritas, castitasque capere nonnihil detrimenti posset, sed etiam cavisse, ne quod ab se mendacium diceretur, ferant. His animi ornamentis studium adjunxit litterarum. Quo in genere adeo profecit, ut onus ipsi explicandæ in cœnobio Granatensi Philosophiæ imponeretur. Igitur cum exercitatione virtutis, doctrinaque ita esset institutus, in Provincam insularum Philippinarum cum aliis dominicanis Doctoribus, quos *missionarios* dicimus, an. MDCCXXV. contendit. Ubi in eas insulas venit, haud diu post a Præfecto Provinciæ Dominicanorum missus in Sinam est an, ut conjectura assequi possumus, MDCCXXVII. propterea quod idem, cum an. MDCCXLVII. de turbis in se, focios, christianosque omnes ab ethnicis concitatis commentarium scriberet, testatus sit, annum esse vigesimum, ex quo ipse in eam regionem pervenerat. In fungendo munere pleno laborum, variis ægrotationibus corporis occupatus, exagitatusque fuit: ac licet inde, cum designatus jam Martyr esset, argumentum duceret contemnendi sui, diceretque parum se adjumenti afferre suis fociis, ac fratribus potuisse, proptereaque rogare etiam atque etiam, sibi ut ignoscere ne gravarentur, quod adversa valetudine fere semper conflictatus esset; certa tamen res est, his tam gravibus incom-

commodis ignem caritatis, quo vehementer flagrabat, numquam deferbuisse. Nam is, quemadmodum viri graves memoriæ tradiderunt, apostolicis laboribus ita affici consueverat, ut nulla res esset, quæ ipsum deterrere ab iisdem obeundis posset. Immo vero uti laboribus solebat, ut suæ voluntati juvandi omnes, quibuscumque rebus poterat, satisfaceret. Interdum cum portas oppidorum, in quæ se noctu conferebat, clausas inveniret, viamque introeundi, administrandique sacra impeditam cerneret, ascendens in ea introducebatur, arrepto funiculo, quod ei e muro oppidani Christi sectatores demittebant. Quin etiam inclusus quandoque sacco, deferri sese uti vendibilem suam curabat, quoad ipsi in Christianorum ædes ingredi, suoque munere fungi licuisset. Demitti præterea sese aliquando in humidum putei fecit, quo in loco die ipso asseribus contactus, ut hostium impetum declinaret, mansit. Excedere item die quodam ex armario, in quod ipsum Christiani abdere cogitabant, atque in montem profugere, inque sepulcro, ut satellitum sese quærentium diligentiam eluderet, latere coactus est. Ita sibi Seranus viam ad martyrium, quod deinceps subiturus erat, munivit.

VI. Joachimus Royus Hinojosæ Ter De Joachimo
velensis Diœcesis oppido in Aragonia, Royo.
Joa.

14 DE MARTYR. SINENS.

Joachimo Royo, & Mariana Peresia honestis parentibus ortus, & baptismi sacris V. nonas octobres an. MDCXCI. initiatus est. Vix annum tertium, ac decimum ætatis attigerat, cum animum ad studium latini sermonis appulit, testeque magistro, ipsis quatuor annis præclara indicia diligentia, morumque innocentia dedit. Profectus inde Valentiam, ut sese instituto devoveret Prædicatorum, cooptatus in ordinem est IX. kal. apriles anno MDCCIX. in Cœnobio, quod a columna *del Pilare* vocant. Sed cum is locus destinatus instituendis novitiis non esset, in alterum ejusdem urbis, quod prædicatorum dicitur, mores suos Ordini probaturus concessit. Anno autem ipso in ædibus novitiorum tanta sociorum, Patrumque voluntate, admirationeque versatus est, ut eum omnes unum maximi facerent, neque solum, quod sæpe usuvenit, statotempore profiteri eum nostrum institutum paterentur, sed etiam summopere vellent, quodque singulare fuit, in numerum alumnorum ejus Cœnobii, quod jure sanctorum seminarium appellare licet, referrent. Ac Præfectus quidem, qui ejus rei auctor fuerat, quasi divinaret, erit, inquit, is adolescens huic familiae gemmarum fertum. Ubi Royus se Deo solemni ritu devovit VIII. kal. apriles an. MDCCX. promisitque operam se colendæ virtuti diligenter

ligenter daturum, tam magnos in eo genere progressus fecit, ut vir gravissimus, quo usus aliquando magistro fuerat, qui- que etiam nunc vivit, testetur, modestia eum singulari fuisse, nihilque se umquam in ejus vita animadvertisse, quod reprehendendum videretur. Jam usque autem ab eo tempore permotus misericordia in eos qui duriori fortuna conflictabantur, si- quid fociis superfuisset ciborum, studiose colligendum putabat, ut egentibus distri- bueretur ab his, quibus id onus more, at- que instituto majorum, Præfectus Cœno- bio imposuisset. Quinetiam quum de iis interdum ex magistro intellexisset, qui in superstitione inanum deorum versa- bantur, tantum in eo continuo traducen- dorum ad christianam religionem ethni- corum studium existit, ut quamvis acer- ba esset ætate, conscribi se tamen, an- numerarique voluerit his, qui brevi pro- pagandæ religionis veræ causa in Philip- pinas insulas navigare constituissent. Dumque opportunum tempus opperire- tur, diuturnis precibus sese, severioris- que vitæ cultu ad præclarum munus recte obeundum comparavit. Postremo Gadibus XV. kal. octobr. an. MDCCXII. una cum sociis navim conscendit, cumque V. non. decembres ad portum veræ Crucis appu- lisset, Angelopolim profectus est, ubi eo- dem mense Hypodiaconus ordinatus fuit.

De-

16 DE MARTYR. SINENS.

Denique ad Philippinas pervenit, ibique cum haud longo tempore constitisset, ea-que brevi didicisset, quæ ad rem bene gerendam pertinerent, non enim illi opus diuturno tempore erat, qui tam vehementi propagandi Evangelii studio ducebatur, in Sinam est missus, etsi annos non amplius, quam tres ac viginti, natus esset. Uberes autem laborum fructus P. Joachimum Royum tulisse triginta trium annorum intervallo, quod in Sinensibus instituendis consumsit, multif-que incommodis fuisse perfunctum, facile est existimare. Sed horum vix pauca in nostram notitiam venerunt. Hoc scimus: an. MDCCXIX. cum maxime in christianos ethnici furerent, Royum dies amplius septuaginta nullo certo loco consistentem, hac illac errare compulsus esse, ut hostium diligentiam, artesque deluderet, quin perfugia magnum homini solatium afferre possent. Nam quum in cubiculum quodpiam sese aliquando abdidisset, coactus triduo est ad id latus, ad quod se primum aptarat, manere, quin ei potestas situs corporis immutandi esset. Nec vero describere accurate possumus quibus ille angoribus, terroribus, incommodis sæpe alias cum in Fo-Kiena, tum in Kiang-sya, & Che Kiangia Provinciis affectus fuerit (in his enim curam aliquando Christianorum, qui ad Philippi-

nen-

nenses Dominicanos pertinebant, gessit) satis tamen id esse, quod hactenus est indicatum, putamus, ut, quamvis minus quam res ipsa postulat, aliquo tamen modo, qui amor Royi erga homines ceteros, quæque in adversis rebus æquo animo perferendis patientia fuerit, intelligatur.

VII. Johannes Alcoberus Granatæ VIII. kal. januar. an. MDCXCIV. Francisco Alcobero Belmonte in Aragoniæ, & Vincentia Figuerasia Ontinienti in Regno Valentiaë honesto loco oris parentibus, natus est. Is cum tenera adhuc ætate esset, nondum enim sextum ac decimum annum attigerat, institutum Prædicatorum in Granatensi Sanctæ Crucis cœnobio amplexus est, in eoque VIII. kal. januar. an. MDCCX. more, atque instituto majorum, suam Deo obligavit fidem, promittens sese perpetuo statuta Ordinis servaturum. Post iis generibus studiorum, quibus informari, instituique nostri solent, annis octo diligentem operam navavit, quibus exactis, missus a Præfecto Provinciæ ad cœnobium Sancti Dominici Lorcam fuit. Quo in loco, quum de rebus divinis, deque recte instituendis moribus orationes ad populum haberet, magno plausu auditus est, imprimis quod eorum more, quos *Missionarios* appellamus, diceret. Atque inva-

B

luit

De Johanne
Alcobero.

18 DE MARTYR. SINENS.

luit in cœnobio , de quo supra demonstratum est, fama , quæ ferret, Alcoberrum , cum publice de religionis christianæ decretis, deque præceptis evangelicis ageret, instinctu quodam superiore ita, fuisse cominotum, ut suspirare ipse, lacrimari, gemere (quin cœptam orationem absolvere valeret) auditoresque idipsum facere cogerentur. Jam usque autem ab eo temporis momento novos spiritus ad pie, sancteque vivendum sumsisse, seque majorem in modum collegisse, ut suæ salutis prospiceret, visus est, quoad divinæ voluntati obsequutus, an. MDCCXXV. una cum ceteris, qui propagandi Evangelii causa patriam deferere constituerant, in Provinciam est profectus Philippinarum. Tres ille annos cum in itinere, tum in iis addiscendis rebus consumsit, quæ ad susceptum munus recte obeundum conferrent. Namque an. MDCCXXVIII. a Præfecto Provinciæ missus in Sinam est Evangelium promulgatum. Annis decem, & octo, quibus ille magna cum laude, antequam in carcerem conjiceretur, decreta religionis christianæ Sinenfes docuit, multis laboribus, incommodisque perfunctus est. Cumque incensus esset incredibili studio juvandi, quibuscumque rebus valeret, eos, qui sua opera egebant; accidissetque forte fortuna aliquando, ut idipsum sine magno periculo perficeret.

ficere nequiret, in fellam se, quæ feretri instar esset, immitti, deferrique a quatuor viris in locum, quem præstituisset, quasi adversa valetudine laboraret, fecit. Erat Alcoberus maxime corpulentus, tantumque ob angustias feretri detrimenti cepit, ut in ardentem febrim inciderit; sed paullo post voluntate Dei, cujus quidem causa nihil horum curabat, sanitatem, roburque, quo ante pollebat, corporis recuperavit. Anno MDCCXXIX. cum ethnici christianæ religioni bellum intulissent, postquam ille, ut fugeret, e muris desilire, inque vias sese incognitas dare coactus esset, uno uti perfugio cubiculi potuit, quod carcere ipso angustius erat, in quo clausus diebus novem supra quadraginta fuit, quin tussire, seseque movere auderet. Post ubi in eas ædes satellites invaserunt, compingi se ab christianis in reconditum ejusdem cubiculi locum sivit, qui locus adeo arctus erat, ut vix corpus hominis pingue caperet. Ut clausus ibidem est, cum respirare difficulter posset, tanto angore premi coepit, ut membrorum motu privaretur, neque inde educi, nisi aliorum manibus tractus, posset. Sequuta febris mox est, quæ virum, qui nihil ante horas triginta gustarat, insigniter extenuavit. Nec vero hic finis fuit incommodorum, quod ipsi, hostibus, qui illum quærebant,

20 DE MARTYR. SINENS.

secundo ingreſſis domum, clam inde ſervi veſte indutus excedere, ſeſeque horas ſere octo in loco ad exonerandum ventrem accommodato continere neceſſe fuerit, donec beneficio noctis egredi potuit, ut obviam periculis, & calamitatibus novis iret. His talibus, tantisque rebus geſtis, quas magnam partem ignoramus, nobilis Chriſti miles illuſtris erat, quo tempore in carcerem eſt contruſus.

De Francisco
Diazio.

VIII. Franciſcus Diazius, de quo poſtremo eſt loco dicendum, Ecijæ, quæ urbs eſt Provinciæ Bæticiæ, VI. nonas octobr. an MDCCXIII. Johanne Diazio Fernandefio nobili viro in vico Diœceſeos Burgi nato, & Iſabella Maria Rioſia Ecijenſi, tenui fortuna parentibus ortus, operam primis rudimentis litterarum, quibus inſtitui ſolent adoleſcentes, in ejus urbis cœnobio ad SS Pauli & Dominici, accuratam dedit. Quo ex tempore, quam eſſet modeſtus, taciturnus, demiſſo per virtutem animo, inque ſacris conventibus, myſteriisque pœnitentiæ, eucharistiæque frequentandis diligens, oſtendit. III. idus ſeptembres anno MDCCXX. ſingulari colendæ virtutis deſiderio incenſus, veſtibus eſt indutus Dominicanorum, annoque poſt pridie idus ſeptembres ſolemnitatu pollicitus Deo eſt, ſe dum vixiſſet, leges, atque iuſtituta Ordinis ob-

observaturum . Sed Deus ipse , qui
diversas iis , quos elegerit , munit ad
eamdem felicitatem consequendam vias ,
quasi experiri cœpisset , quantum virtute
novitius Prædicator posset , debilem ejus
corporis temperationem , tenuemque
valetudinem reddidit, permisitque, ut per-
petuo epiphora oculorum conflictaretur.
Quæ res cum impediret , ne magnos pro-
gressus in sublimioribus studiis litterarum
faceret , tum spatium eidem dedit , ut ani-
mum ad eam , quæ est de moribus , Theo-
logiæ partem appelleret . Sed etsi hisce
incommodis valetudinis premebatur , iis
tamen virtutibus ornatus erat , quibus jam
usque a primis ætatis annis præstiterat ,
quibusque addidit summum studium ser-
vandi leges , atque instituta Prædicato-
rum . Post cum ex historia de Provincia
Philippinarum intellexisset , paravit sese
diuturnis precibus , castigationeque cor-
poris ad id munus , ad quod obeundum ad-
lectum se divinitus esse cognorat, annoque
MDCCXXV. in eas insulas navigavit,
& quæ de ipso divina providentia decre-
rat , fecit . Artibus variis , precibusque
matris , atque sororum , quibus eum a
suscepto consilio deterrere studebant , no-
vus Jesu Christi miles constantissime sem-
per restitit , Deum , qui ipsum vocaret ,
unam esse affirmans suæ sententiæ caus-
sam , iisque tandem , quas plurimum di-

22 DE MARTYR. SINENS.

ligebat, rogatis, ut apud se mortuum
 ipsum esse statuerent, neque vero iis so-
 lum, sed etiam amicis, sociisque Præ-
 dicatoribus valere iussis, discessit. Sed
 Deus, qui ei jam usque a teneris annis
 voluntatem amittendæ pro religione
 tuenda vitæ indiderat, spiritus quoque
 adjunxerat, quibus obstacula superaret,
 quæ ex infirma corporis valetudine, amo-
 reque in matrem, consanguineosque ce-
 teros proficiscebantur. Post interitum
 viri, cum Ecijæ fama de ipsius martyrio
 percrebuiisset, intellectum primum ex
 patre, qui etiam num vita fruitur, est,
 quibus ei divina misericordia modis, au-
 xiliisque præverterit. Namque ut certior
 est factus a Præfecto cœnobio senex, quam
 gnatus gloriam consequutus esset, eam-
 que ob rem gratias Deo, quas potuit, ma-
 ximas egit, contineri non potuit, quin
 diceret: adolescentem Diazium, cum
 annos natus duodecim esset, rogatum a
 parentibus fuisse, ut in patriam, rever-
 sus *beneficio ecclesiastico*, sic enim di-
 cimus, quod ad se majorum statuto perti-
 neret; undeque plurimum lucri posset
 capere, potiretur. Hortanti autem sæ-
 pe, ac multum patri, sic denique juve-
 nem respondisse: „ Desine me rogare, mi
 „ pater. Non enim opes, resque eas,
 „ quæ pereant, volo, atque expeto, sed
 „ Deo in Ordine Dominicanorum servi-
 „ re,

„ re & cupio , & vero ei , cum per æta-
 „ tem licuerit , nomen dabo . Post Præ-
 „ dicatoribus , qui primi in insulas Phi-
 „ lippinas Evangelii promulgandi causa
 „ navigare decreverint , me socium addam ,
 „ inque eas regiones contendens , sangui-
 „ nem pro Christo Servatore fundam , .
 Quid rerum in Sina gesserit , quosque la-
 bores pertulerit , ut suo munere satisfacere-
 ret , ignotum hactenus nobis est . Id unum
 ab Serrano accepimus , octo ipsos annos
 eum magna cum sui gloria , antequam ve-
 niret in hostium potestatem , laborasse , ut
 saluti Sinensibus esse posset . Quare cre-
 dibile est , gratissimas Deo ejus vigilias ,
 curasque fuisse , qui summa sua voluntate ,
 atque præsidio fecit , ut quem desiderio
 ad martyrium præparaverat , is tam feli-
 cem exitum haberet .

IX. Tempestatis , quæ coorta in chri-
 stianos est , ac Sinæ fortissimos religionis
 christianæ propagatores ademit , cælo-
 que , quod pie credimus , reddidit , non
 alia , quam invidia ethnici mali , omni-
 busque invisi hominis , causa fuit , qui
 Mo-yangi natus , Yin-ku ab incolis ap-
 pellabatur . Is cum sese in Prætoris ami-
 citiam , familiaritatemque insinuasset , ab
 eoque , quacumque de re ageretur , ad con-
 siliū adhiberi consuevisset , usus hac
 tanta consuetudine est , ut , quæ molitus
 adversus Christianos fuisset , perficeret .

Initium tur-
 barum adver-
 sus Christia-
 nos Fo-Kie-
 næ Provin-
 ciæ .

Itaque Prætozem non ſolum eorum, qui Chriſtum colerent, ſed etiam Europæorum, qui in Sinam dilatandæ religionis cauſſa veniſſent, ac mulierum, quæ cooptatæ fuiſſent in Ordinem Sancti Domini tertium, ædiumque, in quibus degerent, certiozem fecit. Atque hanc unam laborum, incommodorumque fuiſſe cauſſam, quæ Chriſtiani Sinenſes perpeſſi his annis paucis fuerunt, non ex commentariis modo, quos Epiſcopus Tipaitanus, quem nos imprimis auctorem ſequimur, cum anguſtiis carcerum teneretur, ſcripſit, ſed ex epiſtolis etiam cognoscitur virorum Eccleſiaſticorum, qui cum diverſam inſtitutionem vitæ, diverſosque Ordines profiterentur, tum ſocii laborum, calamitatumque fuerunt. Anno MDCCXLVI. initio aprilis menſis, Præfectus Fo-ningæ urbi de granariis publicis cogniturus Fo-ganum venit. Prætor, de quo ſupra demonſtratum eſt, natum ſe opportunitatem chriſtianæ religionis delendæ ratus, quæ ab ſcelerato Yin-kuo didicerat, explicavit. Eſi Præfectus nullum tunc in Chriſtianos odii, iræve indicium dederat, tamen ubi Fo-ningam revertit, litteras ad Fo kienam Pro-Regem miſit, quibus vehementes, gravesque in Sinenſes, Europæosque chriſtianos accuſationes continebantur. Cheu-Hio-Kienus, id namque erat Pro-Regi
no-

nomen, vir christianæ legi infestus, atque inimicus, qui nihil eorum prætermisit, quæ impellere Imperatorem ad eamdem tollendam possent, accepta libenter accusatione, continuo Hoang-Chung-Yeo Prætorianorum tribuno iussit, ut cum manu militum, quos usui esse putaret, Fo-ganum Europæos christianos, virginesque cooptatas in ordinem tertium Dominicanorum comprehensurus proficisceretur. Tribunus vir insigni crudelitate, hora post meridiem VII. kal. julias Fo ganum pervenit, horisque duabus post, centum militum *Mandarinis* (est id apud Sinenfes Magistratum nomen) Fo ganensibus, aliisque attribuit, qui Mo yangum, quod oppidum millia passuum novem Fo-gano distat, conducerent: ipse interea cum militibus item centum in Koan pum suburbium, ut Chin-Josephi optimi viri ædes improvise adoriretur, contendit, quibus in ædibus reconditum sacellum nostrorum Sacerdotum erat, in quo caute imprimis christiani, ut sacris interessent, veniam peterent, eamque sancte, quæ erga Deum esset, pietatem colerent, congregabantur. Sed quoniam ante dies quinque PP. Serranus, & Diazius Ki-tungum abierant, nostrorum ibi neminem offendit, quare diripi domum, ac libros, sacramque supellectilem, & quidquid rerum inventum esset,

set, alio asportari, ac Chin Theresiam-
Te-virginem, quæ iisdem in ædibus de-
gebat, vicinamque Chin-Rosam-Kuey,
& Claram Josephi christiani uxorem,
hujusque adolescentulam filiam Agnetem
in carcerem duci imperavit. His rebus
gestis, e vestigio Ki-tungum, quod mil-
lia passuum tria Fo-gano abest, Serra-
num, Diaziumque oppressurus, discessit.

PP. Serranus,
& Diazus de
militum ad-
ventu certio-
res sunt. Et-
hnici Sinen-
ses Christia-
nos aggredi-
untur, mul-
taque in eos
exempla sæ-
vitiae edunt.

X. Jam ante horæ quadrantem a Ca-
rolo viro quodam christiano de adventu
militum intellexerant, satisque spatii na-
cti fuerant, ut commode sese sub cubiculi
tabulatum reconditum in locum abde-
rent. Ubi tribunus ad ædes venit, fores
effringi, sediliaque muralia dirui, ac dolia,
capsasque perrumpi iussit, ut latebras in-
veniret Dominicanorum, quorum causa
iter susceperat. Sed Deus a quo ita sunt
definita tempora, ut præverti, accelera-
rique hominum scelere non possint, etsi
milites quater per tabulatum, quod mini-
stros Servatoris Christi occultabat, inam-
bulassent, noluit, ut latentes detegerent.
Quare furentes domum diripuerunt, ac
Rosam Chingiam virginem, quæ iisdem
in ædibus habitabat, atque honestam, il-
lustrique loco natam viduam Mariam-
Kyam, cujus illæ propriæ ædes erant,
secum abduxerunt. Quo tempore Jacobus
Nienus Mariæ, de qua modo demonstra-
tum est, filius, quasi prodigio quodam
fer-

fervatus, sese furori militum subduxit. Finem injuriis nox attulit, paucisque post horis datum Serrano, Diazioque spatium in proximas Francisci-Lani viri christiani ædes migrandi fuit, quibus in ædibus ad eum usque diem latuerunt, quo venerunt in hostium potestatem.

XI. Jam inde ab ea nocte crudelissime in christianos sæviri coeptum. Tribunus Prætorianorum, qui Europæos invenire cuperet, mulieres, quas supra captas a militibus fuisse dictum est, excepta Agnete, tormento manuum cruciari, ut locum manifestarent, in quem illi profugissent, jussit. Cumque vestes, quæ adhiberi in re divina faciunda a christianis solent, in eorum domibus repertæ indicio satis magno essent, cognosse ipsas, ubinam Christi Sacerdotes degerent; hoc interrogantibus respondebant: fugisse Europæos certo se scire; quo autem fugissent, nescire. Cumque ex Agnete de rebus iisdem quæsisset, Europæos, illa, quinto jam die Ki-tungum abiisse; utque nemini damnum inferret, rogata, ecquis vestes eorum, ac vasa sacra detulisset, juvenem raso capite, bajulum, cujus ipsa nomen ignoraret, dixit: Hoc responso accepto, missi continuo milites fuerunt, qui eum quærerent. Hi primum omnium, in quem Ki-tungi inciderant raso capite juvenem, comprehendunt, & quamquam

Ethnici
in Christianos
Ki-tungenses
sæviant, tor-
mentoque ta-
lorum juve-
nem Idolorum
cultorem ex-
cruciant, qua-
si Christianis
partibus stu-
deret.

esset

esset imbutus superstitione deorum, eisque, id quod res erat, nihil se de Europæis nosse confirmaret; tamen tormentis ad talos pedum adhibitis, victum dolore, cum sustinere diutius non posset, factum ab se, quod numquam fecerat, fuisse confiteri cogunt, ac Fo-cheum, quasi reus esset, in carcerem abducunt.

Vuang-Petrus-On, qui Mo-yangum, nūciatū Christianis militum adventum, contemderat, ab Ethnicis capitur, & cruciatur.

XII. Dum hæc Ki-tungi geruntur, ac de Christianis quæstio crudelissime habetur, milites, quos Mandarinis Fo ganensibus attributos fuisse diximus, eodem die improvise Mo-yangum perveniunt. Nam Vuang-Petrus-On Christianus, qui ante, quæ parabantur, animadverterat, & una cum Lieu Francisco Xuno Foganum, nostros malorum, quæ impenderent, certiores facturus, discesserat; cum medium iter emensus esset, una cum socio a militibus oppressus, Fo ganumque in carcerem adductus fuerat. Is idem, sociusque, quum vim cruciatus ferre nequivissent, confirmarant se quidem Foganoprofectos iter Mo-yangum instituisse, christianis, quod imminebat, periculum nunciaturos.

Milites in ædes Margentii Christiani irrum-punt, Episcopumque Sansium quæriunt; ac Margentii, ejus-

XIII. Cum milites ingressi Mo-yangum fuissent, in Mien-Johannem adolescentem, quem *Christianis* partibus studere ignorabant, inciderunt, cumque ei imperavissent, ut sibi Lang Kuoni, hoc est Margentii ædes, in quas Sansius Episcopo-

scopus perfugerat, commonstraret, ille, ut eos tantisper detineret, Episcopoque spatium evadendi daret, eosdem in alterius cujusdam christiani domum, quæ inde aliquanto aberat, deduxit. Post in ædes Margentii venerunt, in eisque neminem offenderunt Europæorum, propterea quod domi essent Margentio duæ, atque ille quidem in vetere, in nova vero Episcopus degebat. Dum eum milites, delusi, ubi non erat, quæritabant, surgere Episcopus e lecto, ac transilire horti murum, inque ædes Mieu Josephi profugere potuit. Abeundum jam inde milites putabant, quod frustra ab se laboratum vidissent, cum nunciatum eis, ubi ad fores accesserunt, ab ethnico quodam est, Europæum, cujus causa illuc venissent, non in vetere, sed in nova Margentii domo agere. Quod ubi intellexerunt, in novas ædes statim irrupere, rebusque omnibus, in quas forte fortuna incidissent, eversis, atque perruptis, vestes sacras, reliquamque Episcopi supellectilem invenerunt, & calorem, quem experti, tangendo lectulum, fuerant, satis magno esse argumento putarunt, ut illinc paullo ante hominem recessisse statuerent. His indiciis tam clavis adducti, Margentium, ejusque uxorem, virginesque præterea duas, Kuo-Theresiam-Chun singulari virtute feminam, quæ præfecta mulie-

que uxorem
tormētis cru-
ciant ut co-
gnoscere ubi-
nam Episco-
pus degat,
possint.

lieribus erat , quæ tertium Ordinem S. Dominici profitebantur, hujusque fratris filiam Kuo-Luciam-Hieu tormentis subjiciunt , sed nihil ex iis rerum, de quibus percuntantur, extorquere possunt; quod interrogantibus perpetuo, ab omnibus responderetur , profugisse Episcopum, neque sibi esse, quo profugerit, exploratum . Interea Prætor , ne opportunitas christianis latebras quærendi daretur, militibus imperavit, ut Kan Kia-panum, quod est oppidum in adversa fluminis ripa, haud longe a Mo-yango situm, proficiscerentur, Europæumque, qui ibidem versaretur, caperent .

Johannes Alcoberus capitur, Fo-ga-nūque a militibus ductus, de sua patria, deque rebus ab se gestis interrogatur.

XIV. Erat is Europæus P. Johannes Alcoberus, quem hospitio Vuang-Thadæus-Go-Chin christianus receperat. Ac primus quidem ille Sacerdotum Dominicanorum, qui in hostium potestatem veniret, fuit : quæ res, ut idem ad Serranum scripsit, sic evenit. VII. kal. julias media fere nocte, milites Mo-yango profecti, ædes, in quibus ille diversabatur, adoriuntur. Alcoberus, audito strepitu, e lecto festinanter evadit, iisdemque in vestibus, quibus indutus cubitum iverat, uti fuga salutis suæ prospiciat, portam exiguam ædium petit, sed hanc a militibus occupatam cernens, retrocedere cogitur. Vix passus quinque processerat, cum cespitans concidit, extemploque in eum

eum lictores tanta vi, quantam existimare quisque facile poterit, irruerunt; adeo ut coxendicis læsæ dolore aliquamdiu premeretur. Loro deinde collum arte ligarunt, hominique barbam vellentes, magno clamore, ac strepitu eundem aliquot passus extra ædes trahunt. Interea Mandarinum ad ripam amnis, qui non longe ab Mo-yango fluit, milites præstolabantur, quos ubi accedere viderunt, animadvertitque Mo-yangensis Prætor adeo indigne tractatum Alcoberum, eum ut solverent, propterea quod nihil mali admisisset, præcepit. Postmodum cohors in ædes irruit, unde Sansius paullo ante profugerat, ibique VI. kal. julias mansit. Prima enim luce Fo-ganum omnes reverterunt, abductis una cum Alcobero christianis, quos captos fuisse diximus, & Ambrosio Hy-jino, adolescentuloque illo, qui milites, ut supra est demonstratum, deluserat. Sequenti deinde sunt, qui Episcopi supellectilem deferebant, ex qua eburneam imaginem Christi Servatoris cruci affixi miles detraxerat, detectamque gestabat. Hoc vexillo, quod illi magno in itinere solatio fuit, quasi triumphans Jesu Christi minister sub meridiem ingressus Fo-ganum est, quo tanta hominum multitudo ex oppido, vicinisque locis Alcoberum expectatura convenerat, ut essent, qui dicerent, si Fo-ganum Impe-

perator venisset, majorem fuisse minime
 futuram. Atque ille primum ad Prætorem,
 ut audiretur, adductus, ab eoque cito di-
 missus, ad Præfectum urbi Mandarinum
 perducitur; cui roganti, cujas ipse? quot
 annos natus? quod eidem nomen esset?
 cur, quoque ex tempore in Sinam venis-
 set? quot demum Europæi eodem in Im-
 perio versarentur? respondet: esse Euro-
 pæum se, annos natum LII., Fy ab Sinen-
 sibus appellari. Venisse ante annos XVIII.
 promulgatum divinam legem, Europæo-
 rumque se unum, alterum Sansium Epi-
 scopum esse, qui iisdem in locis degerent.
 Solum vero Præsulem Sansium memora-
 vit, quod hujus esset ad judices delatum
 nomen. Post, quum nox instaret, apud
 Mandarinum oppidi, legatosque duos,
 quos Pro Rex capiendorum Sacerdotum
 Dominicanorum causa miserat, quæstio
 instituitur. Adhibitis interrogationibus,
 responsisque, de quibus est supra demon-
 stratum, quæsitum ex Alcobero est, quot
 essent in Provincia Christiani, quot mu-
 lieres, quæ tertium S. Dominici in-
 stitutum profiterentur? ubinam Sansius
 ageret? An una ipse, & Episcopus vi-
 vere consueissent? Quam longo eum an-
 te tempore non vidisset? Ad hæc Alco-
 berus: quadringentos circiter christianos
 in Provincia esse respondet: mulieres,
 quæ tertium Ordinem Prædicatorum pro-
 fiteantur

fiteantur, octo, vel decem, easque anus. Scire se Mo-yangi Sansium agere, quibus autem in ædibus agat, nescire. Commune sibi, præsulique Sansio domicilium non esse, annosque jam præteriisse ferme duos, quo ex tempore illum minime vidisset. Atque is exitus prioris quæstionis fuit. Postero die, qui dies V kal. julias fuit, in iudicium rursus Alcoberus adducitur. Quo in loco cum supellectilem Episcopi Sansii, vestesque sacras, inque iudicum mensa eburneam cruci affixi Servatoris Christi imaginem collocatam, omnibus patere vidisset, datam sibi magna cum religionis veræ laude esse intellexit explicandi ethnicis, quæ sit Virgo Servatoris Mater, utque divinum Verbum humanam sibi naturam conjunxerit, opportunitatem. Interrogatus deinde, ecquid litteræ in membranis, ex quibus signa plumbea penderent, inque chartis scriptæ significarent, numque ad incitandum ad defectionem populum pertinerent? respondit: litteras, quæ scriptæ in membranis essent, dari cuique in Europa solere, ut omnes in tam distantibus regnis, quis sit ipse, intelligant; neque his concitari quemquam ad defectionem posse. Reliquas, quæ chartis continerentur, epistolas esse ab amicis ex Europa ad Sansium in Sinam missas, de qua illa, quæ sinice perscripta erat, cujus se gentis litterarum

C

no-

notas ignorare dixit. Sequutæ mox interrogationes de oleo sancto, de ornamentis altarium, de mitris fuerunt; quibus est ab Alcobero ita, ut par esse videbatur, perspicue, atque graviter satisfactum. Major fuit de magnis, parvisque particulis azymi panis, quas *hostias* dicimus, disquisitio, de quibus post, quam iniquam animo ethnici illi concepissent opinionem, videbimus. Igitur cum quælitum ex viro forti, constantique esset, quomobrem hostiæ adhiberentur, respondit: in his corpus, sanguinemque Jesu Christi, cum res divina fieret, consecrari, ac magnas ab Sacerdotibus, parvas ab christianis ceteris sumi consuevisse. Quæsitum præterea ex eo est, quibus ex rebus idem panis conficeretur: utque Alcoberus ex farina, & aqua dixit, iudices, qui interrogando implicare hominem studebant, panem, qui ex farina, & aqua, neque ulla ex re alia constaret, tam esse candidum posse negaverunt. Ille cum fortis in sententia maneret, ostendisse jam se, quibus ex rebus fieret panis, qui in sacrificio adhibetur, dixit. Id, si iudices, ut quidem ajebant, non crederent, afferri illuc farinam, aquam, ignem, ac ferreum instrumentum juberent. Se namque, iisdem inspectantibus, re ipsa, quod verbis dixisset, confirmaturum. Post ubi actum de codicibus,

qui-

quibus doctrina, legesque christianæ continentur, de typographis, deque glutinatoribus, ornatoribusque librorum fuit, ac percuntantibus Alcoberus & vere, & graviter fatisfecit; tum auri cupidi iudices rogarunt, quidquam ne pecuniæ finenses christiani, ut libris iisdem potirentur, darent. Denique cum respondisset, distribui finensibus gratis libros, quod hoc consilio eosdem europæi christiani pretio mercarentur; sciscitanti ex eo sunt, quæ tandem divinæ legis præcepta essent. Cumque ille decem numerari dixisset, statim, ut ea scriberet, imperarunt: confirmantique se sinice scribere nescire, responderunt, Kuo-Ambrosium Hy-inum præsto esse, huncque jam, quæ ipse vellet, scripturum. Premebatur acerbissimo dolore Ambrosius, nam ejus excrucianti lictores finem paullo ante fecerant: ac humi adhuc prostratus, jacensque præcepta divina, Alcobero dictante, scripsit. Ea noster, ubi scripta fuerunt, accepit, ac prætori dedit. His lectis, prætor, mandarinique omnes tacuerunt.

XV. Cum hæc Fo-gani adversus Alcoberum ab iudicibus gererentur, sævire milites furoris ethnicorum administri in vicinis oppidis, locisque pergebant. Christianorum, qui quæri sese ad supplicia intellexerant, pars, subductis suis, ad montes profugerant, pars sese in do-

Ethnici Christianorum Mo-
yan-gensium,
& Ki-tungë-
sium domos
diripiunt, eo-
rumque ali-
quos tormen-
tis excruciant.

36 DE MARTYR. SINENS.

mos ethnicorum , quorum erant animi ad misericordiam propensi , abdiderunt . **Æ-**des christianorum cum aliis in locis, tum **Mo-**yangi imprimis, & **Ki** tungi populationi patebant , augebaturque numerus latronum , qui esse se milites , lictoresque jactabant , accedebatque damnis , quæ ex avaritia proficiscerentur , timor , quem libido militum procacissimorum honestis mulieribus afferebat . Atque hi quidem mulieres , virginesque in ædibus quasque suis omnibus generibus tormentorum, haud secus , atque judices facerent , miserandum in modum excruciabant , adeo ut aliquarum digiti distracti , fractique essent , propterea quod ter , quaterve in quæstione id tormenti genus pertulissent .

Serranus , & Diazus furorem hostium declinaturi in angustum se locum abducunt .

XVI Interea Serranus , atque Diazus , qui **Ki** tungi in ædibus Franciscilani latebant **VI** ac **V** kal. julias , cum quæri ab hostibus summo se studio , diligentiaque intellexissent , claudi sese in suprema parte ædium intra muros exiguos , debilesque duos curarunt , quorum alter , ne suspicioni locus daretur , faccis aliquot oryza plenis contextus fuit . Cum in eo tam angusto loco essent , diligentia hostium , ærumnarumque , quas christiani patiebantur , certiores fiebant , quibus ita afficiebantur , ut misericordia permoti , mandarinis se ipsos prodere cogitarint . Sed ubi animadverterunt , permitti se ,
sua-

fuaque omnia divinæ providentiæ oportere, expectandum putarunt, quoad ipsa quid factum esset opportunum, significasset. Sed amor christianorum erga Sacerdotes Dominicanos, ac pietas ferre non poterat, ut ii, quos Patres vocabant, in potestatem venirent ethnicorum. Itaque nocte, quæ diem est consecuta V. kal. julias, eos in ædes ethnici cujusdam ad montem contra Ki-tungum agentis, cujus erat ipsis perspecta fides, ducere instituerunt.

XVII. Rebus omnibus comparatis, quæ ad proficiscendum pertinerent, intellectum extemplo est, pulsari vehementer fores. Qui iisdem in ædibus habitabant, Serranum, atque Diazium monent, adesse milites, atque utrumque, quam celerrime possunt, occultant. Ipsi milites numero centum ingressi domum, rem nullam, quam non perfringerent, reliquerunt. Nihilo secius, cum ter ad eum locum prope accessissent, ubi Dominici latebant, deprehendere ipsos non potuerunt, frustra que tormentis adolescentulas quasdam, & grandem natu Virginem ex tertio S. Dominici Ordine excruciarunt. Nam hæ fortiter cruciatus, quin Sacerdotes prodiderint, invicto animo pertulerunt. Jam milites inveniri Europæos posse diffidentes, ac spe dejectos laboris, quem inquirendo consumsissent,

A Præfecto in quæstione exquisitissimis tormentis excruciantur, postque in carcerem adducti, in catenas conjiciuntur.

tædere cœperat, Dominicanique e latebris eisdem agentes, abesse illinc europæos, audiebant; cum proxime discessuris Sinensis quidam, cui nomen Nicolaus erat, qui a nostris sacris ad ethnicorum superstitionem transfugerat, supervenit, ac ne putarent, inquit, aves esse, volareque Europæos posse. Esse sibi exploratum illic eos intus agere. Itaque iterum quærerent. Hac audita oratione, milites cum exiguos quosque muros ædium deieciissent, in eum denique venerunt, quo uterque Dominicanus Sacerdos tegebatur. Quos ubi viderunt, funem extemplo in Serrani collum injecere, & zona apprehensum tanta vi, tantoque impetu inde sustulerunt, ut ei spiritus præcluderetur. Diazius gravi catena constrictus, quod assaultibus, ictibusque urgeri sese, hæreretque cerneret, ut se, ne caderet, sustinere posset, manum, cui inniteretur, in terram demisit; cumque pedem, ita ut hoc conanti natura accidere necesse est, movisset, tetigit forte fortuna infimi gradus mandarinum, quem decurionem dicere possumus; quam rem mandarinus adeo moleste, acerbeque tulit, ut apud tribunum Hocang-Chung-yensem gravissime conquereretur, puniri ob inanem injuriam Diazium faceret.

A militibus
comprehensi,
vinctique in

XVIII. Hora fere ante mediam noctem, Serranus, Diaziusque, cum salutem

tem christianis, qui lacrymis, clamoribus, suspiriis suam vastitatem, solitudinemque testabantur, dixissent, alter fune, alter catena constrictus, Ki-tungo a militibus centum abducti magno armorum, gladio-
 rum, laternarum, facumque apparatu, post horas duas Fo-ganum pervenerunt; statimque ad tribunum, de quo supra diximus, adducti sunt. Is cum ex utroque, quot annos natus esset, cur, quoque tempore in Sinam venisset, ac cetera, quæ post describentur, quæsisset, tum ad Diazium conversus rogavit, quam ob causam calce ausus mandarinum petere fuisset? Negavit ille quidquam ab se simile factum, aut sublatum pedem fuisse, ut aliquem læderet. Erat tribuno in animo virum aliquo genere tormenti excruciare: itaque captaturus occasionem, sciscitatus ex eo est, ubinam Europæus Pè (hoc enim vocabatur Episcopus Sansius nomine) degeret. Cum scire se Diazius negasset, ille iratus, torqueri cruciatu talorum (a) ho-

urbem adducuntur. Miles infimi gradus de Diazio apud Judicem, quod se pede tetigisset, vehementer ex-
 postulat.

C 4

mi-

(a) Cum sæpe de cruciatu talorum, manuumque dicturi simus, ratio ipsa hortari videtur, ut, quemadmodum in commentariis quibusdam scriptum de Sinensium rebus est, breviter, cujusmodi sit, explicemus. Ac cruciari quidem ad talos pedum apud Sinenses reus consuevit instrumento, quod e tribus lignis, quæ sese mutuo decussant, conficitur, quorum sane lignorum medium fixum, immotumque est, reliqua circum illud volvuntur. In

hæc

minem imperavit, summaque crudelitate produci plus, quam ad horæ dimidium, quæstionem fecit. His confectis rebus, defessos fuga, metu, sollicitudine, itinere Sacerdotes, atque conviciis, verberibus, contumeliis, tormentis vexatos in carcerem adduxerunt, colloque injecta catena, pedes etiam eorum vinculis constrinxerunt, atque, ut ne fugerent, in pedicam conjecerunt, cui attollendæ vix satis quatuor esse homines viderentur. Quæ corporis collocatio etsi erat adeo molesta, ut ne oculis quidem sustineri posset, Dominicani tamen, quibus spiritus, viresque divinitus addebantur, reliquam noctem non patienter solum, quod ipsum magnum fuisset, sed etiam hilariter transegerunt, summamque lætitiā ceperunt, quod iis vinculis suos teneri cernerent, quibus constricti primi Sinarum martyris pedes fuissent.

Diazio iterum tormentis subjicitur. Vi doloris captus, cum se brevi interiturum credat, ab Serrano se te ut absol-

XIX. Postera nocte iterum fisti eos sibi tribunus imperat. Ac Diazio imprimis se iratum esse ostendit, propterea quod mandarinum, ut dicebatur calce petiisset. Itaque novas viri iterum torquendi quæritabat opportunitates. Cumque

hæc pedes immitti reorum solent, quæ restibus plus, minusve, ut fuerit ab iudice imperatum, constricta, acerbissimum, ut suspicari quisque poterit, dolorem afferunt. Torqueri autem rei ad manus solent bacillis, qui digitis inserti, funibus deinde arctissime colligantur.

que ex eo percuntatus tribunus esset, notet ne in iis voluptatibus capiendis traduceret, quas pudor nominare vetat; nonsterque respondisset, devotum esse Deo se, neque tam esse improbum, ut veneri indulgeret; tum iudex, quid istuc rei est, inquit, quod crumena inclusum gestas? Diazus nihil cunctatus, viri optimi vestium *reliquias* esse dixit. Erat ea tunicæ venerabilis viri Posadæ particula. Sed Sinenfis iudex homo impudicis moribus, superstitiosum quidpiam, sumsit, esse, quod ad tegendas ejus nefarias libidines pertineret. Nam nisi confessus esset, sciret id causam, quare iterum tormentis subjiceretur, futurum. Negavit Diazus, negantemque dari in cruciatum tribunus iussit. Quod ut est continuo factum, tantum innocentissimo viro doloris attulit, cum afflicti adhuc eidem pedes ex quæstione, inquam abreptus fuerat nocte superiore, essent, ut sensu rerum privari videretur. His tot malis, tantoque angore oppressus, cum cito sese morituum putaret, petiit ab Serrano, ut sese supplicem mysterio pœnitentiæ expiare ne gravaretur. Ut Serranum *absolutionis*, quam dicimus, verba recitare tribunus vidit, ratus precibus eum vel tormenta ab socio, vel tam immanem dolorem avertere conari, alapas ei viginti bubalinis coriis triplicatis, quadruplicatisve infligi præcepit. Paulo post, quam

vat, petit. Serranū verba sacramenti adhibentē alapis credi Tribunus jubet. Theresia Chun religionis causa cruciatur. Inque Mariam Hy nobilem vi-duam Ethnici sæviunt.

42 DE MARTYR. SINENS.

quam Diazius expiatus *pœnitentiæ* sacris fuit, ita usu est sensuum destitutus, ut eum jam Serranus in cœlum migrasse, certaminum palmam adepturum, arbitraretur. Hora amplius cruciari hominem judex fecit, minatusque tormentum Serrano fuit, nisi, ubi esset Sansius, indicavisset. At is diu jam esse respondit, quod eum minime viderat. Se namque Fo-gani, Episcopum vero Mo-yangi perpetuo constitisse. His dictis, in Theresiam Chun, quam præfuisse mulieribus ex ordine S. Domini tertio demonstravimus, iram, crudelitatemque judex convertit, utque tormento cruciaretur, imperavit. Aderat tum Serranus. Audita judicis sententia, honesta, fortisque mulier, Deo gratias egit, itaque animum improbi, sævique hominis commovit, ut is lictores artius funes constringere juberet. Hoc statu cum esset, quæsitum ex ea est, ubi nam Sansius ageret. Ad hæc invicto animo mulier, octavum jam esse diem respondit, ex quo ille discesserat, ignorareque se, quibus tunc in ædibus lateret. Eodem tempore Maria-Hy nobilis vidua in tormentis fuit, ut, quo loco Episcopum esse sciret, confiteretur. Cumque inventi essent, qui mentirentur, missum ab hac ipsa christiana vidua ethnicum adolescentem, de quo supra diximus, Mo yangum fuisse, ut supellectilem, quam ea servasset do-

domi, ad Episcopum deportaret, ita in-
miseram tribunus sæviundum putavit, ut
post immanes cruciatus duci eam Mo-yan-
gum jufferit, quo militibus indicaret
ædes, in quas sese Episcopus abdidisset.

XX. Cum judex finem tam crudeli-
ter inquirendi fecisset, Diazium, & Ser-
ranum compediri, ac Theresiam, Ma-
riam viduam, feminasque christianas re-
liquas reduci in carcerem præcepit. Illi.
kal. julias milites, quod jussi fuerant no-
cte superiore, fecerunt. Namque Mo-yan-
gum afflictam tot cruciatibus viduam du-
xerunt, ut index illis Sansii latebrarum
esset. Igitur cum eam, qua in domo Eu-
ropæus versaretur, interrogarent, ipsa-
que circuitione uteretur orationis, & vel
in hanc, vel in aliam sese ut conferrent,
diceret, illi irati, propterea quod laten-
tem, quo mittebantur, detegere nequi-
rent, suum in miseram furorem verberi-
bus, maledictis, verbisque obscœnis ex-
plebant. Id cum sæpe, ac multum eve-
nisset, facile sibi milites persuaserunt,
non esse mulieri locum, in quo Episcopus
degeret, exploratum, ejusque vexandæ
finem fecerunt, in eumque carcerem re-
duxerunt, quo reliquæ feminæ christia-
næ detinebantur. Adventabat interea,
tempus, quo veniundum Episcopo in ho-
stium potestatem erat. Dici vix potest,
quot ille, quamque gravia incommoda a
die

Serranus, &
Diazium, fe-
minæque rur-
sum in carce-
res contrudū-
tur. Maria
Ky Moyan-
gum a mili-
tibus trans-
ducitur, ut,
quo loco sit
Sansius, indi-
cet. Indicare
recusans ma-
ledictis pro-
fcinditur. Sā-
sius in ethni-
corum pote-
statem cadit;
atque ad tri-
bunum addu-
ctus de rebus
ab se gestis
intertogatur.

44 DE MARTYR. SINENS.

die VII. kal. ad prid kal julias perpeffus fuerit, quo die in manus incidit ethnicorum. Annum tum sextum, ac sexagesimum agebat, herniaque jam diuturna, & vomitione sanguinis laborabat, furisque adeo turgidis, lividisque erat, ut illius, qui ipsum aspexissent, misererentur. Accedebant inedia, vigiliæque; nam ante dies quinque neque cibi quidquam capere, neque somni potuerat, propterea quod domum sæpe mutare coactus esset. Christiani hostili militum furore perterrefacti, suum denique pastorem deseruerunt, eoque in loco sub arboribus reliquerunt, qua venientibus aditus Mo-yangum patet. Prid. kal julias, cum nihil de magnitudine, fortitudineque animi remisisset, quamquam ab suis derelictum se, ac viribus corporis destitutum videbat, ut mala ab christianis, quæ propter improbitatem hostium impendebant, averteret, illustreque virtutis, ac fortitudinis exemplum gregi suo daret, quem perterritum esse intelligebat, primos, qui illinc forte fortuna transfierunt, ethnicos rogavit, ut sese ad milites ducerent, aut illis ubinam degeret nunciarent, se namque eos, dum veniant, expectaturum. Id ut est ab lictoribus intellectum, eo se statim ferunt, captoque Episcopo, Foganium proficiscuntur. Hora jam post meridiem quarta, ac dimidia in oppidum pervenerunt,

runt, statimque Præsulem innocentissimum ad tribunal duxerunt, qui illum cupide præstolabatur. Is postquam ex Sansio de ætate, deque aliis rebus, ut est apud Sinenfes in usu, quæsiuit, percunctatus mox est, ubinam P Royus Dominicanus, & Antonius Conainus sacerdos natione Gallus, agerent. Episcopus nihil sibi esse de Rojo compertum, Antonium vero aut Macaum, aut Cuchuenum abiisse, dixit. Quo tempore omnes recesserunt, solumque in Prætorio Episcopum reliquerunt. Ei, quum ibi in scamno, requietis causa, confedisset, inque unam arborem, quæ in atrio erat, oculos coniecisset, visum est, paullo ante quam advesperasceret oblatum, quod cum ipse Rojo, Serranoque secreto narrasset, tum ab hoc postremo, qui Episcopus perinde, ac martyr fuit, summa fide litterarum mandatum est monumentis.

XXI. Igitur videre sibi visus est summam arborem stellis confertam, quæ multo essent cælestibus lucidiores: pedæ præterea, quibus Episcopi utuntur, quæque e stellis pari splendore fulgentibus constarent, duo: aliquanto demum ab stellis intervallo feretrum. Substitit aliquamdiu oculos oblectans, captusque visi admiratione Sansius, tandemque surgens, ut intro, quo audiri posset, abiret; ubi se novos spiritus aspectu ostenti sumturus, cum in
ja-

Visum Sansio offertur. In Prætorii atrio sedenti stellæ, pedæ Episcopalia duo, ac feretrum apparent.

januæ limine esset, convertit, quid quid apparuerat stellarum, pedorum, feretri-
que, evanuisse animadvertit.

Sanctus in
carcerē con-
jicitur. Eth-
nici, ut Ro-
yū m capiant,
Ambrosiū Hy-
inum tormē-
tis subiiciūt;
isque victus
mulieres, ob-
testatur, ut
indigent, ubi-
nam sacerdos
lateat. Mu-
lieres se in-
dicaturas ne-
gant. Com-
prehenditur
Royus, de-
que eo tri-
plex quæstio
habetur. De-
nique ethni-
ci Lucā Hin-
inum, &
Royū va-
riis de rebus
interrogant.

XXII. Introductus autem Antistes in
conclave distinctum ab eo fuit, in quo Al-
coberus manebat, ne qua eis inter sese
communicandi potestas esset. Unus adhuc
supererat Dominicanorum, qui nondum
in hostium potestatem venisset. Is erat
Royus. Quem ut inveniret, kalendis ju-
liis tribunus Kuo-Ambrosium-Hy-inum
tormentis tentari præcepit. Sperabat enim
fore, ut ille, ubi Royus esset, confitere-
tur. Ambrosius, qui vim doloris perferre
diutius nequibat, promisit se quæsiturum.
Quare ipsum iudex eodem die una cum
Mandarini Foganensis adiutore, militi-
bus, lictoribusque Mo-yangum mittere
decrevit, confidens fore, ut brevi in po-
testate hominem haberet. Agebat in ædi-
bus Sinensis cujusdam, qui patruus Am-
brosii erat, Royus, cumque eo cohors
pervenisset, persuadere Kuo-Magdalena,
quæ tertium S. Dominici ordinem profi-
tebatur, sobrinæ suæ conatus Ambrosius
est, ut, ubi Royus delitesceret, doceret,
quod fieri non posse diceret, ut diutius
celaretur. Magdalena etsi subiecta tor-
mentis fuit, negavit tamen se, ut quæ
fortior sobrino esset. quo in loco Sacer-
dos lateret, demonstraturam. Hujus sunt
exemplum imitatae nurus, quæ iisdem in
ædi-

ædibus degebant . Interea Royus , qui multis difficultatibus superatis , iisdem in ædibus latuerat , cum e spelunca , in quam se tandem abdiderat , intellexisset Mo-yangi milites manere , & sese nominatim quæri , considerassetque spem latendi nullam in posterum tempus futuram , VI. non. julias exeundum e latebris putavit , cumque e colle , qui prope ab oppido aberat , descenderet , in lictores incidit , qui illum continuo aggressi sunt , eique fustibus verbera minari cœperunt . Sed Royus eos , ne quidquam in se auderent , hortatus , actum se apud Pro-Regem reum esse affirmavit . Quæ res in caussa fuit , cur abstinendum ab injuria , maleficioque esse arbitrarentur . Itaque collum homini fune ligarunt , eumque ad Mandarinum , Mo-yangum adduxerunt . A Mandarinis cum aliquot horis in ædibus Magdalenæ detentus fuisset , media fere nocte Mo-yango abductus , V. non. julias prima luce Fo-ganum pervenit . Post in iudicium adductus , flexis genibus , horæ dimidio interrogantem Prætorem sustinuit , cumque Hoang Chung-Ye tribunus supervenisset , instituta rursus , productaque molestiæ plena quæstio ad horam est , quin ei facta aut surgendi , aut sedendi potestas esset . Duas illas priores tertia est consequuta apud Præfectum oppidi quæstio , qui , ut miti , lenique ingenio erat , nulla
in

in re sacerdoti molestus fuit, eaque solum ex eo est percunctatus, quæ speciem quamdam, non vim iudicii præferrent. Paulo post, quum mandarini iidem tres in præfecti oppidi ædes convenissent, primumque omnium Ambrosium Hi jinum ad se vocassent, ex quo in Kuo-Lucæ Kin-jini domo Royum aliquamdiu constitisse intellexerunt; tum Lucam in iudicium adduci iusserunt, postque varias interrogationes (quæ ad celebritatem iudicii pertinebant, quasque Tipasitanus Præsul negat se, antequam de longa quæstione a Pro-Rege instituta sermo incidere, descripturum, ne eadem sæpe dicere cogatur) ex eo de usu sacrarum vestium quæsierunt. Interrogantibus cum perspicue, distincteque, ut par erat, Lucas satisfecisset, mandarini, qui præjudicatis opinionibus ducebantur, in alia quæstionum genera venerunt, exque Royo sunt percunctati, quem usum, viresque theriacæ, cocolatæque esse judicaret. His ille id, quod res erat, respondit. Necesse enim hæc item explicare fuit, propterea quod Sinenses, qui sibi sapientes esse videntur, aut crederent, aut sibi esse persuasum simularent, huiusmodi rebus vel fascinandorum hominum, vel capiendæ turpis cum feminis oblectationis, impediendorumque eorum, quæ inde oriuntur, quibusque mala cum mulieribus confuetudo

tudo detegi natura solet caussa Europæos
uti consuevisse. Cum molesti, sævi, im-
probique Mandarini finem quærendi fe-
cissent, datum militibus in mandatis est,
ut in carcerem, cujus angustiis Serranus,
Diaziusque detinebantur, Royum dedu-
cerent. Numero jam erant XXXIV.,
qui propter religionem custodiis asserva-
bantur. Erant eo in numero mulieres,
quæ, sejunctim a viris, in cubiculo sedi
tribuni proximo clausæ detinebantur.

XXIII. Cum Dominicani, qui in
Fo-Kiena provincia degebant, omnes in
ethnicorum potestatem venissent; impe-
ratum militibus III. non. julias a judici-
bus est, eos ut Fo-cheum cum aliis chr-
stianis quinque, illustrique femina The-
resia Chun, de cujus virtute facta est su-
pra commemoratio, ducerent. Quæ so-
litude Fo-ganensium christianorum, qui ge-
mitus, quam ingens animi dolor fuerit, cum
abscedere eos, quos parentum habebant
loco, intuerentur, quin se illos iterum vi-
furos confiderent, describere prætermi-
timus, quod imminuere describendo rei
magnitudinem nolimus. Christiani om-
nes collo, manibusque (demptis Episcopo
Sansio, & Alcobero, quorum non sunt
manicis ferreis constrictæ manus, ac pri-
mi quidem propter ætatem, alterius pro-
pter corporis ægritudinem) catenis ligati
a militibus ducebantur, qui milites bini

Sacerdotes,
Christianique
ceteri, vin-
cti Fo-cheum
abducuntur,
magnisque in-
itinere incō-
modis pressi,
post habitam
Fo-chei a Fro-
Rege quæ-
stionē, ad reco-
rum judicium
mittuntur.

50 DE MARTYR. SINENS.

singulis custodiendis, torquendisque destinati erant. Dies amplius quinque in itinere consumserunt. Quod iter, cum ob vehementes ætus plenum molestiarum, esset, tum durius plane fuit propter victus tenuitatem, qui exigua oryzæ coctæ portione continebatur, & propter quietem, quæ vinctis noctu negabatur. Namque ad palum, pilamve alligati, non alio lecto utebantur, quam satis humido solo storea contecto, qua in storea magnus numerus turpium bestiolarum nidos fecerat, quæ culicibus junctæ nullum eis requiescendi spatium relinquebant. In iis, qui humaniter nostros susceperint, duo Hing-Telo-yvenus, & Lin-Kiangus mandarini fuerunt, quorum sunt erga afflictos christianos officia a Tipasitano Episcopo posterorum memoriæ commendata. Sexta post meridiem hora VI. idus julias Fo-cheum Servatoris Christi famuli venerunt, horaque post in iudicium Pro-Regis iussu adducti sunt, qui cum ex eis plura ad fastidium usque pro iudiciorum consuetudine quæsisset, omnes ad iudicem reorum misit, qui eosdem in quatuor Meïropoleos illius carceres distribui curaret.

Christianis in carceres distributis, delecti mandarini, qui de causa cognov-

XXIV. Fo-cheum, five Fu-cheufum urbs Fo-kienæ provinciæ princeps, ac Pro-Regis sedes, multitudine civium frequentissima est, suisque mœnibus duo Heu-

Heu-Kuon-Hienum, & Min-Hienum, suburbia continet. Christiani, qui defessi ambulando erant, cum horis duabus ad fores judicis reorum expectavissent, tum ita in carceribus distributi sunt. Episcopus Sansius, Dominicus Vuen chieus, & Ambrosius Hy-inus in Min-Hienum; Serranus Episcopus Tipasitanorum, Margentius Langus, & Dominicus Chieus in Præfecti urbi; Alcoberus, & Diazus in judicis reorum, seu quæstoris provinciæ; Royus denique, Thaddæus Go-chinus, & Theresia Chuna in Heu-Kuon-Hienos carceres contrusi sunt. In his tot doloribus, angoribusque, quos propter incommoda, & labores itineris, ac diuturnam quæstionem (horis enim quatuor coram Pro-Rege, flexis genibus interrogati fuerant) pertulerant: inque tanta rerum omnium inopia, cum catenis, manicisque ferreis, & squalore carceris, inter innumerabiles, maximeque molestas bestio- las, oppressi, ac pene confecti essent; Deus, cujus causa pugnabant, suos milites non deserebat, immo vero novos eisdem spiritus addebat, & placidiorem concedebat somnum, ut redintegratis viribus, rursus pro religione in certamen descendere, strenueque configere valerent. Interea mandarinis Heu-Kuon-Hienensi, Min-Hienensi, & Chang-lo Pro-Rex negotium de causa christianorum cogno-

scant; primâ
de iis quæ-
stionem insti-
tuunt,

52 DE MARTYR. SINENS.

scendi dedit, a quibus ad d. XVII. kal.
augusti, prima est quæstio instituta. A-
supervacaneum, plenumque tortasse mo-
lestiæ opus esset, quæ proposita, dictaque
ultra citroque in quæstione quaque fue-
runt, describere, quæ eodem fere omnia
recidebant; quamobrem iis productis, in
quibus est quidpiam singulare, cetera in
id iudicium rejiciemus, in quo describenda
omnia sunt quæ ab Serrano diligentissime
litterarum mandata monumentis fuerunt.

Tribunus
militum ho-
mines chri-
stianos 14.
Fo-cheum in
carceres du-
cit, idemque
ossa Ven. Ca-
pillæ super-
stitione du-
ctus, quod
urbi metuat,
extra mœnia
relinquit.

XXV. Eodem die Fo-cheum Hoang-
Chung-ye tribunus militum, de quo supra
demonstratum est, venit, hominesque se-
cum quatuordecim in carceres contruden-
dos adduxit. In his Maria-Hya, mulie-
resque aliæ ex tertio S. Dominici institu-
to quatuor, Aloysia, Lucia, Johanna,
& Rosa; ethnicus ille adolescens, quem
errore decepti milites in catenas conjece-
rant, Agnesque puella fuerunt. Hanc tribu-
nus hospitio recepit, ut eam sibi beneficio
devinciret, faterique cogeret, quæ ipse
sibi falso ab sacerdotibus christianis flagi-
tia perpetrari persuasisset. Idem, quum
caput, duxque hostium esset, arcam, in
qua ossa V. Francisci Capillæ Martyris
asservabantur, asportari, extraque urbis
mœnia collocari fecit, quod superstitione
Sinensium teneretur, qui, si cadaver, os-
sæ cujusquam in oppida importentur,
infortunium oppidanos laturos, luemque
bre-

brevi futuram putant. Sed christiani diligenter de loco, in quo sunt eadem, ossa condita, cognoverunt, ut, cum divini numinis beneficio restituta Ecclesiæ Sinarum pax fuerit, ea ipsa recuperare, & Manilam transferre possint.

XXVI. Atque hæc sane occasio fuerunt, quamobrem sacerdotes Europæi accusarentur. Namque a malevolis nunciatum Mandarinis fuerat, esse ea quidem unius alicujus infantis ossa, quæ summa religione ab Europæis, veneficii, aliorumque nefariorum scelerum causa, assertarentur. Ergo XI. kal. augusti Serranus, & Josephus Chung-Hoeyus, cujus ædes gratis, liberaliterque Serrano patuerant, in judicium adducti fuerunt, ut de iisdem ossibus interrogarentur. Uterque, id quod res erat, respondit: esse ea venerabilis viri Francisci Capillæ ossa, quem Capillam fuisse Fo-gani capitis condemnatum, cum Xun-Chy, ejus, qui nunc est, Imperatoris Kien-lungi proavus, apud Sinas imperium obtineret. Ad hæc Mandarinus, qui præjudicata opinione ducebatur, iratus, atque ægre ferens, Serranum intuens, abscede hinc cano capite serve, inquit, sunt enim hæc infantis ossa, quæ huc fascinandorum hominum causa attulisti. Negavit Serranus; atque id esse, quod paullo ante affirmarat, Fo-ganensibus notum dixit. Esse namque ossa

Ossa V. Capillæ ethnici infantis cuiuspiam esse, iisque christianos ad veneficia uti, comminiscuntur, eaque de re ex Serrano, & Josepho Chung-Hoeyo querunt.

§4 DE MARTYR. SINENS.

illa viri cujusdam Europæi, cujus insignis erga Deum pietas fuisset, adeoque tam diligenter in Sina servari consuevisse, quam caput in ejus patria, quo asportatum jam inde a multo tempore fuerat, servabatur.

Idem ex Sancio, itemque ex Serrano, & Dominico Vuen-Chieo. Mandariniper, cantantur, virosque anatomicæ artis peritos consulunt. Horum auctoritate calumnia depellitur. Mandarin ad Pro Regem tabulas mittunt, quibus innocentia christianorum manifestatur.

XXVII. His rebus gestis, Mandarinus finem inquirendi fecit, seque jam dixit de omnibus Pro Regem certiorem facturum. VIII. idus augusti instituta rursus de ossibus quæstio est. Vocati in judicium Episcopus Sansius, Serranus, & senex Dominicus Vuen-chieus, ita iudicibus respondendo satisfecerunt, ut eos veritatem fateri, nihilque de nostris suspicari cogerent. Nihilo secius id ut magis, magisque constaret, gratumque Pro Regi fieret, datum a Mandarinis negotium quinque, aut sex viris anatomicæ facultatis peritis fuit, ut de ossibus, quam diligentissime potuissent, cognoscerent. Hi, quum accurate, quod jussi fuerant, fecissent, communi sententia, esse ea viri, non infantis ossa dixerunt. Ea re judicata, referri omnia in acta, ex quibus sacerdotum christianorum innocentia cognosceretur, Mandarin curarunt; eademque post, ut fert consuetudo, Pro Regi exhibuerunt.

Pro Rex iudicibus amotis alios substituit, quos sæviores futuros arbitra-

XXVIII. Ægerrime Pro Rex capitalis nominis christiani inimicus, atque hostis tulit, cognosci ex actis innocentiam eorum, integritatemque morum posse, quos

quos ipse reos esse gravissimorum criminum volebat. Quare Mandarinis, ut ne coeptam quæstionem habere pergerent, imperavit. Inde, ut ingenio indulgeret, e Mandarinis Provinciæ Chang Pu-hienum, Kien-Hing-hienumque homines sævos, atque crudeles delegit, qui rem gererent, hisque Yen-Ping-suæ urbi Præfectum adiutorem dedit. Inventa jam inter chirographa Sansii epistola erat, qua mulieres e tertio S. Dominici ordine, quæ Chang-cheu agebant, hominem hortatæ fuerant, ne in id oppidum se conferret, propterea quod magnus ibi lictorū numerus esset, a quibus captus certe, transductusque Macaum fuisset. Mandarinus Chang-loæ urbis, antequam actis suprema imposita manus esset, Episcopum ad se evocavit, ex eoque mulierum, quæ litteras misissent, nomina quæsit. Cum caute Sansius feminarum, patrisque earum nomina tacuisset (erat autem ipsarum pater Nien-Antonius, qui diu ante multas perpeffus pro religione christiana calamitates fuerat, de cuius virtutibus agemus alio loco opportune) Pro-Rex implacabili ira inflammatus, Antonium, uxoremque, aliosque christianos duos comprehendi iussit. Sed perpaucis post diebus his postremis christianis tribus abeundi potestatem dedit. Antonium retinuit. Hunc in carcere mensibus duobus asservari, colaphis-

tur. Muses-
rum, quæ
Episcopum,
sibi ut cave-
ret, per lit-
teras monue-
rāt, parentes
vexantur.

que triginta cædi fecit, cumque nihil in iudicio, quod reum hominem constitueret, reperisset, liberum domum mittere decrevit.

Ly-Benedictus, christianique alii, quod vindictis opem intenderent, comprehensi, in carceres, Ly-Benedicto excepto, conjiciuntur ac ethnicus Vuag-
Meus eandem ob causam capto ad collum damnatur, sed postea omnes dimittuntur.

XXIX. Interea christiani reliqui pro sua caritate nihil prætermittebant, quin iis, qui squalore carceris opprimebantur, subsidia importarent. Erat Fo-chei christianus nomine Ly-Benedictus, cujus etsi modicæ fortunæ erant, domus tamen non sacerdotibus Europæis modo, qui apud eum sæpe versabantur sed etiam christianis Fo-ganensibus, & Chang-cheensibus universis patebat. Is una cum Ly Michaelle fratre in id diligenter incumbebat, ut carcere conclusis fociis religionis adesset, eosque, quibus rebus poterat, juvaret. Quamobrem Pro Rex, qui exploratoribus constitutis, ne quid in carceres auxilii christianis supportaretur, cavebat; ubi Alcoberum, & Diazium, pisciculis aliquot, ejusque generis fructibus, quos Sinica terra producit, donatos cognovit, continuo Ly-Benedictum, in quem ea suspicio cadebat, ad Præfecti urbi carceres abduci imperavit, ubi exemplo cum Alcobero conferretur. Sed cum uterque in eam responsionem conveniret, sibi alterum ignotum esse (quod plane ita sese habebat, neque enim umquam alter alterum viderat) Ly-Benedictus liber dimissus est. Ex Fo-ganensibus etiam
chri-

christianis, quamvis perculsi omnes timore erant, tamen viri plus minus duodecim inventi sunt, quos retinere non posset metus, quin Fo-cheum contenderent, iisque auxilium ferrent, qui vinculis detinebantur. Ea res ut est Pro-Regi enunciata, hos item in carcerem contrudi iussit, eisque solum evadendi facultas fuit, qui sibi fuga salutem quæsierunt. Venerat una cum christianis ethnicus quidam Vuang-Meus appellatus, ut viduæ Mariæ Hy principi, ut dictum est, feminæ præsto esset. Is, ut erat in judiciis versatus, & prudens, exempla sibi quæstionum, quæ de christianis habitæ fuerant, reliquorumque chi-rographorum, quæ ad causam pertinebant, paraverat; sed cum iis rebus, ceterisque, quas habebat, omnibus impotestatem satellitum, a quibus est interceptus, venit. Dies quindecim optimi, piique imprimis viri, Præfecti carceribus detenti, atque alii alapis, alii tormentis afflicti sunt. Ethnicus Vuang-Meus, non solum tormento excruciat, sed etiam virgis quadragies cæsus, & ad tres menses majori ad collum cippo, tum minori ad annum damnatus fuit. Qua lata sententia, omnes ad locum unde profecti fuerant, reversi sunt. Ita omnibus subsidiis interclusi, maximis molestiis christiani afficiebantur, atque ii imprimis, qui in carceribus Min-Hieni, & Heu-Kuon-Hieni erant; nam quod nondum

capitis damnati essent, ne tenuem quidem oryzæ portionem, falis, lignorumve accipiebant, quæ conclusis in Præfetti urbi, iudicisque reorum carceribus distribuebantur.

Vir Præfetti urbi familiaris episcopalis ornamētis per contemptum irridens se induit, ac paulo post miserabile in modum interit.

XXX. Interea dum iudices designati, qui de christianorum causa cognoscerent, expectabantur, res, libri, sacraque supellex, quæ inventa Foganī fuerant, in urbem quotidie inferebantur. Accidit autem, cum eæ res omnes coram Præfetto urbi in tabulas referrentur, ut unus aliquis ex ejus familiaribus, imposita sibi infula, indutusque chlamyde, quæ *pluviale* dicitur, cothurnisque episcopalibus Sani calceatus, quos *sandalia* vocant, cum irrisione incederet. Sed ultus continuo Deus injuriam est. Vix enim exuerat ille se sacris vestibus, quum repente ante omnium oculos phrenesi correptus est, cumque medici complures multam in restituenda viro valetudine operam consumfissent, post dies amplius sex, delirans, quin ars ei medicorum, qui ejus rei causa vocati fuerant, subsidio esse posset, animam misere efflavit.

Judices Serano, & Josepho calumniā de usu episcopalis pedi opponunt, ac negantes tormentis excruciant, qui-

XXXI. X. kal. delecti sævi, crudelesque iudices christianorum Fochœum pervernerunt. Josephus Chung-Hoeyus, & Seranus omnium primi adducti in iudicium fuerunt, atque ex priore quidem de offibus venerabilis viri Capillæ, deque pedi epi-

episcopalis Sansii tubulis, seu cylindris, ^{bus Josephus}
 quæsierunt. Sed ut interrogationes toties ^{vicus, calum-}
 ab iniquis iudicibus de pedo episcopali re- ^{niam confir-}
 petitæ intelligi facile deinceps possint, ^{mat.}
 animadvertendum est: Sansium, quo ex-
 pedition pro varietate locorum, ubi essent
 sacra celebranda, pedi usus foret, ita,
 illud conficiendum curasse, ut quatuor
 cylindrulis contineretur instar cochleæ
 elaboratis, quo facile necti possent, in-
 tusque, ut fert consuetudo, ne pondus
 impediret, quo minus commode pedum
 gestaretur, cavis. Quos cylindrulos, seu
 tubulos ubi Sinenses viderunt, continuo
 calumniæ occasione arrepta, sive ignora-
 tione rerum, sive improbitate id facerent,
 Europæos accusaverunt, quasi tubulis hu-
 iusmodi ad rem obscœnam, quam rem
 aperte dici prohibet pudor, abuterentur.
 Ejus criminationis quod nullum, præter
 suam ipsorum nequitiam, argumentum
 haberent, innumeris, & molestissimis quæ-
 stionibus, perpetuisque tormentis, quin
 sexui, ætative parcerent, extorquere con-
 fessionem ethnici nitebantur. Sed Josephus
 etsi utrique percuntationi vere, aperteque
 respondit; iudices tamen, qui obducere
 veritati tenebras studebant, torqueri eum
 ad talos præceperunt, tormentumque ad
 horam produxerunt. Ipse tormenti dolore
 victus, promissisque iudicum illectus, qui
 se torquendi finem facturos pollicebantur,
 ini-

60 DE MARTYR. SINENS.

iniquam, turpemque delationem suo testimonio confirmavit. Post, quasi victoriam reportassent, iudices Serranum advocarunt, qui iisdem de rebus interrogatus, de omnibus ita, uti veritas, suaeque integritas vitae poscebat, demonstravit. Qua constantia iudices vehementer commoti, viginti ei alapas infligi iusserunt, tantoque impetu cæsus est, ut auditu ab sinistra aure læsus ad mortem remaneret. Inde vinculis, & calceis, calceolisque detractis, binisque scutellis juris phasolacei potis, quod jus ad egerendum, si quod, ne dolorem sentiret, forbuisset, medicamentum spectare arbitrantur, subjici tormento iusserunt. Verum, cum illius pedes jam in vinculum conjicerentur, veriti, ne, quod viribus corporis destitutus esset, doloris acerbitate interiret, differendum tormentum existimarunt. Interim Josephum eodem induxerunt, qui Serrano persuaderet, ut impudens mendacium diceret. Sed Christi Servatoris miles, de cujus fortitudine nihil cruciatus imminuebant, ea, quam semper retinuit, lenitate, suavitateque oris, aperte imbecilli christiano coram iudicibus demonstravit, quam procul a veritate res abesset, cujus rei sacerdotes nostri accusabantur, seque propterea ad eam confirmandam adduci nulla ratione posse. Iudices, qui etsi convicti calumniæ erant,

erant, id tamen sibi persuaderi volebant, concilio dimisso, christianos ad carceres remiserunt.

XXXII. Quamquam tam erat magnus numerus christianorum, qui religionis causa carceribus detinebantur; nihilo fecius ethnici, in iis præsertim locis, in quibus Europæi constiterant, ab inquisitionibus non cessabant. Itaque iis ipsis diebus ex oppidis Ki-tungo, & Mo-yango ducti Fo-cheum christiani adhuc quatuor fuerunt, Chin-Thomas Xan-ganus, Kuo-Lucas King-jinus, Kuo Petrus-Vejinus, Kuo Johannes-Hanus, quem tamen Mandarinini, duobus illius fratribus retentis majoribus natu contenti, confestim liberum dimiserunt. Multa in carceribus incommoda christiani, multa in oppidis, agrisque perferebant, quæ tamen omnia singillatim persequi non licet; nam neque id fieri ab se potuisse, Serranus ipse testatus est.

Christiani quatuor ab ethnicis capti Fo-cheum ducti, unoque dimisso, tres reliqui carceribus clauduntur.

XXXIII. Die V. Kal. Septembres Europæi sacerdotes quinque, & Sinenses christiani decem in iudicium adducti sunt. Iudices cum de iis rebus quærendi finem fecissent, de quibus reos interrogare Sinenses in iudicio consueverunt, quæstione de pedi tubulis, atque nefario usu, quem ipsi suspicabantur, renovata, percussati ex Sansio fuerunt, quamobrem multis ex partibus, iisque cavis pedum constare voluif-

Sansius ab iudicibus de pedo interrogatur, atque alapis cæditur. Thadæus Go-chinus alaparum vi, ac dolore compulsus, de pedo falsa prædicat, eumque socii omnes, uno Dominico sene-

excepto, me-
tu fracti imi-
tantur. Agnes
puella domi
dimittitur.

luisset; qui cum, ut facile transferri pedum,
pondusque minui posset, respondisset, ala-
pis quindecim, propterea quod verum,
dixisset, cæsus est. Decem item alapas
Thaddæo Go chino impingi iudices im-
perarunt, quod turpes insufflationes, quas
ethnici a nostris fieri calumniabantur,
confirmare mendacio recusasset. Nihilo
fecius victus dolore cruciatus, vera ab
hostibus prædicari mentitus est. Hujus
socii cum parari tormenta vidissent, con-
tinuo perterrefacti, imitari viri exem-
plum, quam innocentes liberare a calum-
nia, maluerunt, Dominico Vuen-Chieo
excepto, qui etsi annos natus septem ac
septuaginta, adeoque ætate provecta
esset, terreri tamen nulla re potuit, quo-
minus in fide, & veritate constantissime
perseveraret. Vocarunt etiam in iudicium
Aagnetem adolescentulam, quam magnis
studiis, muneribus, atque officiis sibi ad-
jungere curaverant; a qua tamen, etsi
magna eam, supra quam credi potest, mo-
lestia affecissent, nihil extorquere, quod
optimis viris detrimento esset, potuerunt,
cum ipsa, nisi castos, illibatosque ritus,
quibus uti Ecclesia consuevit, rem nullam
adhiberi a nostris fateretur. Quamobrem
iudices, qui multis se rebus ab adolescen-
tula vinci viderent, continuo ut domum
remitteretur, jusserunt.

Thaddæus,
& Margen-

XXXIV. Interea quæstiones de chri-
stia-

stianis numquam intermittebantur. III. kal. homines viginti, & octo, Europæi quinque, Sinenfes decem, ac septem, vidua Maria Hya, & mulieres Dominicanæ quinque adductæ in iudicium fuerunt. Cum sacerdotes Dominicani memoriam S. Rosæ Limanæ virginis eo die celebrari ab Ecclesia scirent, ei se, sociosque christianos, in prætorium mox ingressuri etiam, atque etiam commendarunt, ita ut ejus præsentem opem, velut est ab Serrano scriptum, sentirent. Introductus primum Lieu-Margentius, qui pridie ejus diei ter-ritus tormentorum metu, calumniam de turpi insufflatione comprobaverat, cum ex eo iudices de re eadem quæfissent, novo spiritu divinitus accepto, negavit vera esse, quæ dixerat. Iudices vehementer irati, quod ab eo contusam calumniam, cernerent, tormento eum subjici jusserunt, ac quinque horarum spatio in eodem tormento tenuerunt, cui tamen constantia, spiritusque eo majores addebantur, quo fortius satellites funibus instrumentum constringere pergebant. Hunc secutus Thaddæus, tulisse Europæos calumniam dixit, quare satellites alapas ei quinque incusserunt, successitque Royus: Royique hospes Kuo-Lucas, atque huic perinde quinque, illi decem sunt alapæ inflictæ, quod fateri de hospitio renuissent. Interrogarunt deinceps Royum de

tius resipiscunt, & calumniam iudicibus exprobrantes excruciantur. Royus, ejusque hospes in eundem cruciatum veniunt. Iudices ex sacerdotibus, atque ex mulieribus multa de pedo percuntati, tandem Diazium tormento, Sansium alapis affligunt.

ca-

capsula sacrorum oleorum, deque cocolatæ usu, de quibus ille rebus apposite, verique respondit. Iisdem de rebus ex Sanfio etiam, & Serrano quæsitum est; quorum cum essent similia responsa, iudices versutas percuntationes intermiserunt. Tum advocato Alcobero, rursus de episcopali pedo quærere; de quo ille etsi veracissime, quem haberet usum, ostenderet, tamen vocare mulieres etiam, & superiores interrogationes repetere. Quæ christiani cujusdam, qui putabat hoc modo declinare eas cruciatum posse, consilio inductæ, ter a ministro sacrorum, dum baptisma celebraretur, sufflari solere responderunt; eaque responsione accepta, iniqui iudices, qui mysticas ejusmodi sufflationes pro sua nequitia, & improbitate interpretabantur, vehementer sunt gavisi. His rebus dictis, Mandarinum, quod tempus jam prandii impenderet, intermissa quæstione, abierunt, christianis tamen in salutatorio cubili relictis, ibique ad duas post meridiem horas, nullo sumto cibo, expectantibus. Quo tempore, redintegrato iudicio, christiani plerique inducebantur, atque majorem partem alapis cadebantur. Post Diazium ad se adduci imperarunt, rati que hominis simplicitatem allici simulatione miserationis, & suavitatis posse; bonos viros Europæos esse affirmarunt, abesse ab eorum moribus
frau-

fraudem, & quibus rebus sustentare vitam possint, habere. His, aliisque rebus in eandem sententiam dictis, pari lenitate de turpissimis insufflationibus exprimere conati, postremo, ni confiteretur, minitari homini tormenta cœperunt. Quorum ille contentionem, & studia, patefacta rei veritate, elusit: cumque id saltem ut fateretur, rogarent, Sansium nefariis ejusmodi cæremoniis delectari, eos modeste coarguit, quod, quum mendacio injuria Deo gravis irrogaretur, ipsum tamen mentiri præciperent. Quæ cum ille dixisset, confestim jure phaseolaceo potum in tormentum talare conjecerunt: & fatellitibus funes constringentibus, unus ex his quidam, tubulo pedi accepto, virum percutiebat, ac fatere, ajebat, his vos tubulis ad inhonestas sufflationes uti consueffe. At Diazius, cujus erat major animus, quam ut compelli cruciatu, conviciove ad ignaviam posset, etsi pedibus erat afflictis, ossibusque confractis, perlato jam semel, & iterum Fogani tormento eodem, doloremque propterea ex eo, cum tertium jam torqueretur, maximum caperet: tanta constantia cruciatum, tanta animi æquabilitate, atque lætitia ferebat, ut vel sociis ipsis moveret admirationem. Dum is torquebatur, Mandarinus evocato Sansio, huic dicere, urgereque, ut, quoniam de sufflationibus impu-

dicis falsæ mulieres essent, ipse quoque confiteretur. Quibus ille fidenter, ut summa erat animi præsentia, feminas ut accirent, dixit: namque si hæ coram ejusmodi turpitudines confirmassent, ipsum se cruciatibus ultro subiecturum. Igitur accersitis feminis, Sanctus, tubulo pedi uno arrepto, ad Kuo-Theresiam maximam Dominicanarum conversus: ego ne, inquit, seu tecum, seu aliis cum feminis unquam facinus tam indignum admisi, cujus me iudices accusant? ad hæc mulieres una voce omnes; minime sane, responderunt: Nam est id calumnia cōparatum mendacium. Nos quidem te, aliosque Patres ter, cum baptismum celebraretis, sufflasse diximus: at sufflari seu abs te, seu ab reliquis per hos tubulos in feminas, virosve consuesse, nusquam diximus. Hinc præsul sanctissimus nactus occasionem, explicare iudicibus cœpit, quo spectarent eæ sufflationes, quæ ab Sacerdotibus, dum quemquam christianis sacris initiant, fieri solerent. Sed ii tamen, ut qui non ad intelligendam quidē, sed ad contemnendam, irridendamque veritatem venissent, Theresiæ, ut in Episcopum sufflaret, quo eum ipsi ritum cognoscerent, jusserunt. Episcopus, qui id imperatum irridendorum sacrorum causa fuisse intelligebat, neque usurpari per contemptum cæremonias sanctissimas patiebatur, restituit: etenim non ad eum quidem, qui bapti-

ptizetur, sed ad ministrum mysticarum, sufflationum hoc munus pertinere dixit. Ventum deinde a contumelia ad tormenta est, decretumque, ut alapis viginti caderetur, qui cæsus, atque ab iis, sentiret ne ex colaphis dolorem, interrogatus, cum affirmasset: quid ergo est, inquiunt, quod nihil quereris? His Sansius: quod Redemptoris, inquit, mei Jesu Christi cruciatus meminerim.

XXXV. Interea perturbati iudices Kuo Theresiam digitorum tormento subjecerant. Quem ob cruciatum, quod eum Fogani antea bis magni hæc animi femina passa fuisset, contortisque jam supra modum manibus, digitisque esset, tantam vim perpeffa doloris est, ut pene sensu rerum privaretur. Aderat Sansius, atque in tam gravi Theresiæ periculo S. Rosæ majorem in modum implorabat opem: quem cum movere labia Mandarinum homines superstitiosi animadvertissent, primum quod preces recitaret, arguere; tum apparitoribus, inde ut abducerent, imperare; quasi vero extra eum locum precandi viro facultas non esset. Atque ut Theresiæ constantiam, & fortitudinem iudices frangerent, curarunt, ut, dum ipsa torqueretur, Ambrosius fratris ipsius filius prostratus humi valide verberibus caderetur. Ita enim sperabant fore, ut amitæ fortitudo misericordia fratris filii vince-

Kuo Theresia digitorum tormentum subit; fratrisque filii cruciatu a sententia se deterreri non patitur.

retur, ipseque afflictus verberibus eidem persuaderet, ut annuens confirmaret sufflationum calumniam. Clamabat miser pressus ictibus, amitæque orabat, implorabatque fidem, ut sui jam misereretur, & supplicio liberaret. Ipsa contra nihil seu animi, seu corporis cruciatu commota, constantissime respondit: atqui Deum roga, te ut liberet. Equidem te per blasphemiam, calumniamve ut liberem, non committam. Pertulit invicte amplius hora Theresia tormentum, cujus victi patientia iudices, non esse diutius rem producendam existimarunt, eique triumphum ultro concessere, quem eo pretio meruit, ut in omni reliqua vita læsa manibus remaneret.

Judices Romanorum verbis circumvenire conati, post de Deo multa præclare disserentem arundine sævissime cædunt; ac Dlazium, & Sanzum molestis percussationibus morantur.

XXXVI. Nihilofecius immisericordes iudices nullum tempus, quin christianos insectarentur, prætermittebant, nullamque his relinquebant quiescendi facultatem. Postero die, qui fuit dies kal. septembr., rursus adduci eos ad tribunal jubent; & Royum, qui primus omnium eo esset inductus, quamobrem venerit in Sinam, interrogant. His ille: non aliam sibi veniendi causam fuisse dixit, nisi studium propagandæ divinæ legis, hominumque permovendorum, ut Deo fidem adjungerent, ut caritate in illum inflammarentur, utque ei obtemperarent, consequuturi, si imperata fecissent, exacta mor-

mortali vita, sempiternam felicitatem, perpetuumque supplicium evasuri. Loquentem iudices interpellant, atque feverius objurgant, ac talia ne commemoraret, imperant: eam enim illum adventus causam habuisse, ut populos ad defectionem incitaret, ut turpiter consuetudine, familiaritateque mulierum abuteretur, vel ut in aliquo gradu honoris, & dignitatis a Pontifice Maximo collocaretur. Quum ille affirmare, quæ ante dixisset, pergeret, iudices afferri arundinem primæ magnitudinis imperarunt, eaque ante Royum posita, homini minantur, ni eorum inendacia confirmet, se, ut ea cædatur arundine, jussuros. Ad hæc cum ille constanter diceret, se, quamvis ita, uti ipsi minabantur, cæderetur, non aliter umquam, quam hætenus fecisset, respondurum; tum iudices circumvenire argutiis hominem conati, vobis, inquiunt, persuasum est, ubique esse auctorem mundi, & moderatorem Deum: erit igitur in ista arundine. Itaque si dolorem tibi verbera non attulerint, seu conspicuum sese præbuerit Deus, teque liberarit, nos fidem isti adjungemus Deo, quem nobis prædicas; sin secus acciderit, Deum illum nuspiam esse statuemus. Sed Royus, nemini esse dubium oportere, inquit, quin immensus qui est, is etiam sit ubique locorum, adeoque in arundine ipsa, Deus.

Vim tolli verberum, ne dolorem inferant, seque liberari cruciatu, rem factu facillimam divinæ virtuti esse. Sæpe id multis evenisse. Majori se tamen beneficio augmentum divinitus iri, si neque a verberibus ipse, neque a dolore eriperetur. Dolorem, quem ictus inferrent, brevem esse, gloriam contra, quam dolor post mortem pareret, æternum haud dubie duraturam. Tum Deum esse ostendere, deque eo multa egregie, præclareque dicere, & testimonia scripturarum afferre, quibus de Filio Dei homine facto doctrina contineretur. Elegantissimam hujus universitatis rerum fabricam commemorare, cælorum amplitudinem; multitudinem, splendorem, pulchritudinemque syderum, & temporum varietates, ac perpetuas mutationes, resque conditas tanto numero, tantaque inter se dissimilitudine constantes demonstrare, quæ quidem omnia unus aliquis ad usum, & voluptatem hominum fabricatus sit; cumque ea nec fieri poterint, neque conservari ipsa per sese, dominum tantarum rerum esse omnipotentem aliquem oportere, qui omnia fecerit, omniaque servet, ac moderetur. Atque hunc, inquit, nos Dominum colimus, hunc unum esse, verumque Deum prædicamus. Quæ res etsi erat clara, atque perspicua, atheis tamen illis (nam hoc eos Episcopus Tipasitanus appellat nomine)

ne) persuaderi omnino non potuit; quorum jussu Royus humi prostratus, nudatusque sævissime denis verberibus est afflictus. Interrupte cæsus, cum binis, tenisque ictibus pulsaretur, ex eoque, quam ob causam ad Sinam venisset, judices peterent; ipse felicitatis hominum sempiternæ se, animarumque salutis procurandæ studio venisse respondit, donec decretus verberum numerus expleretur. Hujus supplicii, quo homines nudati afficiuntur, tanta vis est, ut qui commentarios de Sinenfium moribus ediderunt, eo solo hominem exanimari posse ferant. Iisdem de rebus post ex Serrano etiam quæsitum est. Cui judices, cum eadem fere ac Royus de suo in Sinarum imperium adventu respondisset, decem incuti alapas fecerunt. Post percuntati ex Alcobero fuerunt, ecqua res christianorum divina esset? atque eam ne ipse quotidie facere, christianisque reliquis distribuere soleret? Quibus quum ille ita, uti res ipsa poscebat, diligenter satisfecisset; tum ex Diazio quæsierunt, quinam hi essent, qui Macao Foganum Europæis sacerdotibus subsidia importabant? Diazius juvenes Cantonenses duos respondit; nam, ita ut responderetur, inter nostros ante convenerat. Deinde judices rogarunt, quibus nominibus Pontifex Maximus, Rex Hispaniarum, Provinciæque Dominicanorum in Philippi-

nis Præfectus appellarentur. Denique Sansium multis interrogationibus de patriæ suæ appellatione, deque rebus, quæ ad eam pertinerent, vexarunt. Ita diem totum christianos afflictos, & duro, asperoque lapidi genibus innixos, accedente ad hæc tot mala etiam fame, magna eorum molestia, atque incommodo detinuerunt: neque ante, ea die, sæviendi finis est factus, quam mandarini cœnatum abirent; quo tempore omnes ad suum quemque carcerem remiserunt.

Ex sacerdotibus iudices multa quæstione: Josephus distribuisse se ossa V. Capillæ, tormenti metu, falso affirmat. Sansius, & Royus in proximos tribunali carceres transferuntur omnesque Europæi librum baptizatorum exscribere jubentur. Die insequenti, renovata quæstione, alapis Sansius cæditur; tum aliquādiu quæstiones intermittuntur.

XXXVII. Satellites, qui, uti supra diximus, loca, in quibus nostri habitassent, scrutati diligenter fuerant, sacerdotum libros seu europæis, seu finicis litteris perscriptos abstulerant, tabulasque præterea, in quibus notata nomina eorum erant, qui in oppido Foganano initiati mysterio baptismi fuissent. Biduum, qui dies fuere ad IV. & ad III. nonas septembres in Europæis de librorum finice scriptorum auctoribus, deque loco, in quo impressum formis kalendarium fuisset, quod ad usum christianorum finice ipsi digesserant, interrogandis consumtum est. Quibus de rebus graviter, ut debebant, recteque responderunt: cumque iudices percuntari studiose pergerent; nostri opportunitatem nacti, commodum eis præcipua doctrinæ christianæ capita explicarunt. Hæc athei nihil morati, percuntati con-

continuo sunt, descriptane iisdē in tabulis nomina quinque sacerdotum Europæorum essent? quum nostri affirmassent, tum callide ex Serrano quæsierunt, num ossa venerabilis viri Capillæ, eo saltem nomine, quod sacras esse reliquias arbitraretur, christianis distribuisset? Quorum ut ille improbitatem perspexit, elusitque, iudices ad hospitem ejus Josephum quæstionem converterunt, qui etsi primum distributa ab se ossa illa fuisse negavit, post tamen minis, & metu tormentorum perterrefactus, rem ita ab se factam, uti fuerat ab illis excogitata, confessus est. Eadem die, quod satellites, qui a carceribus Min-Hieno, & Heu-Kuono Sanfium, & Royum adducere ad tribunal consueverant, iudicibus demonstraissent, quanto sibi ea res incommodo, & damno esset, impetratum est, ut in prætoriiis carceribus, qui prope ab tribunali absunt, ambo manerent; quæ magna his, ac Serrano fuit tantorum malorum, molestiarumque levatio, propterea quod licere sibi eas una perferre intelligerent. Postero die, qui fuit prid. nonas, vocati ad ædes iudicum nostri sacerdotes, molestisque percuntationibus aliquamdiu fatigati, jussi demum fuerunt, ut separatim eorum quisque nomina ex tabulis baptizatorum quaterna, aut quina describeret. Quod eo consilio factum est, ut, num exempla congruerent,

in-

intelligeretur. Exemplorum summa consensione deprehensa, jam omnes tabulas iudices exscribi voluerunt, quibus nomina hominum MMDCXVII. continebantur. Hujus mandati hæc una fuisse causa videtur, quod ex iis tabulis Pro-Rex sese aliquid cogniturum existimaret, quo Europæos tentatæ defectionis reos ageret; nam tabulas quoque ab oppidorum principibus conscribendas curaverat, quibus tabulis christianorum in oppidis singulis incolentium nomina indicarentur. Sed puduit hominem malitiæ, improbitatisque suæ, ubi maximam eorum partem pueris, feminis, senibus, leprosis, infantibusque, iisque etiam, qui vita functi fuissent, contineri comperit, qui in suspicionem venire defectionis propter corporis infirmitatem nulla ratione possent. Nonis rursus adducti in iudicium Europæi fuerunt, ut ex omni supellectile, quæ fuerat Fo-gani intercepta, suas res quisque cognosceret; quod cum facerent, tum quid ad singulos pertineret, in scripta referebatur. Denique in carceres reducti sunt. Quo tempore Sanfio, propterea quod ab iudicibus, num rem quotidie divinam faceret, interrogatus, affirmasset, decem alapæ inflictæ fuerunt. Illi enim cum doctos se esse arbitrarentur, inque calendario Sinico nonnisi dominicos, festosque reliquos dies notatos cernerent,

con-

convictum mendacii hominem existimabant. Inde ab die non. sept. ad diem XII. kal. octobr. omnis intermissa quæstio est.

XXXVIII. Non dubito fore plerisque, qui hoc genus scripturæ prolixum judicent, quum easdem plerumque interrogationes, responsionesque distincte, minutimque descriptas legent. Sed hi, si animadvertant incitari ad pietatem, virtutemque colendam christianos posse, qui considerent summam, æquabilemque sacerdotum Europæorum in tot, tamque molestis, plenisque fastidii quæstionibus subeundis constantiam, non admirabuntur nos in iisdem referendis, repetendisque rebus fuisse scrupulosius, quam aliqui fortasse vellent, versatos. Accedit quorundam licentia, qui nimium sua doctrina confisi, horum Christi. Servatoris testium agendi, respondendique rationem reprehendere auderent; quæ sane licentia in eam nos sententiam induxit, ut quæstiones quasque diligenter describendas, resque omnes in quæstionibus gestas, dictasve compendio summa fide explicandas existimaremus, ut in populum veritate rerum enunciata, Europæi quique christiani recte instituti dijudicent, quo fit loco habenda illorum adversus nostros lata in Sinis censura, quorum aut proclivior ad credendum animus fuit, aut nimium præjudicata opinio.

Rationes afferuntur, quæ obrem omnia in hoc commentario diligenter sint describenda.

XXXIX. Et-

Noſtri quo-
tidie ad ædes
judicum, ta-
bulas descri-
pturi, vincti
ducuntur; iis
que iudices,
rurfus inſti-
tuta quæſtio-
ne, verba dāt:
rum Royum,
& Serranum
arūdine, Dia-
zium alapis
cædunt.

XXXIX. Eſſi erant quæſtiones, ut
ſupra demonſtravimus, intermiſſæ, ni-
hilo ſecius moleſtiis noſtri minime leva-
bantur. Quotidie ad ædes judicum tabu-
las, quemadmodum dictum eſt, descri-
pturi, e carceribus, vincto catenis collo,
uno Serrano manicis etiam conſtricto,
ducebantur. Cumque itus illis, redituſ-
que quotidiani eſſent, inſtare tamen af-
ſidue operi, celeriterque facere cogeban-
tur, neque cibi quidquam ante ſolis oc-
caſum, quo tempore reducebantur in car-
ceres, ſumebant. Perfecto opere, die XII.
kal. octobr. iudices Europæos quinque,
chriſtianosque litteratos ſex ad ſe adduci
juſſerunt. His, dum iudicium redintegra-
retur, Mandarinum confirmaverant, cauſ-
ſam facilem in locum eſſe deductam. Qua-
re, quod metuant, nihil eſſe. Hoc unum
Pro-Regem velle, ut levioribus quibuſ-
dam de rebus ex eis quærat. His dictis
rebus, reliquos exire, Royumque mane-
re imperarunt. Hoc præter cætera ex
ſolo percuntantur, pecuniane animos ſibi
chriſtianorum conciliaſſet? Id cum ille
negaret, qua ex re, quærunt, tantus il-
lorum in Europæos amor exiſteret, ut eos
captos, abeuntesque lacrimis proſeque-
rentur? Ad hæc Royus: Chriſtianos Eu-
ropæis magiſtris uti, ex quibus diſcerent,
quemadmodum conſequi felicitatem ſem-
piternam poſſent; neque eſſe propterea,
cur

cur ipsi admirarentur, quod tantum esse in eos cernerent studium christianorum. Hoc dato responso, iudices humi prosterni hominem, nudatumque decies arundine cædi jubent; renovatisque ad ictus singulos percuntationibus, frangere ejus constantiam conantur. Quem cum neque artibus, neque cruciatu vincere potuissent, Serranum advocant, ab eoque continuo, quod antea sæpe fecerant, exquirunt, num mortuorum ossa distribuisset? Negantem, uti Royum, prosterni, parique crudelitate cædi jubent. Eadem ex Diazio petunt; atque ab Serrano saltemne distribui ossa viderit, sciscitantur, recusantemque fateri alapis quindecim cædi imperant. Denique Sansio, & Alcobero, etsi alter similia eorum, quæ dicta ab Europæis cæteris fuerant, responderet; alter vera esse inficiaretur, quæ iudices affirmabant, devinxisse ipsum sibi largitione pecuniæ illius populi, apud quem diversatus fuerat, principem; nihil tamen damni afferendum putarunt.

XL. Dimissis Europæis, Dominicum Vuen-chieum, qui erat ex ordine litteratorum, iudices accersunt, interrogantque, quemadmodum, cum domi uxorem, nurusque haberet, hospitio tamen Europæos exciperet. Ad hæc ille: Europæis quidem se, respondit, non mulieres ministrare, bonosque viros Europæos esse, in

Dominicus senex ad questionem adducitur, fortisque in sententia manet: sed christiani aliquot a Christi fide desciscunt. Iudices Royum pleraque in-

quos

terrogāt, hor-
ranturque, ut
socios indu-
cat, ut de di-
stributis mor-
tuorum offi-
bus fateatur.

quos suspicio mali cadere non posset. His
omissis, ad Confucium veniunt, atque
huncine, avosque, falsumque Koan-lo-ye
numen colat, interrogant. Quorum ubi
ille nihil se venerari dixit, iudices irati
minari flagella coeperunt. Tum ille: ego
vero, inquit, consenui, brevique me
arbitror moriturum. Itaque parvi refert,
etiam si crudelissime cæsus inteream. Ni-
hilosecius mandarini cædendum homi-
nem non putarunt, quod provectæ illius
ætatis (natus enim annos septem, ac se-
ptuaginta erat) rationem habendam ar-
bitrarentur. Similia ab ceteris litteratis
viris percuntati sunt. Horum aliqui, et
primum neque Confucium ab se, neque
Koang-lo-ye coli palam dixerunt, post ta-
men flagris alii quinquies, & vicies, alii
quindecies cæsi, nutare animo, atque
concidere coeperunt, & victi denique fal-
sum numen veneraturi proficiscuntur.
Unus omnium Sinensium, qui eo die vi-
ctoriam adversus ethnicos reportarit, Do-
minicus senex fuit, cujus est auctus im-
probitate iudicum triumphus, quod lapsis
viris litteratis reliquis, studio, speque il-
lius quoque superandi incitati minaren-
tur, ni cultum idolo, Confucio, atque
avis adhiberet, sese filium illius compre-
hendi, coramque eo ad mortem usque
flagellis cædi iussuros. His enim commi-
nationibus, quum ne leviter quidem com-
mo-

motus esset, respondit: facerent quod luberet; se namque hominem christianum numquam de sententia recessurum. Iudices quæstionem reliquam in tempus pomeridianum differunt, & fatigatos, verberibusque afflictos Europæos in salutatorio cubiculo interea manere jubent. Cumque ibi ad vesperam detenti essent, reliquam diei partem iudices in molestissimis percuntationibus consumserunt, quærentes ex Royo de annorum putandorum ratione, qua Europæi uterentur, hominemque hortantes, ut sociis persuaderet, ut distributa ab se mortuorum ossa, sin minus christianis singulis, at suis saltem fautoribus, confiteantur. Ex ea enim re nullum seu Sinenfes christianos, seu sacerdotes Europæos incommodum accepturos. At Royus, qui, res quorsum evaderet, intelligebat, se imperata nunciaturum promisit; sibi tamen iudices etiam, atque etiam persuadeant, numquam id fore, ut socii ea, cum sint falsitatis plena, confirment. Tali modo absoluta quæstione, omnes ad vesperam in carceres sunt reducti.

XLI. Ad diem IV. idus octobr. insignes crudelitate mandarini Chang-Pu-hienus, & Kien-Ning-hienus, qui tantopere christianos exagitaverant, postremam de his quæstionem instituunt. Ergo omnes adduci in iudicium imperant. Diazium primum omnium accersunt. Quæ-
runt

Diazium, Ser-
ranus, & San-
sius alapis ple-
ctuntur; ac
Sâsius de por-
toribus, ubi
esse iudicibus
exploratū co-
gnoscit, fate-
tur.

80 DE MARTYR. SINENS.

runt ex solo, quidnam finicæ quaternæ hæ litterarum notæ panno inscriptæ, qui pannus usui altari erat: *Chu, Pao, Chung, Pang*, significant? Cumque ille hunc esse omnino earum sensum diceret: *Serva Domine Sinarum Regnum*, ei continuo, quasi irati ob responsionem essent, colaphos decem incuti faciunt. Quinque mox infligi Serrano imperant, propterea quod usus eadem interpretandi ratione fuisset. Inde durius eos increpare aggrediuntur. Nam si scribi curassent: *Domine serva christianos*, ferri id quidem potuisse ajunt; quod autem scripserant: *Domine serva Sinenſe Regnum*, ferri nullo modo posse. Deinceps immutato sermone, Serranum interrogant, quisnam subsidia Europæis in Sinam annua importet? ipse, prout inter nostros antea convenerat, ne mentiretur, neu quempiam proderet, propterea quod neque legitime interrogaretur, neque ceteros venisse in cognitionem ethnicorum putaret, tacereque de aliis fas sibi esse perspiceret, Cantonensibus duobus adolescentibus se, sociosque portitoribus usos respondit, denisque ob eam responsionem alapis cæsus est. Deprehenderant jam mandarini, vinctosque tenebant adolescentes illos quatuor, quibus auxiliorum supportandorum datum negotium fuerat: quæ res sacerdotes nostros latebat. Inducto deinde Royo ad a-

osten-

ostenderunt, quæ missa ab Fo-ganensi Mandarinis fuerant, quibus nomina singulorum continebantur, ostendebaturque, omnes in carcerem fuisse coniectos. Postremo Sansium advocarunt, eumque, quod fateri de puerorum nominibus primum, nollet, quindecim colaphis cædi fecerunt. Quem ubi Royus nudum, humique prostratum, moxque flagellis cædendum vidit (quoniam pueris, qui capti, convictique jam essent, nihil afferri incommodi posse, si nostri faterentur, cognorat) ut eriperet tormento Episcopum, hunc monuit, rem esse iudicibus compertam, neque esse, cur celandam putaret. Itaque aperte Episcopus puerorum nomina exponit, idemque post etiam Alcoberus agit. Cum Mandarini interrogandi finem non facerent, eaque percuntari pergerent, quæ ad rem nihil, ad afferendam vero nostris molestiam plurimum pertinerent, Sansius instinctu quodam superiore permotus, concitata voce; obsecro, inquit, iudices, molesti esse desinite. Nam sic habetote nostrum, qui adsumus, reum criminis esse neminem. His rebus dictis, prostravit se humi, atque me, inquit, occidite. Mandarini hanc tantam animi virtutem, fortitudinemque mirati, quamvis erat, qui Episcopum rusticis esse moribus diceret, tamen quæstionem, cruciatumque, quem horis jam quinque asperis lapidibus

innixi genibus nostri pertulerant, intermittunt. Interim Sansio, atque Serrano, huiusque hospiti Josepho, nisi de distributis mortuorum offibus confiteantur, trinum ad talos tormentum minantur. Post viris, feminisque christianis evocatis, interrogatisque, essent ne illorum nomina in tabulis baptizatorum descripta, concilium dimissum est.

Thomas Sanchezius Sinensis sacerdos nostris subsidio venit; sed horum hortatu mox domum revertitur.

XLII. Eodem fere tempore a. d. VII. kal. novembres, Thomas Sanchezius sacerdos natione Sinensis, Siamensisque Seminarii Gallorum alumnus, qui propagandæ religionis causa missus fuerat, Fochium venit. Is etsi senex erat, ætatis namque annum octogesium agebat, periculis tamen, in quæ se coniectum intuebatur, deterreri non potuit, quin eo se, omni officio; ac pietate militibus Christi operam utilem daturus, conferret. Nam vestes, pecuniamque attulit, quibus extremam eorum inopiam levaret. Sed nostri, qui triduo ante auxilia a christianis Foganensibus acceperant, gratias, quas maximas possunt, homini agunt, ac perpetuo habituros recipiunt; tum rogant, ut, quoniam hostes per id tempus maxime sæviunt, quam celerrime potest, ad urbem Hing-hoam revertatur. Demonstrant ipsum, quod ætate sit adeo gravi, si in hostium potestatem veniat, quæ eum manerent, incommoda non laturum. Itaque abeat,

abeat, sibi que consulat. Nam si quid eorum cuiquam ex usu fuerit, facturos se eum continuo per litteras certiores, subsidiumque opportune postulatuos. Thomas consilium eorum, quod tam prudens esse perspiciebat, sequutus, cum biduo Fo-chei moratus esset, eo revertit, ubi ante degere consueverat. Atque se quidem sæpe offeret summa nostra voluntate oportunitas faciendi magna & laude, & grati animi significatione caritatis in nostros, virtutisque Alumnorum Siamensis Collegii mentionem.

XLIII. Etsi de christianis quæstiones habere ethnici cessarant, nihilominus immitibus Mandarinis duobus, de quibus diximus, alii item iudices, ut est Sinensium consuetudo, ad eandem causam, antequam absolveretur, cognoscendam successerunt. Ergo die IV. nonas novembres omnes apud Præfectos urbibus Fo-cheu, & Yen-pin in iudicium vocantur. Inductos primum Europæos quinque iudices de nomine, de ætate, tum de dignitate Episcoporum, deque eorum, quos *Missionarios* dicimus, munere interrogant. Quærunt denique num ad Sansium quotannis CL. nummum argenteorum, quos Hispani *pezos* appellant, ad reliquos C. mitterentur? Quibus de rebus quum ipsi ita, uti decebat, respondissent, continuo, ut abeant, jubentur. His christiani succedunt, qui ho-

Causæ christianorum alii iudices præficiuntur, qui brevi facta quæstione, omnes dimittunt.

84 DE MARTYR. SINENS.

spitio nostros exceperant . Interrogantur , Europæi ne in eorum domibus habitarent ? affirmant , moxque jam dimittuntur . Post judices quinque litteratos Sinenses advocant, eademque ex his percuntantur . Negant hi , diversatos umquam apud se fuisse Europæos . Interrogati deinde , num eos, quod Christo se dedidissent, pœniteret, abnuunt . His excedere iussis , christiani , qui nullum dignitatis gradum obtinerent, quinque adducuntur. Quæritur ex his etiam manere ne in fide velint, quam Christo dederint ? Affirmantibus , abite , inquiunt judices , dementes servi . Tot enim cruciatus pertulistis, christiani nominis causa, audetisque in suscepta religione persistere ? Mox quibus cæremoniis nostri initiari baptismo solerent percuntati , quum id christiani fieri fundendo aquam , recitandoque verba , quæ Christus Servator præscripserat , respondissent ; deferri ad se jubent quatuor adolescentes illos , quos subsidia importare consueisse docuimus ; ex quibus cum intellexissent , quam diu suam operam Europæis locassent ; quærunt tandem , velint ne ab institutis christianorum desciscere , negantesque dimittunt . Postremo viduam Mariam-Hyam , virginesque , de quibus supra demonstravimus , quinque introduci jubent . Ex his , fuerit ne ulla ipsis cum Europæis minus honesta consuetudo , in-

qui-

quirunt. His nullam fuisse respondentibus, quærendi finis est factus, cum hora omnino quæsitum esset.

XLIV. Jam prope erat, ut innocentum christianorum causa per summam injuriam, iniquitatemque, ut mox videbimus, judicaretur. Interim nova de Missionariis, de quinque horum hospitibus, deque Maria vidua ad diem V. idus novemb. apud alios judices quæstio est instituta. Erant hi judices, Quæstor, quem judicem criminalem vocant, Præfectus ærario, & Quæstoris Legatus. Hi deferri ad se Europæos hoc ordine imperant: primum Sansium Episcopum, tum Royum, post Serranum, inde Diazium, postremo Alcoberum. E vestigio, quæ judices alii consueverant, de ætate cujusque, deque tempore, quo in Sinis versati sunt, quærunt. Conversa mox ad res alias oratione, inquirunt, sint ne Rex, & Regina Hispaniarum, quique his parent, omnes addicti christianæ religioni? Post, viderintne ipsi aliquando Deum, aut cujusquam animum? & quo ex tempore Dei verbum humanam sibi naturam conjunxerit, quidque causæ habeant, cur venerabilis viri Capillæ ossa servanda putent, quantumque in annos singulos ad eos pecuniæ mittatur; ac futurumne, si in Europam revertantur, ut Rex in eos, vel Pontifex Maximus animadvertat:

Rursus apud alios judices Sacerdotes adducti, iis decreta christianæ religionis explicant; tū de hospitibus illorū, deque vidua Maria-Hya quæstio habetur.

quamnam ipsi ibi dignitatem obtineant; denique, ut leviora multa præteream, cur enunciandæ Sinensibus legis christianæ causa, tot subire æumnas, tot, tantasque perferre calamitates voluerint, rogant. Ad hæc nostri ita, ut illis concessum divinitus est, responderunt. Promisit enim Christus iis, qui se coram principibus confessi essent, ipsum se eorum lingua locuturum. Cumque iudices miti, bonoque ingenio essent, commodum nacti nostri opportunitatem fuerunt iisdem explicandi, quæ decretis christianæ religionis continerentur. Nihilofecius cum Sanctius postremæ percuntationi satisfaceret, magnus eorum risus est factus, quod ille dixisset, pati se, ut anima cujusquam hominis jacturam æternæ salutis faceret, non posse. Dimissis Europæis iudices hospites illorum quinque, viduamque Mieumariam-Hyam advocant. Petunt, num hospitio Europæos exceperint: Fatentur nostri. Sumunt iudices, eos ne, quod Christo suam obligassent fidem, poeniteat? Nihil minus, vincti respondent. Rogant denique, num retinere in posterum tempus instituta christianorum velint? Cum christiani affirmassent, quod horas quatuor interrogando iudices consumsissent, quæstio absoluta est.

Extrema
de christianis
quæstio a Pro.

XLV. Jam tempus advenerat absolvendæ æquissimæ, sed per summam injuriam

riam pessime actæ causæ christiano-
rum. Præfuit ei iudicio Cheu-Hio Kie-
nus Pro-Rex, qui summam rerum omnium
potestatem, quam sibi arrogare reguli Fo-
cheu Pro-Reges solent, cum implacabili
in christianos odio junxerat. Iis omnibus,
qui in carceres contrusi religionis causa
erant, ad X. kal. decembres dictus est
dies. Ubi ea dies venit, primi omnium
inducti sunt fures tres, in quos incredi-
bili comitate, clementiaque usus iudex,
mitissime decrevit, omnemque severita-
tem contra innocentes christianos adhi-
bendam servavit. Atque eorum quidem,
quæ in iudicio sive quæsitæ ab iudicibus,
sive dictæ a nostris fuerunt, quoniam mul-
ta sæpe in hunc locum, ne eadem repe-
tere videremur, Serranum secuti, rejeci-
mus, nunc fusius omnia persequemur.
Quorum tamen copiam his, qui legent,
quod & postrema hæc est habita de chri-
stianis quæstio, & præclarissimum de con-
stantia sacerdotum Dominicanorum, tum
aliorum etiam christianorum testimonium
exhibet, minus molestiæ allaturam exi-
stimamus.

Rege insti-
tuitur, qui
latronibus mi-
tius habitis,
sævire in no-
stros consti-
tuit.

XLVI. Primus, qui in iudicium vo-
caretur, Kuo-Ambrosius Hy-inus fuit.
Nequa vero ex Sinicis nominibus distin-
guendorum hominum difficultas oriatur,
animadvertendum est, Sinenses hac uti
nominum ratione, ut priore loco nomen,

De ratione
Sinensium no-
minum, de-
que Ambro-
sio Hy-jino
ad tribunal
ducto, cre-
brisque alapis
cæso.

tum prænomen, quod impositum christiano in baptismo est, postremo prænomen alterum a parentibus inditum ponant. Ergo ex Ambrosio a Pro-Rege quæsitum est, quamdiu diversatus apud eum Pe-to-lous fuisset? namque hoc modo inflectitur ab Sinensibus Petri nomen, quo Sansius vocabatur. Cum annos ille octo respondisset, tum Pro-Rex, quot ipse Ambrosius homines, ut mysterio baptismi initiarentur, induxisset, rogavit; cui Ambrosius, viginti, respondit. Sed Pro-Rex, cum tantulus, inquit, is numerus sit, quemadmodum plus, quam duorum milium baptizatorum nomina tabulis continentur? Ille vero, eas tabulas ante annos duos, ac quadraginta, describi cœptas, eisque nomina comprehendi seu vivorum, seu mortuorum, infantium, senumque: se vero jam inde a puero (nam de hoc etiam hominem Pro Rex interrogarat) baptismo fuisse initiatum, annumque, quo id contigerit, aliaque hujus generis reliqua, memoria non tenere, dixit. Post hæc judex, ideone ipse christianismum coleret, quæsit, ut defectione civium, quam Europæi molirentur, muniret sibi in eo Imperio ad magistratum aliquem capeffendum viam? Quam cum ille calumniam propulsasset, seque, sociosque religionis tale aliquid ne cogitasse quidem umquam, dixisset; idcirco

circo enim suscepisse instituta christianorum se, ut Deo obsequi, utque aditum, sibi ipse expedire ad vitam sempiternam posset, Pro-Regis jussu quinque colaphis cæsus fuit. Inde exprobranti judici, cupiditatem pecuniæ in causa esse, quamobrem Europæis morigeraretur, quantumque ab eis in singulos annos acciperet, quærenti, respondit: se ne obolum quidem ab Europæis petiisse, neque Europæos illius pecunia, neque se illorum uti consueſſe. Sed Pro-Rex rursus interrogans petiit: si neque rebus novis studeret, neque lucrum pecuniæ faceret, quid ergo esset, cur leges Europæorum confectaretur? Ad hæc Ambrosius, quod illi, inquit, me colendæ virtutis, quod effugiendi post mortem supplicii, quod consequendæ sempiternæ felicitatis rationem doceant. Hac tanta constantia commotus, atque ira inflammatus iudex, infligi iterum homini quinque alapas jussit, cumque monuit, si de civium defectione fateretur, liberum abiturum, sin minus, capitis condemnandum sciret. Ambrosius nihil his minis territus, rebellionis ne vestigium quidem esse ullum dixit. Inquireret quam diligentissime posset iudex. Nam siquid reperisset, quod christianos in ejus rei suspicionem vocaret, libenter sese lacerationem corporis laturum. Ob id responsum quinque alapis

cæ-

Ambrosio
Kuo-Lucas-
Kin-jinus ,
Thaddæus
Go-chinus ,
Josephus
Chung-Hoë-
yus , & Do-
minicus se-
nex succedūt,
diuque inter-
rogati, alapis
cæduntur .

XLVII. Eo remoto , Kuo Lucam-
Kin-jinum interrogare Pro-Rex cœpit .
Quæsitum primum , quot annis domi suæ
Rorum hospitio habuisset ? quo ex tem-
pore ipse christianismum profiteri cœpisset ;
atque ab Roro ne , an ab alio initia-
tus baptismi mysterio fuisset ? Lucas , de
hospitio se , quod iudex sciscitaretur , non
meminisse , respondit . Id ex Roro per-
cuntaretur . Baptizatum se statim pene , at-
que est natus , fuisse , quo tempore nondum
in Sinam Europæi illi pervenerant . At
Pro-Rex ad eas interrogationes , quas in-
stituere calumniæ causa consuevit , ve-
niens ; rogavit , idcirco ne ille suam Chri-
sto fidem obstrinxisset , ut pecuniam ab
Europæis acciperet , an , ut , concitatis
turbis , defectioneque facta , cooptaretur
in Mandarinorum collegium ? Cumque
Lucas neque de rebellione , neque de pe-
cunia , aut ambitu agi , seque christia-
num esse , ut Deo vero inservire , obti-
nereque ab eo post mortem sempiternam
felicitatem posset , dixisset , tum iudex ,
aliquemne ascendente ad cælum ali-
quando conspexerit , percuntatus est . Cui
ille confidenter , nondum vidisse se quidem
quod iudex quæreret , dixit , propterea
quod vitam hanc adhuc degeret plenam
miseriarum : confidere tamen se , fore ,
ut , ubi vita functus mortali sit , id sibi
in-

intueri liceat; se namque Europæorum,
opera attigisse cognitionem Dei, ejusque
legibus parere didicisse. Quare, si faciat,
quod didicerit, sese promissam christianis
gloriam post interitum corporis certissime
consecuturum. Instare tamen adhuc ju-
dex, & de numero christianorum quærere.
Quos cum Lucas partim infantes, partim
integra ætate, omnes numero ad mille,
esse dixisset; tum ille hortari, ut impo-
sterum christianus esse desineret. Contra
Lucas magna animi constantia respondit:
se, tametsi periculo capitis, numquam,
tamen ab fide, quam Christo dederit, di-
fcessurum. Hujus responsi causa quinque
illi inflicti colaphi fuerunt. Interim Pro-
Rex, ut nova hominem arte circumve-
niat, ex eo quærît, num Europæus, quem
hospitio exceperat, usus uxoris ejus con-
suetudine fuerit? id ut aperte fateatur, mo-
net: Si pareat, eum se capitis supplicio
erepturum. Sed hi conatus frustra fuere.
Nam Lucas, qui nihil præter rei verita-
tem fateri statuisset, falsa esse omnia re-
spondit: nam si talia Europæi auderent,
tanta Sinenfes patientia numquam laturus
fuisse, ut versari illos in suis domibus pa-
terentur. Nunc contra æquo animo ab
iis Europæos excipi solere, quod illis san-
ctæ, beatæque vitæ magistris uterentur.
Igitur judex, qui nihil extorquere ab eo
potuisset, ira incensus, alapis hominem
affli-

affligi iussit, quibus vir innocentissimus quinque, & vicienis tanta crudelitate, & sævitia cæsus est, ut e deformata facie magna sanguinis copia manaret. Adducti cum Luca in iudicium fuerant Vuang-Thaddæus-Go-chinus, & Ching-Joseph-Chung-Hoëjus, quorum priore Alcoberus, altero Serranus, & Diazus hospitibus usi fuerant. Cum interrogati iisdem de rebus essent, de quibus supra est demonstratum, atque ita plane, uti factum ab aliis erat, respondissent, alapæ Josepho decem, Thaddæo vero quindecim incussæ fuerunt. Sequutus mox duos illos gravissimus, ac celeberrimus Chin-Dominicus Vuen-Chie senex fuit, quem ita est allocutus Pro-Rex: Tu vero, cum sis peritus sinensium doctrinarum, librosque Confucii, ac Menzu teneas, quemadmodum falsam sectare christianorum legem? Senex, qui nulla re terrebatur, continuo: Confucius, & Menzu, inquit, nihil de vitæ, mortisque auctore tradiderunt. Contra Europæi me Deum nosse, & primam vitæ, ac mortis quasi radicem; præmia rursum, atque supplicia, & veram rerum omnium originem docuerunt. Ob eam responsionem iratus iudex, insanire hominem dixit, quinisque cædi alapis imperavit. Post objurgare hunc in modum perrexerit: Tu istis legibus vivens aut rebellionem studeas, aut certe pecuniæ servias, ne-

neceſſe eſt. Minime vero, inquit ille. Propterea enim chriſtianus ſum, ut Deum colam, eique ſerviens, æterna felicitate potiri poſſim. Sed Pro-Rex, quid? inquit: uſquam ne tu vidisti Deum? Non equidem vidi, reſpondit ſenex: ſpero autem, ſi modo ejus leges ſervaverim, fore tandem aliquando ut videam, cum e mortali vita exceſſero. Nam ſi in vita bonis propoſita præmia, malisque decreta ſupplicia ſunt, quid eſt, quod quiſquam, eſſe item poſt mortem hominibus & præmia, & ſupplicia conſtituta, neget? Rurſum Pro-Rex: quam ob cauſſam, inquit, veſtris domibus Europæos excipitis? Cui Dominicus: quod ſint, ait, magiſtri, doctoresque noſtrarum legum. Nam, quemadmodum, ſublato e ludo Præceptore, continuo ordo ab auditoribus, doctrinaque omnis tollitur, quod doctrina, præceptisque deſtituantur; ita, remotis Europæis, doctrina nos, atque inſtitutio deficeret, neque ipſi colendæ virtutis rationem retineremus. Hoc dato reſponſo, quinque iterum alapis cæſum magni animi ſenem, convicio Pro-Rex eſt inſectatus, turpiſſimo eum appellans nomine, quod nos nomen ut taceamus, honeſtas ſuadet. Poſtremo ad eum ſe Pro-Rex convertens, annon pudet, inquit, filias habere te domi, quæ Europæis famulentur? Negavit Dominicus, atque incredi-

dibili animi virtute, ac fortitudine, gnatas, inquit, meas ministrare Europæo, neque tuli umquam, neque feram. Mihi namque uni famulandi sacerdotibus onus servavi. Atque hoc ille modo, dum pene confecta ætate esset, improbitatem, crudelitatemque Pro-Regis vicit.

Haftenus quidem singularia plane constantiæ, & fidei exempla, repetito sæpe, uti demonstratum est, periculo, Sinenfes christiani dederant. Sed quemadmodum primis reipublicæ christianæ temporibus, cum nostri exagitarentur, ubi in discrimen venissent, infirmi a fortibus, quasi triticum a palea secernebantur; ita afflictis in Sina Ecclesiæ rebus, labi e christianis nonnullos permisit Deus, ut auxilii sui in iis illustrior vis appareret, qui de tyrannis forti, invictoquo animo triumphassent.

Christianis
XI. in iudiciū
adductis, octo
ex iis turpi-
ter a religio-
ne desciscit;
tres reliqui
sortes in sen-
tentia perfe-
verant.

XLVIII. Ac primum quidem omnium, qui fidem fefellerit, Kuo-Petrum-Hy-jinum fuisse ferunt, qui in iudicium vocatus, etsi neque tormentis excruciat, neque minis territus esset; continuo tamen ab religione Christi Servatoris ad superstitionem ethnicorum transfugit. Introducti deinde, post Dominici senis, de quo supra diximus, victoriam, ad tribunal fuerunt Chin-Franciscus-Lanus, Chin-Thomas-Xang-Ganus, Chin-Nicolaus-Xinus, Chin-Josephus-Koanus, Chin-

Chin-Dominicus Kieu, qui erant omnes ex ordine litteratorum; Lieu-Margentius-Langus, Lieu-Franciscus-Xunus, Vuang-Petrus-Onus, Mien-Simon-Káo-Hinus, & Mieu-Thomas-Xang-Cheu. Hi, cum Pro-Rex peteret, esset ne ipsis in animo christianam adhuc religionem profiteri pergere, confestim omnes, Chin-Thoma-Xang-Gano ex litteratis, ex reliquis vero Lieu-Margentio-Lango, & Lieu-Francisco-Xuno exceptis, miserandum in modum conciderunt. Transfugas octo abduci Pro-Rex statutam adoratum iussit; cui sacrilegi paruerunt. Tres reliquos separari iudex præcepit. Etsi locus, in quo constiterant, aliquantum ab fede iudicis remotus erat, ad eosque sæpe Assessores Pro-Regis accedebant, hortabanturque, ut se christianos deinceps minime futuros dicerent; ajebantque, ni fecissent, imperaturos se, ut flagrorum ictibus exanimarentur, brevique cubicula domus suo sanguine conspersa cernerent; nostri, quin eorum simulatam, sævamque misericordiam morarentur, fortes in sententia manserunt.

XLIX. His rebus gestis Pro-Rex pueros quatuor, qui subsidia quotannis nostris sacerdotibus supportarant, adduci ad se imperavit. Adductos iudex rogat, quantum in annos singulos deferre pecuniæ ad Europæos, quantumque ab eis ipsi portorii

Sacerdotum portitores, quantum pecuniæ detulerint, quantumque ipsis sit datum, interrogatur.

no-

nomine accipere folerent? Illi, Europæis singulis quotannis C., Episcopo autem CL. detulisse se, sibique X. nummum argenteorum, de quibus supra memoratum est, in singulos ob portorium numerari consueſſe, dixerunt. Ex his nihil deinceps quæſitum fuit.

Pro-Rex mulieres ad tribunal duci imperat: Mariam Hy viduam, quod hospitio Europæos exceperit, reprehendit, eidemque tormentum minatur; exque virginibus Dominicanis de turpissimis rebus quæritat.

L. Tali modo cum de Sinensibus viris quæſtio eſſet absoluta, vocatæ in iudicium mulieres fuerunt, inter quas primum Maria-Hya vidua locum tenuit. Ex ea cum percuntatus Pro-Rex fuiſſet, quemadmodum, mortuo marito, Europæum in ſuis domibus occultafſet, nihil extorquere potuit, quod eſſe noſtris detrimento videretur. Sed etſi rem illa negabat, neque jam ex veſtibus, & reliqua Sanſui ſupellectile, quæ deprehenſæ apud eam fuerant, convinci poterat, quod eas domum aliena opera advectas, ſervafſe dumtaxat ſe confirmaret, nihilominus eam iudex cruciari tormento imperavit. Ubi illa manus in tormentum coniecit, continuo Pro-Rex militibus, ut ceſſarent, juſſit: quo tempore ipſa inceptam orationem perſequuta, habitafſe quidem apud ſe Europæum, quum maritus viveret, affirmavit: hoc autem mortuo, non item. Interrogantique Pro Regi, qui homines Europæi illi eſſent; atque, niſi ut illorum familiaritate per impudicitiam abuteretur, quam eos ob cauſſam hospitio excepiſſet;

pisset ; homines esse Europæos , respondit, castis , sanctisque moribus , idque contendere , ut instituant reliquos homines , doceantque rationem , qua consequi gloriam , felicitatemque sempiternam possint. Se vero neque voluisse , neque potuisse iis ad libidinem uti , quæ deducat homines ad brutorum conditionem . Post viduam dimissa , adductæ in iudicium virgines fuerunt , quas supra diximus , quinque , Kuo-Theresia-Chuna earum maxima , Kuo-Aloyfia-Xa , Kuo-Lucia-Hieu , Mieu-Johanna-China , & Chin-Rosa-Kueya . Vetat autem pudor dicere , quod primum ex ipsis quæsitum a Pro-Rege fuit . Itaque describemus , quod est ab illis responsum Pro-Regi datum . Ergo illæ : colere virginitatem se , quam jam inde ab infantia dicassent Christo , talesque turpitudines ne nosse quidem , dixerunt . Neque tamen hæc virginum pudicitia , atque in respondendo modestia tanti fuit , ut iudicis licentiam reprimeret , quin nimium inverecunde adhuc de sufflationibus interrogaret , quarum pro sua ipsi improbitate Europæos accusabant : & quamquam tubulis iis , ex quibus calumniandi sumta occasio fuerat , pedum Sansii contineri virgines affirmarent , quo , pro sacrorum celebritate , insigni Episcopus uteretur , ad sufflationes vero huiusmodi illius usum esse omnino

nullum ; ipsis tamen iudex impudentissimus diu multam interrogando molestiam exhibuit , eo usque progressus , ut Theresiæ tormentum manuum ostentaret . Sed eo cruciari miseram noluit .

Pro-Rex donum ab Imperatore recepturus, quæstionem intermittebat, Christiani tres tormentum effugiant. Pro-Rex, ne Sacerdotibus quidquam interim cibi detur, cavet; omniumque nomina describi jubet, Transfugæ octo imaginem Christi conculant.

LI. Supererant adhuc ad quæstionem Dominicani . Interim nunciatur Pro-Regi , adventare , qui munus ei ab Imperatore missum deferret . Ipse continuo suis imperat , ut , quæ essent ex usu futura ad recipiendum donum , compararent , & magnifico apparatu , cunctis urbanis Mandarinis comitantibus , Imperatoris legato obviam venienti procederent . Quæ res in causa fuit , ut iudicium de Europæis incastinum differretur , hominesque Christiani tres , qui , quod deficere ab Christi fide constanter renuissent , damnati flagris fuerant , fortuito supplicium effugerent . Dum Pro-Rex quæ ad apparatus , de quo dictum est , pertinerent , ut honorifice munus reciperet , disponebat ; de cruciandis christianæ religionis propagatoribus cogitabat , suosque monebat , ut diligenter caverent , ne quid illi cibi coemerent , etsi erant adhuc jejuni . Antequam legato Imperatoris obviam iretur , reversus Pro-Rex ad tribunal , omnes adduci eodem iussit , de quibus latum iudicium fuerat , ac suum cuique nomen , ut in pagina describeret , imperavit ; cui paginae primum hæc verba inscripta erant :

An

Anno XI. Imperatoris Kien-Lung, luna X. Post nomina secuta sunt christianorum. Sed ii octo, quos, ejurata Christi religione, adorasse statuam demonstravimus, antequam nomina describerent sua, Christi ejusdem cruci suffixi imaginem conculcare sunt jussi (nam quatuor, quinqueve imagines ejusmodi in ipso majori tribunalis cubiculo tenebantur) unusque omnium scelestissimus Chin-Dominicus-Kieu, cui scabie corpus, multo autem magis animus vitiatum, infectusque erat, pressam pede imaginem fregit: reliqui, quorum magis infirma, quam prava voluntas erat, ita pedes tulerunt, ut imaginem transgredierentur, nec tangerent. Nefario scelere a transfugis admisso, christiani omnes, cum horis quinque asperis lapidibus genu innixi constitissent, rursus in carceres abducti sunt.

LII. Postero die, qui dies erat ad IX. kal. decembres, Europæi mature sunt in judicium inducti, eodemque Pro-Rex e templo reversus, quo se, pro singularibus, quibus auctus ab Imperatore fuisset, beneficiis, gratias diis acturus, contulerat, venit. Ac primo quidem Sansium ad quæstionem vocavit, qui quasi agmen Christi Servatoris militum ducebat. Is, quot natus esset annos, interrogatus, sex supra sexaginta, respondit. Rursum, cum ex eo Pro-Rex quæsisset,

Pro-Rex Sansium evocat; deque eo quæstionem molestissimam ad multum tempus producit: tormenta, ac supplicium capitis minatur, ac sæpe hominem alapis sævissime cædi jubet.

100 DE MARTYR. SINENS.

quot annis in Sina versatus esset, annis, inquit, duobus, & triginta; esse autem Hispanum e Catalonia Provincia se, nam hoc etiam ab homine percuntatus iudex fuerat. Pro-Rex, cum facta esset Hispaniæ mentio, quod esset Regis Hispaniarum nomen rogavit: cui noster Philippum appellari eum dixit. Nam, quod hoc eodem anno ad diem VII. idus julias Rex obiisset, nondum ejus rei nuncium Sinenfes acceperant. Ventum mox ad Pontificis nomen fuit. Hunc Sansius Benedictum vocari respondit. Ubi cognitum de nominibus est, Pro-Rex, uter ei, ut in Sinam contenderet, auctor fuisset, Rex ne, an Pontifex, quæsiuit. Negavit utrumque Sansius; addiditque, sponte se, non jussu, neque hortatu aliorum venisse, ut procurare salutem animarum posset. Persequitur cœptam quæstionem Pro-Rex. Quærit, num per Philippinas insulas, cum in Sinam navigaret, transierit: quod cum Episcopus affirmasset, hunc rogavit, quisnam eisdem in insulis imperio potiretur? Episcopus nil cunctatus, Rex, inquit, Hispaniarum. Mox Pro-Rex, studio ne, inquit, concitandæ plebis, ut ab Imperatore deficiat, Sinam petisti? Negavit noster, ac, nihil nos, ait, tale vel conati sumus, vel umquam conabimur. Quid enim? quum anni sint amplius centum, ex quo in divinis legibus instituere

no-

nostri Sinas cœperunt ; an quidquam est tale de nobis usquam auditum ? Pro-Rex iratus , ad milites sese convertit , ac torqueri hominem imperavit . Ubi vir fortis imprimis , invictoque animo , tormenta parari vidit , humi se continuo excrucian- dum prostravit , sed tamen fatelles unus ictu eum calcis appetens , ut surgeret , iussit ; neque enim imperasse tormentum Pro-Re- gem , sed minatum tantum fuisse confirma- vit . Rursum Pro-Rex , quo tandem modo , inquit , cum tam longe ab Hispania Luzo- nia , seu Manila insula absit , eam Rex gubernet ? quid ex ea illi in annos singu- los redit ? His Episcopus respondit : nihil redire inde ad Regem , neque hunc com- modi aliud capere , nisi quod æterna ho- minum salus procuraretur : cuius rei gra- tia multa millia nummum in incolas , qui magna inopia laborent , ab Rege erogari . Sed institit Pro-Rex : & vestri , inquit , imperii homines sunt ne omnes christiani ? Affirmavit Sansius , atque ab Rege quidem ad abjectissimum quemque infimæ plebis . Suntne apud vos , subdidit Pro-Rex , mili- tes , & magistratus , ac iudices , ita ut sunt in Sina ? Quum Episcopus annuisset , tum ille ; Cum fueris in Europam reversus , adi- bisne ad Regem , atque ad Pontificem ? An isti te dignitate aliqua augebunt ? San- sius , ut incredibili moderatione , gravi- tateque animi erat , recta me , inquit , in

meum cœnobium conferam . Non enim de Rege , aut de Pontifice laboro . Dignitates autem , magistratusve similes mihi regnorum esse videntur , quæ exhiberi in theatris solent ; nam scena absoluta , omnia confestim evanescunt . Hac re dicta , Pro-Rex hominem quinque alapis plecti iussit , quasi loquutus esset stultorum more : indeque ad Episcopum versus : atqui , ait , si neque de dignitate , neque omnino de præmio laboras , quid ergo te impulit , ut , spretis incommodis , quæ laturus esses , in Sinam proficiscerere ? Ego vero , respondit Sansius , non inani rerum , quæ cito intercidant , sed spe consequendæ sempiternæ felicitatis per-motus , propagandæ christianæ religionis causa veni . Sed Pro-Rex , qui ignarus decretorum Evangelicorum esset , quanam in re positum esset sempiternæ felicitatis præmium , quæsivit . In cognitione Dei , respondit Sansius , quam sequitur amor , ex quo sempiterna , incredibilisque delectatio , atque felicitas oritur . Perstitit Pro-Rex , rursusque interrogavit , sint ne ædes in cælorum regno ? At Sansius , diversæ , inquit , prout quisque , cum viveret , est meritus , in cælo sunt mansiones . Si cum iis mansionibus ædes , quibus utuntur in terris homines , comparentur , tanti æstimandæ sunt , quanti loculi formicarum . Commotus ad hæc
ju-

judex, insanire hominem, quare alapis quinque cædendum, dixit. Mox Sansum alloquens, in Europa, ait, quis rem christianorum publicam moderatur, Rex ne, an Pontifex? Verum Sansius: quæ ad rem civilem, terrenumque regnum pertinent, inquit, Rex moderatur, Regique tributa penduntur: quæ vero ad doctrinam, rationemque dirigendorum, ducendorumque ad vitam sempiternam animorum spectant, hæc a Pontifice administrantur. Pro-Rex, ut erat vaferrimus, ratus ab se implicari laqueis interrogationum senem posse: In Sina, inquit, omni, si veram religionem amplecteretur, quisnam imperium obtineret? Ad hæc continuo vir prudens, Imperator, inquit, idem, qui modo obtinet. Post, cum Pro-Rex ex eo percuntatus esset, omnes ne Macai incolæ christianam religionem profiterentur; ipse vero, cum secundo ad Sinam veniret, an Macao profectus esset; respondit, Macaenses omnes christianis partibus studere, parereque Regi Lusitanorum; seque ita, ut judex dixerat, in Sinam iterum venientem Macao fuisse profectum. Pro-Rex inceptam quæstionem persequutus, quot anni essent, rogavit, ex quo reverterat in Sinarum Imperium? Ille, octo, respondit. Jam captum esse Episcopum Pro-Rex putabat. Itaque continuo sumsit; Quæ ista fuit au-

dacia, ut Sinam repeteres, cum edicto Imperatoris vestram esse legem, ut falsam, proscriptam scires? Atqui falsa ut sit, inquit Sansius, fieri omnino non potest. Lata enim a Deo est, qui cum sapientissimus, optimusque sit, & falli, & fallere prorsus nequit. Hoc responso repressus iudex, alio convertit orationem, quæsitque, ubinam Deus consisteret? Cui Sansius: est ille, inquit, ubique; heic adest, atque tuo etiam in corde. Pro-Rex ad satellites conversus, quinque, inquit, colaphis eum rursus cædite, nam insane loquitur. Inde ipsum interrogans subdit; si adest heic Deus, quid est, quod tibi esse adjumento nolit? Atqui adjuvat ille me quidem, Sansius respondit: nam quod injurias, æumnasque istas, quas majori mihi merito ad coronam futuras confido, fortiter, patienterque feram, id sum equidem illius beneficio consequutus. Perrexit Pro-Rex, rogavitque, viderit ne umquam Sansius Deum? Negavit noster, atque, Deus, inquit, propterea quod spiritus omnino sit vacans corpore, hisce oculis cerni non potest. At impius iudex, quemadmodum, inquit, ei fidem adhibeas, quem numquam videris? Cui Sansius: ne vos quidem, ait, Imperatores Fo-Hy, & Puon-Ku videritis, neque, quo magistro gloriamini, Confucium, neque discipulum ejus Menzu,

zu, neque vestrates alios, quorum tanta est apud Sinenfes existimatio, atque celebritas, cum tamen nemo sit vestrum, qui eos vixisse aliquando neget: quanto ergo nobis magis habenda Deo fides, cum divinas præsertim scripturas habeamus, quarum est firmum imprimis, atque gravissimum testimonium? Pro-Rex ita, ut facere consueverat, ubi ei nihil, quod opponeret, succurrebat, ut quini ei adhuc colaphi ducerentur, quasi diabolica verba dixisset, præcepit; invidiamque Sansio ex interrogatione quærens, quæ, inquit, vestra ista est arrogantia, ut Sinenfes populos doctum veniatis? His, ne commotus quidem, Episcopus respondit: docemus eos, ut cognoscant, & ament Deum. Id ni fecerint, norint, se perpetuo perituros. Namque extare Deum; hominem vero præditum esse animo, qui polleat ratione, tam est clarum, tamque perspicuum, ut id Philosophi Ethnici, natura duce, assequuti fuerint, litteris mandaverint, tradiderintque memoriæ posterorum. Quæ cum Episcopus dixisset, Pro-Regis jussu quinis alapis cæsus fuit. Ab iudice deinde interrogatus, quemadmodum per æneos tubulos in mulieres sufflaret, sic respondit, ut criminationem dilueret, & quemadmodum antea III. kal. septemb. fecerat, explicaret, qui sit usus Episcopalis pedi in re divina. Addidit do-

doctrinam de sufflationibus mysticis, quæ adhiberi in baptismo, Ecclesiæ instituto, solent. Tum Pro-Rex; placentula, inquit (nam hoc impius ille panem Eucharisticum appellabat nomine) quam christianis præbere, oleumque, quo eosdem linire consueitis, ea quidem certe ad fascinum, veneficiumque pertineant, necesse est. Alius enim ejusmodi rerum usus esse qui potest? Ad hæc Sansius: Atqui, si ea ad veneficium pertinent, inquit, quid est, quod, in singulis orbis partibus christiani cum sint, omnesque sacris communificent, oleoque ungantur, veneficio, & fascino non afficiantur? Convictus Pro-Rex, alio convertit orationem, & cur, ait, singula eorum nomina, qui sunt baptismo initiati, abs te in tabulas referuntur? Ut sciam, respondit noster, qui sint christiani, eorumque curam gerere possim. Cumque plerique infantes baptizentur, si forte fortuna mori parentes eorum contigerit, ne suum quemque nomen fugiat, quod ei fuerit in baptismo inditum ab sacerdote. Accedere ad hæc consuetudinem Ecclesiarum, dixit. Nam toto terrarum orbe eundem usum obtinere. Quid vero est, ait, judex, quod iis, qui vestra sacra sectantur, Confucium, avosque ut adorent, non esse concedendum existimes? Res est, inquit Sansius, Romæ jam judicata: deque ea re Pon-

Pontifex ad hoc Imperium annis superioribus legatos misit. His ultro, citroque dictis, iudex de rebus huiusmodi interrogandi finem fecit, conversaque ad aliam quæstione, quisnam eum Foganum reversum hospitio excepisset, percuntatus est. Ipse, quod explorata jam omnino res erat, Kuo-Ambrosium Hy-jinum, palam respondit. Post iudex alia investigare coepit, eaque illorum similia cum sint, quæ hactenus demonstravimus, prætermittenda esse existimamus. Illud tamen prætereundum non est, quod, cum Pro Rex supplicium capitis Episcopo minatus esset, vir Apostolicus, esse id quidem in ejus potestate, arbitrioque respondit. Ac duas quidem horas quæstionem Episcopus molestissimam, atque sævissimam pertulit, eoque spatio alapis ad quinque, ac viginti tanta vi, atque impetu afflictus fuit, ut ex ore sanguis efflueret, indeque tumor, inflatioque tanta faciei existeret, ut oculi non apparerent, auriumque usu facili ad mortem usque privaretur.

LIII. Sansio Royus successit, ex quo Pro-Rex primum quæsit, quem annum ætatis ageret? Cum ille sextum, & quinquagesimum, dixisset; tum Pro-Rex, quo, inquit, ex Regno es, qua ex provincia, quoque ex oppido? Huic continuo noster: ex regno Hispaniæ, ex Aragonia Provincia, ex oppido Hinojosa, inquit. Sed Pro-

Ex Royo iudex de causa cur in Sinam venerit, de mysteriis, de Europa, deque aliis rebus multa percountatur.

108 DE MARTYR. SINENS.

Pro-Rex : cum Præfectus Manilensis tuus in Sinam te misit, ecqua dedit mandata, quidque fieri abs te velle se ostendit, ut christianos ad defectionem concitares? Nos vero, sumsit Royus, qui in Sinam mittimur, nostrum singuli munus, quidque facto sit opus, novimus. Qui mittunt, abite, inquiunt, in Sinam Evangelium promulgatum, nihilque præterea imperant. Contra judex, profecto, inquit, ducti studio concitandæ plebis venitis. Immo vero, respondit Royus, nihil nobis tale in mentem venit. Inde Pro-Rex, ut de Sinensibus christianis, Europæisque cognosceret, quot, inquit, christiani sunt in oppidis Fo-ninga, Ning-te-Lo-yuen, Fo-cheu, Yen-Ping-fu, Chin-nen-cheu, Chang-cheu? Ego vero, respondit Royus, numquam in his oppidis fui, neque rationem de his rebus reddere inquirenti possum. Sed perstitit ille, & quot, inquit, in Kiang-siena, ceterisque provinciis sunt Europæi? Cui noster, ne id quidem, inquit, mihi est exploratum. Ex quo enim cautum est, ne oratoria, templave ulla christianis essent, neque me ad reliquarum provinciarum sacerdotes visendos contuli, neque quidquam ad eos litterarum dedi. Tum mutato sermone, judex, quantum, ait, in annos singulos Pe-Kingensi Ecclesiæ pecuniæ penditis? Ad hæc Royus, Pe-Kingen-

genes , inquit , sacerdotes , nulla nos auctoritate præcedunt : propterea neque pendimus eis quidquam pecuniæ , neque ipsi ex nobis petunt . Christianis autem , subdidit iudex , quantum pro hospitio solvitis ? Nihil omnino , ille respondit . Post iudex , quamobrem igitur , inquit , vobis ministrant ? Ac Royus , opera , inquit , quam nobis præstant , exigua est : præstant autem Dei causa , isque eorum in nos pietatem gloria sempiterna remunerabitur . Inde Pro-Rex , quodnam , inquit , de vobis supplicium sumetur , si reversi fueritis in Europam ? Nullum , respondit Royus . At si jubentibus , ait iudex , vos in Sinam venire , dicto audientes non essetis , cuiusnam poenæ damnamini ? Cui vir Apostolicus , neque ob id quidem plecteremur . Nos enim non iussu , mandatove Præfecti , sed sponte ipsi nostra venimus , ducti studio procurandæ salutis hominum sempiternæ . Rursum Pro-Rex , quum , inquit interrogans , præceptum ab Imperatore esset , ut vobis templa tollerentur , vestramque legem coli , promulgarique vetasset , quid causæ fuit , cur hinc secedendum non arbitrare ? Ego , inquit Royus , adversa per id tempus valetudine laborabam : deinde christianos ut ministris , sacrificisque destitutos relinquerem , id vero committendum non putabam . Sed iudex eo ,
unde

110 DE MARTYR. SINENS.

unde digressus erat, rediens, quæ vobis inquit, vestram legem propagatum in Sinam veniendi causa est? Rogas? inquit noster. Scilicet ut verum homines agnoscant Deum, ut ament, ut imperata faciant, atque per hæc æternas inferni poenas evadere, sempiternaque gloria potiri possint. At iudex: qui ausus es Sinam, petere doctum christianos falsa dogmata? Ego vero, respondit ille, nihil, præter ea, quæ antea demonstravi, christianos docui. Tum Pro-Rex, quid rei, inquit, placentulæ commiscetis, quam præbere christianis consuevistis? Nihil plane, inquit ille; nam quod christianis, facta panis consecratione, præbemus, id non placentula quidem, sed ipsum est corpus Jesu Christi. Cur, ait iudex, ad oculos, ac cetera corporis membra christianos linitis? Linimus, ait Royus, eos, qui gravi morbo conflictantur, idque ad oculos, aures, partesque illas corporis reliquas, in quibus resident externi sensus, Deum rogantes, ut, quæ per eosdem sensus peccata admiserint, ea ipsis velit ignoscere. At enim plerique omnes, inquit Pro-Rex, erui a vobis extrema ægritudine laborantibus oculos, affirmant, neque defunt, qui viderint. Negavit noster, atque ea, inquit, manifesta calumnia est, reosque nos agunt criminis, quod numquam admisimus. Ac sæpe quidem per superiores
etiam

etiam quæstiones infulsam hanc de effossis morientium oculis calumniam mandarini nostris objecerant, crebroque repetitis quæstionibus, ut faterentur, ex ipsis vi extorquere conati fuerant. Ea res quo spectaret, ne Apostolici quidem illi viri, etsi diuturno jam usu Sinensium rationes perspectas habebant, intelligere potuerunt, deque ea neque nos, certi quod referamus, habemus quidquam. Nam quod Serrano vir quidam Sinensis ex eorum ordine, quos litteratos vocant, significavit, persuasum iis esse, adhiberi ab Europæis mortuorum oculos ad pictas imagines conficiendas, quod fieri arte illud omnino non posse putent, tanta ut sit oculorum imaginum cum ipsis hominum oculis similitudo, id vero nobis non placet. Ab his rebus iudex, quas demonstravimus, ad ossa venerabilis viri Capillæ, & ad theriacam, atque cocolatam quærendo descendit; ossaque illa infantis esse, atque ad veneficium ab Europæis adhiberi; cocolatam autem non ad veneficium modo, sed ad incitandam etiam libidinem, eamque abortu celandam pertinere dixit. His autem percuntationibus, quæ, ut Episcopus Tipasitanus animadvertit, originem ex impurissimis, perditisque moribus ethnicorum Sinensium, ducebant, pro sua innocentia, & castitate Royus ita respondit, ut turpem, ineptam.

112 DE MARTYR. SINENS.

eptamque calumniam depelleret. Post de Pontifice, de Rege, de Palatiis ab iudice multa interrogatus, de omnibus ita, uti decebat, demonstravit. Inde Pro-Rex, quid porro est, inquit, quod Pontifex, vosque omnes tanto studio, & diligentia de propaganda vestra religione laboretis? Quia, sic enim noster continuo respondit, ipse, qui nos ex peccato in libertatem asseruit, Jesus Christus pro summa sua in nos voluntate, studioque salutis hominum sempiternæ, Apostolis, eorumque successoribus in mandatis dedit, ut ubique gentium Evangelium promulgarent. Atque ad Pontificem imprimis mittendi ad universas regiones orbis religionis vindices, propagatoresque cura pertinet, ut Christi legislatoris præceptis pareat. Perrexerit Pro-Rex, ac, quantum quidem, ait, conjicere mihi ex oratione tua licet, videmini vos mihi, Pontifexque optare, ut Sinenses omnes christiana sacra sectentur, & colant. Utinam vero, respondit ille, omnes colerent. Judex, etsi nutu minus sibi id responsum placuisse significavit, tamen quæsit, quis rem Sinensium publicam, si cuncti sese Christo dederent, esset moderaturus? Sed Royus, dubium ne est? inquit. Imperator Kien-Lung, idem, qui rerum modo potitur, ejusque post eum successores; non secus, ac in Eu-

ropa usuvenit, ubi suo reges singuli regno potiuntur, imperantque, neque in eorum negotia immittit se Pontifex, ut qui eorum solummodo curam gerat, quæ æternæ hominum felicitatis procurationem continent.

LIV. Post Royum vocatus in iudicium Diazus est. Interrogatus de ætate, de regno, de provincia, deque urbe, in qua natus esset, quamdiu in Sina constitisset, ac apud quos habitasset, ad hæc ipse, annos natum se tres, & triginta, ortu Hispanum ex oppido Ezija provinciæ Bæticiæ esse, in Sina annum jam octavum agere, habitasse apud Mariam-Hyam viduam Ki-tungi, Foganii vero apud Chin-Josephum-Chung-Hoeyum, respondit. Nam quia omnibus perspicue palam erat, quorum Diazus hospitio usus esset, ipse celandum non existimavit. Sed Pro-Rex nihil cunctatus, quæsiuit, quemadmodum, cum destituta marito mulier esset, diversatus apud ipsam fuisset. Licuisse id sibi, dixit noster, ut ejus hospitio uteretur, cui filius esset, isque litteratus, quem tunc vita esse defunctum intelligebat. Percuntari deinde ex eo iudex de Eucharistia, deque causa, quamobrem, cum proscriptam ab Imperatore sciret legem christianorum, Manilam non revertisset, de quibus antea rebus, ut demonstravimus, ex Sansio, atque ex Royo quæsierat;

H

ho-

Item ex Diazio, quæ alapis cædi jubet.

horumque ipse virtutem, respondendique rationem est imitatus. His addita ab iudice, & dicta ab Diazio nonnulla fuerunt, quæ, propterea quod essent similia superiorum, quæ sunt distincte, minuteque descripta, nihil esse Tipasitano Episcopo visum est, cur ea diligentius persequeretur. Igitur illud unum ad Dei gloriam, pro cuius religione tanta Diazius incommoda perpeffus est, narrandum existimavit, denis eum alapis, jubente Pro-Rege, fuisse percussum, ac quinis primum, quod Jesum Christum nominasset; tum quinis iterum, quod de humano animo sermonem habuisset. Adeo molestum est iis, ait Serranus, de animo audire, qui ita vivunt, ac si animi expertes essent.

Diazium
Serranus ad
quæstionem
secutus iisdem
fere, ac ille,
de rebus in-
terrogatur.

LV. Diazium sequutus Serranus fuit, vir nobilis imprimis, & Episcopus Tipasitanorum, cuius tanta vis, & præfentia, atque æquabilitas animi fuit, ut non solum mala omnia fortissime tulerit, sed his etiam affectus, & squalore carceris oppressus, res præclare ab christianis gestas summa diligentia descripserit. Igitur ex eo primum iudex est percuntatus, quot annos natus esset? Ille vero: unum, inquit, & quinquaginta. Tum Pro-Rex: quo ex regno es, inquit, quoque ex oppido? Ex Hispaniarum, respondit Serranus, regno, ex provincia Bætica, exque Guenexensi vico. Persequutus quæstio-
nem

nem Pro-Rex, quot jam, inquit, excurrerunt anni, ex quo ad Imperium hoc Sinenſe veniſti? Decem, atque novem, Serranus dixit. Cumque ex eo quaſiſſet judex, quo itinere in Sinam veniſſet? Ex Hiſpania, inquit, Manilam, hinc Macaum, Macao Cantonum, ac Cantono Foganum veni: Pro-Rex, ubi Manilæ facta eſt mentio; Manila, inquit, magnum ne eſt oppidum? Quod cum noſter negaſſet, tum ille, quid vero Macaum? Eſt ea quoque urbs, Serranus reſpondit, exigua, neque admodum populosa. Navis autem, inquit Pro Rex, quæ Manila Macaum com meat, quantum pecuniæ aſportat mercaturæ cauſſa? Quadraginta millia, reſpondit Serranus, nummum argenteorum, quos *pezos* Hiſpani vocant. Atque is idem Serranus animadvertit tali uſum Pro-Rege interrogandi ratione fuiſſe, quaſi ad noſtros ejus rei procuratio pertineret. Tum a quo exceptus hoſpitio Fo-gani fuerit, judex interrogat, eique Serranus, modo apud Mariam-Hyam viduam in oppido Ki-tungo, modo apud Chin-Joſephum-Chung-Hoeyum in Fo-ganenſi ſuburbio habitare reſpondit ſe; ſcribitque datum jam ſibi idem vitio fuiſſe, quod fuerat ante Diazio obiectum, totidemque ſe fere verbis, atque ille, criminationem diluiſſe. Tibi vero, Pro-Rex adjungit, quantum pe-

cuniæ subsidii nomine quotannis mittitur? Nummum, inquit Serranus, eorundem argenteorum centum. At Pro-Rex, quantum, subdidit, in christianos erogas, ut eos ad tuam legem perducas? Omnino, inquit Serranus, nihil. Nam, mihi quod mittitur, id in victum, vestemque, tum in ceram, & vinum ad rem divinam faciundam, aliosque in sumtus necessarios, totum confertur. Atqui placentulæ, ait iudex, quam præbere vestris soletis, aliquid ne veneficum commiscetis? Cui no-ster, minime vero, respondit; namque, quam tu rem placentulam vocas, ea hostia est consecrata, verumque corpus est, verusque sanguis Christi Servatoris. Eam porro cum christianis communicamus, ut aucti gratia divina, ubi e-vita excefferint, gloria, felicitateque æterna potiantur. Atque harum percuntationum, quas descripsimus, similes reliquæ, Tipasitani Episcopi testimonio, fuerunt, eæque non satis multæ, quod Pro-Rex jam fessus clamitando esset.

Denique Al-cobero in iudicium adducto, interrogatoque, Pro-Rex finem quærendi facit.

LVI. Novissime Alcoberus ad quæstionem vocatur. Hunc quoque iudex de ætate, de patria, de Sinensi commoratione, de hospitio, tum cuiusnam iussu eo venisset, prout consuevit, interrogavit. Ad hæc ille: ætate esse annorum se duorum, & quinquaginta; patria Granatensem, quæ urbs est Bæticiæ provin-

vinciæ in Regno Hispaniensi; in Sina annis jam octo, ac decem versari; habitasse in ædibus Thaddæi-Go-Chini; venisse autem missu Manilensis Præfecti sui. Percuntatus inde permulta plena fastidii Pro-Rex fuit: Ac Hispani, inquit, omnes ne sacra christianorum colunt, lateque regnum Hispanorum patet, & Sinensi præstat? Ecquæ magnificentiores sunt ædes, Sinensium ne, an Hispanorum? Quid Reges? sunt ne alii christiani? ac quotus eorum est numerus? Quibus de rebus cum Alcoberus ita, uti par erat, prudenter demonstravisset; tum Pro-Rex, quot, inquit, christiani sunt abs te baptizati? Huic interrogationi veteranus Christi miles quantum fraudis inesset intelligens, quingenti, respondit: quod hæc responsio neque ab rei veritate abesset, neque numerum indicaret. Post ad præmium Pro-Rex venit, &, quid, inquit, consequere, si tibi facultas Manilam revertendi detur? An te continuo antistitem sacrorum dicent? Ad hæc pro sua modestia ille: sunt, inquit, in ditione Regis Hispaniarum, permulti illustres doctrina, atque integritate morum. Hi creantur antistites. Quid ergo, subdit Pro-Rex, tibi tribuetur præmii, jam senex quum sis? Et ipse: atqui præmium, inquit, a Deo dumtaxat spero, gloriam scilicet sempiternam. Tandem Pro-Rex: cur vero, ait, quum nosse pro-

scriptam Imperatoris edicto christianorum legem, e Sina discedendum non putasti? Cui noster: non discessi, inquit, Dei causa, & causa animarum. Atque ita absoluta molesta, ac diuturna quæstione, agenda, judicandæque causæ christianorum finis est factus.

Accusationes
per caluniam
Christianis ab
Sinensibus da-
tæ cum iis
conferuntur,
quas primis
Ecclesiæ tē-
poribus no-
stris constare
Ethnici con-
suerant.

LVII. Antequam vero sententiam proponamus, quæ qualis esset futura, ex infensis, obfirmatisque adversus nostros iudicum animis suspicari quisque facile poterat; liceat jam nobis, quod poscere res ipsa videtur, a proposito paullisper digredi. Ergo quemadmodum primis Ecclesiæ seculis ethnici, quum nostros homines exagitarent, calumnia usi, nocturnos christianorum cœtus, tamquam nefarios conventus traducebant, quasi his, non honesti solum, sed sanguinis etiam, atque naturæ jura turpissime violarentur, & rebelliones, proditionesque, religionis simulatione, instruerentur; sacram vero Eucharistiam quasi convivium, ex carnibus exanimati infantis, farreque contecti paratum; ritusque sanctissimos religionis reprobabant, quasi præstigia, artesque magicas, quibus nostri ad fascinandos, ad insaniamque adigendos simplices, facilioresque ad credendum homines, uterentur; lacera- bantque Episcopos, virosque apostolicos, ac si seductores, incantatores, atque profani essent: Ita nunc apud ethnicos

Si-

Sinenſes , mulieres chriſtianis ſacris ad-
dictæ , ſacræque virgines eo nomine ac-
cuſantur , ac ſi libidini Europæorum ſer-
viant , eiſque ſe totas tradant ; integer-
rimi , puriſſimique ritus baptiſmi , atque
Epiſcopalia inſignia , occultorum flagitio-
rum , inſtrumentorumque ad impudici-
tiam habentur loco ; hoſtia confeſcrata ,
ſacrumque oleum , venena ad faſcinan-
dos , impellendosque ad infaniam chri-
ſtianos exiſtimantur ; oſſa martyris , quaſi
infantis oſſa ad veneficium ; res , quæ ex
uſu ſacerdotibus noſtris ſunt , ad præſti-
gia , tum ad commovendam , occultan-
damque ſterilitate , atque abortu libidi-
nem pertinere putantur ; ſacerdotes ipſi
fraudis , magiæ , & turbarum , quique
eos ſint ſecuti , rebellionis inſimulantur ;
ac denique ſtudium , & doctrina apoſtoli-
ca , velut artes , atque præcepta ad per-
duellionem , & ſcelus , traducuntur .
Quorum ſane omnium tanta eſt cum ſu-
perioribus ſimilitudo , ut eaſdem præſe-
ferre notas , ſeu in hoſtes chriſtianorum
Sinenſes , ſeu in chriſtianos cadant , ac
illa veterum , videantur .

LVIII. Sed jam ad ſententiam , quæ Sententia a
Pro-Rege in
ſacerdotes ,
Chriſtianos-
que reliquos
lata describi-
tur . lata a Pro-Rege eſt , veniamus . Atque ea
quidem , ut deſcripta ab Epiſcopo Ti-
paſitano in commentariis eſt , ſic habe-
bat . ,

bat . „ Europæi quinque (a) Pe-to-lus
 „ (Sanſius Epifcopus) ; Hoa Kinus
 „ (Joachimus Royus) ; Xi-Hoang Chi-
 „ kus (Francifcus Diazius) ; Te Fan-
 „ Chi-Kus (Francifcus Serranus) ; Fi-
 „ Jo-Vuangus (Johannes Alcoberus) ,
 „ quod animos pervertant hominum , vi-
 „ tientque , capitis condemnantur . Kuo-
 „ Ambroſius Hy-jinus , quod ſcriba
 „ Pe-to-li fuerit , quodque operam pro-
 „ pagandæ falſæ legi divinæ dederit ,
 „ ſtranguletur . De Pe-to-lo , velut de-
 „ cretum ſupra eſt , extemplo ſupplicium
 „ ſumetur . Europæi reliqui quatuor ,
 „ dum ſecus ſtatutum fuerit , in carceri-
 „ bus retineantur . Chin-Joſephus Chung-
 „ Hoeyus ; Kuo-Lucas-Kin jinus ; Vuang-
 „ Thaddæus Go-chinus ; Chin Domini-
 „ cus Vuen-Chieus , quod hoſpitio Eu-
 „ ropæos exceperint , perpetuo exilio
 „ pelectantur . Huic poſtremo , quod
 „ ſenex ſit annorum LXXVII. exigua
 „ pecunia redimendi exilii poteſtas eſto .
 „ Lit-

(a) Solent Sinenſes Europæorum nomina , cum ab ipsis uſurpantur , ut eorum lingua poſtulat , in tot monosyllaba dividere , quot iisdem nominibus ſyllabæ continentur . Cumque pronunciare R. litteram non poſſint , eam aut prætermittunt , aut in aliam immutant . Itaque Petrum , *Pe-to-lum* vocant , Franciſcum autem *Fan-Chi-Kum* , &c. Atque hoc ſatis eſto , ut quiſque intelligat , cur hæc tanta ſit inter nos , atque Sinenſes in nominibus efferendis diverſitas .

„ Litterati quinque Chin-Franciscus-
 „ Lanus ; Chin-Thomas-Xang-Ganus ;
 „ Kin-Dominicus-Kieu ; Chin-Jose-
 „ phus-Koanus ; Chin-Nicolaus-Xinus,
 „ quod falsam sequuti sint legem, e gra-
 „ du dejiciantur, verberibus XL cæ-
 „ dantur, menſeque ipſo, collo conſtricti
 „ *cangam* (a) deferant. Vuang-Petrus-
 „ Onus ; Lieu-Margentius-Langus ;
 „ Lieu-Franciscus-Xunus ; Mieu-Tho-
 „ mas-Xang-Cheu ; Kuo-Petrus-Ul-ji-
 „ nus ; Mieu-Simon-Kao-Hingus, quod
 „ falſæ legi paruerint, verberibus XL.
 „ cædantur. Qui per hos annos Cantonum
 „ ſubſidia Europæorum importaturi com-
 „ mearunt adoleſcentes, Mieu-Raymun-
 „ dus-Xang-yu ; Mieu-Paulus-Kiu ; Mieu-
 „ Franciscus - Fungus ; Chin-Thomas-
 „ Me, X. argenteos nummos, quod ip-
 „ ſis eſt portorii ratione datum, reddant ;
 „ idque fiſco addjiciatur. Vidua Mieu-
 „ Maria-Hya, & Virgines Dominicanæ
 „ Kuo-Thereſia-Chuna ; Kuo-Lucia-
 „ Lieu ;

(a) Poſtulat omnino ratio, ut paucis genus
 illud Sinenſis ſupplicii explicemus, quod Luſitani
 appellant *Canga*. Conſtat igitur id vinculum ex
 tabulis ligneis quadratis duabus, quæ ita compa-
 ratæ ſunt, ut intercepto ſpatio, qua pervadere
 malefici caput poſſit, claudantur deinde, ac ge-
 nus quoddam *collaris* exhibeant. Magni autem
 ſunt ponderis tabulæ, tamque amplæ, ut reus inſi-
 ſtere pedibus, manuque os contingere nequeat,
 adeout cibum ſumere aliorum miniſterio cogatur.

„ Lieu ; Mieu-Johanna-China ; Kuo-
 „ Aloyfia-Xa ; Chin-Rofa-Kuey , fla-
 „ gris, & *Canga* torqueantur : vidua, quod
 „ hospitio Europæos domi exceperit ; re-
 „ liquæ , quod id institutum profiteantur.
 „ At utrifque redimendæ exigua pecunia
 „ poenæ facultas efto . Anno XI. Impe-
 „ ratoris Kien-Lung , die VII. Lunæ XI.
 „ (XV. kal. januarías an. MDCCXLVI.)
 „ Cheu-Hio-Kienus Provinciæ hujus
 „ Fo-Kienæ Pro-Rex. „

Sacerdotes
 Fo-chei reti-
 nentur : chri-
 ftiani reliqui
 in Fo ganen-
 fes carceres
 transducuntur.

LIX. Hac tam iniqua fententia dicta ,
 eodem die XV. kal. Januarias , Sacerdo-
 tes Europæi quinque Fo-chei iisdem in-
 carceribus manferunt . Nam in Foganen-
 fes Lucas , Jofephus , Thaddæusque trans-
 ducti funt , quid tandem Imperator decer-
 neret , expectaturi ; christianique reliqui
 omnes Fo-ganum perinde miffi , uti ab
 fuo quique Mandarino ita , ut judex de-
 cretat , flagris , & cippo ad collum pu-
 nirentur .

Transfuga-
 rum , qui dā-
 nati & ipfi
 fuerant, unus
 refipiscit, fā-
 eteque mori-
 tur .

LX. Nec vero transfugis profuit ad-
 miffum in religionem scelus , ut feverita-
 tem judicis declinarent . Quamquam fer-
 vatus beneficio Dei Mieu-Simon-Kao-
 Hingus eft , qui mœrens , ac dolens, pro-
 pterea quod metu suppliciorum Chriftrum
 ejuraffet , cui ante perpetuo fuam obliga-
 rat fidem , ubi myfteria Ecclefia , ut
 christianum hominem decebat , fufcepit ,
 pridie ejus diei , quo die publicata judicis
 fen-

sententia fuit, in ædibus Ly-Benedicti decessit, quo, ægritudinis, qua conflictabatur, causa, e carcere translatus fuerat.

LXI. Tali modo ferus, capitalisque hostis nominis christiani, quam erat nostris molitus perniciem, intulit; nihilque prætermisit, quod ad explendam crudelitatem conducere posse videretur. Jam primum omnium de captis, conjectisque Fo-gani in carceres Europæis Sacerdotibus certiorum Imperatorem fecerat, tum mandanti Imperatori, ut homines Macaum, inde in patriam, unde fuissent profecti, remitterentur, litteras dederat, quibus significabatur, pessimis moribus Europæos vivere, multisque flagitiis implicari. Cognosci igitur hæc omnino, sententiaque iudicis puniri oportere. Itaque facile impetravit, ut ei Imperator dijudicandæ causæ, faciundique, quod jus, æquumque esse arbitraretur, potestatem daret. Ipse, ubi se consequutum esse, quod vehementer optarat, vidit, ut in eos animadvertere impune posset, quos sceleris, ac maleficii accusaverat, nihil intentatum reliquit, quo, investigando, inquirendoque, velut est supra demonstratum, aliquid in nostris deprehenderet, quod dignum poena videretur. Ergo priores iudices, quorum sententiis absoluti christiani fuerant, amovit, duosque delegit, quos futuros maxime crudeles

Artes, calūniæque describuntur, quibus usus Pro-Rex est, ut Imperatoris animum in christianos concitaret.

124 DE MARTYR. SINENS.

les putabat : iique jam cum nullius convincere eos criminis potuissent , & remittendos ad sua regna Europæos , hospites autem eorum exilio , christianos reliquos flagris puniendos constituissent ; ipse nimium leniter , mitiusque in eos pronunciatum existimans , augeri cruciatus iussit , quibus innocentes homines afflictos sævissime per quæstionem fuisse ad diem XII. kal. octobr. diximus : Quæstor , & Præfectus Ærario , etsi primum , quod mandarinæ non ex æquo , & jure , sed Pro-Regi obsequendi studio tulisse eam sententiam , quæque objiciebantur christianis , ea esse omnia calumnia a Pro-Rege conficta , cognoscerent , adstipulari sententiæ recusarant , post tamen veriti , ne in ejus offensionem , odiumque incurrerent , in quem summam esse Imperatoris voluntatem perspiciebant , quique maximo ipsis esse incommodo , & damno posset , si rem , quam ægre tulisset , ulciscendam tandem arbitraretur , etsi haud libenter , in scelus tamen consenserunt . Scriptam , obsignatamque causam Pro-Rex Pe-Kingum misit , unaque Imperatorem obsecravit , ut , quæ ipse in Europæos , christianosque ceteros decreverat , rata haberet , ac Sansium continuo gladio percussu imperaret . Etsi autem de ceteris quoque Europæis , Ambrosioque Hy-jino sumi vellet , tamen in aliud tempus differri
sup-

supplicium patiebatur. Petiit idem præterea ab Imperatore, ut sacram suppellectilem, libros, resque reliquas Europæorum cremari, pecuniamque fisco addici, denique ædes, in quibus Sanfius, & Serranus, atque Alcoberus habitassent; ac pueros, qui subsidia Europæis importassent, quidquid ab eis stipendii accepissent, reddere, idque etiam in ærarium inferri, juberet. Neque est tamen his tot, tamque immanibus postulatis capitale hominis in Christianos odium imminutum. Namque, ut facilius conata perficeret, traheretque ad sui voluntatem Imperatorem, multa actis addi plena calumniæ, falsitatumque curavit, Sacerdotesque nostros per summam injuriam multorum, gravissimorumque scelerum reos egit. Itaque confessos fuisse Europæos flagitia, quæ ipsis ab ethnicis falso attribuebantur, scribi fecit; quæ etsi sunt omnia ab Episcopo Tipasitano diligenter descripta, nos tamen, ne tot calumniis, quæ nihil ad rem pertinent, molesti lectori simus, graviora omnino, perque fallaciam, caliditatemque majorem conficta describemus. Itaque Mauricastrensem Episcopum in judicio fuisse confessum scripsit, esurialibus feriis editiori loco sedere se, accedereque ad eum christianos seu mares, seu feminas, velatis capitibus panno albo, eumque salutare consuevisse: tum se
aquam

aquam eis in frontem fundere, eosque lavare, eumque ritum baptismum vocari. Viris in faciem dumtaxat, feminis vero non in faciem solum, sed in alias etiam corporis partes per tubulos quosdam ex indica arundine confectos sufflare turpiter. Hac re ex eorum cordibus expelli dæmonas. Christianis præterea pecuniam largitum fuisse se; eosque primum humanissime habere: docere deinde, Imperatori neque auctoritatem omnino, neque honorem tribui ullum oportere. Europæum illum, qui homines majori numero ad christianismum adduxerit, præstare reliquis gratia, iisque præfici debere; eum vero, qui nullos, remittendum esse in Europam, demtoque, Pontificis jussu, subsidio, publice per vias flagris cædendum, morteque ignominiosa damnandum. Non enim huic aditum in cælum patere. Regnum Manilense egenos olim, atque inopes barbaros tenuisse; cumque eo Hispani suam religionem promulgatum, propagatumque venissent, horum largitionibus, & pecuniæ spe illectos Europæis se, suaque omnia permisisse. Macai templa esse christianorum octo: Dominicanos, & Miraltam Fo-Kiensium Sacerdotum rationes procurare, Pe-Kingensium, & Hang-Kingensium Jesuitas; cæteros reliquorum. Atque hæc quidem ita Pro-Rex Imperatori, quasi ea Sanctius in quæstione con-

fessus esset, per litteras significavit. Nam quæ Sacerdotibus Dominicanis reliquis affinxit, eodem fere revolvebantur: Pontificem, ad quem propagandæ religionis procuratio pertineat, adesse Regi, eumque adjuvare, quemadmodum in Sina, qui primas inter Mandarinos partes obtinet, Imperatorem: Si quod Regnum Christi fidem admiserit, ut in Europa usuvenit, transire continuo illud in potestatem eorum, quos *Missionarios* vocant: missos eo se a suis Præfectis, ut Imperium omne ad Christi religionem converterent, suoque regno subigerent: esse eisdem certum, constitutumque, ab eis, qui legem christianorum amplectantur, Imperatori officium nullum præstari oportere: Commeare quotannis ex Europa in Sinam naves tres, easque plurima nummum millia, quibus sit usus ad religionem propagandam, importare: augeri jam amplificarique in dies numerum Sinensium christianorum: libenter Europæos Sacerdotes in id Imperium venire, propterea quod nihil metuant, cum sciant abesse ab Sinensium legibus severitatem, iisque nullam sibi esse constitutam pœnam: quod summum timere possint, ne Imperatoris edicto in exilium pellantur, & Manilam remittantur, id si fiat, facilem fore, atque expeditum inde reditum in Sinam: Alcoberrum eadem, quæ Petolus, confessum esse

esse . His plura adhuc pari calumnia usus adjecit , quibus Imperatoris animum in nostros , ceterosque viros Apostolicos , christianosque omnes , quam posset , vehementer incenderet . Re per summam injuriam , calumniamque gesta , die xiii. kal. januarias Pro-Rex Pe-Kingum ab Imperatore evocatus , Fo-Keu , ampliorrem dignitatem consequuturus , discessit .

Matthias Fu
nostrorum res
diligenter cu-
rat, Sanctum-
que Episco-
pum de pro-
ximo suppli-
cio per litte-
ras certiorē
facit :

LXII. Harum rerum omnium Serranus a Matthia-Fu præstantissimo Siamensis seminarii alumno certior est factus; qui cum christianos vinctos , carcereque detentos consolaturus , Fo-cheum venisset , modum , quo exemplum actorum , causæ ex tabulario Quæstitoris extraheret , invenit , quæ acta contra christianos Pro-Rex conscribi curaverat . Thomas item Sanchesius ejusdem Collegii alumnus , de quo supra diximus , mense Februario eos inviserat , quibusque rebus poterat , juvarat , ut demonstraret , quantum eos diligeret , quantique penderet ; cui etsi , numerata custodi pecunia , adeundi in carceres facta facultas esset ; metu tamen Mandarinum , qui carceribus præerat , diuturniori colloquio prohibitus , atque die , ex quo venerat , tertio Hing-hoam reverti coactus est . Sed Matthiæ diutius in oppido versari fas fuit , cujus , non secus ac Thomæ , Tipasitani Episcopi testimonio , tantum extitit in nostros studium , atque bene-

benevolentia , ut vel viris eodem illis instituto conjunctis optabilius nihil esset ; quæque aliquid solatii afferre iis poterant , diligentissime procurabat , nunciabatque omnia , quæ ad eos pertinere viderentur . Interim multo jam mense Aprili , cum populus Focheensis nuncium Pe-Kingo expectaret , significatum nostris a Matthia est , nullum de eorum causa adhuc ab Imperatore decretum factum fuisse ; qua ex mora , simulque ex Pro-Regis calumnia facile quisque , quorsum esset res evasura , suspicabatur . Neque vero suspicionem fefellit eventus . Nam a . d . ix . kal . jun , prima luce delatæ ad Maurica-strensem Episcopum a Matthia litteræ fuerunt , quæ sic habeant : „ Ephemeride modo „ Pe-Kingo accepta intellectum tandem „ nunc est , sententiis a Pro-Rege Cheu- „ Hio-Kien latis , ab Imperatore subscri- „ ptum . Itaque tibi martyrii palma , & „ corona brevi tribuetur . Collegis tuis „ una cum Ambrosio manendum in car- „ cere est , quoad alterum Imperatoris „ edictum de eorum supplicio publice- „ tur . Hæc ut cognovimus , temperare no- „ bis ipsi a lacrymis non potuimus . Te , „ ut nobis bene preceris , nostrumque „ omnium memor ut sis apud Deum , ro- „ gamus . „ Est autem ephemeris Pe-Kin- „ gensis , cujus Matthias meminit , diarium , quod jussu Imperatoris quotidie in aula

I

descri-

descriptum, typisque excusum, in omnes Provincias vulgatur: continetque præter ea, quæ ad gubernationem Reip. pertinent, circa quam præcipue versatur, res etiam singulas reorum, de quibus sit capitale iudicium latum.

Sanctus, mortis nuncio accepto, colligit continuo se & singularia virtutum exempla prodit.

LXIII. Epistolam Episcopus submissa voce cum legisset extra conclave, quo in conclavi hæc describebat Serranus; tum intra ingressus magna hilaritate, ipsumque Serranum manu apprehendens: *Accede*, inquit, *scito me quamprimum gladio percussurum* iri; ac continuo in genua provolutus canticum *Te Deum* summa religione, & pietate recitavit: tum Serrano, *tu me heic*, ait, *expecta*: jam ego ad *actæ omnis vitæ exomologesim me comparatum pergo*. Itaque cum collegisset aliquamdiu ipse se, præparassetque, pie, ac diligenter *exomologesim*, ut optabat, peregit, animo adeo per virtutem demisso, tanta caritatis vi, & magnitudine, tantaque copia lacrimarum, ut eum facile agnoscere liceret, qui (ut ait Serranus) dilecti sponsi ad nuptias æternas invitantis brachia jam sibi ad collum cerneret. Facta *exomologesi*, tum collegas alloquens, eorum se imprimis futurum memorem, ubi esset a Deo gloriam consequutus, promissit. Sacra vero Eucharistia etsi summopere refici sese, confirmarique cupiebat, unde viaticum ad æternitatem comparatum, habere-

haberet, & Matthias in eam rem summa contentione nitebatur, & neque precibus, neque pecuniæ parcebat; custodibus tamen tantum incusserant mandarini metum, nullis ut præmiis, aut pollicitationibus induci potuerint, ut eidem Matthiæ in carceres aditum permittendum arbitrarentur. Quod cum Dei voluntate fieri Episcopus reputaret, æquo, hilarique animo tulit, seque ita sustinuit, non modo ut non ægre ferret, sed ne perturbaretur quidem. Ac vitam hætenus sic ille duxerat, ut coluisse perpetuo pietatem, seque ad certamen martyrii continenter comparasse videretur. Nam cum jam inde ab ineunte ætate ita, ut demonstratum est, recte instituentæ vitæ dedisset operam, & diuturnos pro religione labores sustinuisset; tum iniquitate inimicorum religionis, squaloreque carcerum, occasionem sæpissime nactus colendarum maiorem in modum virtutum erat, quibus eum cumulatissime præditum fuisse constat. Ergo incommoda Foggænsis itineris, carceres, catenas, vincula, manicas, famem, quam per dies octo, nonnisi particulis cucumeris, quas ab christianis una in carcere detentis accepisset, sustentarat, alapas ad nonaginta ipsi in judiciis crudelissime inflictas, molestosque, ac crebros ad tribunalia itus, reditusque, tempestate pluvia, cruribus, pedibusque nudatis, ut alia multa præ-

tereamus, tanta patientia, atque æquabilitate animi pertulit, ut tot incommoda ei neque conqueſtionem ex ore umquam extorſerint, neque de vultus hilaritate quidquam detraxerint.

Virtutes
recenſentur,
quibus erat
eximie præ-
ditus Sanctus.

LXIV. Magna etiam animi fortitudine ſæpius eſt uſus, dum de eo habitæ quæſtiones, quas ſupra diximus, fuerunt, ut ipſe quidem eſſe Judex, quemadmodum Serranus ait, Mandarinum autem rei viderentur: neque ipſe ſolum ſuſtineret odium, & ſævitiam inimicorum, ſed aliis etiam chriſtianis ſpiritus ad tormenta, atque necem perferendam adderet. Studium præterea tuendæ religionis, quo vehementer ardebat, mirifice declaravit, idque jam ſtudium tam magnum erat, ut cum eum ad Pro-Regem brevi adducendum monuiſſent chriſtiani, atque, ut caveret, hortarentur, ne quid minus leniter reſponderet, (propterea quod animo ille in noſtros infeſto eſſet, obſeſque Eccleſiis plurimum poſſet) ipſe, etſi ita, uti demoſtravimus, magna animi virtute, & firmitate reſpondit, poſtea tamen Serrano dixerit vereri ſe, ne impudentis Judicis, qui Dei legem eſſet auſus falſitatis inſimulare, petulantiam neque tam acriter, ut par erat, neque tam graviter, ut tempus hortabatur, reſreſſiſſet. Qua vero caritate flagraret, ex eo maxime intelligitur, quod cum chriſtiani ab iudicibus cruciatu, alapis, tormentis vexarentur, tantum

tum ipse ex eorum casibus dolorem capiebat, ut magnam vim lacrimarum effunderet, homo, qui propriis oppressus malis, non modo fletum, sed ne gemitum quidem umquam emisit: tum ex eo, quod cum Serranus in carcere e lateribus laboraret, ipse, cui pro sua caritate gravior ea res, quam ægroto, accidebat, nihil prætermisit, quod futurum homini ex usu existimasset; tantumque ejus officium extitit, ut stramentitiam culcitram conquistam, inventamque suis ipse manibus apportaverit, locoque, prout usus fuerat, moverit; omnia denique diligentissime procuraverit, quæ ad illius levationem aliquam pertinere videbantur. Nam quæ instituti sui legibus continentur, ea semper summa diligentia, constantiaque servavit, ut quamvis tot jam morbos, aliaque mala perpeffus, corpore esset maxime infirmo, nihilofecius, quamdiu carceribus tentus est, perpetuo de media nocte surrexerit, & pro *matutinis*, ut vocant, precibus, a quibus per nocturnum tempus, quod deesset lumen, aliisque incommodis impediretur, persolvendis prohibebatur, hymnos, & psalmos, aliasque preces magno numero recitaret. In munere autem Apostolico fungendo tantum studium, operamque consumsit, ut ab eo ne vinculis quidem prohiberi se pateretur. Namque Kuo-Matthæum-On juvenem annorum

sex, & viginti, qui desciverat jam pridem a Christi fide, vel in ipso carcere monitis, atque hortationibus ad sanitatem convertit. His tot, tantisque rebus gestis, toleratisque, quæ vera erat ratio parandi ad martyrium sese, cum virtutem adeptus esset animi singularem, tum triduo ex eo die, quo nuncium accepit, ad diem, quo corona donatus est, id continenter contendit, ut studium adhuc pietatis augeret, suumque animum quam posset maxime ornaret, quæque sibi divinitus commissa talenta erant, multiplicaret, uti jam pulsanti januam sponso placeret, atque a cælesti Domino, velut fidelis minister, in gloriam sempiternam reciperetur. Quo tempore designatus martyr Serrano narrabat, visum illud mysticum sibi jam continenter quasi ob oculos versari, quod sibi ipsi oblatum Fo-gani fuerat, quodque visum nostri, etsi primum ita fuerant interpretati, ut feretro ossa Ven. Capillæ significari arbitrarentur; post tamen de proxima Mauricastrensis Episcopi morte certiores facti, feretro putabant ejus Episcopi martyrium portendi; multitudine autem syderum magnam numerum eorum, quos Deus sibi ex Fo-ganensibus delegisset; ac duobus denique pedis ex stellis, peda duo, quibus uti consueffet Episcopus, inique a Mandarinis contemptui, ac turpitudini habita, a Deo autem syderum splendore decorati.

corata, existimarunt. Verum quibus videnti, iisdem non semper visa, ostentaque intelligendi divinitus facultas datur. Nobis enim feretrum non unius Sansii sepulcrum portendisse, neque pedum utrumque ad ipsum tantummodo Sansium referendum fuisse videtur. Secundus enim erat in Sina Serranus Episcopus pro Christo privandus vita, etsi nondum hoc illi compertum erat.

LXV. Eadem die ix. kal. Junias, accepta Pe-Kingo ephemeride, Focheensis Prætor Mandarinum inferioris ordinis quemdam prætorios carceres inspectum misit. Is medio in atrio carcerum cum sedisset, & Præfectus carceribus adesset, tum Scriba contenta voce nomina singulorum, qui carceribus tenebantur, ex indice recitare cœpit, singulis respondentibus, ubi se quisque nominari intellexisset. Hac recensione absoluta, tres Europæos, qui iisdem in carceribus erant, Pro-Prætor vocat: eos ait per dies decem pedicis, manicisque constrictos manere oportere. Pro-Regem enim venturum inspectum carceres, qui si solutos offenderet, rem magno custodibus damno futuram. Sed hæc simulatione fiebant. Simulandi causa hæc erat. Solent Sinenfes, ubi primum se reos esse, supplicioque afficiendos cognorint, ne manu carnificis pereant, ipsi sibi mortem consciscere. Ita-

Mandarini, ex Sinenfium consuetudine catenis Sacerdotes cōstringunt, veriti; ne illi sibi ipsis mortem consciscerēt.

que rem iudex capitis damnatos celat, uti subito e carcere educti ad supplicium trahantur. Quod idem de Europæis faciendum existimarunt, rati tam eos, quam Ethnici consueverunt, barbaris, efferaisque moribus vivere.

Satellites in
carcerem ir-
rumpunt, at-
que Sanctum in-
dignis modis
vinctum edu-
cunt.

LXVI. Postero die, qui dies erat ad VIII. kal., delatum decretum Imperatoris de interficiendo statim Sancto Fochum fuit. Sed res ea die exitum habere non potuit, propterea quod veteris cuiusdam Imperatoris, quem eæ gentes superstitiose colunt, interitus anniversariis sacris celebraretur. Die insequenti hora circiter a meridie quarta, magnus hominum strepitus auditus a nostris est; de quo cum ex ceteris, qui erant una in carceribus, quærerent, sic accipiebant: oryzam venire magni, quamobrem magnos hominum concursus fieri, qui velint emere, atque ex concursu strepitum existere. Nimirum qui in carcere detinebantur, etsi norant tempus supplicii Episcopo imminere, cavebant tamen, ut qui summa in eum, singularique pietate, atque benevolentia essent, ne ei nunciarent, quæ ipsi infausta arbitrabantur.

Denique hora fere quinta denique satellites magno tumultu, magnaue lætitia in carcerem irruperunt, cumque ad conclavis januam venissent, in quo Europæi manebant, *ubinam*, inquit, est *Pet-
lus?*

lus? Ad hæc Antistes mitissimus, quin perturbaretur, *ecce me*, inquit; *adsum*. Quæ cum dixisset, de humili fella, quæ quatuor duntaxat ex fustibus constaret, in qua *Rosarium*, quod vocamus, B. Mariæ Virg. recitans sedebat, surrexit. Mox lictores accedunt, & ut posset ad supplicii locum incedere, vinculis hominem solvunt, eique occiput postremo tondent. Quod cum ii facerent, quæsiuit pacatissimo animo ex Serrano Episcopus, quidnam ageretur, eique capillos tonderi respondenti, ne moram gladio interpone-
rent: *eja igitur*, inquit, *absolve me*. Itaque brevem exomologesim fecit, jamque abeuntem Serranus ritu sacro absolvit. Egredienti e cubiculo, nostri apprehensas manus deosculabantur; quibus cum confirmasset, quod primo promiserat, ubi ad Deum ascendisset, eorum se imprimis memorem futurum, dimissus ab ipsis est, quem patris loco habuerant, cujusque aspectus maximam eis malorum levationem attulerat; sed eo amisso, quo in luctu, & mœrore remanserint, non tam potest verbis, quam lacrimis significari. Ad carceris januam custos accedens, vinum ei, resque alias quasdam pauculas obtulit, ut aliquid ad refectionem fumeret; quibus comiter recusatis, Episcopus homini, qui tanta in se humanitate usus esset, gratias quas potuit maximas egit,
tum

tum pecuniæ nonnihil donavit, quo ei se plurimum debere significaret. Cum manus militum ad Præfecti Urbis tribunal venisset, *ubinam*, Episcopus inquit, *est satellites, qui est acturus carnificem?* Quæ facta interrogatione, satellites homini ictum calcis infligunt, tum, in genua, in-quiunt, continuo procumbito, neu quidquam quærito. Non enim intelligebant homines tam alieno ab institutis christiani animo, quo spectaret Martyris percussio, qui eximia, atque heroica exempla præclarissimorum primævæ Ecclesiæ præfulum imitatus, nummum argenteorum, quos *pezos* vocari ab Hispanis diximus, quinque, quos ad eam rem attulerat, donare carnificem constituerat. Neque tamen nova hæc injuria invictæ patientiæ Episcopum a sententia deterruit; nam humi in Prætoris conspectu pecuniam posuit. Is eam præfecto carceribus ad Ser-
ranum, & Royum deferendam, unde sibi ad victum aliquid compararent, dedit. Post, detractis martyri manicis, manus ei ad tergum satellites ligarunt, funesque humeris, brachiis, ac manibus circumductos tanta vi constrinxerunt, ut ossa non secus creperent, ac si singula distraherentur. Paraverant præterea tabulam, seu vexillum chartaceum, cui Sansii causa his verbis descripta erat: *Reus hic Petro-lus capitis condemnatus est, ut omnes*
inde

inde doceantur, sibi que exemplum sumant, propterea quod animos hominum mendaciis, fraudibusque seduxerit. Huic tabulæ Pro-Rex chirographum, five insigne suum adposuit, lineam describens rubro colore; qua descripta calamum continuo abjecit. Est enim apud Sinenfes ita consuetudine comparatum, ut rubro colore sanguis in sententiis capitalibus; abiectione autem calami, ejus vilitas, ut nulli jam usui esse queat, significetur. Tali modo subscripta tabella, atque ad instar vexilli arundini appensa, arundinem manus inter, & brachia martyris satellites ligarunt, ita ut capiti tabella emeretur, ut quæ erant in ea descripta, legi ab omnibus facile possent. Allatum etiam frænum est, quod reis injici in Sina solet, ne possint Imperatori, aut ministris male precari: quod frænum cum jam martyri satellites vellent injicere, his ille: *Os, inquit, mihi liberum relinquitte, ut implorare divinam opem, laudareque Deum possim.* Verum neque obtinuit quod rogarat, &, quod rogasset, alapa cæsus est.

LXVII. His gestis rebus, Prætor Mandarinis Min-Hiensi, atque adjutori centurionis, aliisque præfectis duobus milites, & apparitores attribuit, iisque Episcopum tradidit, ut eum, quemadmodum decretum esset ab Imperatore, interfici curarent. Ipse Episcopus ita per Fo-chei
vias

Sanctio extra Urbis mœnia deducto, caput præciditur. Eum Christiani mortuum deflent.

vias incedebat, tanta vultus, atque ani-
 mi hilaritate, ut triumphum agere vide-
 retur; neque impediabatur fræno, quo
 minus Deo supplicaret, moneretque ho-
 mines, ejus ut legi parerent, si salutem
 consequi sempiternam vellent. Erat con-
 cursus hominum ad spectaculum supra,
 quam credi potest, magnus, partim ex op-
 pido, quod est imprimis maxime populo-
 sum, partim eorum, qui studiis littera-
 rum erant addicti, quique Focheum per
 id tempus confluebant, ut merito quisque
 suo aliquem obtineret gradum honoris,
 & dignitatis; partim christianorum, qui
 ducti pietate, & religione circumquaque
 ex agris, pagisque convenerant. Juvenis
 autem Kuo-Mattheus-On, quem Epif-
 copus ad sanitatem inter vincula con-
 versum summopere diligebat, gratiam
 amoris, & beneficio illius singulari re-
 laturus, dum ad supplicii locum venire-
 tur, numquam ab eo discessit. Accidit
 interea tanta frequentia hominum, re-
 rumque perturbatione, ut Episcopo pi-
 leus Sinicus vel decideret, vel auferretur.
 Hanc ipse rem ut animadvertit, dignam
 se animi constantiam, & tranquillita-
 tem præseferens, ad satellites versus,
ēja vos, ait, pileus mihi e capite deci-
dit: quare cum rursus capiti imponitote;
 atque haud multo post, cum illi præ mul-
 titudine pes compressus, detractumque
 cal-

calceamentum fuisset, continuo magna frontis serenitate conversus, petiit, ut pedi calceamentum restitueretur. Denique per portam, quæ ad occidentem solem spectat, ex ambitu moenium egressa nefaria manus, pontemque sublicium prætergressa, qui pons passus prope xxx. a moenibus aberat, cum paullo adhuc processisset, iussus est a satellite martyr fortissimus, ut in lato saxo, quod in media erat suburbii via, genua flecteret. Quod ubi invictus Christi miles intellexit: *Paullulum*, inquit, *mane, spatiumque mihi, dum me Deo ipse commendem, concedito*. Ea re impetrata Deum oravit; factoque precandi fine, respexit retro, lætoque vultu lictorem intuens, *jam*, inquit *Cælum peto*. Hac re audita, carnifex manum Episcopi pilo imponens, scapulasque ejus leniter tangens, *quam aveo*, inquit, *una venire!* Cui Sanctius, *ergo Dei legem colito, si saluum te cupis esse*. Tum eum hortatus ne metueret, genua flectit, ac lictor continuo gladio, unico ictu, caput abscidit Martyris, viamque patefecit, qua beatus animus ad cælestem triumphum evolaret. Matthias-Fu, ut sanguinis colligendi facile christianis potestas esset, tapete attulerat, quod humi ad supplicii locum sterneretur. Sed satellites concedendum non putarunt, quod id apud Sinenfes fieri non consueffet. Neque eo fecius

cuius reperit christianorum pietas, qua ratione sanguis martyris colligeretur. Nam vir diligens imprimis Ly-Benedictus ethnici cujusdam opera usus nomine Chin-Vl-Yuen ad lapidem, solumque cinerem spargendum curavit; eumque postea cinerem martyris sanguine imbutum collegit. Abscisso martyris capite, satellites continuo quatuor cadaver ad locum, qui prope mœnia esset, intulerunt, ibique quadrantis horæ spatio relictum, post in agrum importarunt, ubi deponi corpora illorum solent, qui extremo sint affecti supplicio, passibus a muro ccclxxv., atque in limine loculi unius eorum, qui sunt in agro, collocarunt. Caput autem (quoniam est in more Sinensium positum, ut turpi quodam modo collocetur, ut transportari una cum corpore facile possit) Matthias hujus declinandæ infamiæ causa, numerata satellitibus pecunia, impetravit, ut seorsim a corpore sacco inclusum, in quem erat immixtus sanguis, transportaretur. Aderant, dum hæc gerebantur, Matthias ipse, & christiani, diligenterque omnes cavebant, ne ab ethnicis cognoscerentur. Ac multa jam nocte, quum ethnici omnes inde cœnatum abiissent, christiani, cum solos jam esse se animadverterent, magnam vim lacrimarum effundere, a quibus tamdiu, metu coacti, magno conatu temperaverant, & sanguine

ne profusas pastoris vestes rigare cœperunt; cuius alii interea pedes, alii manus deosculabantur; alii summam in eum pietatem maximis significationibus testificabantur; alii denique patrocinium illius implorabant. Quum enim præclarissimus Antistes, & martyr viveret, ita gesserat erga christianos se, ut pater esse illorum videretur. Quare hoc illi modo patri optimo, ac benemerenti parentabant.

LXVIII. Horis fere ante mediam noctem duabus, Matthias-Fu Sinensis sacerdos, de quo supra demonstratum est, una cum aliquot christianis inventum feretrum, vestesque, quibus martyris cadaver ornaretur, paratum ivit, relictis aliis, qui custodiendi corporis causa, quasi in vigiliis manerent. Rebus omnibus, quæ ad illud pie, decenterque sepeliendum pertinerent, paratis, postero die Matthias, qui nullo labori se vinci patiebatur, in agrum, in quo erat corpus locatum, venit; cumque factus magnus ethnicorum concursus esset, ut quæ fierent, videre, impedireve, ne martyri id officii genus præstaretur, possent, necesse fuit, ut ille præsidio usus custodum carcerum, Quæstoris trium, qui bene in nostros animati essent, arte adhibita loco cedere omnes faceret, ut libere, quod in animum induxisset, perficeret. Hisce amotis, vestes omnes sanguine conspersas, cate-

Episcopo iusta christiani solvunt; Ethnicosque impedire conantes reprimunt.

catenas, manicas, pedicas, & cetera, quæ ad martyrem spectabant, ut partes inde christianis Sinensibus distribueret, quodque reliquum fuisset, Siamum, Manilam, Romam, alioque mitteret, collegit, quod Dominicanis martyri sociis in carceribus asservatis hanc curam suscipere non liceret. Jam meridies instabat, quo tempore corpus Sancti ita, ut par erat, ornatum, inque feretro collocatum fuit. Sed dispositis rebus omnibus, cum proxime in montem sanctum, ubi condi christianorum cadavera consueverunt, deferendum esset, opposita subito obstacula sunt, avaritia improbitateque Mandarinum, qui agro, in quo reorum corpora sepeliuntur, præfectus erat, ut qui diceret, ni sibi argentei nummi triginta numerarentur, se numquam, ut idem corpus alio transferretur, passurum. Etsi quinque se illi numeraturum Matthias promitteret, tamen quod Mandarinus ex eo genere hominum esset, qui mediocri esse contenti lucro non possunt, nihilque de priori petitione remitteret, consilio Matthiæ uti christiani ad præfectum carcerum confugerunt. Sed cum is eorum postulatis satisfacere recusasset, ad præfectum carcerum quæstoris, cujus egregia erga Diazium, Alcoberumque voluntas erat, sese petitum auxilium contulerunt, qui eos hortatus, ut bono ani-

mo

mo essent, promisit eam rem sibi curæ futuram. Post decretum ita, ut nostri optarant, tulit; agrique Mandarino, ne christianis resisteret, imperavit. Is, ut erat pecuniæ cupidus, certior fieri voluit (neque vero is solum, sed etiam pater ejus, ac mater) a præfecto nescio, an confictum hujusmodi decretum fraude christianorum esset. Cumque inquirendo comperisset, nihil sibi fuisse, nescio præfecto, a nostris nunciatum, etsi invitatus, atque ægre ferens, tamen corpus tradidit; acceptumque christiani in sepulcrum ad montem intulerunt. Jam sanguis martyris ab ethnico ita, ut illi datum in mandatis erat, collectus, in manus Matthiæ pervenerat. Sed, quoniam ei, qui collegit, singularia quædam, ac pene similia prodigiorum evenerunt, postulat omnino tempus, ac ratio, ut eorum distincte hoc loco mentio fiat, nequid nos dissimulasse quisquam existimet, quod in Dei gloriam, decusque martyris redundare possit.

LXIX. Itaque cum satis tuto nemini christianorum negotium sanguinis martyris colligendi dari posset, propterea quod periculum esset, ne ira in nostros incenderetur Mandarinorum, qui continenter causas majorem in modum in christianos sæviendi aucupabantur, Ly-Benedictus, cujus fides imprimis, ergaque Europæos

Chin. VI.
yuen Ethnicus homo,
Ly-Benedicti rogatu,
sanguinem martyris colligit,
jamque amore, ac pietate in Episcopum incendi-
tar.

K.

sacer-

sacerdotes observantia, atque hospitalitas,
 magna omnium consensione commendari
 solet, Chin-Vl-Yuenum ad id negotium
 adhibere cogitavit, quod eo ethnico viro
 familiariter uteretur. Atque is quidem
 minus ad rem gerendam idoneus videba-
 tur, propterea quod tam improbis, sævis-
 que moribus esset, ut uxorem excedere
 domo cogeret. Accedebat superstitio, qua
 fiebat, ut non errores ethnicorum modo
 probaret, sed etiam, multitudine idolo-
 rum inlata, in templum deorum suas
 ædes convertisse videretur. Ob eas res
 omnes, incredibilemque horrorem, quo
 Sinenfes aspectu, contactuque eorum,
 quæ ad cadavera spectant, affici solent,
 dubitabat Ly-Benedictus, dare ne id
 negotium homini satis tuto posset. Sed
 cum aliquandiu secum cogitasset, neque
 alium aptiorem, cui res crederetur, in-
 venisset, statuit ei, quod sibi in mentem
 venisset, proponere. Ubi ethnicus, quid
 a se fieri christianus vellet, cognovit,
 non solum resistendum non putavit, sed
 etiam rem se tanto studio, tantaque dili-
 gentia curaturum promisit, ut ei confirma-
 ret, etiamsi in vitæ periculum venisset, ne
 guttam quidem sanguinis Pe-to li se in
 loco supplicii relicturum. Nam scelus il-
 le a Mandarinis admissum detestabatur,
 qui ob benefactum, studiumque, quo in-
 census Episcopus e tam remotis regioni-
 bus,

bus, non lucri, sed indicandæ populis in
 cælum viæ caussa, in Sinam venerat,
 hanc gratiam retulissent. Quæ res sum-
 mam movit Ly-Benedicto admirationem,
 ut qui Chin-Ul-Yuenum virum ethni-
 cum divinæ gratiæ auxiliis incitatum non
 modo hæc polliceri, sed etiam abire cer-
 neret promissis satisfacturum. Atque is
 ethnicus, ubi in locum supplicii perve-
 nit, caputque Antistitis recisum vidit,
 nihil metuens, nullaque aut eorum, qui
 aderant, aut loci habita ratione, ar-
 repta arundine cunctos arcere, qui
 ipsum conculcabant, impediabantque,
 ne conata perficeret, cœpit; tum effu-
 sum sanguinem, ita ut promiserat, col-
 legit, inque sacculum immisit. Inde do-
 mum reversus, cum suas manus sanguine
 adhuc tinctas intueretur, abluendas non
 putavit, quod eum esse viri justī sangui-
 nem diceret. Quinetiam suos ad se filios
 evocavit, eorumque capitibus cruentas
 manus imponens, *salutem vobis*, inquit,
o gnati, Pe-to-li sanguis, vitamque af-
ferat. Postremo quod reliquum sanguinis
 ejusdem erat, lambendum duxit. His re-
 bus gestis admirabilem in modum aucta
 viri pietas erga martyrem, virtusque fuit,
 eademque nocte colligendi sanguinis, qui
 e capite, colloque stillatim in terram de-
 ciderat, caussa, in eum locum contendit,
 qui prope a mœnibus oppidi aberat, quo

in loco lictores humi corpus posuerant, cum funes, aliaque compararent, quæ opportuna ad idem corpus in agrum transferendum erant. Quas collegit guttas, ut quas pignora martyris esse judicabat, domum lætus importavit, ut a se instar thesauri summo studio fervarentur. Postero die ad martyrii locum revertit, & lapidem, ad quem Sansius flexis genibus capite diminutus fuerat, sustulit, eumque, alio jam substituto, transtulit in suas ædes, atque honestissimo loco posuit, eisdemque hæc omnino verba insculpsit: *Lapis, super quem venerabilis magister Pe in celum conscendit.* Qui hujusce initii fidei, quod colligenti, contrectantique Chin-Ul-Yueno sanguinem, reliquiasque Episcopi Sansii Deus indidit, progressus fuerit infra videbimus.

Præfectus
carcerum Al-
coberum, &
Diazius hu-
māissime tra-
ctat.

LXX. Non est autem hoc loco confilium divinæ providentiæ prætermittendum, quo factum est, ut Alcoberus, Diaziusque gratiam a præfecto carceribus Quæstitoris inirent, cujus quidem præfecti opera impetratum perfacile fuit, ut Sansio ea, quæ supra demonstravimus, officia adhiberentur. Igitur jam usque ab eo tempore, quo Alcoberus, Diaziusque in eos carceres conjecti fuerant, cum animadvertisset præfectus neque vestes ipsos, quibus tegerentur, neque pecuniam habere, neque scire quemadmodum exiguum

um victum, qui eis e publico suppeditabatur, coquerent, misertus eorum, ministrum eisdem, qui eorum ageret curam, attribuit, & duplam victus portionem, locumque, in quo seorsim ab aliis essent, assignari fecit. Quæ res illis magno comodo ad virtutem, pietatemque colendam fuit. Inde crebro eos invisere, atque invisendo eorum consuetudine delectari cœpit, cumque propensiore in eosdem animo esse pergeret, ut ipsis una cum reliquis christianis confabulari, atque agere liceret, concessit, remque illis gratam facturum, quæ ad eorum causam pertinerent, nunciare, cum tempus hortaretur, non prætermisit. Nostri, qui Sinensium mores perspectos haberent, scirentque, eos non tam misericordia, quam quæstu moveri solere, dubitare initio, num hæc christiani alicujus opera, magnisque pollicitationibus fierent: sed paullatim experiundo, voluntate, non simulatione Mandarinum agere intellexerunt. Itaque occasionem dimittendam viri apostolici non putarunt, quo minus ei, qui de se optime meritus fuisset, decreta religionis christianæ proponerent; cumque ille magnopere fuisse delectatum significaret se constantia animi, loquendique libertate, qua Kuo-Lucas usus, dum Pro-Regi respondebat, fuisset, ut in illius manus libri venirent, quibus præcipua doctrinæ christianæ capita continentur,

tur, curarunt. Hos ille libros magna, significatione honoris, existimationisque acceptos, non invitus legit, & studio, ac liberalitate, qua uti in nostros pergebat, animo esse se nonnihil in religionem, pro qua iidem exagitabantur, propenso demonstravit. Etsi vero intellectum nondum cuiquam nostrum est, assensus ne divino munere doctrinae, initiatusque adhuc mysteriis christianorum fuerit; tamen gratiam illi divinitus fuisse ob sua, erga sacerdotes Dominicanos merita relata constat. Nam cum, ducta jam pridem uxore, nullos ad illud tempus, quo contrusi nostri in carceres fuerunt, liberos suscepisset, quæ res, Sinensium moribus, institutisque, omnium turpissima existimatur; post ubi humanitate in Christi milites uti coepit, nondum absoluto anno, auctus filio est, quod ille maximi beneficii loco habuit, lætusque in carcerem, Alcobero, Diazioque nunciaturus continuo accurrit.

Sacerdotum
reliquorum
quatuor, &
Ambrosii, qui
mortis dam-
nati fuerant,
ex Sinæ con-
suetudine
singulorū ge-
nis capitalis
sententia in-
scribitur.

LXXI. Interea Dominicani quatuor, qui Imperatoris decreto capitis condemnati, carceribus detinebantur, haud multo post, certo indicio, quod iudices dissident, eandem se coronam consequuturos, quæ Sansio obtigisset, intellexerunt. Est apud Sinenses in more positum, ut quarta quaque luna, quod tempus in-
mensum majum solet incidere, Pro-Reges
Sinens-

Sinenfis , Tartarusque , & ærario , atque urbi Præfecti , Mandarinique duo vicorum , qui urbis mœnibus continentur , in ædes quæſitoris ſe conferant , congregatique de fortunis , capitibusque reorum agant ita , ut Pro Reges , Præfectusque , ærario honore loci , in quo ſedeant , præſtent , quæſitor decernendi auctoritate , ceteris antecellat . Ad hos iudices , ubi convenerunt , provinciales , qui carceribus detinentur , propterea quod dicta in eos ſententia mortis ſit , adducuntur , quibus , antequam in concilium veniant , ad humeros tabella chartacea inſtar vexilli , ut ſupra oſtendimus , alligatur , cui tabulæ & cauſſa , & genus ſupplicii , quo quiſque affici debeat , inſcribuntur . Circumponuntur præterea collo tabulæ charta contectæ , qua in charta res eadem ſcriptæ leguntur . Quinetiam manicas ligneas charta obductas , in quibus ſint foramina duo , ita componunt , ut manus in eaſdem immiſſæ ceu vinculo quodam conſtringantur . Poſt inſcribitur faciei cujuſque ſententia , quæ indicet vel decollationis hominem , vel alterius ſupplicii reum eſſe . Ordine deinde , ita ut quiſque prior eſt in carcerem contruſus , gravioreque ſcelere implicatus , inducuntur , una introeuntibus iis , qui ſunt ejusdem flagitii accuſati . Qua iudicii ratione ſit , ut bidui , tridui intervallo extrema

sententia de reis quadringentis feratur, tot enim fere numerari quotannis solent. Ex introeuntibus nihil iudices percuntantur. Rei ut primum in conspectum, iudicum venerunt, flexis genibus, corpus admodum, caputque inclinant. Mox lictores accedunt, singulisque humi flabellum, particulasque massæ oryzeæ ad ferventis aquæ vaporem concoctæ, obolosque trecentos, ac sexaginta apponunt, atque, hæc, ajunt, tibi iudices dono mittunt. Ad hæc rei quique, gratias se quas possunt maximas iudicibus agere, respondent, paulloque post dimittuntur, ut locus ceteris, qui succedunt, detur. Quum iudices antea de omnium causa cognorint, non esse multum in ea re temporis infumendum putant. Hi, ubi ad sistendi finem fecerunt, suos ad Imperatorem, commentarios deferri curant, qui ita, ut supremis provinciæ, Pe Kingensibusque magistratibus videtur, postremam sententiam dicit. Quamquam interdum usovenit, ut eos, qui capitis condemnati fuerint, in exilium pellendos decernat. Quos Imperator reos esse mortis decrevit, hi mense decembri interficiuntur, propterea quod arborum folia decidere eo tempore soleant, idque jam ad interitum hominum opportunum esse Sinensibus videatur. Huic iudicio Dominici Sacerdotes quatuor, ut qui capitis condemnati essent,

essent , iv. kalen. junias interfuerunt ; primumque omnium , ut fert consuetudo , apud carcerum præsidem exiguo stylo dexteræ cuiusque eorum Dominicanorum genæ litteræ illæ Sinenfes duæ *Chan-Fan* , quæ *reum decollationis* hominem esse significant ; Ambrosii vero genæ duæ aliæ *Hiao-Fan* , quæ in idem , atque *reus strangulationis* , decidunt , inscriptæ fuerunt .

LXXII. Hæc narrans Serranus , nulum se unquam vidisse confirmat lætiores diem . Quo lictores (ajebat) stylo litteras genis insculpere pergebant , eo nostrorum animorum alacritas , lætitiaque augebatur , ut qui incidi faciei cuiusque nostrum signa fervorum Jesu Christi videremus . Cumque summo Servatoris Christi beneficio cooptati simus in suorum locum , jam nostra hæc esse capita desierunt . Atque ille quidem , quæ sua fecerit , cum voluerit , suo arbitratu tollat . Pergit porro : atque , utinam , inquit , aliquid nobis suppeteret boni , quod eidem offerre , consecrareque liceret . Hæc ego integre , sincereque loquor : Sed & Christus est dives , & liberalis , quamobrem arbitror servis exiguum , quod offerunt , perpetuo lucro futurum . Itaque gratias illi maximas , quod tot in nos , tantaque beneficia contulerit , & agimus & habemus . *Sit benedictus in secula* . Hæc Serranus Martyr ,

Dominicani
singulari ani-
mi fortitudi-
ne , dum ge-
nis sententia
inscribitur ,
lætitia affi-
ciuntur .

tyr, quæ sane digna fuerunt, quæ nos inducerent, ut paullulum ab inititudo digrederemur.

Judicibus iisdem sistitur, donoq; ab iis acceptam pecuniam lictoribus distribuunt.

LXXIII. Litteris, ita ut supra demonstratum est, genis martyrum insculptis, quæ litteræ cum ex atramento, sanguineque conflatae sint, deleri scilicet numquam possunt, ad scapulas cuique vexilla alligarunt, quibus vexillis hujusmodi verba inscripta erant: *Hic reus plectendus capite est, propterea quod dolis, fraudibusque animos hominum pervertat.* Circumposuerunt præterea collo tabellas, manusque eorum ligneis vinculis, quemadmodum diximus, constrinxerunt, postremosque una cum Ambrosio ad iudices ingredi fecerunt. Quæ res magno illis solatio fuit, ut qui spatium nacti duabus horis, atque dimidia inter se colloquendi essent. Denique cum in conspectum iudicum venissent, iisdem donis, quibus ceteri, aucti sunt, sed oblatos, custodibus carcerum, lictoribusque distribuerunt, qui pecuniæ cupidi eodem ipso superioreque die eos sibi artibus, blanditiisque conciliare curaverant.

Matthias Fu invidia Ethnicorum Focheo abire cogitur. Sanctus subsidii causa venit. Ly-Michaël,

LXXIV. Die iv. idus junias Matthias Fu, quem vulgus Sansii filium esse arbitrabatur, qui patris funus curatum venisset (nam summa fuerat eo in funere parando hominis pietas, summum officium, & diligentia, ut ad sepeliendum Martyris

ris corpus, & colligendas reliquias divinitus missus videretur) commotus periculi magnitudine Fo-cheo Hing-hoam abire coactus est. Itaque proficiscens adiit ad nostros, qui carceribus detinebantur, significavitque quam invito animo ab eis discederet, simulque promisit, sese illis martyrii tempore præsto futurum. Paulo post, mense junio exeunte, Thomas Sanchesius viros apostolicos in vincula coniectos consolaturus, subsidiaque laturus, & veneraturus corpus martyris, tertio Fo-cheum venit; quibus in rebus cum duos, tresve consumisset dies, Hing-hoam ad suos reversus est. Contra hostes christiani nominis nihil intermittebant, quod ad incommodum christianorum pertinere videretur. Igitur, cum animadvertissent milites, qui ad viarum custodiam advigilabant, Ly-Michaelem quemdam fratrem Ly-Benedicti sedulo navasse operam, ut Episcopi corpus ad montem christianorum efferretur, ut sunt Sinenfes pecuniæ maxime cupidi, ut citra quæstum nihil suscipiant, aliosque suis ipsi moribus æstimant, nonnisi magno accepto argento inductum in rem hominem putarunt. Ergo illius ad Pro-Regem nomen detulerunt, Pro-Rex ad sese inferioris ordinis Mandarinos evocat. Eis mandat, ut de re tanta cognoscant, & ad se referant. Itaque horum insidiis Michael i v. non. Quintiles

quod cadaveri Sansii officia præstitisset, accusatur, paulloque post iudicio absolvi-
tur. Martyris corpus, Præfectorum jussu, in agrum refer-
tur, ubi malefici sepeliri consue-
runt.

etiles capitur. Ad Mandarinum Heu-Kuo-
 nensem adductus interrogatur, quantum
 ei pecuniæ, ut corpus Pe-to-li efferret,
 christiani numerassent. Ille, ab Euro-
 pæis duobus, qui in prætoriis essent car-
 ceribus, accepisse se nummum juliorum
 argenteorum quinquaginta; ab duobus aliis
 qui in carceribus quæstoris, viginti, qua
 pecunia emisset feretrum, aliaque ad fu-
 neris usum comparasset, respondet. Sed
 instat judex, atque rursus ex homine per-
 cuntatur, cur feretrum ad montem chri-
 stianorum asportasset? Ipse dissimulans
 qua de causa id fecisset, fecisse se dixit gra-
 ti animi causa in Sansium Episcopum, cui,
 dum viveret, ministrarat; nec nisi ac-
 cepta a præfecto carcerum facultate. Qua
 de facultate cum ab iudice diligenter quæ-
 situm esset, præfectusque carcerum rem
 confirmasset, nam idcirco ad iudicem
 adierat; Ly-Michael, & Mandarinus,
 cui agri concredita cura erat, qui item
 in eadem erat causa, contrususque in
 carcerem fuerat, iudicio absoluti, post-
 que triduum dimissi sunt. At in Marty-
 rem omne virus effusum est, cui ne mor-
 tuo quidem parcendum judicarunt. Nam
 nonis juliis sepulcrum, ubi condita olim
 pleraque eorum, qui christianæ religionis
 propagandæ causa in Sinam venissent,
 corpora fuerant, postremoque Sansii, de-
 jici

jici jufferunt, hujusque corpus in agrum referri, in quo tumulari consueverunt, qui supplicio publico interierint.

LXXV. A. d. vi. idus junias, quod, rogante Pro-Rege, Imperator decreverat de re nostrorum sacerdotum, confectum est. Igitur ad tribunal quæstoris libri, suppellex, resque universa, quæ ad eos pertinebat, igni cremata est, & fisco pecunia addicta, quæ pecunia fuerat ex eorum subsidiis intercepta.

Dominicanorum suppellex igni crematur.

LXXVI. Neque vero Fo-chei tantum christiani vexabantur. Nam quo tempore in urbe ea gerebantur, Fo-ganensis Mandarinus per omnem Fo-ganensem agrum magnis, gravibusque molestiis parentes virginum, fratresque afficiebat, ut eas nuptui dare cogerentur. Celebris autem inter eos, qui sunt ab eo Mandarino exagitati, christianus quidam Mo-yangensis fuit, integris moribus homo, ætate annorum lxxvii., Lin-Matthias nomine, qui tertium Prædicatorum Ordinem profitebatur, & filias habebat tres eidem addictas instituto. Is jussu Mandarini comprehensus, atque ad tribunal adductus, cum interrogaretur, num christianus esset, filiasque haberet, quæ virginitatem profiterentur, quin ullo metu afficeretur, affirmavit. Tum judex: ergo, ait, posthac christianus ne esto, & filias nuptui dato, Cui ille: mihi vero, ait, neque

Christiani Fo-ganensem agrum incolentes vexantur: Lin-Matthias in judicium rapitur, & cruciatur; sed tandem liber dimittitur.

neque deferere sanctissimam Dei legem licet, neque fas est filias, quæ Deo integritatem suorum corporum consecrarint, adigere ad matrimonium. Ac iudex: tu si dicto audiens fueris, clementia in te utar; sin minus, jubebo te flagris exanimari. Ille autem: fac, inquit, tibi quod lubet: mihi ab Dei injuria abstinere certum est. Qua responsione Mandarinus ira inflammatus, hominem denis flagris valide cædi jubet; ratusque fractam supplicio animi virtutem, iterum interrogat, velit ne imperata facere. Huic rursum ille respondet, se nullo unquam modo a proposito discessurum. Quamobrem iudex majorem in modum commotus, atque ægre ferens, rursus affligi eum flagris jubet pari numero, atque ad statuas deorum vi trahi: quo cum christianus venisset, statuam non modo non est veneratus, sed etiam contempsit, significans emori sibi certius esse, quam eo se flagitio implicare. Itaque vicit sua constantia sævitiam persecutoris, qui veritus, ne quod erat gravi, & valitudine affecta, si rursus caderetur, vita excederet, reduci eum in carcerem imperavit, ejus fortitudinem alias faciliore tempore tentaturus. Neque eo secius paucis post diebus, mutata sententia, liberum, & gloria confessionis ornatum domum dimisit.

Atque ad hoc tempus dumtaxat com-
men-

mentarium de rebus Sinensibus Serranus perduxit, quo ex commentario, seu seriem rerum spectes, atque aptissimum ordinem, seu diligentiam, qua omnia minutim est persecutus, seu scribendi rationem, quæ lætum quiddam, & jucundum præsefert, apparet, quanta esset animi æquabilitate, quantosque haberet spiritus, qui tot affectus malis ita potuit scribere. Nos quæ de ejus, & collegarum illius triumpho, tum de reliquis rebus eodem pertinentibus mox sumus scripturi, ea ex certissimis monumentis, ex litteris cum martyrum, tum aliorum, qui propagandæ religionis munere funguntur, collectis desumemus, eaque sic describemus, ut temporum ordo fervetur, non secus atque est ab Serrano ipso factum, quibus temporibus omnia contigerunt.

LXXVII. Cum nunciatum Macai esset extremo mense sextili de martyrio Episcopi Mauricastrensis, plaudere omnes christiana pietate, ac Dominicani imprimis, ad quos maxime ea res pertinebat; inque æde sua ipsi sacra, post accensa per triduum vespere per urbem lumina, cum adessent Episcopi Macaunensis, & Ecri-nensis, hominesque nobilissimi civitatis, canticum *Te Deum* concinentes, solemni ritu supplicaverunt. Eodem nuncio accepto Pe-Kingensis Episcopus supplicationem decrevit. Paulo post delatæ ad

Alco-

Macai, & Pe-Kinghi, Sancti martyrio cognito, supplicationes habentur. Serranus Tipasitanorū Episcopus dicitur. Matthias Fu Fochum revertit, & Sacerdotibus, atque Ambrosio sacra administrat.

Alcoberum sunt, qui, ut diximus, erat in carceribus quæstoris, die viii. kal. octobres a Pontifice Maximo litteræ, quibus P. Franciscus Serranus Tipasitanorum Episcopus, & Fo-Kienæ provinciæ Vicarius Apostolicus dicebatur. Has litteras Matthias-Fu ab oppido Chang-cheo Hing-hoam Thomæ Sanchezio miserat; isque, etsi inclinata erat ætate, & valetudine adversa, Hing-hoa Fo-cheum detulit: verum, quod in aliis carceribus erat Serranus, & carceres ipsi summa diligentia, ne cui aditus esset, custodiebantur, ad eum mittere, nisi a. d. vii. kal. octobres, non potuit. Sed Matthias-Fu, pro summa sua in designatos martyres pietate, impetrare ab se ipso non potuit, ut ab eis diutius abesset. Itaque nihil veritus discrimina, in quæ se ipse conjiceret, cum essent adhuc eadem aditus difficultates, quas supra diximus, maxima usus prudentia, & fortitudine, extremo octobri mense Focheum revertit: ibique die iii. kal. Kuo-Ambrosio Hy-jino utrumque *Pœnitentiæ*, atque *Eucharistiæ* sacrum, eandemque *Eucharistiam* nostris, Royo prid. kal., Diazio, & Alcobero kalendis, ac vi. nonas Tipasitano Episcopo, in suis cuique carceribus administravit. Atque hi designati martyres laudandorum Siamensis gymnasii alumnorum finem nullum faciunt, quorum tanta usi sunt ope-

opera , ac Matthiæ imprimis , cuius de fortitudine , & caritate sæpe demonstravimus . Quæ nos libentissime commemoramus , ut nostrorum martyrum in eos gratus animus constet , eorundemque Siamensium , ac Matthiæ præsertim , res præclare pro religione gestæ pro merito omnium laudibus efferantur .

LXXVIII. Per idem tempus Kuo-Lucas-Kin-jinus , Uvang-Thaddæus Go-Chinus , & Joseph Chung-Hoëyus nostrorum hospites, quos exilio damnatos diximus decreto Imperatoris , pulsati in Tartariam sunt . Nam etsi sæpe multumque actum cum Fo-cheensibus Mandarinis fuerat , ut eorum opera christianis iis tribus redimendi pecunia exilii facultas fieret , saltemve ut ne uxores , quod est in legibus Sinensium , una cum ipsis proficisci in exilium cogerentur ; impetrari tamen omnino non potuit ; indignos enim esse , in quos iudices misericordia uterentur , propterea quod desciscere ab Christi fide pertinaciter recusassent . Quos tamen neque tanta ista severitas iudicum , neque uxorum miseratio , quas in suas ipsi calamitates adducerent , aut matrum , & sororum , quas relinquerent , quæque essent ætate fere gravi , nec ulla denique acerbitas potuit a sententia deterrere . Itaque una cum uxoribus , duobusque infantulis, Fo-gano discesserunt , quo ductos fuisse

Christiani
tres exilio da-
mnati , in
Tartariam u-
na cum uxo-
ribus , & filiis
proficiscuntur ,
ac prima iti-
neris nocte
Clara mori-
tur .

dictum est supra, ut vel ethnici ipsi lacrimis tantam calamitatem prosequerentur, quum homines innocentissimos cererent iter adeo longum suscipere, spe ipsi omni redeundi domum, suosque revidendi sublata. Cum prima nocte in vicum venissent, quem Lien-heu vocant, ubi plerique christiani sunt, virginesque nonnullæ tertii Ordinis Prædicatorum: die insequenti ad ceteras eorum ærumnas magnus ex Claræ morte, uxoris Chin-Josephi, accessit dolor. Multa hæc erat mulier perpeffa mala, multasque indignitates: quater ipsa tormento ad manus affecta; maritus conjectus in carcerem; direpta domus, amissa bona, ipsaque exulatum in Tartariam cum marito missa, & animi assiduo dolore excruciatum, quem tot, tantisque ex malis acerbissimum oriri erat necesse; quas res, cum tenui esset valetudine, diutius perferre non potuit. Ac ejus quidem mors christianis, qui aderant, pretiosa est visa, eoque evasisse putanda est, ut ea molestias exilii cum cælesti beatitudine commutaret. Ea mortua, reliqui vincto catenis collo, manicisque constricti iter prosequerentur stipati militibus, qui diligenter cavebant, ne multum subsidii acciperent, virosque pro summa legum severitate habitare in carceribus omnino cogeant, adeo ut nonnisi ægre christianus quidam, qui Stephanus
appel-

appellabatur, in pago Lo-Yuen, se pro iis sponfore oblato, obtinuerit, ut sibi unica nocte domum eos excipere liceret.

LXXIX. Die iv. nonas novembres Fo-cheum venerunt, cunctique, nulla sexus, aut ætatis ratione habita, continuo in carceres Heu-Kuon-Hienses, in quibus Alcoberus erat, conjecti sunt. Quæ illis res tot inter mala commodissime accidit, ut unum ex nostris, quos Patrum loco habebant, viderent, eoque consolatore, ministroque *pœnitentiæ* satis libere uterentur. Nam Deus O. M., cuius causa in tantas inciderant calamitates, easque jam fortiter tolerabant, non est passus carere eos, uxoresve eorum subsidiis, quibus illorum animi molestiis levarentur, & ad reliqua perferenda incommoda confirmarentur. Aderat per id tempus Fo-chei Paulus Sù Sinensis, ab Sacra Congregatione de Propaganda Fide christianam religionem in eas regiones promulgatum missus, qui eo venerat, ut veneraretur Sansii corpus, nostrosque, quibus posset rebus, juvaret, animosque christianis adderet, quos inimici christiani nominis exagitabant. Is provinciam Su-Chuensem deserere, hostium metu permotus, statuerat, quod, cum eo tempore minister quidam sacrorum christianorum comprehensus fuisset, alique duo proripuissent inde sese, ipse, præ-

Exules Fo-chei unum ex nostris Sacerdotibus in carceribus offendunt, eoque ministro Sacrorum utuntur. Paulus Su afflictis rebus christianorum forti animo subvenit.

fertim quod ejus nomen ad tribunalia delatum fuerat, magno in periculo relinquebatur. Quamobrem primum Macaum contendit, inde ad Xen-Siam provinciam: ubi cum de morte Mauricastrensis Episcopi audisset, accepissetque collegas illius contrusos in carcerem, & Matthiam-Fu in eam suspicionem vocatum, quod filius esset Sansi, fugere coactum, quibus rebus summo in discrimine christiana res versaretur; continuo, neque pericula moratus, quæ se subiturum prospiciebat, neque itineris longitudinem, Fo-cheum ire contenderat, ut afflictis rebus, tam necessario tempore, pro gravitate sui muneris subveniret.

Paulus Su
exulibus sacra
administrat:
ipsi exules
magnis in iti-
nere incom-
modis pressi
Pe. Kingum
versus con-
tendere ju-
bentur.

LXXX. Itaque licuit ei nonis novembribus in carceres ad christianos adire, sacramque *Eucharistiam* viris tribus, quos diximus, facile administrare. Ad mulieres vero difficilis cum esset aditus, propterea quod, Sinensium instituto, in carceribus seorsim a viris summa diligentia, & cautione custodiebantur, huic difficultati Paulus, se medicum simulans, occurrit, feminisque duabus administravit sacramenta *pœnitentiæ*, atque *Eucharistiæ*. Quibus rebus exules vehementer lætati animis, hilaritatem vultu significabant, ostendebantque jam ferre adeo libenter se quæcumque ex Dei voluntate acciderant, ut neque superiorum ma-
lorum

lorum recordatione , neque impendendum timore commoverentur . Fo-chei dum morarentur , fuere , qui misericordia ducti a Pro-Rege flagitarent , iis ut in ea urbe hyemandi facultas fieret , quod proxima hyems esset , Thecla autem , & Paula (nam erant hæc nomina mulierum) adversa valetudine conflictarentur , neque possent ipsæ , infantesque frigora , quæ maxima in Tartaria sunt , sustinere . At Magistratus , quorum erant in christianos majorem in modum ira concitati animi , concedendum non putarunt , & neque sexus infirmitatem , neque ætattulam puerorum morati , quæ res maximam habent natura ipsa vim miserationis , Pe-Kingum omnibus sese ut conferrent , jusserunt , ut ab regiis judicibus exilio in Tartaria locus constitueretur . Itaque coacti iter molestissimum aggredi , die iv. idus novembres Fo-cheo discesserunt , acceptis a Paulo Sù litteris ad collegas missos a Sacra Congregatione de Propaganda Fide , & ad christianos Pe-Kingenses nonnullos , quorum opera , quoniam major levatio reperiri nulla poterat , illud saltem consequerentur , ut locus eis aliquis Tartariæ decerneretur , quo in loco christiani essent , ut ne sacris carerent .

LXXXI. Interea odio persequutorum , ac multo etiam magis levitate , at-

Sacerdotes
nostri, calum-
niis promul-

gatis, quas
Pro-Rex con-
flarat, magno
dolore affici-
untur; easque
litteris depel-
lere conatur.

que imprudentia christianorum quorum-
dam, magna nostri sollicitudine sunt af-
fecti, quantam cruciatus corporis acer-
bissimi numquam attulerant. Nam cum
Pro-Rex, quæ ipsis responsa, ut docui-
mus, per calumniam affinxerat, ad ju-
dices, ut mos est, per omnem provin-
ciam misisset, ut in tabulariis publicis re-
ponerentur; inde autem exempla earum
responsionum nonnulla in vulgus manaf-
sent: non defuerunt, qui Pro-Regis
ethnici hominis, omnique conatu opti-
mos viros perdere laborantis testimonium
pluris facerent, quam summam Episcopi,
fociorumque opinionem innocentiae, &
virtutis; fidemque calumniae, quæ per-
facile convinci posset, habendam arbi-
trarentur. Nam homines integra mente,
qui parati vitam pro Christi fide fundere
essent, ineptias ejus modi, & mendacia
confirmasse, quis putet? Itaque per va-
rias jam Sinæ provincias efferebatur is
error, atque in Nan-Kingensi quidem,
plurimum invaluerat; ut, quamvis Nan-
Kingensis, & Pe-Kingensis Episcopo-
rum, atque Ecrinensis imprimis, studio,
labore, opera patefacta fraus esset (quam,
temeritate, improbitateque seposita, de-
tegere, atque odorari per se facile quis-
que potuerat) nihilominus afferretur ad
nostros is rumor. Quo nuncio hi gravif-
sime commoti, quod perspicerent ma-
gnum

gnum inde redundare in christianos ceteros damnum posse, magnamque Episcopo, qui ad sanguinem functus munere sanctissime fuerat, injuriam irrogari; a. d. i. i. i. nonas, pridie nonas, nonis novembr. ex suis quisque carceribus, datis ad Miraltam litteris, primum graviter conquesti, quod extitissent, qui de sanctissimo Episcopo, cujus tanta assidue fuissent doctrinæ, fidei, constantiæ, fortitudinis exempla, ita sibi persuaderi paterentur; testati sunt singuli, aliqui etiam jurejurando confirmaverunt, plena ea esse falsitatis, quæ sibi, atque Episcopo ab iniquo Pro-Rege fuissent afficta; suas vero, atque Episcopi responsiones non discrepare ab his, quas Serranus descripsisset. Quorum cum sit tam apertum testimonium, nihil est opus calumniam scelere conflata repellere. Nam quod ii affirmant, quos, ut facerent sibi fidem, Christus ipse deligendo aptissimos existimavit, præsertim cum ipsi de se, rebusque dicant, quæ sibi acciderunt, responsionesque Episcopi referant, quas fideliter in scripta relatas, Episcopus idem recitatas audivit, approbavitque; id si probare velim, vereor, ne injuriam facere videar hominibus, quorum major fides, atque constantia fuit, quam ut vocari omnino in suspicionem possit.

LXXXII. Dum hæc ad conflandam. Johannes a
S. Maria De.

minicanus ex
Philippinis
Insulis in Si-
nam venit ;
atque , ut sibi
a Mandarinis
caveat , ali-
quamdiu sese
in occulto cō-
tinet .

christianis invidiam gerebantur , die
IV. idus novemb. Johannes de S. Maria
Dominicanus clam Chang-cheum venit .
Nam Philippinenses Dominicani , cum
de fociis coniectis in carcerem accepis-
sent , hunc continuo , qui christianos vi-
hostium exagitatos confirmaret , fociis-
que subveniret , subsidio miserunt . Erat
is natione Sinensis , Regisque Hispania-
rum eximio beneficio in eorum numerum
cooptatus fuerat , quos duodenos Sinen-
ses , aut Tonquinenfes in Manilensi Col-
legio suo ipse aere alendos , docendosque
curat , addendos mox , ubi justam æta-
tem attigerint , Dominicanis , qui in
utroque illo regno operam propagandæ
religioni diligentem navant . Itaque ut
munere ita , ut par erat , fungeretur , ad
quod obeundum a Præfectis suis mitteba-
tur , in navem Hispaniensem , quam
S. Andreæ vocant , quæ ab Philippinis
Insulis iter in portum Emuyensem insti-
tuebat , conscenderat . Verum , cum pro-
spiceret , adversis ventis , difficili navi-
gatione , iter longius futurum ; ubi ad
Insulam Tongsoam pervenit , ut citius ,
quo contendebat , pertingere posset , ce-
leremque operam dare christianæ rei ,
una cum Stephano quodam Sinensi chri-
stiano e navi descendit , atque in oram
continentis advectus , Chang-cheum ve-
nit . Quæ res divino sane consilio acci-
disse

disse videtur, ut adversa tempestate
aliam inire rationem itineris cogeretur;
nam, si ea, quam instituerat, retenta,
ad portum Emuyensem venisset, vix eri-
pere se periculo potuisset, ne caperetur,
& in carcerem conjiceretur. Nam sive
quod de ejus adventu antea ethnici co-
gnorant, sive quod suspicabantur, cum eum
Manilam in disciplinam profectum sci-
rent, in Sinam reversurum, exitu fere
septembris mensis contulerat se Mandari-
nus Fo-ganensis ad eum vicum, quo in
vico illius erat domus, deque illo, &
de Sinico, & christiano illius nomine di-
ligenter quæsierat. Jam inde ab eo tem-
pore idem ipse Mandarinus christianos
quosdam vocaverat, iisque in hanc sen-
tentiam locutus erat: scire se, Fung-Jo-
hannem una cum Europæis duobus esse
reversum; ejus videndi desiderio teneri
se; quamobrem ne timeret, atque libere
ad se veniret: ei, christianisque ipsis,
modo Europæi abirent, nihil, quod me-
tuere possent, futurum mali. Verum
quod ille nondum reverterat, etsi jam
Mandarinus multo adhuc diligentius
quæsierat, ejus tamen vestigium depre-
hendere nullum potuerat. Cujus inquisi-
tionibus christiani admoniti facile intel-
lexerunt, qui esset in Johannem animus
mandarinorum; qui certior de re factus,
ne interciperetur, neu suo munere car-
ceri-

ceribus prohiberetur, latendum sibi esse censuit, seque Chang-chei aliquamdiu in occulto continuit.

Hispaniensis
navis præfe-
ctus de acci-
piendo Sansii
corpore dili-
genter curat;
sed Ethnici
corpus com-
burunt: Chri-
stiani cineres,
partemque os-
sium colligunt.

LXXXIII. Quum ad Emuyensem portum S. Andreae nautæ appulissent, ibique expediendis negotiis, ad quæ missi fuerant, morarentur, Chung-Tu, seu provinciis duabus Præfectus, cui erat Che nomen, ad lustrandam, invisendamque Fo-Kienam provinciam mense decem- bri profectus est. Qui cum Emuyum venisset, atque ab Josepho Passarino Præfecto navis maximis honoris, & observantiæ significationibus exceptus, luculentissimis verbis gratiam habere illi se profiteretur, & relaturum promitteret: Josephus pro sua in Sansium religione, singularique in designatos martyres pietate, spiritus sibi sumpsit, ab eoque postulavit, sibi ut Sacerdotes Dominicanos quatuor, qui carcere detinebantur, concederet; velle enim se Manilam illos trajicere. Cui ita ille respondit: quod postulet, id, nisi Prætoris Manilensis litteris testibus acceptis, suscipi omnino non posse: præterea causa ad Imperatorem delata, jam non integram sibi rem esse, neque decernere se quidquam posse, nisi ab Imperatore accepta facultate, ejusque expectari litteras oportere: nihilominus polliceri suam operam se, omniaque, ut ei satisfaceret, quæ posset, ten-

tentaturum. Qua ex responsione, id, quod res erat, præfectus navis facile suspicatus, Chung-Tu voluntate ab eo procul abesse, ut nostros dimitteret, atque ea spe dejectus, experiundum sibi putavit esse, ut capite Mauricastrensis Episcopi potiretur. Cujus quum rei summo jam desiderio teneretur, illud etiam ad spem accessit, quod Tartarus quidam curaturum id negotium se diligenter argenteis nummis, quos sæpe diximus, quingentis, ac nonaginta tribus ex pacto promittebat; quam Josephus pecuniam, quod, pro animi sui insigni pietate, exiguum tanto thesauro comparando existimabat, libentissime spopondit. Verum his ex officiis longe alia, ac Josephus confidebat, consecuta res est. Etenim Chung-Tu, cum ad diem iv. idus januarias an. MDCCXLVIII. Fo-cheum revertisset, mandarinos duos præfectos suburbiiis Heu-Kuon-Hienfi, & Min-Hienfi, quæ suburbia ipsis Fo-gani muris contineri supra est demonstratum, continuo ad se vocat, & Sansii corpus igni cremare jubet summa severitate, sibi que judiciali ratione ut probent, mandat, una esse cum reliquo corpore Sansii caput. Nam etsi diligentissime caverat præfectus navis, ne ea efferrentur, quæ ad obtinendum caput martyris tentasset; Sinen-
rem

rem omnem Chung-Tu aperuerunt, qui contra omni studio, ille ut ne obtineret, laboravit. Chung-Tu, cum ea, quæ diximus, prætoribus mandata dedisset, filere eos, remque omnem tacito administrare iussos ab se dimisit. Quod secus accidit: nam sive quod sunt Sinenses natura ad tacendum difficiles, sive quod aut pietate, aut quæstu moverentur, quidam ex Vu-chuis (nam ita ii vocantur, qui cadavera hominum supplicio interfectorum curant) christianos de tota re certiores fecerunt. Christiani, hoc nuncio accepto, nihil intentatum reliquere, ut ne sanctissimi Episcopi corpus combureretur. Sed eorum tamen conatus fuere frustra; quod mandarini, quibus id negotii datum fuerat, eodem tempore una cum Vu-chuis, ceterisque apparitoribus die vii. kal. decemb. adhibita simulatione, prætermissa occidentali porta, qua porta proxime ad eum locum itur, ubi comburendum corpus erat Episcopi, porta, quæ in septentriones spectat, oppido exierunt. Ubi ad occidentalem agri locum venerunt (Sinenses Sy-Tay appellant) quo loco corpora custodiuntur eorum, qui interfecti fuerint decreto Imperatoris, feretrum exponi martyris imperavit; eoque exposito, antequam aperiretur, custodem interrogant, sitne caput martyris una cum reliquo

liquo corpore. Qui cum affirmasset, tum
aperiri feretrum jubent, ut de ipsa re,
deque custodis responso certo cognoscant.
Igitur asse disrupta, quæ assis feretrum
claudebat, elevatoque panno, magna
omnium admiratione, atque perturbatione
animorum, corpus apparuit Episcopi,
ipsumque etiam caput eodem vigore co-
loris, quo fuerat vivens, vivacibus ocu-
lis, integra barba, capillisque, totum
denique corpus incorruptum, ac ipsæ
etiam vestes, octavo jam mense ab obi-
tu, mundissimæ, nulla macula. Quibus
rebus esse id Episcopi corpus, de quo
quærebant, certissime efficiebatur, rapti-
que mandarini in admirationem conti-
nere se ipsi non potuerunt, quin excla-
marent: optimum certe senem, sanctissi-
misque moribus fuisse, gladioque per
summam injuriam percussum; tamen
quæ imperata a præfecto essent, omnino
fieri oportere. Ergo feretro ligna cir-
cumponunt; applicatoque igne incen-
dunt. Quo tempore res accidit admira-
tione digna. Nam cum in tertiam jam
horam ignis circum arderet, comburi cor-
pus adhuc non potuit; aliaque afferri li-
gna necesse fuit, majusque incendium
excitari. Cujus incendii vi cum in mi-
nutissima frustra essent redacta ossa marty-
ris, mandarini colligi cineres jusserunt,
eademque contrita ossa, atque in puteum,
fen

seu fossam, quæ est in eo loco, omnia conjici. Nam etsi est apud Sinenses in more positum, ut, siquod cadaver igni crematum sit, custos ejus loci, ubi crematio sit facta, cineres, ossiumque fragmenta, quo ab propinquis, si velint, pecunia redimi possint, in urnam cretaceam colligat, inscripto urnæ hominis occisi nomine; tamen mandarini, ut voluntati præfectorum obsequerentur, quorum illum esse animum perspiciebant, ut ne christianis redimendarum reliquiarum facultas relinqueretur, neu cultus martyris propagaretur, vel ipsius Imperii consuetudines violare non dubitarunt. Neque eo secius colligi illa jusserunt decenter, omnique honoris significatione, fidem assidue suam contestantes, non voluntate se, sed præfectorum auctoritate inductos, tanta uti acerbitate. Aderant, dum hæc gerebantur, magnumque animis dolorem capiebant, Paulus Su, christianique Ly-Ignatius, Ye-Paulus, Lo-Petrus, & Cathecumenus Chin-Ul-Yuenus, habebatque is secum filium majorem natu, qui cum se ethnicis immiscuisset cineres colligentibus, ossium fragmenta aliquot, dum ad fossam deferbantur, furtim subripuit. Re perfecta, apparitores abierunt: tum accedentes christiani, & Paulus Su propius ad locum, ubi crematum cadaver fuerat, non-

nul-

nullas ossium particulas, quæ carbonibus, & cineri immixtæ remanserant (nam eodem in agro reliquerant ethnici hæc sepulta) summo studio, summaque pietate diligentissime selegerunt. Quæ a nobis omnia ita descripta sunt, quemadmodum ex testimonio Pauli Su Notarii Apostolici accepimus, qui suis ipse oculis ea cum vidisset, tum die vii. kal. februarias an. MDCCXLVIII. rite testatus est. Assem feretri infimam, quæ ex incendio supererat, ne in loco tantæ ignominia relinqueretur, Cathecumenus Chin-Ul-Yuenus, usus etiam operæ filiorum, altero a crematione die Ly-Benedicti domum intulit; qua in asse, ita ut Dominicus Josephus-Yuenus testatur, de cuius adventu in oppidum Fo-cheum mox demonstrabimus, carbonibus, & cineres humore quodam oleoso imbuti apparent, ac partes etiam quædam quasi adipis caloris destitutione coagulatae.

LXXXIV. Verum christiani, nisi ossa obtinuissent, quæ in fossam projecta fuerant, non esse sibi quiescendum putabant; ac Paulus Su imprimis, quod in eam rem præ ceteris singulari studio ferebatur, cum nullum perficiendi aditum reperiret, spe dejiciebatur, magnoque dolore afficiebatur. Quum hac sollicitudine teneretur, nunciatum ei est,

Reliqua ossa christiani e fossa extrahunt: eaque quemadmodum distribuenda sint, Serranus decernit.

cum

cum loci custode conventum ex pecunia esse, ut a.d. ix. kal. febr. christiani effossas reliquias accipiant. Ipse, quod maxime cauto esse opus intelligebat, noctu, adscitis sibi sociis Ly-Michaële, Chin-Ul-Yueno, hujusque filio majori natu, in agrum contendit. Ubi eo ventum est, Chin-Ul-Yuenus ad ostium sepulcri, custodiam acturus, mansit: tum in sepulcrum se reliqui demiserunt, filius primum ejus, tum Paulus, ac postremo Ly-Michael. Hi, ubi sepulcrum ingressi, sepulcrum ipsum offenderunt plane mundum, nullis ossibus, nisi martyris, quæ erant omnia in acervum coacta prope sepulcri aditum; continuo gratias Deo agere, quod reliquias sanctissimi Episcopi singulari providentiæ munere, consilioque servari eis voluisset, cœperunt; tum eas in sacculos, quos ad eum usum attulerant, immiserunt. Re bene, ac feliciter gesta, Paulus cum sociis ingenti plausu, ac lætitia reliquias domum Ly-Michaelis detulit; ac nocte insequenti cineres etiam martyris, quos fuisse in agro sepultos supra docuimus, pari diligentia, & felicitate recuperavit. Tali modo omnibus Sansii reliquiis receptis, earum tribuendarum ex Tipasitani Episcopi voluntate, cui integram esse rem Paulus voluit, instituta hæc ratio fuit, ut sex in partes tribuerentur, quarum singulæ Romam, Manilam, Fo-ganum, Cang-

Cang-Cheum, & Hing-hoam, retenta Fo-chei una, mitterentur; ceterisque hominibus, quos Serranus diceret, ex iis darentur, quæ inter cineres selectæ fuerant. Atque de his quoque rebus testimonium extat Pauli Su rite firmatum ad dies vii. kal. febr., iv. non. martias; cuius viri tanta fuit iisdem in rebus curandis opera, tamque assidua.

LXXXV. Chung-Tu cum tanta hæc in corpus martyris edidisset exempla crudelitatis, nondum exsaturato odio, mox in christianos, sacerdotesque nostros carceribus afflictos sævire instituit. Qui etsi odio, quo erat in christianam religionem animatus, movebatur, causas tamen sæviendi per speciem obtendebat duas. Prima erat causa adventus navis S. Andreæ ad Emuyensem portum, qua capta occasione christianos, id quod pridem parasent, rebellaturos persuadere conabatur, quare Mandarinis negotium, ut per sua singuli territoria in eos diligenter inquirerent, qui christianismum profiterentur, dedit. Altera erat causa, neque ea minus levis, & falsa, quam prior esset, quod initio anni prope Kien-ningam, quæ urbs centum viginti millibus passuum Fo-cheo abest, nonnulli e secta *jejunantium* ab quodam xiii. annorum adolescente concitati, qui Mo-ey-ly dæmonis spiritu, instinctuque afflari prædicabat sese (cuius

Chung-Tu, novis conflatis calumniis, inquiri in christianos diligenter jubet.

dæmonis in vico quodam, ab Kien-ninga millia passuum duodecim, magnus impri-
mis est cultus) defecerant, implorataque
hujus ope magno tumultu convenerant,
& Kien-ningam urbem aggredi parave-
rant: quos ducenti milites, obviam a
prætore missi, in itinere affecuti, commis-
so prælio, cum illi vim militum, im-
petumque aliquamdiu multa virtute
sustinuissent, tandem, viris, feminis,
puerisque numero ad quingentos in
prælio occisis, reliquos captos quadrigis
Fo-cheum duxerunt. Neque tamen erat
credibile, vel omnino spectata naturæ ra-
tione, nostros Kien-ningensem tumultum
commovere potuisse, quorum tanta esset
ab iis, qui defecerant, religionis dissi-
militudo, tantaque regionum longinquitas,
præsertim cum custodia carcerum tene-
rentur; neque subesse suspicio ulla pote-
rat, unicam Europæorum navim, eam-
que non ad bellum paratam, sed merca-
toriam, in qua essent homines exiguo nu-
mero, pertinere posse ad rebellionem in
Fo-Kiena provincia, magnis copiis in-
structa, concitandam. Verum cum Pro-
Rex, & Mandarini, qui causam nostro-
rum sacerdotum cognoverant, & per
summam injuriam, veritate rerum, æqui-
tateque judicii contempta, acta falsita-
tum referferant, christianos omnes velut
studio seditionis ductos traduxissent, sa-
cer-

cerdotesque auctores turbarum, & principes rebellionis fecissent: Chung-Tu, seu quod morem gerendum iudicibus existimaret, seu quod eam invidiam ipse magis, magisque conflare, augereque vellet, iussit in christianos diligenter inquiri, ac innocentissimos viros reos haberi facinoris, quod ethnici perpetrassent.

LXXXVI. Igitur sacerdotes nostri, qui tot passi jam fuerant calamitates, die ix. kal. febr., illius iussu, manicis, pedicisque constricti diu, noctuque nova molestia sunt affecti; ac Serrano, majori adhuc severitate, fera vinculorum est clausa, proposita, si quis aperuisset, vincenorum flagrorum poena: christiani non aditu solum, sed etiam accessu carcerum prohibiti: ex carceribus exire vetiti vel ipsi custodes: exploratores adpositi, qui custodum agendi rationem diligenter observarent: graves constitutæ poenæ, si quis audiens dicto non fuisset: decretum in Mandarinis factum, ni commissos sibi carceres diligenter custodissent, ut e gradu dejicerentur: horumque interdictorum exempla in carcere Heu-Kuon-Hienfi exposita, ea re adjecta, ne quis in carceres quid deferret, ne u quis reciperet. Atque ut legem supplicii metu firmaret Chang-Tu, cum accepisset, christianis nonnullis aditum ad sacerdotes datum, neque comprehendere jam christianos posset, custodes carcerum,

Sacerdotes arctius vinculis cōstringuntur, & ne quis ad ipsos adeat, caveatur: custodes carceris duo, quod christianis aditum in carceres concesserint, verberibus damnantur: nihilominus Dominicus Yenus, & Ly-Michael, magno cum periculo, sacerdotes invisit.

Heu-Kuon-Hiensem verberibus xl., Min-Hiensem xxx., damnavit. Sed neque periculi magnitudine sunt christiani ab instituto deterriti, quominus adire ad sacerdotes, consolarique pergerent. Qua in re Dominici Josephi Yeni Siamensis Alumni singulare officium fuit, qui, ut Fo-cheum venit, continuo, neque custodes, neque periculum veritus, una cum Ly-Michaele incredibili studio sacerdotes invisum contendit: quumque Alcoberum, & Diazium vidisset, ductus desiderio reliquorum, ad prætorios item carceres adiit, ibique Tipasitanum Episcopum vidit. Quod cum Mandarinis præfecto carcerum nunciatum esset, existere, qui in carceres ingressi essent, hominemque ejus custodiæ commissum inviserent; confestim, tribunali relicto, eis se obviam obtulit inique animatus, ac, nisi per Ly-Michaelis industriam, consiliumque stetit, vix se Dominicus malis, quæ impendebant, eripere potuisset.

Virgines Dominicanæ quatuor, virique item quatuor Ting-tei comprehēduntur, eaque de re Mandarinus Fo-ganēsis ad Cung-Tu litteras mittit.

LXXXVII. Haud ita post per provinciam quoque coepti christiani sunt exagitari. Hujus mali Ting-tei initium fuit, qui pagus millia passuum sexdecim Fo-gano abest. Nam cum præfectus ejus pagi, seu Pao-chian, sic enim vocant, ingentem a christianis pecuniam poposcisset, neque extorquere potuisset, nomina eorum ad Mandarinos pagi alterius Ung-Gan-tini de

de christianismo detulit. Hi se continuo
 Ting-teum conferunt, domumque vir-
 ginum quatuor Dominicanarum adeunt;
 qua in domo etsi virum nullum invene-
 runt, tamen, quod aliqua deprehendissent
 indicia christianæ religionis, feminas
 easdem comprehendunt, virosque præte-
 rea quatuor, aliquem ibi in hospitio esse
 rati ex Europa sacerdotem. De quibus
 Mandarinus Fo-ganensis certior factus,
 continuo ad Chung-Tu epistolam Fo-
 cheum misit; quæ, Pauli Su testimonio,
 sic habebat: „ Novilunii die vi. (prid.
 „ non. febr.) ego Mandarinus Fo-gani
 „ oppidi certiore te facio, deprehendis-
 „ se me, in domo una homines habitare,
 „ servantes ab initio virginitatem. Do-
 „ mum scrutatus cum essem, libelli ap-
 „ paruerunt, itemque alia, quæ ad per-
 „ versam, falsamque legem pertinerent,
 „ libri europæi, *Rosaria* quatuor, ima-
 „ gines, pictæ tabulæ, vasculum unum
 „ nicotianæ herbæ, aliæque nonnullæ res.
 „ *Tertiarias*, quas vocant, seu virgines
 „ comprehendi iussi, Petronillam, Lu-
 „ ciam, Elisabethen, & Ursulam; item-
 „ que Ursulæ fratrem Thomam, Luciae
 „ fratris filium Andream, fratrem Eli-
 „ sabeth Joachimum, & Ursulæ fratris
 „ filium Pium, omnes numero ad octo.
 „ Pius egressus domo, nondum rediit:
 „ continuo tres reliquos conjeci in carce-

M 3

„ rem,

„ rem , atque in iudicium vocavi ; quo-
 „ rum ad te confessiones in scripta relatas
 „ mitto , mihiq; dum rescribas , expe-
 „ ctabo , quod iusseris , factururus „.

LXXXVIII. Chun-g Tu vehementer

Chun-g Tu
 factū laudat ,
 Mandarinoq;
 ut inquirere
 in christianos
 pergat , ju-
 bet .

lætatus rem pro sua voluntate a Manda-
 rinis adeo diligenter geri , Foganensi in
 hunc modum rescripsit : „ Petronilla ,
 „ & ceteræ imprudentes , indoctæque fe-
 „ minæ , quoniam tanto studio sunt falsæ
 „ legi addictæ , neque adhuc , quum
 „ jam senuerint , nupsere ; næ eæ per-
 „ versæ sunt , & fascinatæ . Tu libros
 „ omnes , atque imagines , & , quæ ad eam-
 „ dem pertinent religionem , reliqua
 „ intercipito , fiscoque tradito , mox ut
 „ igni comburantur . Qui vero latent ista
 „ in domo adhuc feminæ quatuor ? Ad-
 „ sunt Europæi scelesti , quorum nostri
 „ opera utuntur , quique clam homines
 „ docent : hique occulte illorum sectan-
 „ tur legem . Absit , ut doctrina , atque
 „ institutiones istorum ferendæ sint . Hos
 „ tu ad quæsitorem provinciæ dimittito ,
 „ qui consilium totius rei capiat , & , quod
 „ visum fuerit , imperet , eorumque
 „ causas per summam severitatem ex ve-
 „ ritate cognoscat , & judicet . Per ter-
 „ ritorium præterea istuc tuum inquirere
 „ secreto pergito ; mihiq; , siquid depre-
 „ henderis , renunciato , ut hanc possim
 „ religionem radicitus aliquando evel-
 „ lere .

„ lere . Libros , quæque intercepta sunt
 „ reliqua , omnia huc ad quæsitorem
 „ mittito , ut comburantur „ .

LXXXIX. Quæsitore , quem Gan-Cha-
 Zu sinenses appellant , delegata sibi causa
 christianorum , adhibitis ad consilium
 Mandarinis , virgines Fo-cheum duci ius-
 sit : nos tamen , postmodum quid de his
 virginibus factum sit , penitus latet ; so-
 lumque de edicto , seu institutione qua-
 dam ab Johanne de S. Maria accepimus ,
 quod edictum Fo-ganensis Mandarinus ,
 ubi probari tantopere eidem Chung-Tu
 operam suam , diligentiamque intellexit ,
 singulis in oppido domorum foribus affi-
 gendum curavit . Quod edictum cum &
 maxime ad rem pertineat , & aperte con-
 silia Magistratum Sinensium exprimat ,
 gratam nos lectoribus rem facturos existi-
 mamus , ejus si exemplum descripserimus .

„ Qui supertitiosæ advenarum , seu Eu-
 „ ropæorum doctrinæ fidem adjunxerunt ,
 „ hi quidem magno in errore versantur .
 „ Eo errore se liberent , si pace , felici-
 „ tateque potiri , ac frui velint . Nam
 „ hi advenæ sceleribus , rebellionibus , & li-
 „ bidini dediti , obtentu legis Domini
 „ cæli , pervertere ipsos conantur , etsi
 „ eos christiani omnes diligunt , magno-
 „ que in honore habent : puellæ au-
 „ tem , atque *Tertiariæ* captivæ illorum
 „ sunt factæ , & a matrimonio , quamdiu

Quæsitore ,
 delegata sibi
 a Chung-Tu
 causa , virgi-
 nes Fo-cheum
 duci imperat .
 Fo - ganensis
 Mandarinus e-
 dicta in chri-
 stianos pro-
 ponit .

„ vivant , abstinere statuerunt . Ipsi ve-
 „ ro Europæi , quamvis appareant huma-
 „ na facie , revera tamen belluæ sunt ,
 „ nullo pudore , violantque bonas Im-
 „ perii institutiones . Ac dicite mihi ; si
 „ res sunt christianis secundæ , si magna
 „ felicitas, quomodo capite plexus est Pe-
 „ to-lus , quomodo alii pulsi in exilium ,
 „ coniecti in carceres alii ? Cur vero ?
 „ Scilicet quod doctrinam sunt amplexi
 „ superstitionem , quod conjicere ipsi se
 „ in tantam calamitatem voluerunt ;
 „ ut jam illis exemplo sint , qui eos imi-
 „ tantur . Habent ipsi descripta nomina
 „ christianorum , quæ mittant in Euro-
 „ pam . Quid autem id est , nisi velle
 „ se contra Imperium erigere ? Pœniteat
 „ jam cunctos erroris , & fraudem agno-
 „ scant ; & boni imposterus esse ne recu-
 „ sent , neque id agant , quod hæ *Ter-*
 „ „ *tiariæ* Petronilla , Ursula , Lucia , at-
 „ que Elisabeth , quas nondum timor cœ-
 „ pit , & servant adhuc libros , atque
 „ imagines ; orantque una simul eodem
 „ in loco viri , & mulieres . Qui si una
 „ cum ceteris ad superstitionem doctrinam
 „ reverterint , in carceres conjiciuntor ,
 „ severumque de iis supplicium sumitor .
 „ Nunc , quoniam miseret Mandarinos
 „ universos suorum hominum, quos vident
 „ deceptos ab advenis, in profundum frau-
 „ dum puteum sensim incidere , hos com-
 „ „ mo-

„ monemus; nam etsi profiteantur, christia-
 „ ni qui sunt, se non posthac futuros; tamen
 „ sciant nos illis fidem habere nullam.
 „ Mandarinis igitur singulis oppidorum,
 „ & portuum, continenter ut inquirant,
 „ jubeo, curentque, ut herbæ hæ pessimæ e-
 „ vellantur, quarum nullus est fructus; ne-
 „ que liceat his amplius eam sectari doctri-
 „ nam, neu res religiosas habere, neu ad-
 „ venas suis domibus occultare: eorum di-
 „ vitias ne appetunto: libros, *coronasque*,
 „ aliaque id genus cremanto: facella deji-
 „ ciuntor: *Tertiariæ* omnes continuo nu-
 „ bento: hæc omnia verbis tantum non,
 „ sed revera implentor: itaque cu-
 „ rent, & diligenter curent, ne pœ-
 „ niteat eos, capti quum fuerint. Quod
 „ est edictum, sedulo animadvertunto.
 Dat. Fo-gani die xii. primæ lunæ (III.
 idus februarias an. MDCCXLVIII.).

XC. Erat Petronilla, cujus per contu-
 meliam meminerunt Chung-Tu, & Man-
 darinus, homines deorum superstitioni-
 bus dediti, virgo quædam annos nata
 LXX., imitatrix alterius Petronillæ,
 quæ & ipsa opera Dominicanorum Chri-
 sti fidem secuta, prima feminarum in
 Sina virginitatem, cujus virtutis exem-
 plum antea in iis regionibus nullum exti-
 tisset, Christo voverat. Hujus illa se ad
 exemplum componens, vitam ad hæc
 tempora singulari virtute, atque incredi-
 bili

De Petronil-
 la prima in
 Sinis virgi-
 ne.

bili pietate traduxerat, dedita imprimis studio legum christianarum, in quibus multa cum laude jamdiu versabatur: & quum maximo cum a christianis, tum ab ethnicis in honore haberetur, usa auctoritate, quam summam sibi apud utrosque comparaverat, alteros de rebus adversis continenter consolabatur, alteros hortabatur, ut parentem suspicerent Deum, ejusque jam legibus obsequerentur. Quæ cum esset etiam virtute divinitus prædita sanandi morbum infantium, quem illi *malum ventum* appellant (quod est morbi genus maxime periculosum, ex quo, nisi adhibita celeriter fuerit medicina, sunt pauci qui evadant) sempiternam illis sæpe salutem comparabat. Nam quum ethnici affectos eo morbo filiolos eo plerumque tempore ad illam deferrent, quo spes jam salutis nulla reliqua erat; ipsa continuo ad parentes conversa, monebat, puerum certissime moriturum, postulabatque, ut desperata salute corporis, animo saltem infantis consulerent, eumque initiari nostris sacris paterentur; quo esset futurum, ut solutus corpore animus ad Dei conspectum evolaret. Ac parentes quidem plerique omnes rem feminæ permittebant: quod siqui recusassent, tum illa, modo interiturum puerum certo prospiceret, industrie, ingenioseque, patre imprudente, baptizabat; qua in re
sem-

semper cautione usa est tanta, ut omnium, quot per annos tres, & quadraginta baptizavit, convaluerit nemo. Comprehensa est autem eadem in domo, in qua prior Petronilla erat mortua; captæque cum ea simul virgines reliquæ tres, quibuscum pietatis studio, & virginitatis professione conjuncta sanctissime vivebat.

XCI. Interea dum per Fo-ganensem agrum, circumjectamque regionem ethnicorum furor grassabatur, Johannes a S. Maria, qui hactenus, propterea quod quæri se ab ethnicis intellexisset, Chang-Chei se in occulto continuerat, contemnere jam pericula constituit, arreptoque itinere, prid. idus febr. Fo-cheum venit. Qui etsi, ut adire ad martyres designatos posset, diu multumque laboraret, nihilque prætermitteret, quod ad eam rem pertinere videretur; tot tamen, tantæque sunt difficultates oppositæ, ut conata perficere non potuerit. Immo vero ne licuit quidem viro in civitate consistere, quod perterritis metu christianis, cum ab ethnicis inquiri summa severitate viderent, rumoresque de eadem re undique assidui afferrentur, nemo fuit, qui occultare illum auderet. Itaque coactus est Hing-hoam discedere, quo loco christiani qui sunt, iidem a collegii Siamensis alumnis instituuntur. Verum, cum ibi quoque iniquum in locum res esset christiana deducta,

Johannes a S. Maria Fo-cheum venit; mox excedere coactus, Hing-hoam petit, christianisque per vicos sacra aliquādiu administrās, tandem fugere rursus compellitur.

ducta, neque maximis timoribus caret, inde etiam discessit, & Cang-Cheum revertit. Visum heic jam homini tantisper pacatum tempus, ejusque ut fructum caperet, continuo ad sacra christianis jamdiu sacerdote destitutis administranda contulit animum, multamque in his rebus operam consumsit, concurrentibus assidue magno numero qui *pœnitentiæ*, qui-que *baptismi* sacra flagitarent, ne facultatem suscipiendi oblatam dimitterent, cujus fructu aliquot jam annos caruissent. Neque tamen diuturnum id fuit solatium. Nam eo Mandarinus alter cum venisset, qui affligendorum, vexandorumque, si posset, christianorum sibi onus susceperat, jussit confestim incolis, ut in domos irruerent christianorum, inque Europæos, qui occultati per eos essent, diligentissime inquirerent. His rebus cognitis christianus quidam continuo VII. idus aprilis ad vicum Hau-pan celeriter contendit, ut Johanni nunciaret, qui eo in vico perper id tempus munere fungebatur suo: monet ut maturet fugam, proxima enim nocte, aut insequenti die apparitores venturos, Europæosque per domos inquisituros. Quod sane nuncium commodum venit. Nocte enim proxima satellites vicum ingressi, domum continuo petiverunt, qua in domo Johannes habitarat: adeo scilicet de eo diligenter cognoverant.

Quem

Quem etsi deprehendere non potuissent, non tamen conatu destiterunt, vicosque proximos adire, scrutarique instituerunt; ut divinæ providentiæ consilio, quæ illum aliis servaret rebus, factum existimari debeat, ut ne satellites in proximum alium pagum venirent, quo ille profugerat.

XCII. Mandarinī, qui religionis christianæ doctores e Sina aliquando exterminare summis viribus nitebantur, non modo non intermiserunt inquisitiones, verum etiam, occasionem nacti, auxerunt magno christianorum periculo, magnaque accessione calamitatum. Fuit autem occasio hæc. Antonius Huo-Guan-Kie, quem alii Hu-yuen-Ki nominant, qui a Christi religione desciverat, cum interpretem ageret iis, qui navi Sancti Andreae venerant, atque inter portus ministros frequentissime versaretur, & nautis ejusdem navis familiariter uteretur, ex his cognovit deferre eam navim commeatus Dominicanorum, subsidiaque importare, quæ unicuique illorum Rex Hispaniarum pro eximia sua in religionem pietate in annos singulos mitteret, collectasque Macai pecunias, quas christiani ejus urbis, acceptis nunciis de morte Sansi, deque sacerdotibus reliquis carceribus detentis, dum supplicatio ob eam rem publice haberetur, contulissent, subsidioque afflictis christianis

Ethnici cu-
jusdā opera,
qui pridem a
christianismo
desciverat,
Nien - Anto-
nius, alique
christiani cō-
prehendūtur:
sed ipse etiā
transfuga ca-
pitur.

Fo-ganensibus misissent . Suspensus est etiam Johannem a S. Maria Manila venisse, & domi Nien-Antonii optimi christiani latere ; itemque Antonii filium instituto Dominicanorum addictum versari Manila intellexit, vocarique Petrum a S. Dominico . Præterea arca christiani unius, cui erat Chay-Stephanus nomen, præter jus, fidemque aperta, ex qua omnem pecuniam ad argenteos nummos xl. surripuit, litteras invenit ab eodem Antonio aliquot ante annis ad eum datas, quarum hæc erat summa: filium suum Augustinum Fo-ganum esse profectum rogatum Dominicanorum aliquem, ut ad christianorum solatium Chang-cheum se conferat : rogari item ab se præfectum provinciæ Philippinarum, aliquem ut eodem sacerdotem mittat, qui rem christianam administret . Hæc etsi satis erant ipsa ad commovendam iram, cupiditatemque concitandam Mandarinorum ; tamen scelestissimus homo mendacium adjecit, Nien-Antonium pro cooptando filio in ordinem Dominicanorum quinque nummum argenteorum millia solvisse . His ex criminationibus libellum composuit, & Mandarino Emuyenfi dedit . Is ad provinciæ Pro-Regem misit, qui cupidus perficiendi, quod instituerat, ut ab omni provincia Christi cultum penitus exterminaret, Mandarinis Cang-Cheensibus

sibus jussu missi, ut Nien-Antonium, comprehenderent, & in carceres contruderent, fratremque ejus minorem natu Nien-Petrum, aliosque adhuc quinque, quos inter eum ipsum, qui libellum confasset, & Mandarino dedisset. Mandarini imperata faciunt, atque a. d. v. kal. junias singulos in carceres contrudunt.

XCIII. Hoc ferme tempore Ambrosius Hy-jinus, cujus de constantia, & fide sæpe est demonstratum, ab Fo-cheensibus carceribus ad Fo-ganenses transductus est. Factum id fuit non opera quidem ipsius, quasi solatium quæfisset, sed voluntate omnino Mandarinorum. Hi enim, quum prid. nonas majas eandem judicii rationem instituissent, quam a. d. iv. kal. junias anni superioris MDCCXLVII. descripsimus, ita de Ambrosio decreverunt, uti nulla, seu capitalis sententiæ jam latæ, ejusque genis insculptæ, seu custodiendi rationis, facta immutatione, omnino locus carceris mutaretur. Erat hæc res Ambrosio nonnullæ levationi, quod reducto in patriam, tametsi catenis victo, facilius subvenire cognati possent, ipsique potestas fiebat rem perficiendi, quam inchoarat, ut homines duos, quos cum instituendos christianismo suscepisset, mox conjectus in carcerem, prohibitusque docendo fuerat, imbueret jam penitus, nostrisque sacris initiaret. Quamquam

Ambrosius ab Fo-cheensibus in Fo-ganenses carceres transducitur, virosque duos nostris sacris initiat.

quam Fo-chei etiam, quum in Min-Hien-
 fibus carceribus summis angustiis, summa-
 que severitate custodiretur, annunciandæ
 christianæ religionis finem fecit nullum,
 hominemque, cujus valetudo summo in
 discrimine versabatur, ad eandem reli-
 gionem perduxit, ac baptizavit, cujus
 postea vivendi ratio, cum morbo evasis-
 set, dignissima christiano viro omni-
 bus visa est. Ac nostri, quod mutatione
 carceris magna parte incommodorum
 levare Ambrosium intelligebant, ejus di-
 scessu sunt vehementer lætati; contra
 ipse moleste tulit, ut qui sibi discedendum
 ab iis esse videret, quos semper paren-
 tum, & doctorum loco habuisset, vere-
 returque, ut sequi eos jam ad triumphum
 posset, quibuscum una pugnam sustinuis-
 set.

Johannes a
 S. Maria ite-
 rum Chang-
 cheo discedit
 Fo-chei ver-
 sus. Ethnici
 Chang-cheen-
 sium christia-
 norum domos
 scrutantur.

XCIV. Johannes a S. Maria, qui
 Chang-cheensium, proximorumque chri-
 stianorum opera hætenus delituerat, jam
 admonitis ab iniquo Ha-Guan-Kie man-
 darinis, captisque christianis, ipsoque
 etiam accusatore in carcerem coniecto, ut
 rem probaret, quam nunciaverat: quum
 intelligeret sibi, suisque hospitibus nul-
 lum posthac locum tutum futurum, du-
 ctus etiam studio subveniendi sociis Do-
 minicanis, quam ob rem in Sinam fuisset
 missus, rursus rem tentandam existi-
 mavit, nonisque juniis Chang-cheo
 pro-

profectus, jam iterum Fo-cheum versus contendere instituit. Post ejus discessum diligentius mandarini inquirere Chang-chei coeperunt, habitaque de christianis, quos ceperant, quæstione; idibus juniis domum Antonii adierunt, relaturi in scripta, quæcumque in ea invenissent; neque tamen invenire quidquam potuerunt, quod ad christianam religionem pertineret, propterea quod omnia inde commodum, prudenterque subducta fuerant. Hinc domum fratris illius Nien-Petri petunt: libros, & imagines nonnullas reperiunt, atque intercipiunt, deque omnibus ad Chang-Tu Fo-cheum scribunt.

XCV. Interea Johannes die viii. kal. quintiles Fo-cheum venit. Etsi iisdem fere difficultatibus afficiebatur, quibus superiori tempore, quemadmodum in civitate manere, & ad designatos martyres adire posset, propterea quod metu mandarinarum christianus nemo, ac ne ipse quidem Ly-Benedictus, cujus tanta erat pietas, & fortitudo, excipere illum hospitio, domique retinere audebat; non esse tamen animum despondendum putavit, neque conatu desistendum; ac, ne cui hospitii causa calamitatem daret, templum deorum quoddam parvum conduxit, ibique clam habitare coepit. Sed etsi omni cura, ac diligentia conabatur, neque studiose solum, sed etiam, quod

Johannes a S. Maria Fo-cheum venit, sed rursus discedere cogitur.

maxime res poscebat, caute, tamen carcere detentos videre omnino non potuit; tanta enim severitate custodiebantur, ut ne scribendi quidem facultas illis relinqueretur, quin subesset periculum, ne epistolæ interciperentur. Verum paullo post, cum vii. kal. quintiles, qui ex Kien-ningensi tumultu supererant, affecti supplicio homines XLV., reliqui partim diversis poenis damnati, partim dimissi fuissent, coepit paullatim remitti custodia carcerum, ut jam mitti ad nostros litteræ, ex eisque recipi possent. Quod cum Johannes ab die iv. kal. sæpissime faceret, epistolis numquam nomen subscripsit, veritus, ne, siqua forte fortuna in custodum, exploratorumve manus littera incidisset, re patefacta, negotium impediretur, de quo tantopere laborasset. Neque licuit tamen Johanni diutius Fo-chei versari. Nam cum ad præfectos provinciales nuncia Changcheo, atque indicia continenter mitterentur, majusque in dies periculum fieret, discedere coactus est, talemque inire discessus rationem, ut, declinato periculo, posset rursus, ubi per tempus licuisset, facile in urbem reverti.

Sacerdotes
in carceribus
summa le-
veritate affer-
vari magnis
incommodis

XCVI. At sacerdotum nostrorum, incommoda, etsi diuturna, ne minimum quidem remittebantur. Interditi longioribus manicis vinciebantur, ita uti fieri pri-

primum cœperat; & noctu in cubiculum ^{premuntur;} concludebantur ^{eaque invictos} perobscurum, constri- ^{fortique ani-} cti brevioribus manicis, pedicisque, ut ^{mo petierunt} toto prorsus corpore impedirentur. Ostia carcerum custodiebantur præcipua severitate, atque ita, ut non solum adire ad eos subsidii causa citra summum periculum posset nemo, sed ne epistolæ quidem deferri, nisi illorum, qui deferrent, calceis inclusæ, quod etiam ipsum metu non carebat, gravissimis constitutis poenis, si quis detulisset. Ipsi autem sacerdotes ne scriberent ad christianos, certioresque eos de se facerent, quæ res nonnullam ipsis molestiarum levationem attulisset, cum multis aliis, tum his etiam duabus de causis impediiebantur, quarum erat altera nimia curiositas ethnicorum, quibuscum erant una in carceribus, quibusque præsentibus scribi oportebat; altera, quod, omni alia facultate sublata, scribere super suis ipsi genibus cogeabantur, iisque continenti pedicarum dolore maxime infirmis, atque affectis. Quorum de malis, gravissimisque incommodis, ne longior evadat scriptio, illud breve, verissimumque dicere posse videmur, eos, severitate ethnicorum omni prorsus subsidio interclusos, tantum dumtaxat solatii aliquando cepisse, quantum divina providentia curabatur, ut ne ante cederent ærumnis

illorum corpora , quam adesset divinitus
 constitutum tempus , quo se , vitamque
 suam Christo devoverent . Hac tanta
 acerbitate, assiduitateque malorum sensim
 concidebat hominum valetudo , cumque
 reparandi ratio nulla suppeteret , tan-
 dem eo sunt redacti , ut in morbum
 omnes inciderent , ac Royas pene mo-
 reretur . Quæ res tot , tamque molestæ
 etsi ægritudinem corporibus illorum in-
 ferebant , de virtute tamen , & fortitu-
 dine animi nihil imminuebant . Nam
 quo tempore calamitatibus maxime pre-
 mebantur , tanta erat , divina ope , eo-
 rum hilaritas , ut magnam moverent
 aspicientibus admirationem : quodque
 intelligerent dignos habitos se , qui pro
 nomine Jesu contumeliam paterentur, sum-
 mo gaudio perfundebantur , adeo ut ni-
 hil fieri umquam voluerint , quod , alio-
 rum suasu , consilioque , ad libertatem
 recuperandam conferre posse intellige-
 bant . Neque vero aliud avebant , nisi
 ut darent pro Christo vitam , si ipse id
 munus accipere dignaretur . Ex hoc au-
 tem studio , quo præcipuo incendebantur,
 illa existebant , quorum sunt epistolæ il-
 lorum plenæ , avide expectare jam se gla-
 dium , qui capita ab corporibus præcide-
 ret ; tum assidua illa anxietudo animorum,
 qua ex Matthia Fu , aliisque , certum ne
 sibi adhuc esset supplicium capitis, per-
 cuncta-

cuntabantur. Atque in Commentario, quem Serranus descripsit, multisque ejus litteris, quas habemus, nihil tam crebro occurrit, quam illud: offerre se Christo suum caput, libentique animo, ac summa cum lætitia inopem (nam ita agebat) hanc ab se fieri oblationem. Nec minus studebant divinæ voluntati permittere penitus ipsi se; sibi que diffidentes, in Dei unius auxilio spem suam omnem, & fortitudinem collocabant. Igitur neque egere aliquando quidquam, quod ad maturandum supplicium pertineret: & ubi, quod sæpius accidit, commutatam sibi perpetuo ab Sina exilio capitalem sententiam audissent, pacato, æquoque animo tale nuncium accipiebant; ut quamquam displiceret eis coronam sibi quasi eripi, quam paratam existimassent, submitterent tamen libenter se voluntati omnipotentis Dei, cujus id consilio esset factum; indignosque se existimarent, qui præclaram, & singularem martyrii gloriam consequerentur. Quamobrem cum ad christianos animorum sibi pietate conjunctos scriberent, illud assidue flagitabant, sibi ut divinam opem precibus implorarent, quæ spiritus sibi majores adderet & ad pugnandum, & ad vincendum. Ac Tipasitanus quidem Episcopus epistolam, quam prid. non. octobres anno MDCCXLVII. ad Magistrum Ordinis

nis dedit, his verbis claudebat: „ Omni
 „ animi sensu, multisque cum lacrimis,
 „ quas nunc effundo, Te, mihi ut bene
 „ preceris, rogo; quo & exitum ex hoc
 „ mundo felicem impetrare, & divinas
 „ laudes in gloria canere sempiterna,
 „ possim. „

His ex virtutibus insignis ea animo-
 rum æquabilitas oriebatur, quam tantam
 sunt consequuti, ut quibus rebus frangi,
 despondereque animum ceteri homines so-
 leant, iis ipsi ne perturbarentur quidem.
 Cujus rei illustre fuit exemplum, quod
 cum turpissimis calumniis fama illorum,
 & dignitas majorem in modum vexare-
 tur, ita eas audierunt, legeruntque, ut
 tristitiam tamen animis nullam caperent;
 & quamquam scirent, esse, qui fidem
 calumniæ haberent; tamen ne commoti
 quidem, æquo animo id solum responde-
 rent, quod innocentia, quodque veri-
 tas ipsa rei postulabat, servata integer-
 rime caritate. Neque minori flagrabant
 studio procurandæ salutis hominum
 sempiternæ. Atque cum ob eam rem in
 tot calamitates incidissent, tum ejus
 præclarum fuit specimen, quod confir-
 mandis, juvandisque christianis, qui
 pulsī in exilium, inductique eosdem in
 carceres fuerant, præbuerunt. Quod si
 studio nostrorum, quibus moram vincula
 non injiciebant, majori numero non
 sunt

funt adducti homines ad Christi fidem, aut in ea confirmati, factum id est ea de causa, quemadmodum Serranus prid. idus quintiles ejusdem anni, datis ad Miraltam virum gravissimum litteris, scribebat, quod nemini aditus ad eos permittebatur, quodque ethnici, qui erant iisdem in carceribus inclusi, suis ipsi sceleribus indignos reddebant se divina ope, quorum adeo erat in omni turpitudine effusa libido, ut miraretur designatus martyr, non ignem pluere, qui, uti factum olim Sodomis fuerat, & carceres ipsos, & qui in carceribus erant, incenderet.

XCVII. Sed Deus O. M., qui, quos Ethnici Sacerdotibus avaritiæ calumniam intentant, eaq; de re Maigrotus ad Serranum litteras mittit.

elegit, eorum virtutem ærumnis, molestiisque perspectam aliis efficere solet, crebris incommodis fidem, constantiamque nostrorum experiebatur. Itaque inter ceteras ineptias, quæ ad obscurandam gloriam designatorum martyrum efferebantur, manarat in vulgus rumor, avaritia eorum, atque imprudentia esse factum, ut in Fo-Kiena provincia tempestas in christianos concitaretur. Ferebatur autem mendacium compositum tali ratione: christianum quemdam, antequam vita excederet, testamento Dominicanis præcipuam partem facultatum reliquisse; filio vero, quem haberet unicum, deteriore. Hunc, mortuo patre, consum-

tis bonis , adiisse ad Dominicanos , ab
 hisque petiisse , portionem sibi ut darent
 hæreditatis , quam ante accepisset . Qui
 cum durius ab Dominicanis habitus esset,
 duriusque rejectus , ira incensum ab Chri-
 sti fide descivisse , eosque accusasse . Qua
 de re etsi nostri continuo cum a benevo-
 lentibus plerisque , tum præsertim ab
 præstantissimo , & diligentissimo viro
 Matthia Fu certiores fuerant facti ; ta-
 men , quod apertissime falsa res , & ne-
 veri quidem similis appareret , contem-
 nendam putaverant , eamque nos omnino
 unica in epistola ab Royo ad Miraltam
 prid. non. novemb. MDCCXLVII. da-
 ta , tamquam patens mendacium com-
 memoratam offendimus . Verum cum ne
 tanta quidem incommodorum diuturni-
 tate odium , quod concitatum in eos fue-
 rat , mitigaretur , magis , magisque
 aucta ea invidia est eorumdem opera ,
 qui primum conflaverant . Quamobrem
 Johannes Baptista Maigrotus Pro-Vica-
 rius Apostolicus Yun-nanæ provinciæ ,
 & Procurator Generalis Episcoporum ,
 Vicariorum Apostolicorum , & Missionario-
 rum Gallicorum in Indiis , quod sibi cer-
 tissime persuasisset mendacio hunc omnem
 rumorem contineri , cum conatus sæpe
 fuisset calumniam depellere , tandem ut
 ea jam apertius confutari posset , Tipasi-
 tano Episcopo renunciavit , ab eoque
 pe-

petiit, ut suo ipse chirographo rem omnem describeret, descriptamque ad se mitteret.

XCVIII. Serranus hoc accepto nuncio, calumnia id genus accusationis invaluisse, tam æquo, tranquilloque animo cognovit, quam idipsum primum efferri in vulgus acceperat. Neque eo fecius, ut Maigroto satisfaceret, cujus in se, suosque socios tantum esse studium perspiciebat, epistolam ad eum misit jurejurando firmatam, quæ sic habebat: *Testificor coram Deo, & Christo Jesu Domino nostro, quod omnia supradicta nobis imposita, sunt falsa, falsissima, ficta, & chimerica: testis est mihi Deus, quod non mentior: sic me Deus adjuvet. Amen. In testimonium veritatis propria manu subscripsi in hoc carcere Gubernatoris civitatis Fo-chei metropolis provincie Fo-Kien Imperii Sinarum, die 9. julii anni Domini MDCCXLVIII. - Fr. Franciscus Serrano Ordinis Prædicat. elect. Episcop. Tipasitanus, & Vicarius Apost. Prov. Fo-Kien.*

Maigroto
Serranus re-
scribit, ca-
lumniamque
repellit.

XCIX. Interea dum vexata fortitudo nostrorum in dies augebatur, obfirmabatur adversum pervicacia, & crudelitas inimicorum. Chung-Tu, cum nuncium Chang-cheo accepisset de Nien-Antonio in carcerem coniecto, deque inven-

Chung-Tu
de Nien-Antonio filio Dominicanorum querere instituit. Nien-Petri supellex Fo-cheum deferretur.

tis domi fratris ejus Nien-Petri rebus ad christianam religionem pertinentibus, continuo certiolem Imperatorem fecerat, ab eoque quæſiverat, quid facto eſſet opus, ſi quæ alia poſt deprehendiſſet. Huic Imperator mandavit, ut quæreret quam diligentiffime poſſet, inveſtigaretque, haberet ne Nien-Antonius Maniæ filium, qui Dominicanorum inſtitutum profiteretur. Quo accepto mandato, homo, qui ſua ipſe ſponte ad profligandam religionem christianam ferebatur omni cogitatione, multo adhuc diligentius providere, ut rem cognoſceret, in quam inquirere jubebatur, cœpit. Die XII. kal. ſextiles, icones, libri, ſupellex, quæ inventa apud Nien-Petrum fuerant, Focheum venerunt, ab Mandarinis Chang-cheenſibus miſſa, qui nihil ſibi reliqui fecerunt, quin Pro-Regis voluntati penitus obſequerentur.

Chin. VI.
Yuenus filios
ad ſuſcipien-
dam chriſtia-
nam religio-
nem inducit,
magnifq; vir-
tutibus auctus
noſtris ſacris
una cum filia
initiatuſ.

C. Quo tempore Cathecumenus Chin-
VI-Yuenus inſigne beneficium, quod
ei jamdiu divinitus parabatur, eſt con-
ſequutus. Jam inde ex eo tempore, quo
ſanguinem Venerabilis Mauricaſtrenſis
Epifcopi tractaverat, atque evaneſcere cœ-
perant tenebræ ſuperſtitionis, quibus mi-
ſere involutus erat, auxiliis divinæ gra-
tiæ obſequens non obſcura ſuæ pro-
penſionis in lumen chriſtianæ religionis,
quo

quo circumfundebatur, indicia dederat. Nam post præstita martyri singulari pietate officia paucis diebus, immutato animo, cultuque, quem antea diis maximum adhibuerat, in odium converso, imagines deorum fregit, & in frustra contritas in ignem coniecit, suos ita alloquens: *Nolo jam ego sequi diabolicam hanc sectam: sanctam constitui confectari, ac divinam legem: vobis eadem hæc est suscipienda, si evadere supplicia, si cælum consequi avetis.* Cujus exemplo incitati filii, suscepto consilio, & ab Sacerdotibus quibusdam instituti, Deum cognoscere, divinamque doctrinam tanto studio, atque cupiditate excipere cœperunt, ut magna omnium admiratione uberrimi confestim ejus fructus existerent. Namque continenter errores detestari, quibus ante fuissent addicti, & Deo assidue gratias agere, quod merito, rogatuque Venerabilis Episcopi Sansii (nam ita existimabant, fane pie) ex nocte superstitionis se ad mirabile lumen, quo illum cognoscerent, traduxisset. At Cathecumenus doctrinæ studio tantas virtutes adiciebat, ut plane appareret, cujus esset generis spiritus, quo ciebatur. Itaque cum Matthia Fu, & Paulo Su, quemadmodum supra demonstravimus, efferendo primum ex agro reorum hominum cadaveri Episcopi, tum, cremato corpore,

col-

colligendis ossibus , cineribusque multam , diligentemque suam operam præstitit : & Paulum Su Fo-cheo profectum allatum reliquias martyris ad urbem Macaum , ipse Chang-cheum usque fideliter est comitatus ; ac denique factus ex Cathecumeno propagator christianæ religionis , focrum , omnemque familiam ad eamdem suscipiendam induxit . His , quæ erant palam , multa accedebant , quæ secum ipse præclare , sancteque faciebat . Quotidie surgens diluculo , *Rosarium* recitabat ; cumque eum dæmon , aliquando objectis menti imaginibus impudicis , quandoque incitans ad blasphemias , amovere a precibus niteretur ; ipse conatus ejus semper elusit ; utque majori rerum divinarum amore seipsum incenderet , notas suis volis inscripsit , quæ notæ Sinice Dei nomen referrent , easque sæpe oculis admovens , crebris emissis suspiriis , explebat eam , qua erat maxima incensus , caritatem . Qui cum jam se ad recipienda nostra sacra comparasset , christianorumque esset doctrina egregie institutus , postquam inimicorum furore diu fuerat impeditus , tandem , divina ope , oblata occasio est , ut commodum mysteriis initiaretur . Nam Johannes a S. Maria , cum prid. nonas festiles Fo-cheum venisset , hominem eadem die baptizavit , imposito Pauli nomine,

mine, quo nomine, etiam dum Cathecumenus esset, vocari consuevit; simulque fratris illius filiam nomine Lau, quam Mariam appellavit. Qui duo, ut sunt baptismo consecrati, tanto perfusi sunt gaudio, tantaque pietate, & caritate incensi, ut mirarentur, qui aderant, Deoque gratias agerent maximas, quod Chin-Vl-Yuenum anno ætatis LVI., sua prorsus pietate, suoque admirabili consilio, ex dæmonis servitute in libertatem adseruisset.

CI. Eodem tempore, dum gratiam illis referebat Deus, qui de christianis meriti optime fuerant, illorum injurias ulciscébatur, qui eosdem insectabantur. Cheu-Hio-Kienus Pro-Rex, qui Pe-Kingum magna cum spe honoris, & dignitatis vocatus fuerat, quique tot cruciatibus, & calumniis nostros vexaverat; repente, immutata Imperatoris in eum voluntate, comprehensus, & vinctus iussu Pe-Kingensis Quæstitoris, cum multatus esset, desperatione ductus, actusque in rabiem suspendit ipse sese, ejusque exemplum omnis illius familia secuta est. Alius item præfectus nescio quis, qui temporibus christianorum afflictis præerat Fo-Kienæ provinciæ, cum Pe-Kingum se recepisset, ibique ab omni administratione reipublicæ amotus esset, in morbum implicitus sordidum, putrefacto

Hosles christiani nominis maximis calamitatibus premuntur. Ethnici christianos aliquot comprehendunt; ac Ly-Benedictum, ejusque filios, & Mieu-Raymundum alapis, Ly-Michaëlem tormento excruciant.

col-

collo, acerbissimis doloribus cruciatus miserrime obiit. Ipsum etiam Imperium iniquitatis, qua in nostros homines utebatur, poenas divinæ justitiæ dedit. Famine, siccitate, eluvione, rebellionibus, peste conflictatæ plures Imperii provinciæ; ac brevi orbatus filio, quem unicum ex Imperatrice susceperat, ipse Imperator; eademque Imperatrix, in quam amore erat incredibili, vix Te-cheo reversa, quæ urbs tridui iter Pe-Kingo abest, morte correpta. Quibus rebus, etsi divinitus eo spectasse non immerito plerique arbitrantur, ut de hostibus christianorum supplicium fumeretur, non sunt tamen inimici christiani nominis commoti, tantumque abfuit, quin sævitia, & maleficio desisterent, ut potius, novis adjectis minis, poenisque gravioribus constitutis, illud continenter laborarent, ut omni prorsus subsidio nostri prohiberentur. Eorum autem iniquus animus, oblata occasione, ineunte septembri mense eodem anno, conspicuus fuit. Nam cum Fo-cheum christianus quidam Lo-yuenfis se contulisset, neque adeundi ad designatos martyres, quam summopere optabat facultatem obtinere potuisset, propterea quod carceres diligentissime custodiebantur; tum, ut suæ ipse erga martyres pietati, quoad ejus fieri poterat, satisfaceret, pecuniam Ly-Benedi-

cto

cto reliquit, qua in eorum victum, atque subsidium aliquid compararet. Ly-Benedictus, ut, tam difficillimis, atque impeditis rebus, & negotium perficeret, quod susceperat, & vitaret periculum, cum ipsis ministris carcerum egit, ab hisque, ut deferendam ad nostros pecuniam susciperent, impetravit. Accidit vero, ut, qui Royo portionem erat pecuniæ delaturus, sua ipse negligentia, ab exploratore deprehenderetur. Huic incommodo aliud eodem tempore accesserat, elato in vulgus rumore, filium Ly-Benedicti alterum, qui in Siamensi Collegio ageret, cum quinque *taelorum* nummum millibus in Sinam venisse. His rebus a Pro-Rege cognitis, continuo ejus mandato comprehensus est Ly-Benedictus, ceterique viri, qui cum eo una degebant, omnes; duæque præterea epistolæ in ea domo inventæ, altera ab filio altero Ly-Benedicti Siamio missa, altera, cui erat Sacerdotis cujusdam Sinensis subscriptum nomen. Quam ob rem incensus furore Pro-Rex, ut qui pessime in nostros animatus esset, Ly-Benedictum alapis viginti cædi jussit, totidemque ejus filium majorem natu, ac tertium triginta; tum Ly-Michaëlem conatus inducere, ut quam accepisset pecuniam, eam ab Europæo aliquo datam diceret, unde nova in nostros instrui calumnia posset, re-
nuen-

nuentem bis tormento ad talos, atque ad manus semel addixit; aliumque christianum nomine Mieu-Raymundum, quod ab Sinensi homine pecuniam datam perpetuo asseveraret, crebris colaphis afflixit.

Chung-Tu, &
Pro-Rex Sa-
cerdotes qua-
tuor secreto
in carceribus
necari impe-
rant.

CII. Significabatur autem his rebus, proxime futurum, ut supremam crudelitatem in designatos martyres hostis exereret, quæ tot malorum, tantarumque calamitatum finem faceret. Fuerat hoc item anno rursus cognita illorum causa, quod prid. non. majas contigisse putandum est; statuerantque iudices, ut extremo fere anno decretum de iis capitis supplicium sumeretur. Qua de re cum Imperatorem consulissent, etsi is, servato Imperii instituto, in annum infrequentem supplicium differri jussisset, tamen Chung-Tu, & Fo-Kiensis Pro-Rex, sive quod custodiendorum Europæorum cura levare tandem optarent se, in quos tantam esse perspiciebant christianorum voluntatem; sive quod exterminari christianam religionem, quod jam diu moliebantur, nisi sublati ejus magistris, posse diffiderent, maturandum statuerunt, ut, qui illam profitebantur, præcipuo præsidio destituerentur. Ergo ubi primum de Imperatoris consilio cognoverunt, continuo provinciæ quæsitorem, Fo-cheensem prætorem, duosque mandari-

darinos Heu-Kuonensem, & Min-Hiensem evocant, conciliumque cogunt: his, quod ipsi statuerant, proponunt, in carcere Europæos quatuor strangulari oportere, crematisque corporibus, ad Imperatorem scribi, morbo in carceribus homines decessisse. Facile mandarini consentiunt, & consilium probant. Itaque jubetur, ut, comparatis funibus, & feretris, lignisque, ad diem v. kal. novemb. hora post meridiem sexta lictores adsint, qui rem exequantur.

CIII. Ubi ea dies venit, octava a meridie hora lictores ingressi prætorios carceres, Serranum ex ampliori cubiculo, ubi erat, extrahunt, inque aliud contrudunt, in quo erat nemo. Ipse continuo intelligens quo ea immutatio pertineret, vehementer lætatus, quod acceptum Deo videret esse sacrificium vitæ suæ, quod sæpe obtulisset; ut munus apostolicum, quod optatissimam sibi coronam jam afferebat, perficeret, convertit se ad eos, qui aderant, eosque hortari cœpit, ut christianam religionem complecterentur: humique ab lictoribus prostratus, hortari adhuc monereque pergebat. Tum vinctis pedibus, manibusque, carnifices duo laqueum homini collo injiciunt, distrahunt hinc inde, examinatumque relinquunt.

Serranus occiditur:

Tum Alcoberus, & Diazus.

CIV. Horæ spatium interjecto, obtentu visendorum carcerum, conferunt se, satellites in quæstitorios, in quibus P. Johannes Alcoberus, qui Pro-Præfectum provinciae Philippinarum in Sinis agebat, & P. Franciscus Diazus detinebantur. Hi ex impetu, quo irruerunt satellites, animo illorum cognito, confirmati eo spiritu, qui tribuit martyribus fortitudinem, leniter eos ita sunt allocuti: *Letissimis nobis contingit mori: sed prius finite nos Deo gratias agere, eamque adorare; tum de nobis licebit, quod vobis libuerit, facere.* Non potuerunt satellites, quin concederent postulata, brevique interposito spatium, Alcoberum humi prosterunt, ligatisque manibus, ac pedibus, laqueo ita, uti Serrano fecerant, occidunt. Confestim Diazio eodem mortis genere vitam adimunt. Cujus labia non secus, quam Alcoberi, quamdiu vocis facultas fuit, nihil intermiserunt, quin adstantes de suscipienda Christi religione hortarentur, pro cuius veritate asserenda ipsi moriebantur. Hora a morte eorum elapsa, apparuere cadavera tanta oris pulchritudine, tamque composito ad suavitatem vultu, ut intuitibus magnam moverent admirationem, vivorumque hominum magis corpora esse viderentur, quam adeo violento mortis genere intersectorum.

CV.

CV. Eodem tempore Min-Hienfis Denique Ro-
 carcer satellitibus completus est, ubi yus.
 erat Royus, qui constantiam sociorum,
 imitatus, ubi primum mentem satel-
 litum perspexit, continuo hortari, ut
 Christum sequerentur, coepit. Hunc alio
 supplicii genere interemerunt. Nam,
 humi prostrato, & victo, oculos, os,
 nares, atque aures charta, quam *spiritu*
vini imbuerant, obduxerunt, imposito-
 que faciei sacco calce pleno, præcluso
 halitu, interfecerunt.

Tali ratione ceteri post Sansium Do-
 minicani, tot, tamque acerbis cruciati-
 bus, ærumnisque per menses octo & vi-
 ginti invicta fortitudine toleratis, in
 Christi confessione, consummato marty-
 rio, feliciter obierunt.

CVI. Neque contentus Pro-Rex,
 qui tantopere in martyres, atque in
 eam, quam vindicarant religionem, sæ-
 viisset, in ipsa etiam cadavera sævire con-
 stituit. Ea igitur, illius jussu, obtecta,
 ne facies paterent, die iv. kalendas dilu-
 culo e carceribus per foramina (nam,
 sunt ad eum usum in carceribus foramina)
 educta, feretris singula imposita sunt, ac
 denique satellitibus tradita, qui in con-
 stituta loca deferrent. Serrani Episcopi
 corpus satellites duo una cum Min-Hienfi
 Mandarinio in agrum, de quo supra est
 demonstratum, qua parte in occidentem

Martyrum
 corpora cre-
 mantur: ossa,
 & cineres in
 fossam projici-
 untur.

solem spectat, intulerunt, ibique, clausis januis, combusserunt, ossaque, & cineres eandem in fossam, in quam fuerant Sansii reliquiae conjectae, projecerunt. Corpora item Alcoberi, Diazii, ac Royi pari ratione ab aliis satellitibus, quibuscum erat Mandarinus Heu-Kuonenfis, ad orientalem ejusdem agri partem allata, tribus distinctis locis cremata sunt, & projecta in fossam ejus agri communem ossa, atque cineres. Itaque ethnici ii praefecti, quod diu fuerant moliti, ut Jesu Christi ministros penitus perderent, compleverunt.

Johannes a
S. Maria, sociis
sibi adiutis,
Serrani ossa,
& cineres
diligenter
colligit.

CVII. Hæc quemadmodum fuissent gesta, ubi Johanni a S. Maria, & Matthiae Fu primum nunciatum est, dolore incredibili sunt affecti. *En*, ajebat Matthias, data ad amicum epistola, *orbatos nostro Episcopo nos, nostrisque patribus: evaserunt ii quidem ex omnibus malis, misere- retque eos jam nostrum, quos tenet procellosum mare*. Accedebat etiam ea res ad summum dolorem, quod, quemadmodum obtineri possent reliquiae martyrum, omnino non apparebat; intelligebantque uterque, quidquid in eam rem tentavissent, id si ab ethnicis cognosceretur (quod, rebus adeo impeditis, facile fieri poterat) futurum majori malo. Qua cum diu solitudine tenerentur, neque ratio perficiendi esset ulla, die *xī. kal. decembres*
Johan-

Johannes, qui non esse animum despondendum arbitrabatur, & spem in Deo maximam collocaverat, quem sciebat suorum res summa voluntate curare, christianos quosdam admonuit, ut assiduis precibus jejunio adjecto a Deo peterent, ut, implorante B. Maria Virgine, significaret, quid jam facto esset opus, ut ne remanerent in potestate ethnicorum reliquiae martyrum, quos ipse ad gloriam sempiternam evocasset. Quorum adeo valuerunt preces, ut brevi a Deo, quod rogarant, impetrarent. Nam custos occidentalis agri Chin-Paulo-Ul-Yueno, cui agendi cum eo datum ab Joanne negotium fuerat, pecunia illectus, promisit facultatem daturum se extrahendorum ab ea fossa Episcopi Serrani ossium: itaque venirent ad diem vii. kal., curaturum se, ut hora sexta a meridie, agri, fossæque ostia paterent. Igitur proxima spe ejus rei, quam rem difficillimam existimasset, summopere lætatus Johannes, erectusque animo, sociis adscitis Paulo-Ul-Yueno, ejusque majori natu filio, & Yuen-Simone, ad diem hora constituta, in agrum occidentalem contendit. Eo ut venit, fossam ita, uti cum custode convenerat, apertam reperit, atque in ea ossa Serrani, quæ tametsi igni cremata fuissent, adhuc tamen humore, quopiam madebant, erantque insignia, præ ceteris membris cervix, cerebrum, &

particula , quæ esse cordis videbatur , quod aduc ea stillaret sanguinem . His colligendis Johannes, sociique amplius horam morati sunt , maxima usi diligentia , ne quod os colligerent , quod minime ad corpus Episcopi pertineret : neque tamen difficile factu fuit certo discernere , quod & recentia erant ossa , neque ullius post Serrani eo fuerant conjecta . Re diligenter , cauteque administrata , pii christiani domum reverterunt onusti sacris pignoribus : tum noctis maiorem partem fecernendis ossibus , & cineribus , quæ in distincta vasa immitterent , consumserunt . Denique die III. kal. , quod maxime cauto esse opus videbant , domi Yuen-Simonis ea vasa terræ infoderunt .

Item marty-
rum reliquo-
rum .

CVIII. Serrani reliquiis receptis , maximo desiderio tenebatur adhuc Johannes recuperandi pignora trium martyrum reliquorum . Verum videbatur res imprimis difficilis propterea quod putabantur illorum ossa immixta ossibus impiorum hominum fuisse , quæ in fossa orientalis agri erant magno numero ; simul etiam quod præerant ei loco nonnulli Bonzii . Tamen Deus , qui defunctorum etiam corporibus prospicit , res ita disposuit , ut die VII. idus decembres , Paulus Yuenus homo diligentissimus in lictorem incideret illum ipsum , qui tria cadavera martyrum cremaverat , Kin-lo-Ny nomine ; ex quo
cum

cum de ossibus Europæorum quæreret, qua ratione immissa fuissent in fossam, hæc reperit.

Quidquid actum est in eo loco, agebat Kin-lo-Ny, per me scilicet, & custodem Sy-Tay actum est. Ad diem iv. kal. novembres hora post mediam noctem quarta, custodi, cui est Kun-Siano nomen, ut orientalem fossam mundaret, jussi; & cogeret in unum locum Sinensium maleficorum ossa, ut Europæorum tribus distinctis in locis ponerentur, quo, si redimere christiani voluissent, lucrum ex iis facere possemus; nam si reliquis immiscuissimus, qui vellet redimere, futurum neminem. Præscripsi etiam, ut ipse in fossa maneret, dum eadem ego illi ossa tradidissem. Hæc ita uti fuerant a me instituta, facile fuit perficere, propterea quod, cum fossa male oleret, ab ea Mandarinus abstinuit, licuitque custodi omnia facere, quæ imperaveram. Ubi cremata fuerunt feretra, collegi ego ossa primum *magni corporis* (nam ita Alcoberum, quod maxime erat corpulentus, vocabant): tum custodi tradidi, qui admonitus a me cuius essent, media in fossa collocavit: post ejus, qui fuerat in Min-Hiensi carcere (Roi); hæc custodi præcepi, ut dextrorsus poneret: ac illius denique, qui socius *magni corporis* fuerat (erat is Diazius) eaque sunt, meo jussu, posita sini-

strorsus . His addebat lictor , habuisse se
in animo multis ante diebus de tota re
certiores christianos quosdam facere ; ne-
que tamen fecisse , propterea quod nesci-
ret , quemadmodum essent ii animis ad
eam rem comparati . Erant vero hi chri-
stiani , quorum domi latebat Johannes a
S. Maria . Hæc ubi ex Paulo Johannes co-
gnovit , non esse continuo his , quæ li-
ctor narraffet , fidem habendam existima-
vit , certiusque ea de re cognosci oportere
statuit . Itaque eidem Paulo mandavit ,
ut easdem res ex custode ipso agri Chin-
Kun - Siano diligenter percuntaretur .
Quod cum Paulus fecisset , eademque o-
mnino ex custode accepisset , quæ antea
ex lictore audierat ; Johannes jam certa
rei veritate cognita , summo gaudio , sum-
maque fiducia animatus , die vi. idus de-
cembres , una cum sociis tribus , qui-
buscum , quemadmodum supra diximus ,
ad agrum occidentalem profectus fuerat ,
domum custodis adiit , ibique se ad octa-
vam a meridie horam continuit . Quo
tempore Johannes ipse , christianique , &
lictor , ac custos , fratresque custodis duo ,
domo egressi in orientalem agrum con-
tendere instituerunt . Est proximum ei lo-
co Bonziorum templum . Itaque , ne hi
possent animadvertere , e via diverterunt ,
qua iri consuevit , & in quam erat aspe-
ctus ex portis templi ; perque collem ,
qui

qui surgit prope eundem agrum, perrexerunt. Eo cum occulti venissent, tum fidenter lumen accendunt, & scala demissa, in fossam descendunt. Heic jam ossa martyrum inveniunt, seorsim ab ossibus ethnicorum, distinctis locis posita, ita uti lictor, & custos narraverant; cognitæque reliquias corporum, quas quæsitum venerant, continuo singulos in fasciculos immittunt. Re perfecta, domum reverterunt, tanta usi itineris facilitate, ut neque militum, neque exploratorum quemquam offenderint, qui in custodiam civitatis solent noctu frequentes incedere. Domum reversi ossa a cineribus cum honore separare, & separata, in vasa sex cretacea colligere; quæ postea vasa humi sepelierunt eodem in loco, ubi reliquiae fuerant Serrani infossæ, expectaturi dum Macaum, & Manilam commodum transferendi facultas fieret. His administratis rebus, cognitum est, Pro-Regem habuisse in animo impedire, ne colligendi copia christianis relinqueretur. Nam scribæ suo mandaverat, ut extrahi ossa Europæorum ex fossa, inque mare projici curaret. Sed scriba, quum eodem in loco sepulta Europæorum ossa fuisse sciret, in quo Sinenfium, confusa esse utraque, atque una permixta, respondit, neque fieri omnino, quod Pro-Rex vellet, posse. Nimirum factum id est divino prorsus consilio;

lio ; neque enim ferebat Deus destitui
iustis honoribus corpora suorum marty-
rum .

De christia-
nis exulibus
in Tartariam
missis .

CIX. His descriptis rebus , quæ
ad fortunatam martyrum mortem perti-
nent , piumque christianorum studium ,
quo de acquirendis eorundem reliquiis
non minus diligenter , quam feliciter la-
borarunt : non sunt jam silentio prætermi-
tenda , quæ christianos eos spectant , quos
fuisse in exilium pulsos supra est demon-
stratum : quosque eorundem martyrum
& filios , quod eorum opera veram reli-
gionem susceperint , susceptamque for-
tissime retinuerint , & socios dicere pos-
sumus , quoniam una cum illis & ipsi
capti afflictique , quidvis perpeti , quam
a christianismo desciscere , maluerunt .
Nam etsi pleraque mala ante magistrorum
triumphum sustinuerunt ; nos tamen , cum ,
quo quidque tempore pertulerint , igno-
remus , hunc maxime locum idoneum
existimavimus , in quo omnia describere-
mus ; maxime vero , quod per id tempus ,
nimirum a. d. kal. Decembres scripta epi-
stola est , qua omnino ex epistola de rebus
illorum cognovimus .

Exules viri
duo, feminæ-
que ite duæ
in itinere mo-
riuntur . Jo-
sephus super-
stes, ne Thad-
dæi filius in
exilium du-

CX. Ergo Focheo profecti christiani
tres , Lucas , Thaddæus , Josephus , prio-
rumque duorum uxores Thecla , & Pau-
la , & infans unus , quemadmodum supra
dixeramus , per Xan - tungensem , seu
Chan-

Chan-tongensem provinciam, ut erat iter Pe-Kingum versus, transierunt: gravissimo autem per id tempus pestilenti morbo incolæ conflictabantur, magnoque numero interibant. Hunc in morbum Lucas, Thaddæus, ambæque mulieres inciderunt. Quibus etsi Chin-Joseph, prout erat medicinæ peritissimus, omni studio, & diligentia præsto esset, nihilque prætermitteret pro sua in eos singulari pietate, quod ad levandam, restituendamque valetudinem pertineret; vis tamen tanta fuit morbi, ut omnes conatus fefellerit, hominesque ad mortem omnes adegerit; qua morte (nam pie putandum est) beatiorum vitam sint consequuti, atque ab exilio in patriam, cuius solius singulari studio tenebantur, demigrarint. Itaque sua ipsi virtute animati, confirmatique Josephi hortationibus, subicientes se penitus divinæ voluntati, libentissime obierunt. Paula Thaddæi uxor, ubi tres ex sociis mortuos vidit, quum intelligeret sibi etiam prope instare supremum diem, filium annorum sex, quem hactenus secum perpetuo duxerat, Josepho tradidit, & majorem in modum commendavit. Is pueri curatione humanissime suscepta, mortua Paula, Pe-Kingum ire contendit. Eo ubi venit, magnam retulit ex christianorum pietate commodorum. Namque horum opera impetrata homi-

catur, impetrat; ipse Pe-Kingi aliquandiu moratus, mox in Tartariam proficiscitur.

homini facultas est manendi in carceribus sine vinculis, permissus christianis ad eum aditus, invisendi causa; eidem copia facta adeundi cujusdam viri Sinensis domum, cibique apud eum capiundi; Pœnitentiæ, atque Eucharistiæ sacra (nam multo magis cum ipse, tum christiani reliqui de confirmando animo, quam de recreando corpore laborabant) administrata. Quo tempore ministro sacrorum virtus Josephi singularis magnam movit admirationem. Filius vero, quem Vuang-Thaddæus moriens reliquerat, parentibus in itinere orbatus, etsi multæ erant impetrandi difficultates, tamen impetratum est, ut ne in exilium duceretur. Itaque traditus est matris sobrino cuidam, a quo in Fo-Kienam Provinciam reduceretur. Josepho autem Pe-Kingenses christiani pecunia etiam subvenerunt; quos inter eximia fuit, & incredibilis christiani cujusdam pauperis munificentia, qui cum in eum, dum ad tribunal adduceretur, incidisset, christianumque esse audisset, miseratione in eum tanta est affectus, ut exiguas finicas monetas tres donaret, quas, quoniam mendicando victitabat, fortasse solas habebat. Denique Josepho Pe-Kingo, ubi tanta christianorum liberalitate, & beneficentia erat usus, proficiscendum fuit in Tartariam, quemadmodum constitutum decre-

creto Imperatoris fuerat; ubi multa eum incommoda, æumnæque manebant; quarum tamen metu ille ne commoveri quidem significabat se, contemnereque, propterea quod exilio locus dictus sibi esset Xan-hai-quan, quo in loco & consuetudine christianorum, nam sunt ibi christiani multi, & mysteriorum frequentia, ministro sacrorum Sacerdote uno, qui crebro soleret ea loca invisere, futuram sibi utendi facultatem prospiciebat.

CXI. Haud multo post martyrum mortem, quo antea Paulus Yuenus, qui res eorundem martyrum tanta diligentia, fideque curaverat, divinitus auctus fuerat maximo beneficio, idem tota ejus domus accepit. Nam kal. decembribus filius illius natu major, cum annos ageret XXXI., cujus fideli opera in omni officio erga martyres pater perpetuo usus fuerat; aliusque annorum XXV., ab Johanne a S. Maria, sumto alter Josephi, alter Johannis nomine, nostris mysteriis sunt initiati. Sunt etiam initiati baptismo Chin-Anna annos nata XLVI, Xin-Maria an. XIX., & Chin-Petrus an. XXV. Is in oppido Fo-chinga erat natus; cumque interfuisset martyrio Venerabilis Mauricastrensis Episcopi, mox domum reversus simulacra deorum, quæ habebat, omnia confregerat. Tandem vii. kal. januar. consecrati baptismo sunt ab eodem Johanne Chin-

Filii Chin.
Pauli - VI.
Yueni ba-
ptismo con-
secrantur.

Chin-Vincentius Pauli filius natu minor annor. XX., Lau-Thomas an. XXVI. & infantula an. IV., quæ Chin-Irene, appellata est. Tali ratione Deus O. M., quæ maxima sua erga homines misericordia per martyrium, collectasque reliquias Venerabilis Episcopi Petri Martyris Sansii inchoari voluerat, eadem Johannis a S. Maria opera perfici, comple-rique voluit.

Mandarini de Antonii filio, deque Johanne a S. Maria Dominicanis diligenter quærent. Hujus hospes Julianus captus, atque in judicium adductus alapis cæditur.

CXII. Dum his rebus augebatur res christiana, nostrisque mysteriis singulari studio plerique alii initiari se flagitabant; contra hostes christiani nominis infensissimi nihil prætermittebant, quin eam, si possent, funditus profligarent. Ergo delata fuerant Chang-cheum mandata Pro-Regis ad Mandarinos, ut, quod Imperator jusserat, diligenter conquirerent, revera ne Dominicanorum institutum Manilæ Nien-linus suscepisset. Itaque Mandarini cum sua ipsi sponte, tum Pro-Regis jussu ad exitium christianorum animati, compluribus institutis quæstionibus, rem explorare cœperunt; neque id solum, quod fuerant jussi, sed etiam de Johanne a S. Maria studiose investigare, num venisset in Sinam, ibique maneret. Quem cum apud christianum, quemdam Chin-Julianum, qui nuper Manila venerat, latere arbitrarentur, domum hujus aggrediuntur. Sed factum di-

divina providentia est, nihil ut rei in ea domo invenirent, ex quo seu de Johannis adventu, seu de suscepto a Nienlino instituto, qui in Ordine Petrus appellabatur, cognoscerent. Verum deprehensa cruce una, quod fatis erat apertum christianismi indicium, comprehensus Julianus est, raptusque in tribunalia ad quæstionem. Ibi cum jussu judicum crebris alapis cæderetur, eo consilio, ut ab eo, quæ vellent, extorquerent; tanta usus est fortitudine, ut tormenta perferre maluerit, quam aut fallere, mendacio judices, aut sacerdotes prode-
re. Itaque interrogatus, ubinam esset Sacerdos, qui Manila discesserat, ita respondit: scio equidem navi advectum sacerdotem quemdam fuisse; at is in Sina non constitit, nam eadem navi revertit Manilam. Neque erat id falsum. Erat enim sacerdos, quem Julianus agebat, ille, qui in navi *Capellani*, ut vocant, munereungebatur, isque revera cum eadem navi reverterat. Tum de Nienlino cum judices ex eo quærerent, novi ego, inquit, Manilæ Nien quemdam, qui textorem sudariorum agit. Tali modo cum malum ingenium judicum Julianus sua prudentia elusisset, quod ita factum esse opus arbitrabatur; post, ubi res majores spiritus postulare visa est, apertissimis est usus responsionibus, rogatus-

gatusque sacras imagines conculcare, facturum se umquam, etiamsi foret servanda constantia vitæ impendio, fortiter, strenueque negavit.

Ethnicus quidam ob eandem rem in quæstionem vocatur, sed ex eo Mandarinum nihil extorquere possunt. Antonius Fochum in carceres missus sæpe interrogatur; tum propinqui illius, ac denique filius comprehenduntur. Antonius invicta animi fortitudine in sententia perseverat. Ejus virtutes describuntur.

CXIII. Mandarinum, quum extorquere ab Juliano nihil potuissent, ethnicum hominem quæstioni subjecerunt, cui erat nomen Puan-Peng-Kua, qui captus una cum Nien-Antonio fuerat, eoque nomine accusatus, quod subsidia, quæ Sacerdotibus Manila missa fuissent, in Emuyensi portu e navi extraxisset, recepissetque. Qui etsi ethnicus erat, tamen fide, & constantia Juliano non cessit, neque adduci umquam potuit, ut de duobus Dominicanis confiteretur. Quinimmo cum interrogaretur ab Mandarinis, ubi nam loci sacerdos ille ageret, qui navi S. Andreæ advectus fuisset, atque in Sina remansisset; instituit magno animo, declinato mendacio, suspicionem dimovere. Itaque quisnam, aiebat, sacerdos e navi se, quasi volatu, potuit proripere, si Mandarinus Hay-Longensis & nautas, & peregrinos, ubi primum e navi descenderunt, singulos recensuit, idemque, cum iterum navim conscenderent, reversuros Manilam omnes numeravit? Nimirum reticebat, Johannem, antequam in portum Emuyensem venisset navis, ab ea descendisse. Neque sua ipse diligentia, & fide contentus, quæ
per

per quæstionem iudices de sacerdotibus celavisset, christianum præterea nescio quem hortari, monereque cœpit, forti ut animo esset, & constantiæ, quod ipse modo dedisset, exemplum imitaretur; neu metu tormentorum vinci se pateretur, malletque mori, quam novi Sacerdotis Dominicani adventum prodere. Atque ipse quidem Puan-Peng-Kua, quam primum ostendit in christianam religionem, christianosque homines benevolentiam, eandem postea neque vinculis perterrefactus, neque gravibus impendiis commotus, quæ per tribunalia facere coge batur, perpetuo retinuit. Mandarinī, etsi duobus hisce quæstionibus induci posse videbantur, ut inquisitione desisterent; tamen secus accidit; nam Nien-Antonium Fo-cheum mittendum putarunt, ubi in carceres prætorios contrusus est, redintegratæque sæpe quæstiones, crebraque de eo judicia instituta. Die iv. kal. januar. initio quæstionum facto, primum iudices tentare christianam hominis constantiam, petereque, velletne jam dimittere christianismum, sacrasque imagines conculcare. Cum ille se omnino postulatis huiusmodi satisfacturum negasset, tum iudices interrogare, quot habeat filios, quamque teneant rationem vitæ. His Antonius percuntantibus ita respondit, ut neque

mendacium diceret, & institutum Nienlini filii constanter celaret. Igitur Pro-Rex, quod neque ex professionibus testimonium, neque ex confessione Antonii invenire poterat, quibus argumentis Huo-Guan-Kie accusatio confirmaretur, filium Nien-Antonii majorem Augustinum Chang-chei comprehendi, Fo-cheumque abduci iussit. Sed hunc cum Mandarini capere nequivissent, quod commodum, inde se proripuerat, focerum ejus, patruosque duos, & Raymundum Chay-Cua quemdam christianum intercipiunt, omnesque vicenis in singula bidua verberibus condemnant. His rebus cognitis Augustinus, tot malis suos premi non tulit, propterea quod ipse abesset; Chang-cheumque revertit. Ibi confestim comprehensus, ac denique vi kal. martias anno MDCCXLIX. Fo-cheum ductus est. Est autem cognitum hactenus viri cujusdam, qui magistratu fungatur, domo eum pro carcere inclusum detineri, & quantum quidem conjici ex quaestionibus poterat, non futurum admodum grave malum, quod sibi metueret; omnem enim severitatem in Antonium reservari, de quo nondum essent absolutæ quaestiones. Neque vero aut recens Antonio est studium religionis, aut nova in perferendis tormentis animi fortitudo. Nam ejus domus sedes, hospitiumque sacerdotum
chri-

christianorum perpetuo fuit : ipseque propagandæ religioni diligenter ferviens , effecit sua opera , ut ad Christi fidem homines plerique adulti converterentur , infantesque plures quam mille , sæpe occasionem nactus , quod medicus erat , quos certo novisset proxime morituros , suis ipse manibus baptizavit . Anno MDCCXXV. accusatus , quod Johannem a Cruce Dominicanum , qui per id tempus in Sina versabatur , hospitio excepisset , ejusque studeret partibus , captus Chang-chei fuerat xi. kal. novemb. ductusque Fo-cheum una cum eodem sacerdote , ut a provinciæ Pro-Rege , causa cognita , poena decerneretur . Quo tempore ab uxore , a filiis , a matre , quæ gravi erat ætate , ita discessit , ut neque horum lacrimæ , neque malorum metus , quæ impendere jam iis perspiciebat , animi ejus virtutem imminuerint . Quinimmo ex maximis calamitatibus majores sibi spiritus sumens , ab Francisco Saënzio Dominicano , quocum una in carcere detinebatur , ut se in tertium Ordinem Prædicatorum cooptaret , flagitavit , summaque suæ virtutis admiratione in ipso Saënzio commota , impetravit . Pertulit item invicta patientia triginta verbera , quibus , vestibus nudatus , acuta arundine cæsus est ; inflictasque bubalinis coriis viginti alapas , & tor-

mentum ad talos flexies, quo acerbissimo quæstionis genere adigere hominem nitebantur, ut, spe quæstus Europæos sacerdotes venire in Sinam, fateretur. Denique in Tartariam perpetuo exulatum missus, quod exilium plerique morte ipsa gravius existimant, ne commoveri quidem est visus. Post cum Imperium Sinarum is, qui nunc obtinet, Kien-Lung successionem adeptus esset, in patriam rediitionis facultate impetrata, eandem vitæ rationem, quam antea susceperat, constanter retinuit, ut nihil omnino de pristino studio remitteret; neque perterritus tot, tantarumque poenarum acerbitate, quibus, quod nostros juvisset, damnatus fuerat, filium suum ipsum Manilam misit, nostrisque tradidit in disciplinam, ut liberalitate, & munificentia Catholici Regis altus, doctusque, Dominicanorum postea instituto suscepto, dederet se curandæ salutis hominum semperpiternæ. Atque hæc quidem causa fuit, quamobrem ethnici ita, uti dictum est supra, rursus affligendum, cruciandumque hominem arbitrarentur.

Ethnici Virgines Dominicanas cogunt nubere. Ex his una quavis perpeti potius, quam in matrimonium ire, constituit.

CXIV. Jamvero Magistratus, quibus certum erat nihil prætermittere, quod ad exterminandam christianam religionem conferret, ad feminas, quas tertium Prædicatorum Ordinem suscepisse, & virginitatem Christo consecrasse suam dix-

dixeramus, furorem convertendum putarunt, easque adigere ad connubia ethnicorum statuerunt, parentibus, cognatisque, ni dicto audientes fuissent, gravissimis constitutis pœnis. Itaque, ut est ab Johanne a S. Maria nunciatum, decretum a Mandarinis est factum, quo magnis minis feminæ Dominicanæ omnes, quacumque ætate essent, ad eos conferre se jubebantur, nimirum eo consilio, ut, dimissis quæ ætate essent graviori, juniores nubere cogerentur. Virgines his rebus cognitæ, quæ juvenes erant, incensæ omnes studio servandæ virginitatis, continuo variis artibus usæ, lineamenta, formamque mutare, ut ætate provectiore apparerent, conatæ sunt. Id etsi nonnullis accidit, minus tamen aliis evenit, ex quibus quatuor coactæ sunt nubere. Ac fuit harum Virginum una, quæ Agnes appellabatur, annumque agebat quintum ac trigessimum, tanta fortitudine, ut, quamvis Mandarinum juberent, & parentes cogerent, tamen quidvis perpeti satius duxerit, quam alteri se sponso tradere, quum Christo (nam ita agebat) jamdiu nupsisset. Quamcum parentes invitam ethnico viro spondissent, domumque illius vi induxissent, ipse ethnicus renuentem, atque horrore quasi extra se raptam, manibus, pedibusque ligari fecit; eamque verbis, &

sermone, quibus verbis integritatem animi præseferbat, repugnantem, tamen vitiavit. Ipsa, ubi vinculis soluta est, quasi insana dolore, quem animo ex ea re maximum ceperat, ethnicum conviciis infectata, linteisque thalami, a quo tantopere abhorrebat, forcipe in frustra concisis, quindecies e domo aufugit. Quo cum vi perpetuo reduceretur, tandem minatur ædes se igni incensuram, magnamque daturam calamitatem. Quibus minis ethnicus perterrefactus, veritus, ne rem exequeretur, domo pro insana ejecit. Itaque Agnes ad parentes revertit; ab hisque sæpe rejecta, quod jam ut alienam habebant, sæpius rediens, atque ad paternas ædes perpetuo confugiens, vicit sua constantia parentum severitatem, obtinuitque, ut liceret jam sibi apud eos liberæ manere. Quare vehementer lætata, gratias cælesti Sponso, quas potuit, maximas egit, cui, ipsius ope, atque auxilio, servasse se animo integerrime fidem existimabat.

Matthias Fu
Siamensis sacerdos moritur.

CXV. Hoc eodem anno (nam antequam hos eventus, de quibus proxime diximus, an post, incertum est) Fo-Kien-
ses christiani summo præsidio, Johannes vero a S. Maria præcipuo adjumento, mortuo Matthia Fu, sunt destituti. Quanta is fuerit in christianos tot ærumnis, calamitatibusque exagitatos caritate,

tate, quantoque imprimis erga martyres studio, & pietate; qua fortitudine, qua opera, quibus laboribus propagare religionem contenderit, cum ex his, quæ sæpius in hoc Commentario de eo demonstravimus, tum ex litteris Sinensium sacerdotum omnium cognoscitur, qui ejus laudandi, celebrandique finem nullum faciunt. Attulit hujus mors omnibus, ac Johanni imprimis summum dolorem; qui Macaum, datis prid. kal. junias litteris, id nuncium misit. Decessit Fo-chei die v. kal. junias, magnis relictis, præclarissimisque sanctitatis argumentis; eritque ejus *memoria* perpetuo *pretiosa* universo Ordini Prædicatorum; atque *in conspectu Domini*, quemadmodum sperare licet, *in æterna benedictione*.

CXVI. Interea dum tot angustiis premuntur in iis regionibus christiani, omni-que conatu ethnici adducere in contem- tum, & contumeliam, profligareque sanctissimam Christi religionem contendunt; contra Dei O. M. providentia, & pietate crebro contingit, ut, aucto numero christianorum, magnæ martyribus fiant, qui in ea re suam operam consum-ferunt, gloriæ accessiones. Nam carceris custos, quo in carcere Serranus fuerat, totaque ejus familia, reusque capitis quidam, qui in carcere una cum Royo manserat, martyrum hortationibus in-

Ethnici complures christianæ religioni nomen dant: Chin-Paulus V. Yuenus sacerdotes studiose adjuvat.

ducti, tandem, deorum superstitione relicta, Christo suam fidem obstrinxerunt. Hæc nos ex Johannis a S. Maria litteris cognovimus, quas ad P. Guglielmium Ordinis Clericorum Regularium Sacræ Congregationis de Propaganda Fide in urbe Macao Procuratorem dedit. Constantia item, & pietas celeberrimi viri Pauli VI-Yueni, cujus ad sanitatem conversio sanguini Mauricastrensis Episcopi accepta referenda est, adeo insignis est facta, ut laboribus non contentus, quibus, uti supra est demonstratum, plurimis, assiduusque functus est, jam Macaum etiam commeet (quemadmodum ex ejusdem Guglielmii litteris ad diem prid. kal. januar. anno MDCCL. datis accepimus) subsidia inde sacerdotum supportaturus, in tot se discrimina conjiciens, quot difficillimo muneri circumstare necesse est, rebus adeo afflictis, atque impeditis.

Antonius-
Nienus in
exilium pel-
litur.

CXVII. At Magistratus Sinenfes, oculos sua ipsi voluntate avertentes ab radiis lucidissimis Evangelicæ veritatis, nil in christianis, nisi improbitatem, & scelus, videre sibi videntur. Quorum sententia vir fortissimus Antonius Nienus, post diuturnas quæstiones, & squalorem carceris, cruciatusque innumerabiles, exilio damnatus, idibus novembr. ejusdem anni in Tartariam profectus est.

At-

Atque hic quidem , hætenus quoad cognovimus , status est , in quem postrema acerbissima tempestate in Fo-Kiena provincia deducta res christiana fuit : hæ angustiae , in quas Sacerdos Dominicanus conjectus , quem unicum in Sinam , post contritos in carcerem martyres , mittere provincia Philippinarum potuit . Neque vero , quod ei pericula metuamus , moleste id ferimus : quin potius iusto perfundimur gaudio , opemque ei divinam imploramus , ut pro dignitate suo munere fungi possit . Denique Ordo Prædicatorum , animo demisso , atque humili , supplex Deum laudat Optimum , atque Maximum , eique gratias & agit , & habet maximas , quod immortalis beneficio , brevi quatuor annorum spatio , septem ex filiis suis martyrii gloria ornaverit , quorum in Tunquinesi Regno duo , in Imperio Sinensi quinque , vitam pro Christo , sanguinemque profuderunt : eumque precatur , orat , atque implorat , reliquis ut filiis suis omnibus spiritus addat , ut imitati majorum fortitudinem , fratrumque exemplis præclarissimis incitati , pari virtute , diligentia , & pietate inflammantur , ac pro instituti sui gravitate in extremas quasque , ac remotissimas orbis partes sanctissimum Christi nomen , veramque religionem inferre curent .

PROTESTATIO.

DEcretis summorum Pontificum obtemperans, testatur qui brevem hunc commentarium descripsit, ubi quinque hos Dei fervos vocabulo martyrum, aliisque ejusmodi nominibus appellavit, eo se consilio appellasse, non ut Apostolicæ Sedis judicium anteverteret, ad quam ex integro res ipsa spectat, neque ut cultum illis quasi martyribus, aut sanctis conciliaret; verum ut recenseret res præclare ab iis gestas, ea ratione, qua privatis Scriptoribus licet; atque ita plane, ut est ab Sanctissimo Domino Nostro BENEDICTO XIV. explicatum in oratione, quam de eorum morte ad S. R. E. Cardinales in Consistorio habuit, quam hic describendam putavimus.

ALLOCUTIO

Smi Dñi Nostri

BENEDICTI PP. XIV.

*Habita in Consistorio secreto die 16.**Septembris 1748.*

DE PRETIOSA MORTE

P E T R I

MARTYRIS

*Ex Ordine Prædicatorum , Episcopi
Mauricastrensis, Vicarii Apostolici
Provinciae Fokienfis in Regno
Sinensi .*

VENERABILES FRATRES .



Consentaneum magnopere
arbitramur , si ex hoc lo-
co Vobis exponamus ea ,
quibus Sancta Catholica
religio magna cum laude
prædicatur . Itaque no-
tum facimus Vobis , ac-
cepisse ex litteris , quæ nuper ex Sinensi
regno ad Nos pervenerunt , Episcopum
Mau-

Mauricastrensem Vicarium Apostolicum Provinciae Fo-Kien, Petrum Martyrem nuncupatum, ex Ordine Prædicatorum, pro Fidei Christianæ defensione vitam, amisisse; qui propterea, si veteri Ecclesiæ vocabulo uti velimus, *Martyr consummatus* appellari potest. Significatum est iisdem litteris, alium ejusdem Ordinis virum Religiosum, & ejusdem Episcopi Coadjutorem designatum, una cum tribus aliis ex ipsa eadem Familia Sancti Dominici inclusum carceribus detineri, inustasque fronti singulorum Sinenses notas, quibus rei mortis indicantur: qui sane omnes pro vetusta Ecclesiæ loquendi ratione, *Martyres designati* vocari possunt.

Ubi epistolam in manus sumpsi, eamque legi sæpius, ac redundantem in ea, gratiam spiritus perspexi; mihi videbar priscis temporibus versari, cum florerent Ecclesiæ Dei. His verbis scripsit Sanctus Basilius (a) ad Ascolium Episcopum Thessalonicensem, qui Martyrium recensuerat, quod plures Christiani a Barbaris ultra Danubium degentibus constanti animo pertulerant: iisdem Nos verbis utimur; & rei, quam exposituri sumus, libenter accommodamus. Porro res ita se habuit.

Cum gravissima in Provincia Fo-Kien

(a) *Epist. 154. Edit. Parisien.*

Kien contra christianos tempestas excita-
ta fuisset, ob quam territi percussique,
plurimi a Catholica Fide misere descive-
runt, Mauricastrensis Episcopus, qui Vi-
carii Apostolici munere illic fungebatur,
latendum sibi censuit in privatis ædibus,
& a violento illo turbine paulisper decli-
nandum. Sed imminentem sibi ruinam,
pertimescente hospitii Domino, cum
Episcopum diutius tueri latebris domus
suæ recusaret, vix ipse in lucem prodiit,
captus fuit, & in carcerem detrusus, ex
quo tamen Christianam Fidem verbis, &
exemplo, quoad potuit, prædicabat.
Quinimmo ante Judicem constitutus, ipsi
libera voce denunciavit, futurum aliud
in fine Mundi judicium, ubi vitæ antea actæ
rationes exigantur, & pro meritorum
conditione præmia, vel supplicia decer-
nantur æterna. Quamobrem conviciis &
injuriis primum oneratus, deinde toto
vultu ob iteratos colaphos contuso, ac
liventi, tandem capitis reus iniqui Judi-
cis sententia declaratur. Illam Episcopus
æquo animo libenter excepit, & Sacra-
mentis expiari magno studio postulavit.
At, licet quidam Sacerdos, qui summa
fide, & amore Episcopum suum prosequer-
batur, nihil intentatum reliquerit, ut
Eucharistiæ Sacramentum ad ipsum defer-
ret, vani tamen illius conatus irritique
cesserunt. Postremo, cum dies illuxisset,
qua

qua capite plecti debebat Episcopus, carce-
re eductus, & magna satellitum turba,
stipatus, ad supplicii locum processit,
quem Gentilium multitudo, & non exigu-
us Christianorum numerus sequebantur.
Collo suspensam gerebat tabellam, cui
mortis causa scripta erat, videlicet, quod
manu carnificis caput illi obtruncandum
esset, ut hujusmodi supplicio reliquis
exemplo esset, eo quod suis mendaciis,
uti ferebatur, plurimos decepisset. In-
credibile est, quam eximiam virtutem,
animique magnitudinem præferret, cum
ad mortem subeundam duceretur. Curis
omnibus abjectis, assiduas in itinere pre-
ces Deo fundebat; & quo poterat ma-
ximo studio se ipsum commendabat.
Cum pervenisset in locum supplicii, ius-
sus a carnifice, ut in genua provolve-
retur, dicto paruit, & solum ab illo tan-
tum temporis spatium exoravit, donec
coeptas jam preces absolveret. Quibus
peractis, carnificem ipsemet admonuit,
ut rem suam perficeret, qui vibrato gla-
dio caput ab humeris ipsi præcidit.

Gentiles ipsi virtutem tam singula-
rem admirati sunt, cruentoque spectacu-
lo se commotos ac perculsos magnopere
ostenderunt; Christiani vero mortem Pa-
storis sui lacrimis ac mœrore prosecuti
sunt; ita tamen ut animum non despon-
derint, sed corpus decenter efferentes,
eo

eo quidem loco prius condiderint, quo rei homines sepeliri consueverunt: sed paulo post in Cœmeterium Fidelium idem corpus deferentes, suæque dignitatis insignibus exornantes, decenti loco illud posuerunt. Cum id fieret, Christiani pietate ac religione ducti, particulas aliquas, præsertim vestium, quæ sanguine aspersæ fuerant sibi comparantes, in varias etiam partes miserunt, eo fortasse consilio, ac voluntate, ut publicæ venerationi exponantur. Cum hujusmodi Martyrii fama longe, lateque pervagaretur, Pechini Episcopus pro gratiarum actione canticum *Te Deum* universis suæ Ditionis Ecclesiis edixit. Eadem celebritas peracta fuit ab Episcopo Amacaumensi, cui Episcopus Ecrinensis Vicarius Apostolicus Provinciæ Yunnamensis, Gubernator Lusitanus cum Senatu, & multa Regularium frequentia præsentibus interfuerunt. Insuper tota Civitas triduo sub vesperam, funalibus accensis, hilaritatem suam testata est.

Si hæc ita se habeant, quemadmodum litteris suis commendavit Sacerdos secularis, vir probus, atque honestus, qui non solum omnia, quæ superius commemoravimus, accurate ac diligenter descripsit; sed plura ipse oculis suis perspexit, qui etiam, uti jam dictum est, captivum Episcopum, & morti proximum
Eucha-

Eucharistia recreare conatus est; si, inquam, res ita se habeant, prout novis, aliisque recenter acceptis monumentis confirmantur, Martyrium, & causa Martyrii, cum tempus postulaverit, facili negotio ostendentur. Nam facile constabit, Tyrannum adductum, fuisse odio in Catholicam Religionem, ut Episcopum reum mortis pronunciaret: argumento est tabella, quæ pendebat ipsius collo, & mortis causam inscriptam præferebat; argumento est sententia mortis a Tyranno prolata, in qua Episcopus obtruncandus carnifici traditur, eo quod hominum multitudinem perversa religione seduxerit; argumento pariter erunt infelices illi, qui a Fide Catholica deficientes, ab omni discrimine immunes evaserunt. Postremo accedit, quod furente tempestate illa persecutionis, & alias quoque Provincias pervadente, nempe Xensensem, & Xansensem, quæ Portimensi Episcopo Vicario Apostolico subjiciuntur, illud compertum, & exploratum Nobis est, Sacras Christianorum Ædes in illis locis dirutas, & solo æquatas fuisse, ita ut ipse Episcopus, si fieri possit, Amacum confugere cogitaverit.

Porro Episcopum pro Catholicæ Fidei amore subiisse mortem, & nihil omnino eorum ipsi defuisse, quæ ad id probandum requiruntur, apertissime quoque demon-

monstrabitur. Quippe in ea tabula, quam paulo ante indicavimus, nomine *seductoris* appellatur, eo quod plurimorum tenebras Evangelii luce depulerit, eosque ad Christianam Fidem converterit. Siquidem amantiſſimum Redemptorem nostrum *Seductoris* quoque nomine Judæi nuncuparunt, quod ipse libenter tulit, ac permisit, ut suo exemplo voluptatem, ac lætitiā perciperent famuli sui, quos eodem titulo vocitandos prospiciebat. Insuper mortis sententiam Episcopus libenter amplexus est; conatus omnes impendit, ut pie, sancteque cursum suum consummaret; imminentem jam corporis sui dissolutionem, uti Martyrem decebat, forti animo adspexit, & usque ad finem in hac virtute perseveravit. Equidem initio furentis procellæ lucem publicam devitans, se latentem continuit; verum non timori, vel animi imbecillitati, sed christianæ prudentiæ illud est tribuendum. Nam, prætermiſſis exemplis, quæ plura a Scriptoribus Ecclesiasticis recensentur, Cleri Romani iudicium huic rei maxime suffragatur; cum enim Sanctus Cyprianus Carthaginensis Episcopus ad illum litteras dedisset, quibus nunciabat ab Ecclesia sua paulum se recessisse dum tyrannorum persecutio in Christianos furentissime debaccharetur, Romanus Clerus magnopere probavit, quod se ab illo discrimine

Q pro-

proripuisset, ut inde majori cum utilitate animarum, quæ ipsius curæ traditæ fuerant, cum propitium tempus id postularet, ad Ecclesiam suam reverteretur.

Hæc quidem omnia Mauricastrensem Episcopum, ejusque pretiosam mortem, summopere commendant, si, ut antea diximus, veritati consentanea sint, quæ scripta ad Nos pervenerunt. Attamen, alia multa requiruntur, ut idem Episcopus inter eos Martyres adscribatur, quos Ecclesia *Martyres vindicatos* appellare consuevit. Quapropter ex iisdem rei monumentis, quæ accepimus, ea decernere, & perscribere non omittemus, quæ necessaria sunt, ut causa hujus Martyrii pro jure, & legibus Ecclesiæ instituatur; ita quidem ut locorum maximæ distantiae ratio habeatur. Illud quoque in dubium revocari posse cognoscimus, utrum Sineses Christiani cultus privati limites prætergressi fuerint, defunctoque Episcopo ante Sedis Apostolicæ judicium cultum publicum exhibuerint. Quamobrem opportune consulemus, uti fas est, ne ob hanc rationem, labente cursu temporis, ejusdem Episcopi causa aliquid detrimenti patiatur. Porro significationes hujusmodi publici cultus, quem Fideles, licet immature, ipsi præstiterunt, Nobis argumento sunt, illos in ea sententia firmissime versari, quod Episcopus Martyris co-

ro-

ronam, & gloriam sit consecutus. Nemo vestrum miretur, si ipsum Martyrem nuncupavimus, neque ullo modo Canonicas Sanctiones a Nobis violatas existimet, quarum adfertores, & custodes Nos ipsos semper fatebimur: Episcopum quidem Martyrem, haud *vindicatum*, sed *consummatum* appellavimus, quod etiam rerum Scriptoribus licet, qui posteris illorum vitam, & res gestas commendant, quos pro Christiana Religione hoc mortali spiritu defunctos arbitrantur; modo tamen lectores admoneant, haud revera Martyres habendos, nec colendos ob ea solum, quæ ipsi suis in libris commemorant. Hæc fusius explicavimus in Nostris (a) de Canonizatione Sanctorum Commentariis, & Nos ipsi præscripta fecimus, dum Episcopum Mauricastrensem *Martyrem consummatum*, non autem *vindicatum* nominavimus, cum publicus cultus Martyribus tantum vindicatis debeatur.

Vulgata, & communis omnium opinio huic Mauricastrensi Episcopo primi Martyris Sinensis gloriam impertitur. Nos tamen certis documentis adducimur, ut contrarium omnino sentiamus. Etenim exploratum habemus, duas alias martyrii causas apud Sinenses peractas ad Congregationem de Propaganda Fide su-

Q 2

perio-

(a) lib. 2. cap. 12. num. 5.

periori tempore fuisse delatas, quarum prima quatuor Presbyteros complectitur, qui pro Fide Christi supremum diem obierant; altera vero causa confecta est pro Sacerdote Francisco de Capillas, qui Catholicam Religionem sanguine suo confirmarat. Causæ vero hujusmodi jussu Urbani VIII. Prædecessoris Nostri traditæ fuerunt examinandæ Congregationi Sacrorum Rituum, cujus etiam Decreta Nos ipsi perspeximus, ad causam martyrii Francisci de Capillas instituendam confecta. Alia quoque Decreta non ignoramus, quæ pro causa eadem prosequenda edita fuerunt, cum Clemens IX. Prædecessor Noster Summum Pontificatum administraret. Hæc veritatis amore dicta sint, non vero, ut nomen, & gloria Episcopi Mauricastrensis, aut Ordinis Sancti (a) Dominici laudes imminuantur; cum præsertim Venerabilis Dei famulus Franciscus de Capillas, & alii quatuor Sacerdotes, quos paulo ante recensuimus, ex eadem Sancti Domini Familia prodierint.

Finem huic nostræ Allocutioni imponimus, spem Nostram declarantes, quæ reposita est in sinu Nostro. Quemadmodum enim singulari virtuti, & sanguini

(a) *In Summ. Privilegior. Ord. Præd. Collecte ab Antonio Gonzales de Acuna pag. 140. & seq.*

ni Martyrum, quos modo recensuimus, & aliorum fortasse, quos ignoramus, tribui posse videtur, quod superiori tempore Christiana Religio tantopere apud Sinenses floruerit; ita speramus futurum, ut Sinensis eadem Missio, præsentī hac tempestate composita, ac depulsa, in pristinum gloriæ statum restituatur, ob virtutem & sanguinem, quem Episcopus Vicarius Apostolicus nuper effudit; cujus etiam exemplum, uti confidimus, quatuor alii Sacerdotes ex eodem Ordine, quos pro Christiana Fide captivos Vobis antea memoravimus, pari animi magnitudine sequentur. Ita sane futurum speramus, ducti auctoritate, & unanimi Patrum Ecclesiæ sententia, qui scriptum Nobis reliquerunt, tunc potissimum temporis Catholicam Religionem magis elevatam, & amplificatam fuisse, cum in illam Tyranni majori furore, immanitateque desævirent, ita ut ex Martyrum sanguine, veluti ex fecundo semine, Christiani in dies augerentur. Ita secundo sæculo (a) Sanctus Justinus Martyr testatus est: *Sed quanto magis magisque talia nobis infliguntur, eo plures alii per nomen Jesu Fideles, & pii fiunt; quemadmodum vitis, si quis partes illas amputet, quæ fructus ferunt, ita proficit, ut*

Q 3

alios

(a) In Dialogo cum Tryphone Judæo num. 100.

*alios florentes, & fructiferos palmites
 rursus proferat, idem quoque nobis eve-
 nit: plantata enim a Deo, & Salvatore
 Christo vitis populus ejus est. Idem quo-
 que Tertullianus initio tertii sæculi con-
 firmavit (a) in suo Apologetico: Plu-
 res efficimur quoties metimur a vobis: se-
 men est sanguis Christianorum. In libro
 autem ad Scapulam: Nec tamen (inquit)
 deficiet hæc secta (nempe Christiana Reli-
 gio) quam tunc magis ædificari scias,
 cum cædi videtur. Idem Lactantius sæ-
 culo tertio labente tradidit in libro sua-
 rum (b) Institutionum: Est & alia cau-
 sa, cur adversus nos persecutiones fieri
 sinat, ut Dei populus augeatur: quod
 fusius prosequitur, certisque rationibus
 declarat. Plura alia in hanc sententiam
 testimonia proferri possent; sed illud
 Sancti Leonis Magni Prædecessoris Nostri,
 qui sæculo quinto Pontificatum gerebat,
 satis erit, ut res plane comprobetur:
 Non minuitur (inquit ipse in sermone
 de Sanctis Apostolis Petro, ac Paulo)
 Non minuitur persecutionibus Ecclesia,
 sed augetur, & semper Dominicus ager
 segete ditiori vestitur, dum grana, quæ
 singula cadunt, multiplicata nascuntur.*

EPI-

(a) Cap. 1.

(b) Lib. 5. cap. 13. in fin.

E P I S T O L A

Reverendissimi P. M. Generalis Or-
dinis Prædicatorum ad PP. & FF.
ejusdem Ordinis, qua eos allo-
quutionis SS. Domini Nostri
BENEDICTI XIV. P. M.
certiores facit.

*In Dei Filio sibi dilectis universis
Patribus, ac Fratribus Ordinis
Fratrum Prædicatorum*

FR. ANTONINUS

B R E M O N D

Sacrae Theologiæ Professor, ejusdem-
que Ordinis humilis Magister
Generalis, & Servus

Salutem, & Fidei propagandæ zelum.



Ui Dominicanæ Familiæ,
immo Ecclesiæ univer-
sæ decora, & ornamen-
ta ita ex animo pendit,
ac reputat, quemadmo-
dum decet optimæ Ma-
tris amantissimos Fi-
lios, is effuso prorsus, ac intimo gratu-
lationis sensu novissime partos intelliget

ab Apostolicis Viris Ordinis nostri in extremis Orientis plagis pro Catholicæ Fidei propagatione triumphos. Alter jam annus absolvitur, quo certis nunciis accepimus RR. PP. Fr. Franciscum Gil de Federicis, & Fr. Matthæum Alphonsum Leziniana Hispanos ambos Provinciæ nostræ Sanctissimi Rosarii Philippinarum, alumnos in regno Tun-Kini post diuturni carceris pressuras, constantemque ante Præsides, & in vinculis ipsis Evangelii prædicationem gladio percussos gloriosam pro Christo mortem obiisse (a). Quos nimirum vinculum confessionis, & hospitium carceris simul junxerat, junxit etiam consummatio virtutis, & gloria celestis. Eorum Passionis acta ab Episcopo Coricensi litteris excepta, ac Romanis typis vulgata ad plerosque vestrum pervenisse arbitramur.

Paullo post excitata in Provincia, Fo-Kienfi Sinarum Imperii gravi admodum adversus Catholicos, atque in primis Evangelii Præcones persecutione, prehensum ab Infidelibus, atque in vincula conjectum audivimus Illustrissimum, ac Reverendissimum D. Fr. Petrum Martyrem Sans Episcopum Mauricastrensem, ac Vicarium Apostolicum ejusdem Provin-

(a) S. Cyprianus Epistol. 8. ad Martyres, & Confessores.

vinciæ, eodemque tempore una simul
 carceri mancipatos Illustrissimum, ac
 Reverendissimum D. Fr. Franciscum
 Serrano Episcopum Tipasitanum Provi-
 carium Apostolicum, ac RR. PP. Fr. Jo-
 hannem de Alcober, Fr. Joachimum
 Royo, & Fr. Franciscum Diaz Missio-
 narios Ordinis nostri, jamque latam in
 omnes capitis sententiam ab Sinarum Im-
 peratore mox confirmandam. Recentio-
 ribus demum litteris nunciatum est, præ-
 laudatum Illustrissimum Præsulem Fr. Pe-
 trum Martyrem Sans post toleratas in-
 victa roboris Sacerdotalis constantia duræ
 custodiæ angustias, vexationesque gra-
 vissimas, illustre, & gratissimum Deo,
 & Angelis spectaculum exhibuisse, at-
 que obtruncato capite Apostolatus sui
 cursum ad annos fere triginta sex in Im-
 perio Sinensi productum feliciter consum-
 masse, illustremque viam, atque expe-
 ditam Evangelii asserendi, ac propagan-
 di ceteris ostendisse, quam ejusdem quo-
 que Socios pari alacritate, & fortitudine,
 vel jam absolvisse, vel brevi subituros
 speramus. Eximium Religionis nostræ
 triumphum verbis amplioribus persequi,
 aut exornare vix possumus, iis vere
 aureis, vere Apostolicis, quibus SS. D. N.
 BENEDICTUS XIV. P. M. die XVI.
 hujus mensis Sacro Cardinalium Senatui
 secreto in Concistorio rei gestæ feriemus
 pro

pro sua, ac loci dignitate nunciavit, atque Eminentissimorum Patrum oculis fere subjecit. Sapientissimam ejus Alloquutionem eximia qua pollet rei sacrae, atque Ecclesiasticae eruditione refertam hisce litteris adjunctam damus uti monumentum auro contra gemmisque æstimandum, Ecclesiae Fastis, atque Annalibus nostris inferendum, quod a singulis Coenobiis nostris diligenter servari volumus, posteritatis memoriae perpetuo commendandum.

Jam vero quo simus animo affecti in hoc faustissimo rei Catholicae eventu, levius est vobis de ingenita nobis sollicitudine pro Fidei incrementis, ac Familiae nostrae gloria recte æstimantibus conjicere, quam nobis ulla vi verborum explicare. Effusum est in jubilo cor nostrum, superabundavimus gaudio (a), lætati sumus sicut qui lætantur in messe; atque exultantes in Deum vivum, per quem abundat consolatio nostra, immolavimus ei Sacrificium laudis gratias agentes, ut potuimus maximas, quod Apostolicum S. P. DOMINICI spiritum adhuc ævo nostro in Filiis ejus superstitem magno Fidei emolumento videamus. Nimirum quod morti proximus futura prospiciens pollicitus fuerat, se nunquam

(a) *Isaia c. 9. v. 31.*

quam illis defuturum post mortem, id cum semper effecerit, sexto nunc Ordinis seculo cumulatus præstat: nam qui animarum salutis cupidissimus, Martyrii quoque sitientissimus fuit, horum alterum Apostolicis suis perfecit laboribus, alterum vero quod votis tantum assequi potuit, cum alias, tum novissime est consecutus in Filiis, (a) *qui certamine glorioso ad tormenta vincenda ceteris duces facti, exemplum virtutis, & Fidei præbuerunt.*

Eo exemplo incitatos, & quasi clasfico ad pugnandum accitos, non sine ingenti lætitiæ sensu audivimus, jam plures ex nostris flagrantissimo Evangelii proferendi studio accensos certatim in sacras Philippinarum Missiones nomen dedisse numerum Fratrum suorum implere gestientes, quos per Martyrii palmam Cælo illatos gratulantur. Utinam vero suscepti muneris ratio, locique, & temporis conditio pateretur, ac ferret, ut eorum agmini adjuncti, quem aliquando inivimus in Americanis Insulis sacrarum missionum cursum, Nobis quoque cum ipsis conficere liceret. Arrepto Apostolicæ expeditionis vexillo, alacri prorsus animo, ac lubentissimo præiremus ceteris, atque ad populos divinæ lucis, & gratiæ expectes

(a) S. Cypr. loco cit.

tes maturaremus iter, (a) parati ac cupidi tradere illis non solum Evangelium Dei, sed etiam animas nostras. Illuc demum proficisceremur in gaudio, quo nos sanguis Fratrum nostrorum invitat clamans de terra, non vindictam ut sanguis Abel, sed propitiationem, ut sanguis Christi, ac pereuntium animarum salutem. Quandoquidem vero (b) non est currentis, neque volentis, sed misereantis Dei, qui arcano sapientiæ suæ iudicio ab optatissimo Apostolici muneris studio, velut ab ubere avulsos, ne cogitantes quidem Romam abduxit, atque in sortem transtulit ministerii hujus, vicem nostram dolemus, iis vero quasi invidentes gratulamur, quos Legatos pro Christo digniores, nobisque utiliores segregavit, ac posuit in lucem gentium, ut sint salus ejus usque ad extremum terræ.

Interea dum Pugiles nostri (c) induti armaturam Dei, fumentes scutum Fidei, & galeam salutis, & gladium spiritus, quod est verbum Dei, calceati pedes in præparatione Evangelii, atque in acie constituti adversus Principes, & Potestates, adversus Mundi Rectores tenebra-

(a) 1. Thess. c. 2. v. 8.

(b) Rom. 9. v. 16.

(c) Ephes. c. 6. v. 18. 19. 20. & seqq.

nebrarum harum fortiter colluctantes præliabuntur prælia Domini, nos ad farcinas remanentes, per omnem orationem, & obsecrationem jugiter effundemus cor nostrum, ut detur illis sermo in aperitione oris cum fiducia notum, facere mysterium Evangelii, ut in ipso audeant prout oporteat loqui, nec faciant animas suas pretiosiores, quam se. Quando autem (a) sanguis Martyrum semen est Christianorum, in eam spem erigimur fore, ut aucto per novos Evangelii Ministros recentis victoriæ, ac triumphus fructu, deleta, atque evulsa per ipsos omni profani cultus superstitione, Crucis Christi trophæum florentissimo inferatur Imperio, populoque sedenti in tenebris, & umbra mortis fulgeat illuminatio Evangelii, & salutis via aliquando aperiatur.

Finem scribendi, non exultandi facimus, & qui doctissimi, nec satis unquam laudati Pontificis BENEDICTI XIV. verba longe omnibus splendidiora legenda vobis subjicimus, qualemcumque Epistolam nostram disertissimi Episcopi, & Martyris Cypriani sententiis absolvimus. (b) *O beatam Ecclesiam (beatam Prædicatorum Familiam) quam sic honor*
Di-

(a) *Tert. in Apolog.*

(b) *S. Cypr. Epistola superius laudata.*

Divinae dignationis illuminat, quam temporibus nostris gloriosus Martyrum sanguis illustrat. Erat ante in operibus Fratrum candida, nunc facta est Martyrum cruore purpurea: floribus ejus nec lilia, nec rosae desunt. Certent nunc singuli ad utriusque honoris dignitatem. Accipiant coronas vel de opere candidas, vel de passione purpureas. In caelestibus castris & pax, & acies habent flores suos, quibus Miles Christi ob gloriam coronatur.

Habet itaque Fratres charissimi Christiana, & Religiosa pax sine caede, & sanguine Martyres suos, qui nimirum carnem suam crucifixerunt cum vitiis, & concupiscentiis; qui abnegantes semetipsos, & secularia desideria sobrie, juste, ac pie vivunt in hoc seculo, utentes hoc mundo tanquam non utantur; qui mortificationem Jesu in corpore suo circumferentes jam non sibi vivunt, sed ei, qui pro ipsis mortuus est. Diligamus Fratres, strenueque amplectamur hoc quod semel elegimus quotidiani, ac domestici Martyrii genus horrore quidem mitius, sed diuturnitate molestius. Imitatores simus Fratrum nostrorum, sicut & illi Christi, & quos non possumus per bella persecutionum, per vulnera, & mortem, studeamus saltem per pacem sequi. Per patientiam curramus ad pro-

posi-

positum nobis certamen, professionis nostræ cursum alacriter consummantes, fidem servantes: (a) *Quo longior pugna, & corona sublimior: Agon unus, sed multiplici præliorum numerositate congestus. Semel vincit, qui statim patitur, & qui manet semper in pœnis, congregatur cum dolore nec vincitur, quotidie coronatur. Valet Nostri, Sociorumque memores in Sacrificiis, & precationibus vestris.*

Datum Romæ ex nostris Ædibus Minervitanis die XX. Sept. MDCCXLVIII.

Fr. Antoninus Bremond

Magister Ordinis.

ALLO

(a) S. Cyprianus ep. 16.

ALLOCUTIO

Sñi Dñi Nostri

BENEDICTI PP. XIV.

*Habita in Consistorio secreto feria secunda die xxiv. Januarii 1752.*DE PRETIOSA MORTE
FRANCISCI
SERRANI*Ex Ordine Prædicatorum, Episcopi Tìpasitani, Vicarii Apostolici Provinciæ Fokiensis in Regno Sinensi, JOACHIM ROYO, JOANNIS ALCOBER, & FRANCISCI DIAZ ejusdem Ordinis Dominicanæ Sacerdotum.*

VENERABILES FRARTES :



Ertius jam annus est, ex quo Nos hoc ipso in loco pretiosam mortem (a) Petri Martyris Dominicanæ Familiæ Mauricastrensis Episcopi, & Apostolici Provinciæ Fokiensis in Imperio Sinarum Vicarii, Vobis

(a) *In Allocutione habita in Consistorio secreto die 16. Sept. 1748.*

bis exposuimus : quo quidem tempore certiores Vos etiam facere non prætermisimus , quatuor alios Dominicanæ ejusdem Familiæ Religiosos Viros esse, qui in carcere detinebantur , quique non longe ab eo erant , ut eandem damnationis sententiam subirent, & pro Christiana Religione vitam amitterent. Ibi autem cum Nos antiquam Ecclesiasticam loquendi rationem secuti (a) illos *Martyres designatos* nominaverimus , nunc mortis eorumdem , & feralis executionis atrocis sententiæ nuncio accepto, *Martyres consummatos* eisdem appellandos judicamus , quo etiam nomine Mauricastrensis Episcopus a Nobis fuerat appellatus: illud Successoribus Nostris integrum reservantes , ut Martyres *vindicatos* illos pronuncient , postquam probationum examen institutum , atque peractum fuerit , & quæ de illorum gestis relata huc transmissa sunt , a veridicis licet fontibus profecta , authenticis documentis fuerint comprobata ; & postquam Dei Optimi Maximi benignitas signis ac miraculis manifestare dignata fuerit, quantopere horum Servorum suorum holocaustum Divinæ Majestati Suæ fuerit acceptum : cum Sanctæ huic Apostolicæ Sedi hoc in more positum , & constanti lege

R
fir.

(a) *Ibidem* .

firmatum sit (a) ut ad veri Martyrii approbationem minime procedat, nisi supernaturalia signa, atque prodigia pariter accesserint.

Horum, qui nuperrime pretiosam mortem obierunt, nomina sunt, Franciscus Serranus, Joachim Royo, Joannes Alcober, & Franciscus Diaz. Etsi autem probe Nobis compertum illud est, (b) *Martyrem non facere pœnam, sed causam*; minime tamen plura Nobis hoc loco persequenda existimamus, ut Vobis enarremus, illud ex iis, quæ huc ad nos pervenerunt, monumentis colligi, quatuor hosce Sacerdotes necatos Tyranni jussu fuisse, propter infensum animum, quem ipse contra Christianam Fidem gerebat, in cujus prædicatione ipsi Sacerdotes assidua, atque indefessa cura se exercebant; atque ab ipsis, mortem Christiana æquanimitate, ac fortitudine exceptam fuisse, ejusdem Sanctæ Religionis causa, cujus afferendæ miro amore flagrabant; cum de hac re ab hinc supra triennium pluribus Nos egerimus, cum ex hoc ipso loco Mauricastrensis Episcopi mortem Vobis annuntiavimus. Persecutio enim, quæ contra pios hosce Sacerdotes defævit, eadem ipsa

(a) *Lib. 3. nostri Operis de Canonizatione cap. 27. num. 8. & cap. 29. a num. 6. ad ult.*

(b) *S. Augustinus epist. 204. num. 4.*

ipsa est, quæ in Fidei odium contra Mauricastrensem Episcopum excitata fuit; & tam illius, quam horum causa communis est. Illud hic Nobis adjungendum est, Religiosos hosce Viros non modo lubenti animo mortem subiisse, immanesque cruciatus, qui a Tyranno ipsi morti additi sunt, tolerasse, verum & ante gravissimis ærumnis, atrocibusque contumeliis in ipso carcere duorum fere annorum spatio conflictatos fuisse, ut satis apposite de illis dici possit, quod (a) *in omnibus exhibuerant semetipsos, sicut Dei ministros, in multa patientia, in tribulationibus, in necessitatibus, in angustiis, in plagis, in carceribus, in seditionibus, in laboribus, in vigiliis, in jejuniis.*

Nostræ huic Allocutioni finem hic ponere propositum Nobis fuerat. Verum, cum in percurrendis schedis per viros fide dignos Nobis traditis atque transmis-
sis, insigniora quædam ac præcipua deprehenderimus; minime grave Vobis esse cupimus, si in iisdem exponendis paululum Vos etiam detineamus.

Pater Franciscus Serranus ætatis annum agebat quinquagesimum secundum annos autem novendecim in Sancta Sinensi Missione impenderat. Pater Joachim Ro-

R 2

gin-

(a) *Epist. 2. ad Corinthios cap. 6.*

ginta, quorum tres supra triginta Apostolicum munus in Sinenſi item Miſſione exercuerat. Pater Joannes Alcober annos habebat quadraginta duos, horum vero duodeviginti in obeunda Sancta eadem Miſſione exegerat. Pater Franciſcus Diaz tertium ſupra trigefimum numerabat annum, ſpatio autem annorum novem Divini verbi Præco ibidem fuerat. De laboribus eorum, de ferventi aſſerendæ Chriſtianæ Religionis ſtudio, ipſarumque Miſſionum fructu, in Tabulariis Congregationis Propagandæ Fidei negociis præpoſitæ plurima extant monumenta, quorum opportuno tempore erit ut debita ratio habeatur: quoniam, licet pro Martyrio ſatis ſit mors in Chriſtianæ Fidei odium illata; eademque pro Chriſti ipſius amore ſanctæ obita ac tolerata, non inficiandum tamen eſt, diuturnam Chriſtianarum (a) virtutum ſeriem in anteaſto vitæ curſu heroice exercitarum, ad veram Martyrii declarationem permultum conferre.

Neminem autem, niſi Eccleſiaſtica Hiſtoriæ admodum imperitum, ignorare arbitramur, Tyrannorum morem fuiſſe, ut enormis cujuſpiam delicti nota Martyres infamarent, ad odium contra ipſos con-

(a) Lib. 1. cit. operis de Canonizat. cap. 27.
num. 2. & cap. 29. num. 1. & 2.

concitandum; ut scilicet illam, quæ inde redundabat, invidiam effugerent, quod propter solum Christianæ Religionis exercitium, ac professionem, eosdem interficiendos mandarent. (a)

Idem etiam in quatuor horum Sacerdotum Martyrio evenisse comperimus; eo tamen discrimine, quod, cum alii Tyranni in eorum calumnia obstinate usque perstiterint, eademque fulti mortis sententiam pronunciaverint; hic contra Ethnici Judices, & idololatræ minime veriti sunt Sacerdotes nostros innocentes declarare, quoad ea pertinebat, quæ de enormibus vitiis falso ipsis objecta fuerant: quibus rebus Tyrannus minime deterritus, & contra Christi Fidem infensior effectus, laqueo eosdem interimendos crudeliter mandavit.

Cum inter sententiæ pronuntiationem, ejusdemque executionem, aliquod temporis spatium intercessisset, ex quo Sinensis Imperator illam suspendi mandaverat; fama non inanis percrebuit, & quæ ad piorum usque Sacerdotum, qui in vinculis detinebantur, aures pervenit, fore ut capitalis poena in exilium a Regni finibus commutaretur. Magna autem in hoc nuncio vis inerat, ut de eorumdem ani-

R 3

mo,

(a) *Lib. 3. ejusdem operis de Canoniz. cap. 13. num. 7. & seq. & num. 12.*

mo, ac proposito vere dijudicari posset. Nam, si ipsi hujusmodi nuncio lætati forent, id quodammodo minoris roboris, ac fortitudinis indicium esse potuisset, & cujusdam affectionis, qua temporali vitæ adhærerent; quæ omnia heroicæ Martyris fortitudini opposita sunt: contra vero, si contristati essent, suspicio quædam exoriri inde poterat vanæ cujusdam gloriæ, quam in morte fortiter oppetenda iidem sibi proposuissent; (a) qua vana profecto gloria Pseudo-Martyrum hæreticorum mortes inquinatæ sunt. Verum, eorundem Acta descripta, atque huc transmissa, dum leguntur heroica in quatuor hisce Religiosis Viris ad Divinam voluntatem confirmatio elucescit; paratus æque ac promptus, sive ad exilium, sive ad mortem animus, prout Divinæ voluntati complacitum foret, cui vitam suam, mortemque pariter consecraverant.

Postremo autem nemo Vestrum procul dubio est, cui illa ignota sint, quæ celebri Fischerio Rosenfi Episcopo acciderunt. Hic Henrici VIII. Angliæ Regis jussu in angusto carcere cum detineretur, quod legi illi adhærere recusasset, quæ Rex supremum se Anglicanæ Ecclesiæ caput constituerat, purpureus eidem Galerius (b) a Pontifice Paulo III. per idem tem-

(a) *Citato lib. 3. Canoniz. cap. 20. n. 12. & seq.*

(b) *Cit. lib. 3. de Canoniz. cap. 33. num. 8.*

tempus transmissus fuit. Nos Patrem
Franciscum Serranum jam carcere in
odium Christianæ Religionis conclusum,
datis Apostolicis Litteris, Episcopum Ti-
pasitanum constituimus, & Provinciæ
Fokienfis Apostolicum Vicarium designa-
vimus, addita declaratione Coadjutoris
cum futura successionem in locum Antisti-
tis Mauricastrensis. Pontifici Paulo III.
Rofensis vincula nota erant; ignotum
vero Nobis erat, Serranum item vinctum
teneri. Hoc dumtaxat discriminis inter
unum atque alium intercedit. Cæterum
utriusque idem finis fuit; cum quemad-
modum Cardinalitia insignia nihil aliud
Rofensi tribuerunt, nisi ut profundæ hu-
militatis actum exerceret, & præclarum
testimonium acciperet, quanta virtutis
illius ratio apud Pontificem esset; sic ex
Nostris Apostolicis Litteris nihil aliud Ser-
rano tributum est, nisi argumentum,
quanti etiam Nos illum merito faceremus;
quæ quidem Nostra de illo æstimatio præ-
claris humilitatis præcipuæ testimoniis
aucta est, & obsequiosæ obedientiæ suæ,
quam Nobis per idem tempus exhibuit. Et
quemadmodum Cardinalitius Galerius a
Paulo III. Rofensi transmissus, vitam illi
incolumem minime præstitit, quam idem
paulo post pro Sancta Religione libenter
devovit; sic neque Episcopalis, ac Vi-
cariatus Apostolici dignitas Serrano a-

Nobis collata, gloriosæ eundem Martyrii palmæ expertem fecit.

Hæc præcipua sunt, Venerabiles Fratres, quæ de strenuis hisce quatuor Jesu Christi Athletis Vobis exponenda esse censuimus. Cæterum eam nos quæstionem in medio relinquendam existimamus, uter duorum Ordinum, Dominicanus, an Franciscanus, primus fuerit, qui Sanctas in Sinensi Imperio Missiones perageret. Illud quidem certe affirmabimus, ad hæc usque tempora decem ex Dominicana Familia Viros numerari, (a) qui in Sinensi Missione mortem pro Christi Fide per inaudita tormenta oppetierunt; quorum quidem causæ in Sacrorum Rituum Congregatione aliæ jam introductæ, aliæ vero proximæ sunt, ut introducantur. Quamobrem, Venerabiles Fratres, quoniam nemini Vestrum ignotus est infelix status, quo propter atroces persecutiones Sancta illa Missio in præsens redacta est, restat jam, ut ferventes pro illa conjunctis votis Divinæ Majestati preces porrigamus, magna spe freti, ut Eadem de excelsa gloriæ suæ Solio Nobis benigne annuat; quoniam Abrahamo interroganti: (b) *Quid si inventi ibi fuerint decem?* respondit: *non delebo propter decem.*

EPI-

(a) Sex memorantur in citata nostra allocutione habita die 6. sept. 1748. §. Vulgata, & communis Quatuor alii sunt qui in hac allocut. recensentur.

(b) Genes. cap. 18.

E P I S T O L A

Reverendissimi P. M. Generalis Ordinis Prædicatorum ad PP. & FF. ejusdem Ordinis, qua eos alloquutionis SS. Domini Nostri
BENEDICTI XIV. P. M.
 certiores facit.

*In Dei Filio sibi dilectis universis
 Patribus, ac Fratribus Ordinis
 Fratrum Prædicatorum*

FR. ANTONINUS

B R E M O N D

Sacrae Theologiæ Professor, ejusdem-
 que Ordinis humilis Magister
 Generalis, & Servus

Salutem, & Fidei propagandæ zelum.



Um eximio, atque immortali Dei Optimi Maximi beneficio contigisse arbitremur, ut regiminis nostri primordia ab illustri, & gloriosa Fratrum nostrorum pro Christi Fide confessione auspicaremur, id unum ad faustissimi ominis, lætitiæque
 no-

nostræ cumulum fore reliquum videbatur, ut sanguine partam ab Illustrissimo, ac Reverendissimo D. Fr. Petro Martyre, Sans Episcopo Mauricastrensi, Ecclesiæ, ac Familiæ nostræ gloriam ceteri ejusdem Apostolatus Socii proprio implerent, atque amplificarent Martyrio, (a) *ut quos vinculum confessionis, & hospitium carceris simul junxerat, jungeret etiam consummatio virtutis, & gloriæ cælestis.* Quo Apostolicæ charitatis æstu, qua votorum constantia, qua exercitatione virtutum ad supremum agonem, beatæque mortis complexum Martyres jam designati sese componerent, ex litteris Illustrissimi, ac Reverendissimi D. Fr. Francisci Serrano Episcopi Tipasitani, ac Provicarii Apostolici cumulate intelleximus. Ex ipso carcere, quo cum aliis ad necem servabatur, Episcopi Mauricastrensis passionem, & exitum ad Nos scripsit diligentissime, tum Apostolicis sensibus, quo mortem pro Christo obeundi cum sociis flagrabat, desiderium luculenter adeo expressit, ut in ejus verbis cor ipsum loqui videretur. Parati jam sibi optatissimi Martyrii expectatione suspensus, & anxius propriis culpis, quæ ejus modestia fuit, injectam passionis moram, dilatamque sibi, ut videbatur, nondum satis parato coronam de-

pu-

(a) s. Cyr. • lib. 2. Epist. 6.

putabat, patienter interea expectans beatam spem, & adventum gloriæ magni Dei, quo se prorsus indignum prædicabat. Quæ dum obortis præ gaudio lacrymis legere-mus, videbatur Nobis veterum Ecclesiæ Martyrum fidem, constantiam, flagrantissimam charitatem, beatæque immortalitatis firmissimam spem intueri, (a) nec invenimus quid in eo prædicare plus deberemus gloriam vulnèrum, an verecundiam morum, quod honore virtutis insignis esset, an quod pudoris admiratione laudabilis, ita & dignitate excelsus erat, & humilitate sublimis.

Interea destinatorum cum ipso Martyrum in tam illustri agone certantium diu, noctuque obversabatur menti nostræ imago, & præsentia, ac beatissimo eorum carcere, si non corpore & vinculis, animo certe, votisque conclusi Deum jugiter precabamur, (b) ut initiis ad summa pergentibus quos facerat confiteri, faceret coronari. Favet meritis, & precibus suorum Militum, & Confessorum, favit expectationi nostræ divina clementia, & præconceptam ex præclarissimo Episcopi Mauricastrensis triumpho exultationem ejusdem Sociorum pal-mis cumulavit. Recentioribus quippe litte-

(a) S. Cypr. lib. 2. Epist. 55.

(b) S. Cypr. lib. 4. Epist. 1.

litteris, certisque nunciis accepimus, prælaudatum Illustrissimum, ac Reverendissimum D. Fr. Franciscum Serrano Episcopum Tipasitanum, RR. PP. FF. Johannem de Alcober, Joachimum Royo, & Franciscum Diaz Hispanos, Philippinarum Provinciæ Alumnos, post diuturni carceris pressuras, eo nobilius, quo longius, certamen passionis, vitæque cursum feliciter consummasse, ac plaudentibus Angelis ad amantissimi Fratris Episcopi Mauricastrensis complexum evolasse. Universam eorum Martyrii seriem neque aptius, neque luculentius exhiberi posse arbitramur, quam gravissimis, atque amplissimis verbis, quibus eam Sanctissimus Dominus Noster BENEDICTUS Papa XIV. Eminentissimis Patribus in Consistorio secreto die 14. hujus mensis nunciavit. Sapientissimi Pontificis Orationem Apostolicæ ejus eloquentiæ, atque eruditioni incomparabili parem, inter pretiosiora Familiæ nostræ monumenta perenniter adservanda oculis vestris subjicimus.

Jam vero intelligitis Fratres quas divinæ erga nos largitati gratias debeamus, quod ex Dominicanis alumnis hac etiam ætate suscitaverit, atque elegerit sibi (a) homines divites in virtute, dominantes

(a) Eccl. 44.

nantes in Potestatibus, nunciantes in Prophetis, fortes in bello, contemptores vitæ, mortis triumphatores, quos (a) ludibria, & verbera expertos, insuper & vincula, & carceres (b), nec tribulatio, & angustia, nec fames, ac nuditas, nec persecutio, nec gladius separare potuerunt a charitate Dei, sed in omnibus superaverunt propter eum, qui dilexit nos. Est profecto, cur iis, cur nobis ipsis gratulemur, quod illorum nomina jam in cælis descripta novum, æternumque decus fastis nostris attulerint, ac nova adjecerint nobis incitamenta virtutis. Quis enim præclaris adeo non excitetur triumphis, & quasi admotis stimulis sese impellere non sentiat ad eam ineundam Apostolicam viam, quam suo sanguine impressam gloriosissimi Fratres signarunt? Nonne cor nostrum, dum hæc audimus, ardet in nobis, ut fidei zelo succensi (c) eamus & nos, & moriamur cum illis? Hæc sunt, dilectissimi, Apostolicorum hominum vota; hæc eorum merces magna nimis: hæc Instituti, quod profitemur, gloria, a Majoribus nostris parta, ab æqualibus aucta, ac novissime ad emulandum nobis

(a) *Hebr.* 11.

(b) *Rom.* 8.

(c) *Joann.* cap. 11.

bis proposita. Ergo (a) non efficiamur
seignes, sed imitatores eorum, qui fide,
& patientia hæreditaverunt promissio-
nes. Ad propositum nobis certamen cur-
ramus (b) assumentes galeam salutis,
& gladium spiritus, succincti lumbos in
veritate, induti lorica[m] justitiæ, & cal-
ceati pedes in præparationem Evangelii
pacis.

Quod si fortissimos Christi Athletas
per vincula, & mortem sequi non possu-
mus, eorum saltem sectatores simus in
fide, & charitate, in scientia, & lon-
ganimitate, (c) servantes in simplici-
tate innocentiam, in charitate concor-
diam, modestiam in humilitate, in de-
fendenda veritate constantiam, in disci-
plina severitatem, ne aliquid ad recte
factorum exemplum desit in nobis, sed
luceat lux nostra coram hominibus, &
glorificent Patrem nostrum, qui in cælis
est. Hæc sunt enim vestigia, quæ illi
revertentes in patriam nobis reliquerunt,
ut illorum semitis inhærentes sequeremur
& in gaudia. Ad ea nos amantissime in-
vitant, ibi nos cupidissime expectant (d)
jam de sua immortalitate securi, & ad-
huc

(a) *Hebr. 6.*

(b) *Ephes. 6.*

(c) *Ven. Beda Serm. 11. de SS.*

(d) *S. Cypr. de Mortalitate.*

huc de nostra incolumitate solliciti. Ad eorum conspectum, & complexum venire quanta & illis, & nobis in commune erit lætitia! (a) Remissas itaque manus, & soluta genua erigamus, tantæque expectatione mercedis forti animo simus, alacriter subeuntes (b) momentaneum, & leve tribulationis nostræ, quæ æternum gloriæ pondus operabitur in nobis. (c) *Si compatimur & conregnabimus: quod præmium non iis tantum paratum est, qui pro nomine Domini impiorum sævitia sunt perempti, quoniam universitas Deo servientium, sicut in Christo est crucifixa, ita in Christo est coronanda.* Valete, nostri, sociorumque memores in sacrificiis, & precationibus vestris.

Romæ ex nostris Ædibus Minervitanis die XXXI. Januarii MDCCLII.

Di-

(a) *Habr. cap. 22.*

(b) *Cor. c. 4.*

(c) *S. Leo M. Serm. 67. cap. 5.*

Dilecto Filio Francisco Serrano
Religioso Viro Ord. FF. Præ-
dic. Professori, Provinciæ
SSm̃i Rosarii nuncupatæ
Insularum Philippina-
rum Procuratori.

BENEDICTUS PP. XIV.

*Dilecte Fili salutem, & Aposto-
licam Benedictionem.*



A, qua erga inclytum
Prædicatorum Ordinem
in Catholica Ecclesia
commendatissimum af-
fecti sumus paternæ ca-
ritatis propensione, ex-
cepimus epistolam tuam
luculentis filialis erga Nos, & Apostoli-
cam hanc Sedem observantiæ obedi-
entiæque significationibus, & gratiarum
præsertim actionibus insignem ex eo,
quod Nos in Consistoriis Nostriis secretis,
quoad Nobis integrum fuit, meritis lau-
dibus celebravimus gloriosam memoriam
nonnullorum Venerabilium Fratrum An-
tistitum, ac dilectorum Filiorum ejusdem
Ordinis Provinciæ SSm̃i Rosarii nuncu-
patæ in Insulis Philippinis in Catholicæ
Fi-

Fidei odium interfectorum . Quod autem per eandem epistolam supplex a Nobis rogas & exposcis , ut nimirum ad Dilectos Filios Priorem Provinciam , & ceteros Religiosos Viros laudatæ Provinciæ , & Ordinis litteras paternæ benignitatis , & gratulationis , & laudationis , & exhortationis testes , & incitamentum daremus , alacri libentique animo præstamus per alias Nostras in simili forma Brevis hac ipsa die datas , quas cum adjuncto earundem exemplo conjunctas tibi reddendas curabit Dilectus Filius Antoninus Bremond celeberrimi Ordinis tui Frater , & Generalis Magister , qui omnium virtutum , doctrinarum , disciplinarumque splendore conspicuus non solum Pontificiam Nostram , sed cunctorum , etiam Ordinum hujus Almæ Urbis Nostræ gratiam benevolentiamque sibi conciliavit . Tuum igitur erit , Dilecte Fili , ut ipsas litteras Nostras tuto quantocius ad ejusdem Provinciæ Religiosos Viros perferri satagas , & adnitaris . Nos interim tibi Apostolicam Benedictionem peramanter impertimur .

Datum Romæ apud Sanctam Mariam Majorem sub Annulo Piscatoris die II. Decembris MDCCCLII. Pontificatus Nostrî anno decimotertio .

Cajetanus Amatus .

S

Di-

Dilectis Filiis Priori Provinciali,
 & ceteris Religiosis Viris Or-
 dinis FF. Prædic. Professori-
 bus Provinciæ Sanctissimi
 Rosarii nuncupatæ in
 Insulis Philippinis.

BENEDICTUS PP. XIV.

*Dilecti Filii salutem, & Apo-
 stolicam Benedictionem.*



Uibus potuimus Aposto-
 licæ prædicationis præ-
 conis in Consistorio No-
 stro secreto cum Vene-
 rabilibus Fratribus No-
 stris S. R. E. Cardina-
 libus bis habito profe-
 cuti sumus debitas laudes, & res in pe-
 rennem Catholicæ Fidei confessionem,
 præclare gestas a Venerabilibus Fratribus
 Antistitibus, & Dilectis Filiis Religiosis
 Viris Apostolicis Missionariis istius Pro-
 vinciae vestræ inclyti Prædicatorum Or-
 dinis Alumnis, qui in excolenda vinea
 Dei Sabbaoth, atque adducendis ad Jesu
 Christi ovile hominibus sedentibus in
 tenebris, & in umbra mortis ambulan-
 tibus

tibus adlaborantes majorem caritatem, non habuerunt, quam ut ponerent animas suas, quemadmodum reipsa per diversa tormentorum ab inimicis Crucis Christi illatorum genera gloriosam mortem oppetivere. Postquam vero insignem invictissimorum Orthodoxæ Fidei Heroum, quorum nomina in benedictione sunt, memoriam ad majorem militantis Ecclesiæ ædificationem, & decus commendare studuimus, minime omittendum, esse existimavimus, nimirum, ut quæ in secretis Consistoriis protuleramus christianæ fortitudinis ad mortem usque certantis encomia, typis etiam impressa, publicique juris facta ad manus omnium Christifidelium pervenirent, qui tam illustria exempla perlegentes, & invicem in Domino gestientes, ad illa imitanda excitarentur. Interim ingenti cum paterni cordis lætitia effusaque exultatione a Dilecto Filio Antonino Bremond laudati Ordinis vestri Fratre, & Generali Magistro paternæ caritati Nostræ propter religiosas virtutes examiamque doctrinam in primis grato, & accepto, deque familia sibi commissa in omnibus, ac præsertim ob litterarios labores optime merito accepimus, quod fane carissimus etiam in Christo Filius Noster Ferdinandus Hispaniarum Rex Catholicus, in cujus ditionibus Provincia vestra in

Insulis Philippinis sita reperitur, de assiduis Catholicæ Fidei incrementis, gravissimis incommodis, & angustiis, atque gloriosis per indefessos vestræ Provinciæ Missionarios reportatis triumphis plenissime edoctus vobis per regiam suam humanissimam epistolam significaverit perceptam ea propter voluptatem, ac meritas pro singulari zelo vestro egerit gratias. Etsi autem vestra vestrorumque Missionariorum rebus ipsis probata virtus satis declarat vos nec Apostolicis laudibus, nec novis stimulis indigere, quibus ad divinissimum opus, salutem scilicet animarum, alacrius constantiusque curandum, & urgendum magis magisque incitemini (probe enim scimus vos a supremo Pastorum Principe Jesu Christo, & laudationem, & coronam in cælis repositam præstolari) Nos tamen, qui illius in terris vices plane immerentes gerimus, facere non debemus, quin de commendatissimis facinoribus vobiscum præcipue ex animo gratulemur, & consentanea Apostolicæ Nostræ procurationis officia a vobis ab initio, ac novissime non levem apud veros Catholicæ Ecclesiæ filios christianæ sollicitudinis, zeli, constantiaque commendationem impense quidem efferimus verbis, sed magis apud Omnipotentem Deum precibus obsecrationibusque deferimus, ut qui dives est
in

in misericordia, & cujus laus est nova virtute, & gloria induere ex alto, ipse vobis gratificetur, ipse vos pro meritis collaudet, ipse confirmet, & cumulet cælesti benedictione. Deinde eadem, quæ Christifideles sub Tyrannorum persecutoribus gementes alacres infidelibus occinebant, vobis, Dilecti Filii, in memoriam revocamus: Hæc est victoria nostra, vincimus cum occidimur, evadimus cum obducimur, obtinemus cum expellimur, multiplicamur cum morimur. Hic est habitus victoriæ nostræ, hæc palinata vestis, tali curru triumphamus. Plures efficimur, cum a vobis metimur. Sanguis martyrum est semen christianorum. Nec aliter quam sanguine fundatam esse Christi Ecclesiam confitemur, & sanguine crevisse scimus, & sanguine usque in finem seculorum florentem fore permanfuram non dubitamus. Bono itaque animo, Dilecti Filii, vos esse jubemus, certate bonum certamen, nolite amittere confidentiam, & constantiam fidei nostræ, quam prædicandam suscepistis, laborate, sicut hactenus fecistis, usque ad vincula, carceres, & mortem ipsam; ad Christum ducem, & sibi Crucem bajulantem, atque e cælo spectantem, & suppetias ferentem respicite, qui justus Remunerator, & Judex jam pro laboribus præmia

dispensat . Confortamini invicem , & confirmamini ; cum patientia præstolantes salutare Dei , ut , cum apparuit Princeps Pastorum , percipiatis immarcescibilem gloriæ coronam . Nos interea , dum bonorum omnium largitorem Deum supplices poscimus , ut vos uberrima cælestium charismatum copia adaugeat , & cumulet , Apostolicam Benedictionem propensæ studiosæque Nostre ad vobis opportune gratificandum voluntatis testem vobis , Dilecti Filii , peramanter imper-
timur .

Datum Romæ apud Sanctam Mariam Majorem sub Annulo Piscatoris die II. Decembris MDCCLII. Pontificatus Nostri anno decimotertio .

Cajetanus Amatus .

DE PP.
FRANCISCO GILIO
DE FEDERICH

ET
MATTHÆO ALONSO
LEZINIANA

ORD. PRÆDIC.

In Tunquino pro Religione Christiana
gladio percussis

COMMENTARIUS:

DE P. P.
FRANCISCO GILIO
DE FEDERICH

MATTHEO ALONSO
LEZINIANA
ORD. P. R. E. D. I. C.

In Tugurio pro Religione Christiana
gladio petentis

COMMENTARIUS.



DE
FRANCISCO GILIO
 DE FEDERICH
ET
MATTHÆO ALONSO
 LEZINIANA
 MARTYRIBUS
COMMENTARIUS.

I.



Unquinum ab Sinis, quarum olim provincia fuisse fertur, ad Oceanum spectat inter septentriones, & orientem solem; attingit a meridie Cochinchinam, contineturque ab occasu finibus Laorum, & Bramarum. Cum seculo superiore Episcopi, qui missi a Pontifi-

De Domini-
canorum in
Unquinum
adventu.

tifice Maximo in id regnum , amplificandæ rei christianæ causa fuerant , inquirendo de institutione vitæ , moribusque Dominicanorum Philippinensium didicissent , adductique in eam spem essent , ut , his sociis , magnum se itinerum , laborumque fructum laturos arbitrarentur ; anno MDCLXXIV. litteras ad Præfectum ejus provinciæ scripserunt , quibus orabant , ut iis Prædicatoribus , quorum operam utiliore prospiceret futuram , facultatem in Tunquinum navigandi daret . His permoti litteris , etsi magistratus , qui rem in Philippinis insulis publicam administrabant , committendum non putarent , ut quisquam nostrum in eas regiones proficisceretur ; nihilo secius Johannes Sanctacrucius , & Johannes Arjona , Præfecti voluntate , Manila , quæ urbs est princeps Philippinarum , discedunt , cumque forti animo itineris incommoda , injuriasque ab Navarcho inlatas , qui eos durius habuerat , atque in vincula conjecerat , tulissent , an. MDCLXXVI. nonis quintilibus portum capiunt . Inde progressi , in eam regni partem , quæ ipsis attributa fuerat , contendunt . Quo cum pervenissent , annumque jam in docendis Tunquinesibus consumsissent , ob rem strenue , præclareque gestam , obtinuerunt , ut iis in locis , quæ opportuna ac continendos in fide christianos essent , stabiles

biles Prædicatoribus sedes constituerentur. His de rebus fama ad Philippinenses perlatata, P. Dionysius Moralesius, qui summo religionis studio flagrabat, Præfecti provinciæ jussu, Manila solvit, ac secunda usus tempestate ad socios proficiscitur. Eo cum venisset, quantoque usui incolis sua esset opera futura, cognosset, quidvis esse fatius perpeti statuit, quam ut ab se ullum tempus intermitteri, quin eos ad christiana sacra alliceret, pateretur. Communi consilio junctis opibus, ut alter alteri auxilio esse posset tam excellens fortissimorum hominum in adversis rebus sustinendis virtus, tantaque in instituendis Tunquinesibus diligentia fuit, ut crebris significationibus, quam gratus eorum labor divino numini esset, perspicerent, continenterque in sententia confirmarentur. Sed anno MDCLXXX, cum Arjona, & Moralesius Hieni, qui portus est Tunquensium, agerent, subita in christianos ab ethnicis commota tempestas fuit. Nostri quamquam liberam sibi e portu excedendi, periculique fugiendi potestatem esse vident, tamen hortantibus Episcopis, ut manerent, parendum existimant. Qua re per indicem cognita, hostes repente in eos impetum faciunt, interceptisque vestibus, vasisque sacris, quæ ad rem divinam faciundam spectarent, ambos comprehendunt, ac ver-

verberibus cæsos , postque in vincula
 coniectos , Batavis demum , inde ut ab-
 ducant , transdunt . Batavi , quibus per-
 petuæ sunt cum catholicis controversiæ de
 religione , opportunitatem sæviendi in
 sacerdotes orthodoxos secuti , utrumque
 navi imponunt , utque coeperant , tam
 longo itinere conviciis infectari , quam-
 que possunt acerbissime cruciari pergunt .
 Jam unus in Tunquino Sanctacrucius man-
 serat . Is , captis sociis , etsi vix quid-
 quam ab solo in regione præsertim , quæ
 tam late pateret , perfici , seque ab eth-
 nicis quæri , remque esse in angusto , vi-
 dit ; tamen id sibi magnopere contendend-
 um judicavit , ut iis , qui sibi mortalem
 eripere conarentur , sempiternam vitam ,
 & felicitatem daret . Hæc cum secum ipse
 constituisset , processit in mediam hostium
 ditionem , tantaque animi magnitudine ,
 atque constantia rem christianam curavit ,
 ut opes Ecclesiæ non servaret modo , sed
 etiam amplificaret . Interea Philippinen-
 ses Dominicani , qui plena esse omnia
 difficultatum intelligebant , quo minus cui-
 quam suorum iter ingredi , inque eas regio-
 nes contendere liceret , despondendum ani-
 mum non putarunt . Itaque Sanctacrucio
 anno MDCLXXXI. P. Raymundum Lez-
 zolium , & anno MDCXCII. PP. Anto-
 nium Beriainum , & Thomam Garrucha-
 teguium subsidio summisserunt . Sed Be-
 ria

riainus laboribus fractus, quibus assiduus, gravibusque in Laorum regno perfunctus fuerat, anno MDCXCV. decessit. At his rebus adversis deterreri nostri numquam potuerunt, quin viros illuc e suis doctrina, vitæque innocentia illustres promulgatum Evangelium mitterent. Cumque hi diligentissime in obeundo munere versarentur, tantam sunt apud Sedem Apostolicam laudem consequuti, ut plures eorum amplissimis sacerdotiis ornati, præfectique incolis fuerint, qui christianam religionem profiterentur. Regnum est omne Tunquinesium in partes divisum duas. Harum una ad orientem, altera ad occidentem solem pertinet. Cum Innocentius XII. P.M. certior esset factus eorum, quæ Dominici in Tunquino præclare, ac fortiter gessissent, Raymundum Lezzolium, quem propter singularem virtutem maxime celebrari intellexerat, xiii. kal. novembres anno MDCXCVI. Episcopum Olonensem dixit, in eamque partem, quam vergere ad orientem solem ostendimus, cum Vicarij Apostolici dignitate misit. Lezzolio anno MDCCXVI. Clemens XI. P.M. Johannem Sanctacrucium Nimeriensem Episcopum appellatum substituit; eique P. Thomam Seltiensensem, qui post fuit Antistes Nissenorum renunciatus, adiutorem dedit. Sed omnia Philippinensium Domi-

286 DE MARTYR. TUNQUIN.

Dominicanorum in Ecclesiam Tunquinen-
sem merita persequi & instituti operis bre-
vitas impedit, & festinatio, ut ea expli-
cem, quorum causa hæc esse ante dicen-
da videbantur.

De institu-
tione vitæ,
deque moti-
bus Francisci
Gilio Federi-
cii.

II. Igitur his tot exemplis permoti,
incensique studio curandæ non suæ modo,
sed etiam salutis aliorum Franciscus Gi-
lius, & Matthæus Alonsus Leziniana a
Præfecto provinciæ Dominicanorum Phi-
lippinensium petierunt, ut sibi in Tun-
quinum contendere liceret. Sed quoniam
de rebus ab his viris duobus fortiter ex-
tremo vitæ tempore, præclareque ge-
stis differendum est, non alienum esse
videtur, quo quisque eorum loco natus,
quibus moribus præditus, quam ob caus-
sam adductus in eam sententiam fuerit,
ut, amicis, patria, parentibus relictis,
abeundum sibi in ultimas gentes arbitra-
retur, proponere. Atque a Gilio exor-
diendum est. Is Dertosæ in Hispania,
Tarraconensi anno MDCCII. Antonio
Gilio de Federich, & Agnete Sansia ho-
nestis parentibus natus, xix. kal. junuarias
baptizatus, annoque post confirmatus chri-
smatis sacramento fuit. Ubi annum æta-
tis quintum, ac decimum complevit,
cooptatus in Ordinem Prædicatorum est,
statoque deinde tempore Barchinone in
Coenobio S. Catharinæ solemniter ritum suam
Deo obstringens fidem promisit dicto se
per-

perpetuo audientem, castum, ac pauperem futurum. Cumque sic vitam instituisset, ut non modo bene de ipso sperarent nostri, sed etiam confiderent fore, ut omnium, quæ de virtute illius erat, vinceret opinionem; accidit ut Dominicani viros propagandæ religionis christianæ causa in Orientalem Indiam vellent mittere. Id ut intellectum Francisco est, nam Gilio id erat nomen, quamquam annos viginti duos natus erat, operamque theologicis disciplinis sibi comparandis dabat, tamen Thomæ Ripollio tum Præfecto provinciae Aragoniæ, qui post supremo est Ordinis magistratu potitus, significavit, sibi esse in animo in insulas Philippinas Evangelium barbaris gentibus nunciatum ire: itaque petere, ut sibi abeundi faceret potestatem. Ergo, amicis, cognatisque valere jussis, quam celerissime potuit, Gades contendit; indeque solvens anno MDCCXX. novembri mense Manilam attigit. Ubi Præfectus ei provinciae experiundo, quam utilis esset Gilii opera christianæ reipublicæ futura, cognovit, eum in Pangasinamum religionem christianam promulgatum misit. Eo cum venisset, ratus fructum se laborum ferre vix posse, nisi loqui Pangasinamice didicisset, in id studium omne initio contulit, utque magnos se brevi progressus fecisse vidit, sese ad instituendos inco-

288 DE MARTYR TUNQUIN.

incolas convertit. Quod munus incredibili quadam laude biennio fere sustinuit. Quare qui proximis comitiis præfectus Philippinensibus Dominicanis fuit, eum Manilam accersivit, ut ipso scriba provinciae, ac socio uteretur. Sed cum maximo desiderio amplificandi, propagandique nominis christiani arderet, nihil veritus pericula, in quæ sese aliquando venturum providebat, Præfectum adiit, obsecravitque, ut si fieri ejus voluntate posset, ad Tunquineses sibi transmittere liceret. Non recusare laborem se, modo, qui inanium deorum superstitionibus tenebantur, sua opera Christo Servatori conciliarentur. Id vero quamquam majorem in modum optaret, tamen quod satius esse parere, quam sibi indulgere, sciret, se non tantum siquid contra Præfectus jussisset, sed etiam siquid consulisset, tam libenter, quam quod expeteret, facturum. Præfectus virtutem hominis admiratus, morem obsecranti gessit; atque, ubi tempus monuisset, facultatem discedendi fecit. Quæ res quam grata Francisco fuerit, perfacile est existimare. Igitur cum primum potuit, navim conscendit, nactusque opportunum ad navigandum tempus, ad diem v. kal sept in Tunquinum anno MDCCXXXV. pervenit. Qua in regione ut de moribus gentis cognovit, intellexitque, magnas inesse
Tun-

Tunquinenſium animis ad colendam virtutem opportunitates, prius ſibi linguam addiſcendam, propterea quod rem ſecus tam proſperos ſucceſſus habere poſſe, quam ipſe vellet, diffideret, tum populi ſaluti conſulendum exiſtimavit. Sed cum continere diutius ſe, quo minus cum incolis de religione ageret, nequiviſſet, quod graviter, acerbeque ferret, eos tanta in rerum divinarum ignoratione verſari, ubi ſe mediocrem ejus ſermonis facultatem conſecutum animadvertit, Givo-Thuyenſes, Chan Dinhenſes, & Vu-tienſes chriſtianos confirmare, ethnicosque docere, horumque aliquibus ad Chriſtum adductis, rem orthodoxorum publicam augere cœpit. Agri ſunt Givo-Thuyenſis, Chan-Dinhenſis, Vu-tienſisque in ea regni provincia, quæ ad meridiem pertinet. In his quadraginta ſunt fere chriſtianorum cœtus, quorum Dominicani, quibus ſunt attributi, curam gerunt. Horum cœtuum commodis ita Gilius proſpicebat, ut non modo nulli labori parcere, ſed etiam noctes ipſas in re divina, ſacrisque peragendis diſtribuendisque conſumere ſoleret. Quibus in rebus perficiendis ſingularis hominis virtus, atque animi magnitudo fuit. Nam, etſi, cum flumina tranſiret, pedesve iter ageret, iisve in locis verſaretur, in quibus perpauca chriſtiani

stiani essent, periculum erat, ne in hostium veniret potestatem, demittendum nihilo secius animum non putabat. Ac si sæpe evenit ut sibi ab inimicis instructas esse insidias intelligeret, magnoque incommodo accepto, fugam caperet, tamen quidvis pati satius duxit, quam ullam intermissionem officii facere, quod unius veri Deicaussa suscepisset.

De Matthæo
Alonso Leziniana, ejusque institutione vitæ.

III. Iisdem fere laboribus perfunctum, iisdemque virtutibus ornatum fuisse Matthæum Alonsum Lezinianam constat. Is Navæ Regis, quod est Lugduni Hispaniensis regni oppidum, honesto loco natus, cum ea esset ætate, qua dijudicare per se ipse posset quæ sibi vitæ institutio aptior ad sequendum esset; ad Præfectum cœnobio Segoviensium Dominicanorum accessit, ab eoque petiit, ut sese in Ordinem Prædicatorum cooptare vellet. Præfectus, qui ita ut sit, ubi aliquis nostrum institutum profiteri cupit, de moribus adolescentis quæsierat, cum primum quantum ingenio, virtuteque valeret, cognosset, concedendum, quod ille posceret, existimavit, annoque post fecit, ut solemni ritu suam Deo obligaret fidem, seque, dum vixisset, iis, qui præessent, morigerum, pudicum, perque virtutem pauperem futurum promitteret. Cumque sic promissa impleisset, ut prospicere jam pos-

possent sui summæ illum & gloriæ Ordini Prædicatorum, & Christianæ reipublicæ utilitati fore, permotus vehementi quodam studio latius disseminandæ religionis Præfectum provinciæ Castellæ, cui Segovieneses Dominicani parent, oravit, ut sibi in Philippinas insulas navigandi facultatem daret. Ea re a Præfecto permissa maturavit iter, Manilamque anno MDCCXX. petiit. Inde ab eo, qui Philippinensium Dominicanorum provinciam obtinebat, in Tunquinum Evangelium promulgatum missus, multis laboribus, difficultatibusque superatis, quibus in eodem itinere magnis est conflictatus, xiv. kal. febr. an. MDCCXXII. cum P. Petro Martyre Ponsgravio, qui post in eo regno Pro-Præfecti provinciæ partes egit, in adsignatum sibi locum pervenit. Septimo mense post, quam est in Tunquinum ingressus, is vero mensis quintilis fuit, Givo-Thuyenses christiani, qui ejus provinciæ, quæ ad meridiem vergit, partem incolunt, institutoribusque utuntur Dominicanis, ab Thaytincho sacrificulo viro improbo, nostrorumque hominum capitali hoste apud judicem accusantur. Nam huic, qui ex ea civitate esset, quæ non longe a vicis distaret christianorum, explorati frequentes ad eos itus, ac reditus Europæorum erant. Judex, ne spatium nostris eva-

T 2

den-

dendi, resque suas alio supportandi detur, tribunum evocat. Huic mandat, ut onerarias naves paret, iisque quam maximum potest numerum militum imponat, quidque deinceps fieri velit, ostendit. Tribunus, quod iussus est, facit, noctuque solvens, christianos inopinantes oppressurus, in eorum vicos contendit. Nihil tale cogitantibus nostris Tru-linea, Lue-thuga, Ke-Buea, & Tru-Pea vici repente obsidentur. Prima luce, qui Tru-lineam milites venerant, Thaytincho indice usi, in ædes, in quas divertere Dominicani consuecebant, irrumpunt; easque, inventis latebris, in quibus illi sacram suppellectilem, resque suas ceteras occultarant, diripiunt, indeque ac illac circumcursantes, vicum depopulantur. Idem fere qui sunt in proxima loca missi milites fecerunt. Interea Dominicani, qui fuga sibi salutem petierant, amissis rebus omnibus, maximis incommodis premebantur. Quo tempore Matthæus, cum locum nullum, in quo satis tuto consisteret, haberet, incertis sedibus vagari, ac modo sese in naves, modo in ædes christianorum, quæ longe a vicis, de quibus est demonstratum, distarent, abdere cogebatur. Quod vitæ genus cum per plures menses duxisset, dici vix potest quantum detrimenti acceperit. Sed his tam adversis rebus absterri non potuit, quin
lin-

linguam Tunquinenſium ſummo ſtudio ad-
 diſcere conaretur. Nam qui eo ſeſe con-
 tulerat, ut mortalibus commodo, ſaluti-
 que eſſet, intelligebatque parum in hoc
 genere proficere quemquam poſſe, qui
 ſermone incolarum non uteretur, nihil
 laboris, diligentiaēque prætermittendum
 judicabat, quod conferre videretur ad
 comparandam ejus linguæ ſcientiam. Ita-
 que ubi loqui Tunquinice ita, ut facile
 ab incolis intelligeretur, cœpit, curam
 ſuſcepit chriſtianorum, qui ſuperiorem
 ejus provinciæ, quæ ad meridiem vergit,
 partem incolunt. His, poſt annos ali-
 quot, Præfecti jūſſu, qui illius opera uti
 ad recte inſtituendos chriſtianos, qui in-
 ferioſiorem ejusdem provinciæ partem occu-
 paſſent, ſtatuerat, relictis, ad Giao-Thu-
 yenſes, Bu-Tienſes, Chan-Dinhenſes-
 que deſcendit; quibus cum diu exemplo,
 ſtudio, diligentia profuiſſet, in Phu-Ta-
 ienſem, eique proximas Toparchias Chri-
 ſti nomen, religionemque latius propaga-
 tum proſectus eſt. Inde ad Nam-Chanen-
 ſes, Dai Lenſes, alioſque Luc-Phuyen-
 ſibus vicinos chriſtianos, ut Præfecto ju-
 benti obtemperaret, migravit, atque
 apud eos ad diem uſque, qua in poteſta-
 tem venit ethnicorum, permanſit. Quam-
 obrem etſi imbecillus, tenuique valetu-
 dine erat, tamen quod incredibili ſtudio
 curandæ ſalutis animorum incenderetur,

decennium in Apostolico munere obeundo ita consumsit, ut, peragratis locis omnibus, in quibus christiani commendati fidei Dominicanorum erant, non modo synaxes ad multam noctem produceret, suosque, quibus poterat, rebus juvaret, sed etiam ubi se religionis, caritatisque erga homines causa aut perpeti quidpiam, aut ne cogitantem quidem in vitæ periculum venisse videbat, magnopere lætaretur. Ac sæpe sese, cum navigaret, aut pedibus iter ageret, aut domi rem sacram administraret, in id discrimen deductum vidit. Ex quo ægre, magnoque interdum accepto incommodo, liberatus, tantum aberat, ut animo dejiceretur, ut majores spiritus ad rem studiosius gerendam sumeret. *Carbechistas*, hoc est institutores christianæ plebis, quibus propter peritiam linguæ Tunquinesibus uti Prædicatores consueverunt, in religionis doctrina versatos præ ceteris esse volebat, quam ob causam non modo iis quotidiano sermone erudiendis operam diligentem dabat, sed etiam coëmptis suo impendio libris, ut legendo ipsi per se quidnam esset credendum cognoscerent, curabat. Intelligebat enim, si plane, perfecteque, ut eorum postulabat institutum, explorata præcipua doctrinæ christianæ capita haberent, faciliorem sibi *sacramentorum* administrationem futuram. Quibus ex rebus

bus maximæ utilitates in Tunquinenſem Eccleſiam manarunt. Diuturnis præterea precibus colere divinum numen, ſibiſque propitium reddere ſtudebat. Deiparam Virginem ſingulari ſecundum Deum veneratione proſequebatur; cui rem gratam facturum id precum genus, quod *Rosarium* dicimus, adhibebat. Magno item in quoſque homines amore ferebatur. Si quorum rem eſſe afflictam familiarem cognorat, eorum, quibus poterat largitionibus, inopiam levabat. Comiter quoſque, benigneſque non alloqui modo, ſed etiam excipere conſueverat. Quin etiam tam demiffe, tamque de ſe humiliter ſentiebat, ut omnibus ſeſe deteriorem eſſe arbitraretur, & ſiquid feciſſet, quod alteri minus placuiſſe exiſtimaret, eum cumprimis poſſet, adiret, ſibiſque ut ignoſceret, obſecraret. Quæ hominis virtutes tam erant conſpicuæ, ut non Dominicanis ſolum, ſed etiam aliis compertæ, cognitæque eſſent. Hilarius ab Jeſu Auguſtinianus Coricenſis Epiſcopus, Apoſtolicusque in Tunquino Vicarius earum ſeſe teſtem fuiſſe oculatum ſcribit.

IV. Cum ita inſtituti, comparatiſque animis Leziniana, Giliuſque eſſent, operamque augendæ, confirmandæque Tunquinenſi Eccleſiæ diligentem darent, Gilius, qui Luc-Thuyenſes creditos curæ Dominicanorum noſtris eſſe ſacris

Franciſcus Gilius in ethnicoꝝ poteſtatem venit, deque eo liberando Chriſtiani fruſtra laborant. Itaque ad regē

deducitur, &
in morbum
gravissimum
incidit.

initiatos cognorat, a quibus propterea nihil mali esse metuendum arbitrabatur, Luc-Thuyun contendit. Ibi cum aliquamdiu degisset, an. MDCCXXVII. III. non sextiles, quo die propter continuationem imbrium, vinque vehementem ventorum ne suspicari quidem poterat se in hostium potestatem venturum, cum summo mane rem divinam fecisset, nunciatum ipsi ab amicis fuit magnam ethnicorum multitudinem noctu in oppidum venisse, duceque sacrificulo Thaytincho obsedisse domum, nequa spes evadendi, fugaque salutem petendi esset. Id ubi Gilius intellexit, S. Josepho, quem magnopere venerabatur, se, remque christianorum publicam commendavit, moxque nullo trepidationis signo dato, impavide apertis cubiculi foribus, sese in deditionem hostibus permisit. Igitur milites continuo in eum impetum fecerunt, captumque, ligatis retro ad tergum manibus, ad proximam fluminis ripam adduxerunt, jusseruntque, ut navim, quam ejus causa parassent, conscenderet. Venerat una Thaytinchus, de quo supra demonstratum est, quem etsi ante Gilius numquam viderat, tamen ut conspexit, eum esse judicavit, quem nostri hostem esse acerrimum christianorum ferrent. Interea cum Franciscum ethnici in navim inductum arctius constringi, custodirique cu-

curassent, virum unum, mulieresque christianas duas comprehensas, vinctasque eodem deduxerant. Noster, qui aliorum neminem quidquam adversi perferre pateretur, sacrificulum obsecravit, quoniam satis ipse esset, de quo ethnici supplicium fumerent, ceteros ut liberos abire fineret. Thaytinchus, qui capto Francisco, magni se quidquam consecutum existimabat, facile, quod Gilius petebat, concessit. Eodem fere tempore milites Francisci domum, proximasque ædes christianorum diripuerunt. Post cum inde solvissent, quæsitum ex nostro fuit, sibi ne quidquam metueret. Ille, qui non modo Christi causa omnia perpeti haud ægre ferret, sed etiam cuperet, non quæ sibi, sed quæ christianis Tunquinesibus impenderent, damna sese metuere respondit. Erat Thaytincho in animo non ad regem, ita ut leges Tunquensium postulant, Gilium ducere, sed domi detinere, propterea quod extorquere sese ab nostris auri copiam posse confideret. Itaque, ut eum in suas ædes adduci fecit, christianis significavit, si salvum habere Gilium vellent, auri summam, quam ipse imperasset, darent. Negarunt nostri tantas sibi esse opes, quibus avaritiæ sacrificuli satisfacerent. Optare quidem se, ut sibi, quem Patris loco haberent, restitueretur. Quare si ea mediocri, quam ipsi of-

offerrent, pecunia contentus Thaytinchus esset, curaturos se, eidem ut continuo numeraretur. Sin minus, hoc se miserabiliores esse, quod propter facultatum, reique familiaris inopiam consequi, quod cuperent, non possent. Cum ne his quidem pollicitationibus quidquam profecissent, artibus primum, tum vi hominem liberare constituerunt. Sed experiundo cognorunt industriam, artes, vimque ipsam adversus hostem & potentem, & cautum, nihil valere. Itaque communi christiano-
rum sententia delecti fuerunt, qui Pro-Præfectum provinciæ virum ethnicum, adirent, eique significarent, quæ ab Thaytinchus gesta adversus Giliū improbe fuissent. Quum hi, quod sibi mandatum fuerat, fecissent, promississentque, si restitutus ipsis Franciscus esset, sese illi certam pecuniæ summam daturus, Pro-Præfectus cum armato milite in domum sacrificuli, resistentibus licet ethnicis, irrupit, captumque Giliū navi imponi, atque in suas ædes deferri imperavit. Servus erat Thaytinchus perversissimis moribus, qui ita, ut herus, nostris rebus adversabatur. Is ut quid noster responsurus esset, si ex eo iudices de rebus quibusdam quælisent, cognosceret, & ad herum, ita, ut convenerat, referret, habere se aliquando ab Senatu ad Giliū mandata simulavit. Hunc item Pro-Præfectus capi,

pi, inque carcerem contrudi iussit, quasi nostri adiutor, auctorque turbarum esset. Ubi Gilius magnum numerum christianorum eo quasi ad spectaculum concurrisse vidit, opera id esse illorum factum existimavit, ut sibi libertas ad suos redeundi daretur. Interea sacrificulus, qui spe quidquam a nostris extorquendi exciderat, cum vehementer sibi metuere coepisset, ne reus, quod leges patrias violasset, ageretur, rerum omnium, ut acciderant, certio rem summum magistratum fecit, ac non Luc-Thuyenses, finitimosque christianos solum, sed etiam Pro-Præfectum provinciae accusavit, quasi villata, abstulisset lucri causa hominem, quem ipse regi transfere constituerat. Pro-Præfectus, quamvis ante nostris promiserat acturum sese, ut ad eos Gilius liber proficisceretur, his tamen rebus perterrefactus non modo promissis standum non putavit, verum etiam navi positum Gilium ad regem detulit, reumque sacrificulum egit, ac si christianis partibus studeret, & Franciscum aluisset domi. Eo in itinere, quod ad dies omnino decem productum fuit, cum Gilius febris conflictaretur, vixque propter æstum quidquam gustaret, commovit in se uxorum, concubinarumque Pro-Præfecti misericordiam. Hæ suscepta hominis cura, ex ipso ante, quod sibi afferri obsonium vel-

vellet, quærebant. Itaque prandium, ut ille se velle dixerat, parabant. Nihilofecius cum plus cibi sumere, quam prius consueffet, nequiret, tum aucta febris sic est, ut interdum sensu rerum destituere-
tur. Hæc ille incommoda tanta constan-
tia, alacritateque animi ferebat, ut post
ad amicos scriberet incidisse in eum mor-
bum divina voluntate sese, ut nonnihil
perpetiretur, propterea quod adversis re-
bus, quibus pressus hætenus fuerat, ne
perturbatus quidem fuisset.

Gilius febrī,
& stomacho
vehementē la-
borans custo-
dibus carce-
rum transdi-
tur, ut in
vincula con-
jiciatur.

V. Jam dimotus vi febris a sensu Gilii
animus erat cum ethnici ad principem re-
gni urbem navim appulerunt. Hoc statu
cum esset, jussu magistratus transditus
custodibus carceris est, quo nullum esse
diriorem apud Tunquineses ferunt. Cu-
stodes cum ita vexari, urgerique homi-
nem vidissent, ut brevi interitum ar-
bitrarentur, conjiciendum in vincula non
putarunt. Itaque in atrio, sub excubito-
rum lecto, nuda humo stratum relique-
runt. Quo in loco post etiam, quam est
ipsi usus sensuum restitutus, ut sine stragulo
jaceret, quamdiu apud eos mansit, com-
pulerunt. Interea Gilius vehementer sto-
macho laborabat, omnique fere cibo sese
abstinere cogeatur. Quare quidquid illi
cibariorum a secunda præfecti carcerum
uxore parabatur, id ille pene totum Thay-
tinchī famulo, qui, ut supra demonstra-
tum

tum est, quasi suam Gilio operam locasset, a Pro-Præfecto provinciæ ad Regem adductus, iisdem custodiis asservabatur, libenter dabat. Sed is famulus eodem, quo in carcerem detrusus est, anno subito morbo correptus periit.

VI. Paucis post diebus, quam Gilius in magistratus potestatem venit, qui præfectus iis carceribus erat, in quibus fortissimi viri e Societate Jesu, qui anno eodem MDCCXXXVII. religionis christianæ causa gladio percussi fuerant, constitissent, a senatu petiit, ut Franciscum quoque apud se collocari in custodia juberet. Usu namque temporum superiorum compererat, quantum inde lucri facturus esset. Nam christiani, modo alloqui suum institutum, ac magistrum possent, libenter numerare custodi pecuniam consueverant. Qua re intellecta prioris carceris custodes, cum is præfectus cautionem, conscriptionemque de erepto inde Gilio faceret, ne sine lucro vexasse hominem viderentur, detractis vestibus, quibus erat indutus, pene nudum præfecto in custodiam tradiderunt. Eductum milites ad arboris, quæ prope aberat, umbram deducunt. Rei novitate permoti viri, adolescentulique, eo spectandi causa concurrunt. Qui crucem magno apud nos in honore haberi, colique noverant, rati se molestiores homini futuros, arundines capiunt,

Ethnici exiguas cruces efficiunt, easque pedibus proterunt. Has Gilius dissolvit: mox in catenas conjicitur.

piunt, indeque cultro abscissis partibus, cruces efficiunt, quas in terram projectas pedibus proterunt. Noster, qui derideri se, contemnique non modo patiebatur, sed etiam gaudebat, ubi salutis generis humani signum ab hostibus conculcari animadvertit, angi vehementer animo, dolereque cœpit, secumque cogitans circumspexit, ullam ne reperire posset sacrilegos a maleficio deterrendi viam. Cum nulla reperiretur; suæ erga Christum Servatorem pietati satisfactorius, optimum factu esse iudicavit, si cruces colligeret, easque veneratus dissolveret. Id ubi aliquandiu non sine magno suo incommodo, & labore fecit, gravi namque ægritudine corporis tenebatur, a satellitibus duobus in præsidis ædes, quæ prope ab altero carcere distabant, transfertur, humique, propterea quod alienatus a sensibus esset, deponitur. Postquam ethnici uti rursus hominem sensuum facultate intellexerunt, inde ereptum in carcerem adducunt, & in catenas conjiciunt. His ille catenis ad diem usque, quo martyrium obiit, vinctus fuit.

Gilius summa ægritudine oppressus a Tunquinenſi ſacerdote prænitentiæ Sacramento ex-
piatur: paulo-
loque poſt cō-
valeſcit.

VII. Cum æger in carcere ſine ulla medicorum ope maneret, eſſentque permulti, qui ob diuturnitatem morbi brevi deceſſurum arbitrarentur, miſertus viri Vincentius Ngagius Tunquinenſis ſacerdos, cuſtodes convenit. Is cum myſte-

steriorum christianæ religionis virtute humanis animis medicinam faceret, rogavit, ut si fieri eorum voluntate posset, sibi, qui medicus esset, ingredi curatum Giliū liceret. Ea re impetrata, ad ægrum continuo introivit, atque, ut ex eo, siquid umquam peccasset, cognovit, eundem *Sacramento pœnitentiæ* expiavit ritu catholicorum. Vix dies pauci intercesserant, cum insperato, sola mutatione aquæ, febris decessit, Gilioque ita sunt restitutæ vires, ut deinceps optime valeret.

VIII. Christiani, cum primum coniectum in vincula Giliū accepissent, viginti nummos argenti custodibus dederunt, ut sævos, pecuniæque cupidos homines delinirent, eoque adducerent, ut curaturos se, ne quisquam illi molestus esset, neve iis, qui cibum afferrent, in in carcerem aditum clauderent, pollicerentur. Sed hi, pecunia dissipata, promissis minime steterunt. Itaque virum sæpe injuriis, contumeliisque infectari, crebrisque incommodis premere, ut eum, quod poscerent, argentum a christianis postulare cogerent. Quod si quandoque se petiturum negabat, nequis christiano- rum ad ipsum adiret, neque cibum importaret, impediabant. Quare mulier christiana, quæ illius initio curam susceperat, ut quæ cognita præfecto custodum esset,

Mulieres duæ
Gili curam
gerunt eum-
que e carceri-
bus in suas æ-
des recipiūt,
atque ad eum
tuto christia-
ni adeunt.

set, veritate, quod ipsi minabantur, infortunium ferre misera cogeretur, incoeptis desistendum existimavit, postque mensam anum deditam olim superstitionibus deorum, quæ in ædibus adjunctis carceri habitabat, majorem in modum obsecravit, ut id sibi negotium fumeret. Erat enim christianæ mulieri exploratum, anum ipsam victum viris illis quatuor e Societate Jesu, de quibus antea diximus, ministrasse, inductamque crebris eorum cohortationibus fuisse, ut christianam se aliquando fore promitteret; sed nondum initiari mysteriis nostris potuisse, quod magistri, qui eam plene de religionis decretis docerent, defuissent. Quamobrem sperabat, illius operam, quæ irrideri se se, quod nostris partibus studeret, contemni que ab altera anu, quæ simulacris cultum adhibebat, unaque erat continenter domi, æquo animo pateretur, Gilio maxime utilem futuram. Atque rei quidem exitus secundior, quam christiana mulier providisset, fuit. Non enim ea tantum, quæ nobis assentiebatur, sed anus etiam superstitiosa Gilii curam suscepit, atque a præfecto carcerum aliquanto post tempore impetravit, ut Francisco in ipsarum ædes veniendi, ibique aliquamdiu consistendi potestas esset. Id vero percommode accidisse christianis videbatur, propterea quod tutos, facilesque ad Giliū adi-

aditus haberent . Nam ante , etſi viſere hominem , atque alloqui in carcere poterant , metuebant tamen , ne , ſi una diu , ac libere egiffent , in fortunarum , vitæque periculum venirent .

IX. Interea cum Gilius in iudicium vocaretur , proſpiceretque fore , ut ex ſe iudices de Thaytincho ſacrificulo (quem a Pro-Præfecto provinciæ , quæ ad meridiem vergit , ac ſi fautor , adjutorque chriſtianorum eſſet , & Gilium occultafſet domi , apud ſenatum fuiſſe accuſatum , reumque actum , oſtendimus) quærerent , ſecum ipſe cogitare , deliberareque cœpit , quibus reſponſis interrogantibus ſatisfaceret . Verebatur enim , ne , ſi Luc-Thuy captum a ſacrificulo ſe fuiſſe diceret , detrimento chriſtianis eſſet ; ſin autem a Pro-Præfecto in Thaytinchæ ædibus re-
pertum , is ſacrificulus infortunium infelix ferret . At grave utrumque videbatur , propterea quod neque amicis , præſertim quos ipſe inſtituiſſet , vehementerque diligeret , nocendum , neque inimico par pari referendum ſciret . Veniebat illi in mentem perſpicue palam eſſe , quod comprehenſus ipſe Luc-Thuy , quod navimpoſitus , quod vinctus inſidiis Thaytinchæ eſſet . Sed cum animadverteret nihil horum ſacrificulo prodeſſe in iudicio poſſe , quod omnes Pro-Præfecti cauſſam tuerentur , conſtaretque neminem , qui

Gilius quid
magiſtratibus
interroganti-
bus reſpōdē-
dum ſit ſe-
cū deliberat :
chriſtianorū-
que rationem
imprimis eſſe
habendā ſta-
tuit .

contra christianos testimonium diceret, futurum, quo primum in loco captus fuisset, enunciandum non arbitrabatur. Contra nonnullæ res hominem hortabantur, quare se a Pro-Præfecto in sacrificuli domo inventum fuisse confirmaret. Nam confessus id quidem Thaytinus erat. Quapropter, quod is detrimentum cepisset, hoc non esse vitio tribuendum sibi, qui nulla sua culpa in iudicium accessisset, prospiceretque, si de rebus, quæ sibi ante acciderant, locutus esset, magnum se damnum christianis Luc-thuyensibus allaturum. Succurrebat præterea ludi a se eam disceptationem tacendo posse. Non enim quæsituros de religione iudices, pro qua sibi non modo publice respondere, sed etiam vitam profundere certum esset. Hæc diu secum cogitanti commodissimum visum est, captum se a Pro-Præfecto in ædibus Thaytini dicere, non quo huic succensendum, sed quo christianis consulendum existimaret. Nam cum imperatum ei a Pro-Præfecto provinciæ Tunquinsium Dominicanorum esset, ut commentarios rerum a se gestarum conficeret, de Thaytino in hanc sententiam scripsit. Displicere vehementer sibi detrimenta, quæ illius hominis improbitate christiani caperent; sed cum manicas, compedes, carceresque, in quos se conjectum videbat, contemplaretur,

ex

extorqueri a se non posse, quin plurimum ei se debere confiteretur. Itaque, si quidem suppeterent, nummos se ipsi fuisse argenteos philippeos tria millia numeraturum.

X. Cum ventum in prætorium esset, viri, puerique Giliū circumstant, lignaque ita, ut supra demonstratum est, in crucis figuram componunt, quæ ubi conculcarunt, ei ante pedes projiciunt. His magno cum labore collectis, solutisque crucibus, ad senatum ingredi cogitur. Erant in iudicio Thaytinchus, Luc-Thuyensesque christiani tres de loco, ubi captus Europæus fuerat, disceptantes. Quæritur ex Gilio, ecquis horum ipsum recepisset domum. Is christianos digito demonstrans id, quod verum erat, testatus, apud hos umquam se divertisse negat. Tum sacrificulum indicans, cum hoc, inquit, mansi aliquamdiu domi. Hac re intellecta iudex, qui propensior in nostros erat, Thaytinchum, christianosque dimittit, Giliū retinet. Scribæ, ut attendat, quæquæ dicantur, in tabulas referat, jubet. Inde nostram, quo ex regno sit, quo tempore in Tunquinum pervenerit, in quem primum hominem adventans inciderit, rogat. Monet, ut de locis, in quibus fuisset, ex quo tempore in id regnum venit, confiteatur, quo die, quibus in ædibus, a quo tandem viro captus, adductusque in ju-

Gilius in iudicium adductus, interrogatusque de singulis rebus respondet.

dicium fuerit , exponat . Ne se celet , quamdiu ea in domo manserit , quid rerum ibidem gesserit , & an cuiquam explicarit christianorum legem . Ad hæc Gilius breviter respondit . Ortum esse in Hispania se , biennio ante , quam adductus in iudicium fuisset , pervenisse in Tunquinsium ditionem . Nomen se viri , in quem primum adveniens incurisset , memoria non tenere . Nam de locis quod iudex percuntaretur , sciret , nullas sibi stabiles in eo regno sedes fuisse . Id a se tempus , sui que instituti rationem postulavisse , ut modo hac , modo illac incertis locis , ac sedibus vagaretur . Captum se Pro-Præfecti jussu fuisse in sacrificuli Thaytinchii domo , decimo fere post die , quam eo se contulisset . Ne putaret iudex , cuiquam iis in ædibus explicatam ab se fuisse christianorum legem . In eas namque se alterius rei causa venisse . His rebus scriba suo arbitrato per plures alias adversus Thaytinchum adjunxit , inque tabulas retulit . Quibus compertis Gilius moleste tulit , propterea quod nemini invidiam conflare pateretur .

Rursus ad
quæstionem
ducitur ; di-
missoque , at-
que in carce-
res redeunti
pueri cruce
proterentes
molestiam ex-
hibent .

XI. Postridie ejus diei iudex Gilium ad senatum reduci imperavit . Cum is locus , in quo haberi senatus solet , longe ab carcere abesset , ac æstate anni tempore gravissimo tam magni calores essent , vix ut ferri posse viderentur , Gilius-

liusque vehementer ex pedibus laboraret, quod rigore, ac pondere catenarum discissi fuissent die superiore, tanta molestia, tamque acerbo animi sensu afficiebatur, ut non modo non incedere, sed ne insistere quidem posset. Nihilo secius imperata milites fecerunt, abductoque Gilio, cum ad parentum, avorumque regis templum, qua itur ad senatum, venissent, ei, ut pileum honoris causa deponeret, iusserunt. Sed in eum, qui respondisset, se numquam, quod dicerent, facturum, ob eamque rem, quasi moribus incultus, rusticusque esset, contemneretur, nihil est crudeliter imperatum. Ubi perventum ad senatum est, iudices feriis Tunquinen-sibus fas sibi esse quæstionem instituere negaverunt. Itaque continuo Giliū dimiserunt, militibusque, ut eum in carcerem reducerent, mandarunt. Redeuntem cum milites ad cauponam, quo ingressi bibendi vini causa fuerant, consistere coëgissent, magna puerorum multitudo circumstitit, factisque crucibus, inque terram projectis, & conculcatis, indignis modis ludificatur. Nam quod ille injuriam salutis generis humani signo fieri videret, vehementi dolore cruciabatur. Itaque, cum memoria, quæ sibi ante evenerant, teneret, ratus, si colligere, venerari, dissolvereque cruces, ita ut fecerat, coepisset, multitudinem

310 DE MARTYR. TUNQUIN.

nullum earum conficiendarum, conculcandarumque finem facturam, convertere aliorum oculos, remque dissimulare, quasi non cerneret, decrevit. Id ut unus aliquis ex eorum puerorum turba animadvertit, ridens, ludensque occlamitare, salvum esse oportere Giliam, ut qui christianus esse desiisset. Noster, qui ne joco quidem hæc de se dictitari ferret, ludere puerum respondit, adstantesque mendacio fallere conari. Inde, nequis rem aliorum, atque ipse fecisset, acciperet, inclinare se rursus, cruceque colligere, venerari, atque dissolvere, idque jam lætus, alacrisque facere incoepit, quod se Christi causa vel a pueris ludibrio haberi cerneret.

Pueri Gilio
molesti esse
pergunt.

XII. Ad hunc modum, quocumque tandem accessisset, magnus semper populi concursus fiebat, & arundinum partes, festuæque ad crucis figuram a pueris componebantur. Imagines etiam, quæ hominem cruci affixam exhiberent, proferebantur, quæ filo longis arundinibus alligatæ, ita ut a piscatoribus hami solent, illius manibus, pedibusve applicabantur. Quindecim interdum, aut viginti eodem temporis momento eidem cruces ante pedes projiciebantur, iisque nondum omnibus collectis, solutisque, aliæ conficiabantur, protereabantur, eique in faciem adjiciebantur. Inventi præterea quandoque

que fuerunt, qui cruces in viam, qua eundem ipsi in aliquem locum esset, abjicerent, ut eum, si forte remorari gradum, vel conturbari vidissent, ludificarentur. His turbis, clamoribusque permoti tabernarii, opificesque, ne ad officinas ipsorum accederet, curabant. Prospiciebant enim, quamdiu ibidem constitisset, ob tumultum, qui tum oriri solet, neminem ad fores, qui merces emeret, venturum. Quod si, qui vinctum ducebant, milites in domum aliquam aut bibendi, aut alius rei gerendæ causa divertissent, a patrefamilias redarguebantur, propterea quod ausi ad sese ingredi cum eo fuissent, quem ob flagitia esse capitis condemnandum scirent. Quamobrem cum Gilius de se ad Pro-Præfectum Tunquinensium Dominicanorum scriberet, si ea, inquit, virtute valerem, qua Patrem nostrum sanctum Dominicum præstitisse constat, equidem hoc genus ludibriorum, non pacato animo solum, sed etiam alacri tulissem. Sed cum noverim ipse me, fateor aliquando subiratum flabello pueros deteruisse, ne mihi esse molesti pergerent. Hi vero, muscarum instar, quo plus abigebantur, eo importuniores erant.

XIII. Interea, etsi gravissimum Gilio erat, sese non religionis, sed privatæ Thaytinchî controversiæ causa tam sæpe

Mulieres
Gilio officia
præstant; ei-
que ut apud
eas cibum su-

mere liceat,
impetratur.
Gilius ab
Episcopo Co-
ricensi admi-
nistrandorum
sacrorum fa-
cultatem ob-
tinet : atque
ab Cœmanen-
si Episcopo
olea sancta,
librumque ri-
tuale acci-
pit.

in iudicium vocari, tamen, quod vix
quidquam requietis caperet, quod sæpe
dimissus, quin audiretur, quod catenis
vinctus in carcerem a militibus trahere-
tur, quibus militibus, nisi pecuniam,
mercedis nomine dedisset, sese vestibus
iplis spoliatum iri providebat, quod
denique tot injurias, contumeliasque ac-
ciperet, incredibili gaudio cumulabatur.
Atque his tot malis, cum eis frequentes
itus, reditusque e carcere ad senatum
essent, ac summo æstatis tempore calore
pene conficeretur, repentinus furarum
tumor, quæ plenæ pustularum erant,
scabiesque accesserat. Quæ res tantum
doloris homini afferebant, ut dies quin-
decim ne lento quidem gradu incedere
valeret. Anus, de quibus supra demon-
stratum est, quod eum tam gravi morbo
conflictari, esseque mortalium neminem
viderent, qui laborantem ægritudine le-
vare vellet, illius misericordia commo-
tæ, ut ei esse aliquantum virium resti-
tutum intellexerunt, custodes adeunt,
rogantque etiam, atque etiam, ut eidem
e carcere exeundi, inque ipsarum ædes
veniundi faciant potestatem. Nam sic
illis recipiunt; ubi medicamentis curata
vulnera pedum essent, eum statim in
carcerem rediturum. Ea re a custodibus
permessa, facile sibi anus persuaserunt,
fieri quoque eorum voluntate posse, ut
ad

ad earum domum Gilio prandendi, cœnandique etiam causa accedere liceret. Igitur opportunitatem temporis secutæ rem obtinent. Cum omnia sibi accidisse secunda perspicerent, sperarentque fore, ut precibus, muneribusque adducti custodes diem totum domi ab Gilio duci paterentur, quod quidem nosset christianis, qui una manere, & colloqui cuperent, non gratum modo, sed jucundum etiam futurum, non ante conatu desistendum arbitrantur, quam ad suam voluntatem custodes flectant. His ita, ut providerant, superatis, atque in suam sententiam inductis, hospitio mulieres virum recipiunt. Qua re intellecta, christiani frequentes ad eum concurrere cœperunt. In his sacerdotes quidam Tunquinenfes erant, quibus, siquid unquam peccarat, dixit, ab eisque petiit, ut sibi, Dei nomine, cujus essent ministri, veniam dare ne gravarentur. Interea litteras ad Coricensem Episcopum in hanc sententiam scripsit. Quoniam non minus id ipse contenderet, ac laboraret, ne, qui nostram religionem profitebantur, quidquam detrimenti caperent, quam ut ethnici Christo Servatori conciliarentur; petere quidem se, ut sibi eos, qui sacrorum causa venissent, mysteriis initiandi, supplicesque expiandi jus esset. Erat tunc Coricensis Præsul

Vi-

Visitator, ut vocant, provinciæ, quæ ad occidentem solem spectat, qua in provincia urbs est regia Tunquinesium. Is, consilio Gilii probato, facultatem ei agendi, quod Paræco liceret, dedit. Quo tempore impetratum ab Episcopo Ceomanensi, qui provinciam *Pro-Vicarii* nomine regebat, fuit, ut ei quam celerrime posset, olea sancta, librumque *ritualem* mitteret. Sed eo anno *pœnitentiae sacramento* nonnullos, baptismo autem vix eidem perpaucos, qui in carcere extremo morbo premebantur, expiare fas fuit.

Gilius a custodibus vexatur; sed numerata pecunia ab his impetrat, ut ad mulierum ædes ire pergat. Mulierum alteram superstitionibus Deorum deditam ad sanitatē convertit. Ea sacris initiata paullo post moritur.

XIV. Anno MDCCXXXVIII. januarii mense, anni illius annamitici postrema luna, cum Gilius brevi se gladio percussum iri confideret, legati ab Sinis in metropolim Tunquini venerunt, qui nunciarent, eum, qui principatum in republica obtineret, fuisse ab Imperatore appellatum regem. Iudices, qui festos dies ejus rei gratia institutos funerali non oportere existimabant, sumendum alio tempore de reis supplicium duxerunt, quos capitis condemnaverant. Præterea nondum lata in Gilium sententia fuerat, quod Thaytinchus, christianique litigare pergerent, quibus contenditibus, nihil de illius capite statui posse videbatur. Nihilo fecius conjectus iterum in vincula, angustiis-
que

que carceris conclusus fuit, propterea quod custodibus statim, quod petierant aurum, non dedisset. Sed cum soluta pecunia eorum avaritiam explevisset, eique liberum permissum esset, ut, si vellet, mulierum, de quibus supra demonstratum est, frequentaret domum, repente exorta est importunæ anus nefaria superstitio, quæ primo annamitici anni die religionibus sese impediri diceret, quin aditum homini ad suas ædes dandum arbitraretur. Nam præsentem Gilio neque diis supplicare, neque parentibus, avisque ethnicorum more preces, honoresque adhibere se posse sperabat. Eam enim sæpe hortari Gilius consueverat, ut contemptis numinibus deorum, quorum inani cultu animi contaminarentur, Christum verum Deum, Servatoremque generis humani coleret. At mulier, etsi pergratum sibi esse agebat, quod ad se Gilius prima luce, antequam ipsa ad mercatum res suas venum proficisceretur, veniret; propterea quod aliquando egressa domo occurrisse eum sibi omnium primum, seque jam ea die magnum, divenditis mercibus, lucrum fecisse, aniliter animadvertisset; tamen nefas esse kalendis, quibus diebus sacrificabat, nostrum quemquam in suas ædes introduci putabat, monentique, ut christianis se daret in disciplinam, respondebat

316 DE MARTYR. TUNQUIN.

debat jocans , cum rex nostris legibus paruisset , tum se christianam continuo futuram . Sed mense martio , cum ille vehementibus , assiduisque doloribus pressus esset , numerataque pecunia , ab custodibus obtinuisset , ut dies , noctesque in anicularum domo commoraretur , mulierque superstitiosa lubens e suo cubiculo discedens , lectum ibi laboranti sterni curasset , factum beneficio Dei O. M. est , ut ea præmium suæ erga Giliū humanitatis caperet , cultumque negligeret deorum . Nam cum in gravem morbum paullo post incidisset , a quo neque medicamentis levare , neque liberari superstitionibus , quibus multis implicabatur , potuisset , in eam cogitationem venit , ut Gilio , cujus in se , mortalesque ceteros caritatem , singularemque virtutem pluribus exemplis , argumentisque cognitam habebat , obtemperaret . Deliberanti , cum visa noctu objicerentur , quæ ipsa ab hoste generis humani immitti judicaret , noster , cui se magnopere commendarat , fuis ad Deum precibus , opem tulit . Ea ubi placatissimam sibi quietem allatam sensit , sequi statim , quod cepisset consilium , ac sive infirma , sive integra valetudine esset , christianis sacris sese adstringere , decrevit . Itaque orare , atque obsecrare Deum , sibi ut adesset , implorare christiano-

stianorum fidem, ne se defererent, neve de Religionis decretis docere gravarentur, petere majorem in modum ab Gilio, ut salutem animi baptismo sibi impetrare vellet. Sed cum ille diem ex die duceret, rogatusque ab altera anu, ut flagitanti morigeraretur, nondum, satis maturuisse fructum dixisset, ea, ubi quæ de se Gilius sentiret, cognovit, tantum abfuit, ut apud fociam conquereretur, ut læta, atque alacris responderet, se, quamquam ad annos mille produxisset vitam, nunquam ab religione, quam unam esse veram compererat, discessuram. At cum continenter Giliū pulsare, urgereque pergeret, initiata demum mysterio baptismi est, postque mensem imbuta pœnitentiæ, extremæque unctionis sacris, ita decessit, ut conicere nostri possent, eam esse felicitatem, quam cuperet, consequutam. Anus altera, quam studere jam inde a multo tempore rebus nostris coepisse diximus, amissa focia, Giliū convenit, ei, quibus injuriis Christi, Gili ipsius, ceterorumque christianorum causa afflictā ab custodibus fuisset, narrat. Rogat, ne se tamdiu in Cathecumenis esse patiatur. Quamobrem muniat sibi baptismo ad cetera mysteria, atque ad sempiternam salutem viam. Noster, qui æquum ab se peti noverat, mulieri satisfecit.

Quæ

Quæ sic deinceps vitam instituit, ut multo alacrius, quam ante consuevisset, injurias, contumeliasque ferret.

Gilius capitis condemnatur. Interea sacris vestibus acceptis, sæpe rem divinam facit, & sacra hominibus ministrat.

XV. Eodem fere tempore Gilius Eucharistia ab Tunquinenſi ſacerdote munitus, biſque jam ad ſenatum adductus, dimiſſusque, quin audiretur, fuit. Poſt judices Gilium innocentem, atque inauditum rei capitalis, Thaytinchum vero ad elephantorum curam ob receptum Europæum ſacerdotem domum, damnarunt. Horum ſententias cum alii judices, ad quos ſacrificulus appellarat, probaſſent, eamque in Thaytinchii ipſius filium, quam pater ceperat, pœnam conſtituiſſent, Gilius, qui liberum ſibi ab cuſtodibus fieri videret morari, dum ſibi placuiſſet, remque divinam facere, ſi vellet, domi, ad Pro-Præfectum provinciæ Tunquinenſium Dominicanorum ſcripſit, ut veſtes ad ſe ſacras, quam celerrime poſſet, mitteret. Nam antea, quod nondum inter eum, cuſtodesque de pecunia conventum eſſet, ſpem omnem e carcere exeundi, quoties ſibi viſum opportunum eſſet, abjecerat, niſi ſtatim, quod illi peterent, argentum, cumque peterent, numeraiſſet. Sed pacto pretio (nam præter ſummam, quam fidei juffori dabat, qui ſuo periculo Præfecto carcerum ſuaſiſſet, numquam Gilium fugam arrepturum, cuſto-

custodibus se argenti nummos duodecim, daturum promiserat), tum demum fas sibi esse existimavit de sacris vestibus cogitare, curareque, ut ad se commodum deferrentur. His partis vestibus, ad diem iv. idus octobr., qui dies dominicus eo anno erat, primum sacrum fecit. Sed impetrare non potuit, ut sibi quaque die idipsum facere liceret. Custodes enim, qui modo cupiditatem explerent suam, pacta, conventaque nihili penderent, sæpe homini, ne in ea pernoctaret domo, interdicebant. Nihilo secius quadringentas hoc ipso anno *confessiones*, ut dicimus, audivit, paucosque in carcere, qui brevi interituri videbantur, rituque christianorum expiari peterent, baptismi sacris initiavit.

XVI. Postrema annamitici anni luna, qui annus fuit MDCCXXXIX. januario mense, quo tempore apud Tunquineses rei capitis plecti solent, cautum a custodibus est, ne, cum de ceteris supplicium sumeretur, educere quisquam e carcere Giliū auderet. Nam etsi decretum, ut is etiam necaretur, erat; tamen, quod tertium ab Thaytincho appellatum esset, non ante in eum animadvertendum iudices putabant, quam dicta rursus, & cognita causa fuisset. Ergo cum Gilius summo suo dolore spe potiundi eo anno martyrii dejectus esset,

Custodes, ne Gilius e carceribus educatur, curant, eumque vexant: post, pecunia accepta, ut liberē cū christianis agat, concedunt.

esset, ad amicos, ut qui de se humili-
 ter, demisseque sentiret, factum sua
 culpa fuisse scripsit, propterea quod im-
 plicatus peccatis, inque Deum ingratus
 esset, superbeque, rebus tam secundis
 elatus, viveret, quo minus id boni,
 quod vehementer optarat, consequere-
 tur. Extremo annamitico anno cum cu-
 stodes ab eo pecuniam postulassent, qua
 comparare sibi res possent, quibus ethni-
 ci ad sacrificia uterentur, ipseque se
 eam ob causam daturum negasset, tam
 arcte custodiis constrictus, totque con-
 tumeliis vexatus fuit, ut ei neque exce-
 dendi e carcere, neque respirandi pote-
 stas esset. Sed ubi nocentissimi viri nihil
 ab se agi animadverterunt, finem esse
 faciundum injuriarum, circumspicien-
 dumque duxerunt, aliamne ullam inire
 possent, qua argentum ab eo extorque-
 rent, viam. Itaque impendi eam ad
 usus oportere dixerunt, in quibus nihil
 esset, quod nefas, minusque honestum
 videretur. His ut nostri satisfecerunt,
 permissum Gilio est, ut primis anni die-
 bus quatuor in domo aniculæ maneret,
 mysteriisque christi anorum præsidio mor-
 talibus, ac saluti esset. Inde cum nun-
 ciatum fuisset, si duodecim, quos custo-
 dibus dabat, quoque mense nummos re-
 gales argenteos quatuor addidisset, ne-
 minem posthac, qui ipsi negotium exhi-
 beret

beret, futurum, paullum ut secum quid statuto esset opus cogitavit, custodes adiit, pactaque pecunia impetravit, ut sibi deinceps, quocumque in loco visum esset, versari, cumque christianis de summis religionis rebus agere liceret.

XVII. Interim dies dictionis causæ constituitur. xiiii. kal. sextiles iudices Giliū ad se adduci, ut de loco, in quo captus erat, fateatur, jubent. Jam ille secum constituerat, se ne verbum quidem, si de ea re iudices quæsisset, dicturum. Nam quod anno superiore interrogantibus respondisset, quodque suis responsis adjuncta quædam mala fide ab scriba fuisse intellexisset, acerbè tulerat. Cum enim ipse distincte, aperteque affirmasset, dies fere decem, hoc ille veterator sic immutavit, ut annos duos Giliū apud Thaytinchum latuisse scriberet. Jam in atrium Gilius venerat, cum concursus est iterum puerorum factus, qui cruces, ut supra est demonstratum, efficerent, pedibusque, eo inspectante, protererent. Qua re animadversa unus iudicum irrisurus hominem, bacillos duos ad figuram crucis composuit, eique ante pedes projecit. Sed Gilius acceptam crucem veneratus, solvit, ac iudici bacillos restituit. Qui iudex, cum inter Thaytinchum, christianosque, qui inter se contenderent, me-

Gilius in iudicium adducitur; deque multis rebus interrogatus, pauca respondet; de reliquis rebus nihil se umquā dicturū confirmat. Itaque ei iudices cruciatus minantur.

dium poni Giliū jussisset, tum hunc intuens, ex te, inquit, peto, qui vocere, ubi ante versatus sis, quam in sacrificuli domum venisses, atque unde te illuc contuleris? Eloquere; nam si taceris, scito te verberibus cædendum. Quid autem impedit, quin explices, quæ enunciaras anno superiore? Atque sic habeto: hoc te esse tacendo confecuturum, ut, qui adsunt, & mendacem te ipsum, & falsam esse, quam colis, religionem, jure arbitrentur. Ad hæc Gilius: est, inquit, mihi Franciscus nomen. Annus est, ex quo in Tunquensium ditionem perveni, quartus; quorum priores duos in promulganda christianorum lege, reliquos in carcere contrivi. Cetera ne roga: mihi quidem, certum est tacere. Nam, si de religione percuntere, intelliges, non esse in vitio hominem, qui se christianum profiteatur. Quod si de loco, ubi captus, vinculusque fueram, dixi anno superiore, de susceptis etiam a me enunciandi Evangelii causâ itineribus palam dixi. Quare non est opus, ut esse rursus dicendum putem. Quod ais, si taceam, quæ nulla causâ, ut efferam, impellit, fore aliquos, qui & mendacem me, & falsam esse christianorum legem existiment, inane est. Quæ namque sit inter hæc colligatio, ne suspicari quidem possum.

Ac

Ac veram esse, quam colo, religionem, tam certum est, ut oratione non egeat. De mendacio quod subdis, nihil moror, cum evinci a nemine, nisi calumniando, posse videatur. Hac oratione audita, Thaytinchus nostri defensionem suscepit, revocatisque in memoriam rebus, quæ dictæ diu ante ab eo in judicio fuerant, obtestatus judicem est, ne se Giliū, umquam mendacio implicasse arbitraretur. Sed Gilius, stulte, inquit, me, cum ita loquerer, fecisse, & agnosco, & fateor. Nam qui interrogabant, ita erant animis comparati, ut per summam injuriam, qui me aluisset, puniendum, qui vero comprehendisset, atque in vincula conjici imperasset, præmiis donandum judicarent. Ægre cum hæc, graviterque tulisset judex, quæsit, num, si eum percuti gladio jussisset, id ille judicaret injurium, & contra rationem futurum? Ad quæ Gilius, dubiumne est? inquit. Ego vero, si cædi me jufferis, non æquo animo solum, sed etiam lubens patiar. At judex, si vera est religio christianorum, inquit, quæ tanta est illorum improbitas, ut apud nostrum aliquem accusati, innocentes, impositis falsis criminibus, calumnia perdere contentur? Tum Gilius, quos mihi, inquit, christianos narras? his moribus siqui sunt, ii certe divinam non ita observant,

vant, ut debent, legem. Placuit hæc
 omnibus, qui in iudicio aderant, Man-
 darinis responsio. Quamobrem inter se
 collocti, eam, quasi plausum dare vel-
 lent, usurparunt. Interea iudex Thay-
 tinchum, christianosque adstantes de-
 monstrans, horum esse necem, vitamque
 in Gilii potestate, confirmat. Itaque
 hominem, ut verum eloquatur, monet,
 ne quem innocentem, tacendo, condem-
 nari cogat. Quod si molestus tam diu-
 turno silentio iudicibus pergat esse, mi-
 natur, militibus sese, ictibus malleorum
 ei ut ossa confringant, imperaturum.
 Sed Gilius nullam esse causam respon-
 det, cur hi plectantur, qui christianos
 sacerdotes alere solerent. Quamobrem
 esse utrisque parcendum. Nam ab se
 frustra de loco, in quo captus fuerat,
 inquire. Nihil sibi metus afferre, quæ
 iudex de ictibus malleorum, ossifragio-
 que comminaretur. Id si accidat, non grave
 sibi, sed pergratum, ac jucundum sine dubio
 futurum. His acceptis responsis, iudex cru-
 cem a militibus in terra delineari, quam
 contendentes Thaytinchus, christiani-
 que conculcarent, iussit. Cumque Thay-
 tinchus multas sese in carcerem iconas
 a militibus, dum est comprehensus Gi-
 lius, illatas vidisse, quas nostri venera-
 rentur, dixisset, hasque afferri, ut ab se,
 ceterisque protererentur, postulasset, ju-
 dex

dex in posterum diem rem esse differendam sanxit, minatusque verbera, nisi de rebus, quas scire senatus vellet, confessus esset, Giliū dimisit.

XVIII. His gestis rebus, Præfectus carcerum defessum se ambulando esse affirmavit. Itaque se causa laboris, quem ob adductum in iudicium, reductumque in custodiam Giliū sustinuisset, sex regales argenteos nummos poscere. Custodes, qui ad se quatuor reliquos perventuros sperabant, auctores Gilio fuerunt, ne plus ei duobus daret. Quorum cum noster consilium sequutus esset, iram in se præfecti concitavit, qui statim, ut in carcerem conderetur, iussit. Post in mulierem, quæ prandium attulerat, commotus, eam, si rediisset, comprehendi, atque extemplo vinciri imperavit. Eare anus perterrefacta neque vespere vincito coenam, neque postridie ejus diei quidquam ciborum afferre potuit. Jam præfectus Giliū crassis compedibus constringi præceperat, neque mortalium quicumque reperiebatur, qui ei auxilio esse auderet, cum factum divina providentia est, ut ethnica mulier eorum, qui inclusi custodiis essent, miserta ad carceres veniret, eisquem oryzam coctam, melongenasque salitas distribueret, indeque etiam Gilio partem daret. Quo tempore altera item ethnica mulier eidem fructus quosdam il-

Præfectus carcerum Giliū in carcerem condē imperat atque ne anus eum adeat, cavet. Ethnicæ mulieres duæ homini cibū afferunt.

lius generis obtulit, quos *plantanos* Tunquinenfes vocant. Interim qui Gilii curam fufceperat, cum refciviffet quam multis ille, quamque gravibus incommodis premeretur, fe fe tot nummum argenteorum præfecto, quot initio petiiffet, daturum promiffit, modo folvi hominem, liberumque interdum e carcere prodire pateretur. Præfectus accepta pecunia, nihilo fecius in nervo dies tres Giliū detineri juffit. Sed is, qui unde hæc tanta crudelitas extitiffet ne conjectura quidem aflequi poterat, urgerique fe tot ærumnis propterea quod tacuiffet, arbitrabatur, quæcumque acciderent adverfa, hilari animo ferenda judicabat.

Judices Giliū, ut crucis imaginē proterat, fuadent. His Gilius pleraque dogmata christianorū proponit. Rurſus iconas percutere juffus negant fe faciūrum; ac Thaytinchū, ne eaſdē percutiat, impedire conatur.

XIX. xi. kal. ſextiles judex, cum arcas, quibus libri, iconesque continebantur, afferri, Giliūque ad ſe adduci imperaſſet, militesque imperata continuo feciſſent, arreptis bacillis quatuor, imagines crucis duas formavit, quas ingredienti martyri ante pedes per contumeliā inſultans projecit. Gilius, qui plane, quorſum hæc pertinebant, perſpiceret, cruces collegit, atque utramque, ut christianum hominem decebat, veneratus, unam ſolvit, alteram, ut ſibi certanti præſidio eſſet, retinuit. Poſt judex, ubi fruſtra de loco, rebusque ceteris, quæ trita omnibus judiciis fuerant, quæſivit, hortatus martyrem eſt, ut, quoniam tacere

cere constituerat, imaginem saltem crucis fuste percuteret. Cumque Gilius negasset, se se, quod inique præciperetur, facturum, extrahi iudex iconas ex arca, tres, quarum prior Christum cruci affixum, altera vero chartacea, tertiaque eburnea Deiparam Virginem exhibebat, fecit. His extractis Gilius, flexis genibus, honorem adhibuit. Ex eo rursum, cum de loco, in quo captus fuerat, quæsitum esset, iudex quæ sint ejus generis imagines, percuntatur. Gilius amplam occasionem explicandæ senatoribus religionis, doctrinæque christianorum nactus, iconem, quæ virum cruci affixum exhiberet, Christum Dei filium, qui sibi humanam naturam, communis hominum salutis causa assumferit, mortemque obierit, exhibere dicit. Nam duas reliquas Virginis illius iconas esse, quæ eundem peperit humani generis Servatorem. Hoc accepto responso iudex, quo se nostri post mortem transferendos putent, interrogat. Cui sacrilego multa inepte, impieque disputanti Gilius paucis satisfecit. Christianos, qui recte vitam instituerint, post mortem in cælum se migraturos, participesque sempiternæ felicitatis futuros sperare confirmat. Errare vehementer ethnicos, qui res quasque notionibus corporum metirentur. Non enim corporibus solum homines, sed etiam animis constare. Itaque

solutum corpore animum, qui concretus
 non est ex hac terrena, mortali que natura,
 si recte se gesserit, in cælum conscendere
 æternam felicitatem consequuturum. Sin
 male, in inferna detrudi loca perpetuis
 suppliciis cruciandum. Atque a Deo qui-
 dem hæc omnia christianos didicisse. Non
 fuisse ab se, cum hæc eadem hominibus
 dogmata traderet, auditum Deum. Tra-
 dita autem divinitus fuisse, tam esse cer-
 tum, ut qui dubitet, næ is maximo in er-
 rore versetur. His a Gilio [explicatis re-
 bus, cum iterum iudex quæsisset, quo il-
 le se abiturum post mortem confideret,
 eique noster iisdem, quibus ante, respon-
 sis satisfecisset, miles, cui id negotium
 datum fuerat, arrepto fuste, in medium
 processit. Ubi Gilius ad sese hominem ac-
 cedere vidit, ratus se ita, ut minatus ju-
 dex fuisset, crudeliter cædendum, para-
 vit sese, flexisque genibus ostendit ultra
 se pro religione, quæcumque iudices de-
 crevissent, laturum. Qua re animadver-
 sa, qui aderant, non eo consilio allatum
 fustem dixerunt, quo cædi eum a quoquam
 vellent, sed quo ipse iconas percuteret.
 Id ut ille audivit, cohorrui, acceptum-
 que continuo fustem, ab se, detestatus
 sacrilegum facinus, abiecit. Milites quod
 inceptis desistendum non putarent, chri-
 stiano, qui in iudicium cum Thaytincho
 accesserat, fuste, ut id faceret, quod no-
 ster
ster

ster recusasset, jusserunt. Cum is humi se prostravisset, demonstrassetque dicto se audientem non futurum, sacrificulus, ut innui sibi animadvertit, fustem arripuit. Jam cognoverat Gilius fore, ut is eburneam Mariæ Virginis iconem peteret. Itaque manibus Deiparæ, infantisque Jesu Christi capita contexit, monuitque sacrilegum, ut se potius, quam sacram imaginem feriret. Riserunt judices, interque se colloquuti, cæcos esse Europæos dixerunt, qui tanto in suas iconas amore, ac studio ferri solerent. Interim Thaytinchus militibus ostendit, si vi illata Gilius amoverint, se continuo imaginem contriturum. Quare duorum militum conatu, nam a solo vinci nequiverat, tollere de icone Gilius manus cogitur. Incredibile dictu est, quam acerbis homini dolor incesserit, ubi eburneam quidem imaginem fuste percussam, chartaceam autem pedibus a sacrificulo protritam vidit. Eoque magis discruciabatur, quo nullum a Thaytincho fieri injuriarum finem cerneret. Igitur cum a se paullum milites recessisse, liberumque sibi esse impedire, ne ille chartaceam conculcare pergeret, cognovit, in medium procedit, vique imaginem ex improbi viri pedibus sublatam, veneratur. Milites, qui nihil indignum ferendum censent, Gilius circumstant, exque medio excedere coactum ludificantur,

330 DE MARTYR. TUNQUIN.

tur, irridentesque magnum ab icone fustis ictibus acceptum dolorem affirmant. Sed ille suscepta defensione religionis, Jesum, ac Mariam eo in loco esse respondet, in quo neque doloris quidquam, neque incommodi pati possint. Nostros imaginibus memoriæ causa uti docet. Denique eos, ut laceffere, atque obloqui definant, hortatur.

Gilius in carcerem red-
ctus in febre
gravissimam
incidit, paul-
loque post co-
valescit. Ita-
que rursus
quæstio de eo
habetur. Ipse
de legibus,
deque chri-
stianorum re-
ligione mul-
ta præclare
differit.

XX. His rebus ultro citroque dictis, dimisso senatu, Gilius in carcerem redu-
citur. Eo ut pervenit, tam graviter agi-
tari febris cœpit, ut, qui aderant, brevi
decessurum arbitrarentur. Pro-Præfectus
Dominicanorum, ut de casu viri certior
est factus, negotium sacerdoti cuidam
Tunquinenfi dedit, ut quam magnis diur-
nis, nocturnisque itineribus posset, in-
metropolim proficisceretur, ac laboran-
ti opem sacris christianorum ferret. Sed
quum ante hujus adventum Gilius conva-
luisset, dies est iterum judicio constitu-
tus. Senatores, quod magnopere disside-
rent, ac pars quidem esset eorum in chri-
stianos, pars vero in Thaytinchum pro-
pensior, causæ totius unum esse arbitrum
statuendum, quodque is censuisset, jus,
ratumque habendum judicarunt. Arbitro
dicto, qui prodesse christianis cuperet,
xii. kal. octobres judicium instituitur.
Judex cum ex Gilio quotidiana illa de
causa, cur se in Tunquinum contulerat,
de

de tempore, quo primum venerat, captus-
que fuerat, inque sacrificuli ædibus man-
ferat, quæsisset, scribæque imperasset,
ut, quæ dicerentur, in tabulas referret,
tum monuit Gilius, ut sese a sole ad
umbram reciperet. Monenti senator ex
eorum numero supervenit, quos æquiores
Thaytincho fuisse ostendimus. Is, advo-
catis christianis, & sacrificulo, nostro,
ut medius confisteret, imperavit. Ubi o-
mnes, quod iussi fuerant, fecerunt, ex
te, inquit, Francisce, inquiero, quæ te
res impulerit, ut, patria relicta, in hoc
tibi regnum esse veniundum arbitrare?
Ego ne? inquit noster; religionis pro-
mulgandæ causa veni. Sed iudex, ecquid,
inquit, auxilii afferre cuiquam ista tua
religio poterit? Qui nostram, inquit Gi-
lius, observant, coluntque religionem,
his solum effugere supplicia, sempiterna-
que felicitate potiri licet. Nam sectæ ce-
teræ, quæcunque tandem sunt, maximis
in erroribus, atque in summa rerum di-
vinarum ignoratione versantur. At cau-
tum, inquit iudex, legibus Tunquinen-
sium fuerat, ne quis istud religionis genus
in hoc regnum inferre auderet. Ad hæc
Gilius, jus esse nemini, dixit, leges con-
dere, quæ cum ratione pugnent. Pugna-
re autem sanctiones principum, siquæ
umquam contra religionem divinitus da-
tam scribuntur. Atque ea, quæ consen-
tanea

332 DE MARTYR. TUNQUIN.

tanea rationi non sint, in legibus poni non oportere. Quemadmodum enim eam legem appellem, inquit, quæ apportet confusionem, perturbationemque legum? Post, quum multa ex eo iudex percunctatus esset, tum demum, quorum opera captus, contrictusque vinculis fuisset, quæsiuit. Inde iratus, quod interroganti sibi nihil Gilius respondisset, ejus dixit & orationem mendacem fuisse, & falsam esse, quam coleret, religionem. Negavit noster ostendi a quoquam posse, quæ de mendaci oratione iudex affirmaret. Quod si mentitus ipse, cum interrogantibus satisfacere conaretur, esset, non tamen esse consequens, quod ethnici calumniando de religione christianorum concludere auderent. Hujus namque religionis legibus vetari, non probari mendacium. Ubi senatores nihil agi intellexerunt, propterea quod Gilius de loco, deque viro, a quo primum comprehensus fuerat, tacere constituisset, hæc solum scribæ, ut in tabulas referret, imperarunt: Franciscum Gilium jam usque ab annis quatuor in Tunquinum venisse. Annos duos, quin ullas stabiles sedes haberet, regionem Tunquinsium peragrasse, incolasque docuisse christianorum legem. Dies in sacrificuli ædibus decem constitisse. De rebus aliis interrogatum noluisse respondendo iudicibus satisfaci-

tisfacere. Cum hæc agerentur, animad-
versum ab Gilio est, usum fuisse litterulis
duabus scribam, quæ duæ litteræ pravæ
religionis præsidem, & veluti caput signi-
ficarent. Quare monuit iudices, nisi *C*
litteram deleri jussissent, numquam se
tabulas signaturum. Itaque ea deleta,
scriptisque *boa lang* litteris, quæ Lusita-
nensem legem indicant, quo nomine
christianam religionem Tunquinenfes vo-
cant, senatores manum tabulis ab Gilio
imponi fecerunt, ut digitorum longitudi-
ne descripta, hoc enim signo, qui scribe-
re tunquinice nesciunt, uti consueverunt,
obsignari acta, causaque omnis ex jure
cognosci, dijudicarique posset. Ea quæ-
stione habita, quin lata in reos senten-
tia fuisset, dimissoque senatu, iudices mi-
litibus, ut Giliū in carcerem reduce-
rent, jusserunt.

XXI. Interim crebri ad regem rumo-
res afferebantur, permultos in regno con-
jurare, resque eas parare audere, quæ
ad bellum pertinere viderentur. Rex his
nunciis commotus, dat negotium finitimis,
ut, quæ apud eos gerantur, cognoscant,
seque de his rebus faciant certiores. Nun-
ciantibus manus cogi, exercitumque in
unum locum conduci, ut re cibaria pro-
vvisa, oppida muniant, delectumque mi-
litum habeant, jubet. Dent operam
senatores, præfecti provinciis, magistra-
tusque

Magistratus
belli rumori-
bus distinen-
tur. Interea
Gilius sacra
christianis ad-
ministrat: de-
nique arcte
custodiis as-
servatur.

tusque regni omnes, nequid respublica detrimenti capiat. Hoc tam gravi, tamque diuturno, quod ad annos fere quatuor productum est, bello distentis iudicibus, nihil est crudelius in Gilium imperatum. Postrema anni luna tam arcte custodiis asservandum iudices statuerunt, ut ei ad diem usque, quo animadversum in aliquos reorum fuit, quos illi capitis condemnaverant, neque noctu, neque interdiu egredi e carcere liceret. Hoc anno expiati a martyre poenitentia trecenti, ac pueri, adultique aliqui baptismate consecrati; quique suprema ægritudine laborantes aut cistis, ut pauperes apud Tunquineses solent, aut retibus inclusi ad eum asportabantur, extremæ unctionis sacris initiati sunt. Dites regales nummos argenteos tres custodibus causa mercedis dabant; pauperes unum. Qui bene valebant, Giliique visendi gratia ad eum frequentes ventitabant, nisi una, dum ille rem divinam faceret, mansissent domi, ne obolum quidem solvere cogebantur.

Distentis bello magistratibus, Gilius sacra administrare pergit.

XXII. Anno MDCCXL. cum Tunquinum intestino bello arderet, ac non magistratibus modo de causis cogitandi, sed etiam nostris invisendorum, confirmandorumque in fide christianorum adempta potestas esset, qui in metropoli agebant, ad Gilium frequentes venire, sacraque

craque suscipere curabant. Itaque mille, ac ducenti poenitentiae, triginta baptismi mysteriis initiati, expiatiq[ue] fuerunt.

XXIII. Post, cum an. jam MDCCXLI. neque oryza, quod accidere tam diuturna civium dissensione necesse fuit, neque reliqui commeatus supportari, interclusis itineribus, possent, fame, pestilentiaque incolae conficiebantur. Christiani, cum vastatum regnum, seque in summum vitae periculum deductos viderent, enitendum sibi omni studio putarunt, ut, quoniam corporum nequirent, sacrorum ope, quod esse potissimum expetendum arbitrarentur, saluti animorum sempiternae consulerent. Quamobrem maiore numero, quam ante consueissent, ad Giliam convenerunt. Itaque *confessiones* auditæ MMDCCCLXVII., mulieres, virique baptizati XCII., extremæque unctionis mysteriis expiati LXXXVIII. Extremo anni tempore custodes avaritia permoti plurimis, gravissimisque contumeliis mulierem, cuius proximæ carceri ædes erant, nostrumque hospitio excipere solebat, vexarunt, virosque duos, quos esse Giliæ familiares cognoverant, ceperunt, & vinctos in nervo retinuerunt. Hos cum noster, curato custodibus argento, liberasset, in iudicium vocatur, inauditusque dimittitur. Manat interim rumor in vulgus, esse Giliam brevi ad supplicium du-
cen-

Christiani ad Giliam frequenter sacrorum suscipiendorum causa contendunt. Qui ei subsidio venire consueverant, a custodibus vexantur.

cendum. Ea re intellecta, christiani pietate, misericordiaque erga hominem, quem parentis loco habebant, permoti, quid actum, statutumque a senatu esset, inquirunt. Cognita iudicum voluntate, suos, ut ne timeant, utque bono sint animo, hortantur.

Gilius apud regis fratrem rem divinam facit; cumque eo de religione disputat.

XXIV. Die jovis, qui dies ante Paschalia erat quartus, anno MDCCXLII. Gilius apud regis fratrem sextum orthodoxa matre natum rem divinam fecit. Is quamquam bene in nostros animatus erat, tamen quod sibi ab rege metueret, initiari mysteriis christianorum non audebat. Die sabbato, qui dies sanctus hebdomadæ magnæ fuit, Gilius flumen transivit, eoque in oppido, quo magnus erat concursus christianorum factus, sacrum peregit. Septembri mense in avunculi regis domum, illius rogatu, venit, ubi ad horæ dimidium de religione disputavit. Cumque ille interdum capere, quæ a Gilio dicerentur, non posset, auctorque huic, ut nonnulla rursum explicaret, fuisset; tum, his, quæ audierat, probatis, libros christianorum, quorum se aliquos legisse ajebat, nihil aut pravi, aut absurdi; contra eos, qui perscripti ab ethnicis fuissent, multa continere, quæ cum ratione pugnarent, dixit. Inde nostrum intuens, multis se negotiis impediri adiunxit, quin de iis rebus diutius colloqui posset.

posset . Itaque abiret . Nam cum tempus vacuum , ac liberum nactus esset , eum se rursum ad colloquium vocaturum . Actum quidem , si quem haberet de religione librum , sumeret , & ad se adferret . Eum præterea , qui Hispanus esset , Tunquinice neque satis distincte interdum , neque satis commode loqui posse . Quamobrem interprete opus esse . Igitur ex familiaribus unum aliquem secum adduceret , qui utraque lingua multa uteretur . Esse namque sibi in mandatis a rege datum , ut de christianorum legibus cognoscat . Paulo ante , quam Gilius in colloquium venisset , cum domestici avunculi regis esse illi in animo dixissent quærere , ullumne christiana religio doceret perduellium tollendorum , pacisque restituendæ modum ; ita esse nostros institutos respondit , ut ab his , qui resipuissent , quique fufis precibus ad unum verum Deum confugerent auxilium postulatum , impetrari facile pacem posse confiderent . Ac regem quietiorem fortasse , si innocentes odio persequi cessasset ; sin autem in eos sævire pergeret , turbulentior , seditionisfiorumque populum habiturum .

XXV. Jam regnum inopia rerum omnium , ita uti supra demonstravimus , premebatur , magnoque numero incolæ pestilenti morbo correpti interibant . Qui morte sibi , quos carissimos haberent , eri-

Christiani
de impetranda
Gilio libertate
per matris
regis sororem
studiose agunt
sed propter

mulieris mē-
dacia non im-
petrant. De-
nique Gilius
amplius mē-
se continen-
ter in carce-
ribus detine-
tur.

pi videbant, quod neque eas res interdum
parare, quibus famem sustentarent, vi-
resque reficerent, alioque cadavera aspor-
tarent, neque auxilio quemquam accer-
sere possent, propterea quod vel langue-
rent ipsi, atque egredi domo nequirent,
vel vicini periissent, vel sibi quisque,
suisque prius, quam alienis subveniendum
arbitraretur, soli in edibus brevi & ipsi
interituri suum casum misere lamenta-
bantur. Alii etsi bene valebant, tamen
aut male sibi, quod improvise perplures
febri oppressos, extinctosque cernerent,
metuebant; aut amissis parentibus, fra-
tribus, filiis, amicis incredibili mœrore,
luctuque conficiebantur. Ita oppida, agri-
que pleni fletuum, & clamorum erant.
Rex, qui urbes, vicosque gravi annona
conflictari, vastarique cultoribus agros
aliquandiu tulisset, communium tandem
misertus infortuniorum, omnes magna
cum significatione voluntatis, clementiæ-
que erga illos suæ, quibuscumque rebus
posset, juvare cœpit. Ea re incitati chri-
stiani, ratique advenisse optatum, op-
portunumque ad Gilium liberandum tem-
pus, uno omnium, imprimisque Pro-Præ-
fecti provinciæ Tunquinensium Dominica-
norum consensu, matris regis sororem ade-
unt, petuntque majorem in modum hoc a-
pud regem agere ne gravetur. Id sempertra-
rit, daturos ei sese quadringentos argen-
teos

teos regales nummos promittunt. Gilius, qui mori pro Christo cuperet, ægreque eos christianorum conatus ferret, etsi Pro Præfecto jubenti, ne conantibus impedimento esset, paruerat, tamen hortatus omnes etiam, atque etiam est, ut ne quid principi mentirentur. Hæc de se pauca regi proponi velle. Sese in Tunquinum promulgandæ religionis christianæ causa venisse. Eam ob rem captum se tandem, senatusque consulto fuisse capitis condemnatum. Nunc esse multos, qui solvi ipsum, emittique e carcere, in eoque regno libere versari rogent. Nostri, ita ut conventum fuerat, fecerunt. Nihilo secius mulier pecuniæ cupida, quod aliter se argentum comparaturam diffideret, rem esse mendaciis implicandam duxit. Itaque regi exponere decrevit, mercatorem esse Gilium, qui merces in regnum ex Hispania convexisset. Nihil apud eum christiani repertum fuisse ab his, qui odio in religionem commoti, comprehendi hominem, atque in vincula conjici imperassent. Quare Thaytinchum, qui incommodi a Francisco accepti auctor fuerat, S. C. ad elephantorum curam esse damnatum. Orare proinde se regem, ut virum innocentem abire liberum patiatur. Id ut rescitum ab Gilio est, continuo ad mulierem misit, qui dicerent, displicere vehementer sibi, quæ illa facere

340 DE MARTYR. TUNQUIN.

imprudens meditaretur. Igitur caveret, ne fraudibus regem falleret. Nam si fefellisset, sciret, frustra se a christianis, quam speraret pecuniam, petituram. Illa, etsi Francisco nihil fecus, quam sibi esset a christianis mandatum, facturam recepit; tamen, mutandum consilium non putavit. Rex, accepto libello, postulatis respondit, modo vera essent, quæ dicerentur, sese libenter forori matris satisfacturum. Interim eunuchus cuidam negotium in rem inquirendi, & quæ comperisset, ad se referendi dedit. Lectis, expensisque actis, eunuchus instructam regi fraudem retulit, atque in causa fuit, cur mulier non solum nihil eorum, quæ peteret, impetraret, sed etiam rubore suffunderetur. Eodem anno *confessiones* a Gilio auditæ MDCCXI., baptismo initiati mares, feminæque LIV., extremoque chrismate uncti LII. fuerunt. Postremo anni tempore, cum ortæ inter custodes dissensiones, contentionesque essent, plus mense Giliū in carcere clausum detinuerunt.

Gilius ad iudices adducitur. Tahytinchus, Rotariū proterit. Iudices ex Gilio, quis eum comprehendit, quærūt; mul tamq; ei molestiam exhibent. Sed Gi-

XXVI. Ad v. non. martias anno MDCCXLIII. cum Franciscus adductus sextum in iudicium esset, seque a Præsidente vocatum arbitraretur, ut de contentionibus custodum diceret, paullo ante, quam ad patres adiret, a scriba senatus dictum sibi eum esse diem intellexit, ut cujus primum opera in potestatem militum venisset,

set, confiteretur. Hæc nuncianti importune agere iudices respondit, qui se toties de iisdem rebus interrogarent, de quibus nihil deinceps dicere constituisset. *Se* namque ob religionem vinctum, de religione sæpe, si vellent, de auctore autem poenarum, quas libentissime penderet, numquam dicturum. Scriba, qui frustra ab se tempus inquirendo teri animadverterat, de signis esse christianorum quærendum existimavit. Quamobrem rogavit, ullum ne religionis indicium secum adveniens attulisset. Gilius visum ab eo fuisse arbitratus, quod collo circumpositum ferret, neque satis caute occultasset, *Rosarium* (hoc enim nomine appellamus globulorum minorum CL. seriem, majorum XV., qui omnes pertusi cum sint, trajecto filo, itaut decimis quibusque minoribus singuli maiores inferantur, ferti quoddam genus efficiunt) præter hoc aliud se signum habere nullum respondit. Hoc accepto responso, scriba discedit, moxque ad iudices ingressus, de *Rosario* proponit. Senatores rem certius cognituri Franciscum introduci jubent. Ille, cui datæ instituendæ quæstionis, dijudicandæque causæ partes erant, ostendi sibi ab *Gilio Rosarium* postulat. Franciscus, qui fore, quod accidit, ne suspicaretur quidem, quærit ex iudice, num illud continuo se restitutum polliceatur,

lius de ea re
nihil respon-
det.

342 DE MARTYR. TUNQUIN.

tur, ac *Rosarium* annuenti tradit. Judex amuleta ænea duo *Rosario* appensa, cernens, ecquid ea sint, percuntatur. Ubi impressas amuletis imagines martyrum duorum cognoscit, nostrum, eas ut pedibus conculcet, hortatur. Recusantem, cogi oportere non censet. Aderat Thaytinchus. Huic, quem esse ad quolibet contra christianos audendum paratum videt, ad se ut accedat, arreptumque *Rosarium* in terram projiciat, proteratque simul amuleta, jubet. Gilius, quod sacrificulo ad sacrilegum facinus a nefario, impioque judice *Rosarium* porrigi videret, conandum sibi esse, ut illud e manibus ethnicorum hominum extorqueat, arbitratur. Itaque commodum adpropinquat. Deprehenso viri consilio, senatores eum, ut abſistat, sibiſque caveat, jubent. Nolentem obſequi milites vi per crines arreptum retrahunt, ſicque retentum, quæ ab impiis in ſacras imagines perpetrentur, intueri cogunt. Haſ ille conſpui, proterique indigne ferens, injurias religioni christianorum illatas cauſſam eſſe clamat incommodorum, quibus reſpublica premeretur. Jam finem ethnici faciunt contumeliarum. Imperant Gilio judices, ut genua flectere necundetur. Fit, quod jubent. Quæritur ex cuſtodibus, ecquis ei alimenta in carcerem apportet. Illi ab anu ſæpe, interdum

dum vero ab adolescentulis duabus, afferri confirmant. Reprehenduntur. Capi eas oportuisse decernitur. Negant custodes id sibi umquam fuisse imperatum. Quod si tunc iudices præciperent, imperata se continuo facturos, pollicentur. Hæc iudex serio ab se dicta negat. Nam si captæ mulieres fuissent, Europæum fuisse fame in carcere periturum. Inde se ad Franciscum convertit. Percuntatur, quis consilii mittendorum militum, ejusque comprehendendi princeps fuerit. Tacentem minis perterre facere conatur. Denique, ubi fortiter hominem in sententia manere, acerbissimosque cruciatus perpeti malle, quam efferre, quæ sibi initio acciderant adversa, videt, torqueri imagines imperat. Quod ut noster audiuit: ne puta, inquit, o iudex, affici sensu doloris iconas posse. Non enim tam hebetes, tamque inepti sumus, ut æs, ebur, lapidem aut lædi contumelia, aut cruciari mallecorum ictibus arbitremur. Verum hoc tibi persuadeas vehementer velim, obtinere eum, quem imago exhibeat, ulciscendæ injuriæ, sumendique de te ipso supplicii potestatem. Irritatus his verbis iudex, conviciis Giliū exagitat, ac si male senatori, qui partes in iudicio primas teneat, precatus esset. Sed Franciscus non eo se animo locutum respondet, quo male cuiquam precari vellet,

sed quo ab omnibus id, quod res erat, intelligeretur. Post id factum dimissus Gilius in carcerem ab custode reducitur.

Matthæus
Leziniana ab
ethnicis com-
prehenditur,
& gravissime
cæditur, mi-
litibusque in
custodiâ trās-
ditur. Chri-
stiani, ingenti
numerata pe-
cunia, ut il-
le dimitta-
tur, rogant.
Sed frustra
sunt horum
conatus. Ita-
que Lezinia-
na ad supre-
mum magi-
stratum mit-
titur.

XXVII. Jam capto apud Luc-thuyenses ab hostibus, ita ut ante docuimus, Gilio, Pro-Præfectus provinciæ Tunquinensium Dominicanorum christianos in fide confirmaturus Matthæum Alonsum Lezinianam Luc-thuyum miserat. Cum is nihil ab incolis sibi metuendum arbitraretur, quorum egregiam in se voluntatem perspexerat, ethnicus quidam summæ homo improbitatis, & audaciæ, qui, ut sustentare pauperiem posset, ludimagister in proximo vico erat, cumque pueris christianorum in Alonsi domum interdum venerat, omnesque ædium aditus, recessus, exitusque cognoverat, ad exercitum proficiscitur, ac duci, qui adversus majestatis reos missus cum imperio in provinciam fuerat, persuadet, si milites sibi subsidio dederit, Europæum, qui Luc-thuyenses deciperet, in regis potestatem venturum. Dux, qui comprehenso Leziniana magnum se lucrum, prædamque facturum putaret, naves parari, iisque armatos milites imponi, & Luc-thuyum, cum visum ludimagistro opportunum esset, deduci jubet. His paratis rebus, cum Luc-thuyenses christianos oryzæ metendæ causa in agris versari sciret, ludimagister secunda fere vigilia solvit, ac prima
luce

luce iv. kal. decembres Luc-thuyum pervenit, quo tempore Leziniana rem divinam facere consueverat. Is pane, vinoque consecratis, quod ex strepitu, ac tumultu ad se ire milites, remque esse in extremum casum deductam cerneret, repentino periculo perturbatus, implicatusque, calicis obliviscitur, ablatoque Christi Servatoris Corpore, in locum proximum coquinæ perfugiens, vescitur. Interim effractis foribus, in domum milites irrum-punt, atque huc illuc concursantes, ubi ad facellum venerunt, inventum in calice sanguinem effundunt. Alonfus, qui obfistendum temere non putaret, spemque evadendi omnem in celeritate positam arbitraretur, descendit, & qua fors primum obtulit, erumpens, circumspicit quæ sit opportunior fugæ capeffendæ via. Erat prope domum piscina. Hanc si transisset, facile se aut locum, in quem se abderet, reperturum, aut ad vicum aliquem christianorum, in quo tuto consisteret, perventurum censet. Quo capto consilio, sacras vestes, quibus erat indutus, deponit. Ea re cognita ludimagister accurrit, adortusque hominem, per crines arreptum in atrium reducit. Convocati deinde milites, omnes Alonsum circumfistunt, eumque, solis femoralibus relictis, vestibus, quas rabie incitati disciderant, indusioque ipso expoliatum verberibus crude-

crudelissime cædunt, eique tam graviter
 caput feriunt, ut inde magna copia san-
 guis effluat. Post per hortum, aquosos-
 que campos pertractum crinibus, atque
 in propinquum vicum deductum, uvida,
 laceraque veste, quam ludimagister de-
 diffet, induunt, & navarcho, qui navi
 imponat, deferatque ad ducem, trans-
 dunt. Navarchus commiseratione viri
 permotus, adferi sibi medicamenta, ei-
 demque, ut sanguis cohibeatur, appli-
 cari jubet. His paratis, applicatisque re-
 bus, arundinum, quæ permagnæ esse in
 ea regione solent, partibus veluti tor-
 quem conficit, quem torquem ab incolis
goum appellatum Alonso, ac si reus scele-
 ris fuisset, in collum imponit, atque ad
 ducem, qui tunc apud Pro Præfectum,
 provinciæ in castris erat, deducit. Dux,
 qui Lezinianam ob verbera, quibus cæ-
 sus fuerat, cum in manus militum venif-
 set, dolore lateris premi intellexit, solvi
 eum continuo, militibusque in custodiam
 tradi imperavit. Cum his custodiis Alon-
 sus asservaretur, dux simulatione officii
 extorquere sese ab christianis pecuniam
 posse sperans, ei, quem ad se interdum
 adduci fecerat, multis significationibus
 ostendit, curaturum se, ut ei libertas ad
 suos revertendi detur. Id ut homini per-
 suadeat, fabrum lignarium senem, quem
 milites christianum in ædibus Alonsi re-
 per-

pertum, vinctumque ad exercitum de-
xerant, dimittit. Circuitis una cum Le-
ziniana, ejusque famulo christianorum,
vicis, confirmat animos Luc-thuyensium;
pollicetur sibi eorum salutem curæ futu-
ram. At Luc-thuyenses, qui mores eth-
nicorum cognitos haberent, timerentque,
ne ducis simulatione, atque perfidia cir-
cumvenirentur, vocati in castra, veniun-
dum non arbitrantur. Itaque alios e fini-
timis oppidis christianos mittunt, qui re-
stitui Alonsum, sibi que ignosci petant.
Accepta horum oratione, dux comiter,
daturum se operam, ut ne Luc-thuyenses
in salutis, fortunarumque periculum ve-
niant, respondet. Postulat sibi, ut argen-
teos nummos, quos Tunquineses *tacleos*
vocant, ducentos septuaginta numerent.
Hac pecunia redimi Lezinianam, veniam-
que christianis impetrari posse. Ea spe
adducti nostri, quod ille petiisset, argen-
tum deferunt. Dux auctus pecunia, fidem
fallit, ac prid. idus decembres, qui dies
quartus, ac decimus a capto Leziniana,
fuit, arcte eum in custodiis teneri jubet.
Vereri se multitudinem christianorum,
ostendit. Hos, qui navibus venerint, vi
forsitan erepturos, quem ipsius voluntate
libere reducere nequirent. Interdicit,
atque imperat militibus, ne cui nostrum
ad custodiam aditum patere, & cum eo
colloqui sinant. Inde multa jam nocte
nervo

nervo Alonsum constringit, navique una cum famulo impositum in regni metropolim ad supremum magistratum mittit. Leziniana quamdiu apud ducem mansit, non moderate solum, atque alacriter injurias sibi ab hostibus illatas, verbera, atque nervum tulit, sed etiam quærentibus quem se esse profiteretur, incredibili animi constantia, fortitudineque respondit, christianum se, ac magistrum esse, institutoremque Tunquinenfium christianorum. Quo etiam tempore illud quoque boni eidem divinitus concessum ferunt. Nam cum multis, gravibusque infirmitatibus corporis conflictaretur, ubi in hostium venit potestatem, ita sanatus repente est, ut ad mortem usque incommodum valetudinis sentiret nullum.

Gilius de comprehenso ab ethnicis Matthæo cognoscit; magnoque dolore afficitur.

XXVIII. Interea Gilius, qui nuncium de capto iisdem in ædibus Leziniana, in quibus ipse ante annos fere septem comprehensus fuisset, acceperat, magno dolore afficiebatur, propterea, quod prospiceret, nisi hostes ab injuria sibi, & maleficio temperassent, plebem christianorum diffidiis, contentionibusque in æternæ salutis periculum venturam. Sed res aliter, atque ille putaverat, evenit. Nam ita divini numinis beneficio constituta omnia, atque composita fuerunt, ut nihil detrimenti christiani caperent.

XXIX. Sed

XXIX. Sed Alonsum in regiam urbem xii. kal. januaris delatum milites Prætori tradiderunt. Prætor causam cogniturus, quamobrem ille victus, inque iudicium adductus esset, & quo tempore in Tunquinum venisset, quælivit. Ubi annum esse ex quo propagandæ religionis causa venerat duodecimum intellexit, quem ea religio coli præcipiat, sciscitatur. Ad hæc Leziniana, unum modo esse respondit cæli, terræque conditorem, atque parentem Deum. Ei soli legibus christianorum cultum, honoresque divinos adhiberi oportere. Tum Prætor, cum cautum, inquit, ab rege sit, ne quis Europæorum hoc genus religionis in Tunquinum inferre audeat, quid fuit, causæ, cur tanto tuo periculo huc tibi veniundum arbitrarere? Sed Alonfus, novi, inquit, quæ sint ab rege decreta contra christianorum legem. Quare clam hortari, idque jam noctu, mortales consueveram, ut veritatem cognoscerent, vitium fugerent, unamque virtutem confectarentur. Mox iussus, decem decalogi præcepta numerat. His, aliisque rebus, quæ minoris momenti essent, breviter explicatis, in catenas conjicitur. Vinculis, maioribusque compedibus constrictum milites in carcerem deducunt. Cum in eas angustias redactus esset, tametsi improbitate

custo-

Prima de Matthæo quæstio habetur. Ipse multa interrogatus, de omnibus respondet: tum in carcerem concluditur.

350 DE MARTYR. TUNQUIN.

custodum abstinere se cibo, potu, somnoque interdum cogeretur, nihilo secius lætus, atque alacer omnia perferebat, Deumque O. M. assiduis precibus orabat, sibi ut majores spiritus adderet, quibus pro religione certare, ac profuso sanguine vincere tyrannum, hostemque generis humani posset.

Matthæus in
judicium vo-
catus præcla-
re de religio-
ne differit; ac
de seipso præ-
terea, deque
Hispanorum
rebus magi-
stratui inter-
roganti de-
monstrat.
Christianus
Lucathuyen-
sis quidam,
qui se hospiti-
o Matthæi
excepisse di-
ceret, com-
prehenditur;
sed nihil in
eum gravius
decernitur.

XXX. Inde cum sæpe, ac multum in judicium vocatus esset, ex eoque judices de iis, quæ ad rem non pertinebant, quæsisissent, tanta vi, tantaque gravitate orationis respondit, ut eloquentiam desiderare nemo, admirari autem omnes summam hominis constantiam, præstantiamque virtutis possent. Bis publice religionis causam defendit. Quo tempore tam dilucide, tamque impavide de Deo, deque Servatore generis humani dixit, ut facile ethnici intelligerent, christianum occidi quidem ab inimicis posse, terreri autem supplicio, vincique ratione non posse. Nam prid. nonas decembres, qui eo anno magni sabbati dies fuit, cum se in judicio sistere jussus esset, & scriba senatus ex arca, quam ei milites per vim abstulerant, libros, vestes sacras, imaginesque extraxisset, in quibus icones duæ cruci affixi Christi Servatoris erant, inquisissetque judex, ecquis ille passis manibus homo esset, respondit: quas cerneret, eas Jesu Christi

fti iconas esse, qui Filius Dei verus cum
 sit, e cælo in terram descenderit, sibi-
 que humanam naturam conjunxerit, actus-
 que in crucem fuerit, ut genus homi-
 num, quod in hostium venisset potesta-
 tem, sua morte redimeret. A Deo nam-
 que primum omnium parentem Adamum
 fuisse conditum. Hunc, qui graviter
 in conditorem peccasset, non potuisse
 cumulate de injuria satisfacere. Neque
 enim tantam inesse homini virtutem, ut
 cum natura, vitibusque finitis sit, pur-
 gare crimen, summamque injuriam,
 summo Deo illatam possit. Quare, ut
 plene divino numini satisfaceret, junxisse
 sibi humanam naturam Filium Dei Pa-
 tris Verbum. Inde Christum Deum, at-
 que hominem ex Virgine ortum cruci affi-
 xum decessisse, atque e mortuis excita-
 tum, migrasse in cælum, perpetuoque
 rerum omnium imperio potiri. His ex-
 plicatis rebus, quod plebs ad senatum
 ejus videndi causa concurrisset, ac stre-
 pitus, clamoresque ejusmodi orirentur,
 ut, qui in judicio aderant, quæ a for-
 tissimo viro dicebantur, percipere ne-
 quirent, inceptum de veritate religio-
 nis sermonem intermittere cogitur. Se-
 dato paullulum strepitu, cum senatores
 vestes sacras, librosque contemplaren-
 tur, unusque aliquis ex Alonso percun-
 tatus esset, qui ceteris iconibus viri,
 mu-

mulieresque exhiberentur, egregie, cuius quæque imago esset, exposuit. Jam finem libros, vestesque sacras contemplandi iudices fecerant, cum in medium adductum Lezinianam, qui vocaretur, & quo primum tempore in Tunquinum venisset, interrogarunt. Ubi ille Matthæum se appellari, annumque jam excurrisse duodecimum, ex quo venerat, religionemque christianam docere incolas cœperat, dixit, ritualement ei Romanæ Ecclesiæ librum, ut legat, porrigunt. Versibus duobus, tribusve perlectis, de regno, in quo natus ipse fuisset, de magistratibus, deque iis, qui christianis partibus studerent, inquirunt. Ad hæc Leziniana paucis respondit: ortum fuisse in Hispania se. Esse in eo regno, qui magistratum gerant, permultos. Regem summum imperium obtinere, inque suos vitæ, necisque habere potestatem. Ab his omnibus christianam coli religionem. Inveniri marium, feminarum, senum, annum, juvenum, qui huiusce religionis doctrina institui, legibusque parere recuset, neminem. His acceptis responsis, iudices sese ad Matthæi famulum convertunt. Huic nomen Quy, Ignatius prænomen erat. Itaque ab eo de loco, in quo ipse, atque magister capti fuerant, petunt. Jam inter christianos convenerat, ut, si quisquam eorum vocatus

catus in iudicium, rogatusque fuisset, quibus in ædibus milites deprehensum Lezinianam vinxissent, in domo civis cuiusdam Luc-thuyensis diceret, eumque nominaret. Nam is civis, christianus cum esset, oppidanis se civitatem liberaturum promiserat, iudicibusque, qui sisti eum imperavissent, suas Alonso ædes patuisse intrepide responsurum. Quod si capitis condemnatus esset, hoc se felicem imprimis existimaturum, quo suo supplicio servatos cives, seque beatum perpetuo futurum consideret. Sed hanc sibi gratiam referri velle: quidquid pecuniarum vel redimendi, vel alendi, vestientique sui causa ethnici postulassent; propterea quod angustæ sibi res essent domi, hoc totum civitas solvere ne gravaretur. Erant hæc Lezinianæ famulo explorata. Quamobrem interrogatus, de cive Luc-thuyensi, ita ut convenerat, loquitur. Nam ædes ipsæ illius ante civis fuisse dicebantur, quam attributæ Dominicanis essent. Itaque civis continuo reus agitur. Accitus ab iudicibus, adest. Christianum se, parentibusque christianis ortum esse confitetur. Quo tempore Luc-thuyenses in agros messis causa descenderant, Matthæum in ipsius domo deprehensum ab hostibus venisse, in ducis exercitus potestatem docet. Sed corrupti ab oppidanis pecunia iudices nihil

hil in civem gravius statuerunt. His actis rebus, Leziniana cum ministro Ignatio Qui dimittitur. Scriba, evocatis custodibus, imperat, ut postero die utrumque in senatum reducant. Hortatur deinde Ignatium, ut sibi caveat. Nam si mentiri pergat, sciat se verberibus crudelissime lacerandum. Postridie ejus diei et si custodes, quod jussi fuerant, fecerunt, tamen quod judices magnis, assiduisque imbribus impedirentur, quominus habere senatum possent, commutato consilio, diem judicio ex eo die sextum, ac decimum constituerunt.

Renovata
quæstione, ro-
gatus Mat-
thæus, ut cru-
cem percu-
tiant, judices
vehementer
reprehendit:
mox ex con-
silio dimitti-
tur. De Igna-
tio Matthæi
famulo quæ-
stio habetur,
isque se for-
titer, ac stre-
nue gerit.

XXXI. Igitur xi. kal. majas clausis foribus quæstio est instituta. Principio judices delineari in terra crucem fecerunt; cumque ex Matthæo quæsisent, id ne signum fuste percutere auderet, ille plurimum apud se valere senatus auctoritatem respondit; sed christiano viro, imprimisque sacerdoti, qui ceteros instituturus, longum, plenumque periculorum iter susceperat, tam gravi, tamque detestabili scelere constringi, nefas esse, ut injuriam Christo Servatori faceret. Nam cur eam religionem ethnici delere conarentur, quæ vera, quæ recta, quæ sancta sit, quæ fugiendum vitium, quæ colendum præcipue Deum, quæ magistratibus, nisi quid contra jus, rationemque præcipiant, obtemperandum, quæ deni-

denique parentibus pietatem præstandam, propterea quod maximæ ab his omnibus utilitates hominibus afferantur, docet? Hoc responso dato, ex concilio, jussu senatorum, egreditur. Unus intus remanet Ignatius. Is, instituta quæstione, quæ ad horas fore duas producta est, de *Catechistis* quatuor, qui auxilio esse Matthæo sole-
rent, interrogatur. Est *Catechistarum*, viro apostolico maximus in regionibus barbarorum usus. Ab iis enim quotquot sacerdotis oratione, atque opera Christo sese conciliare instituerunt, præcipua decreta religionis, quæque scitu, actu-
que necessaria christianis hominibus esse liquet, explicantur. Quæ res laborem minuit sacerdotum. Igitur Ignatius ab iudicibus de *Catechistis* rogatus, fatetur. Sed eorum nomina reticet. Alia commi-
niscitur. Eorum patriam sibi esse igno-
tam dicit. Negat se de loco, in quo ver-
sentur, dicturum. Quare, ut patefa-
ciat, viminibus asperrime cæditur. At ille sibi mortem esse satius perpeti, quam nocere cuiquam, censet. Ubi finem cæ-
dendi hominis lictor fecit, suscepturum se iudex fuisse ex illius miseria dolorem confirmat, ni crucis imagini fustem im-
pingere recusasset. Ignatius libere, at-
que audacter, nunquam se tam immane flagitium admissurum clamat. Inde per-
cunctanti iudici, quid tandem religio
Z 2 chri-

356 DE MARTYR. TUNQUIN.

christiana præciperet, quemque Deum christiani coli oportere arbitrarentur, eadem, atque Leziniana, de Deo, de magistratibus, deque pietate in parentes persequitur. Exponit breviter decalogum. Addit plura de damnis ab Adamo in mortalium vitam illatis, deque Christo Salvatore, qui salutem attulerit, præmonstraritque generi hominum & vitii declinandi, & virtutis colendæ viam. Ne mirentur iudices, si eum interfectum supplicio crucis fuisse intelligant. Gentem Judæorum sceleribus, flagitiisque contaminatissimam, tacentem, justum, piumque virum æquo animo fortasse, redarguentem autem, poenamque minitantem, qui virtutem coleret, vitiumque averfaretur, nullo prorsus modo ferre potuisse. His cognitis rebus, quod pro explorato haberet iudex, Ignatium ab religione non discessurum, mittit quæ ad leges spectarent christianorum. Quærit, ulline nostrum societate, ac fœdere adjuncti conjuratis essent. Demonstrat lectum Dei nomen fuisse in tabulis, in quibus nomina erant scripta conjuratorum. Coeptam defectionem ab iis, qui essent finitimi Luc-thuyensibus, apud quos ipsum, ac Lezinianam fuisse deprehensos constaret. Quamobrem cum in suspicionem sceleris vocaretur, diceret, num is, quo magistro utebatur, per-

perduellibus consensisset. Si de hoc negaret, de magistris saltem ceteris, quos religionis propagandæ causa Luc-thuyum venisse ab duce militum senatus acceperat, confiteretur. Ad hæc Ignatius, neque auxilio Matthæum cuiquam conjuratorum fuisse, neque consensisse, respondet. Hunc enim, ubi hostes ab rege deficere cœperunt, metu perterrefactum, Nam-canum, ut sibi consuleret, profugisse. Ignorare se, quæ dux militum ad senatum de magistris christianorum reliquis scripserat. Nam præter Lezinianam, sibi alium esse cognitum omnino nullum. Quod si mentior, inquit, ac brevi aliquem eorum in iudicium adductum videam, poenam capitis ob mendacium libenter pendam. His intellectis, mutant iudices consilium. Redeunt ad quæstionem de oppido, deque ædibus, in quibus captus Alonsus fuerat. Eadem, quæ ante, responsa ferunt. Implicati missa hæc faciunt. Audire se de conventibus velle dicunt. Rogant, frequentes ne disciplinæ causa ab Leziniana haberentur domi. Ignatium, semel, atque id quidem noctu iisdem in ædibus conventum a viginti circiter viris, mulieribusque actum fuisse affirmantem coarguunt. Nisi enim ei rei constituta hæc erat, quam domum haberet Matthæus ad instituendos christianos re-

liquam? Ut nullas certas fuisse Leziniana sedes, sed eum ubicumque fors obtulisset, docere christianos consueſſe intelligunt, quiescendum paullisper putant.

Matthæus
rurſum ad ſe-
natum addu-
citur; deque
multis rebus
interrogatur,

XXXII. Relatis a ſcriba ſenatus in tabulas, quæ ultro, citroque dicta fuerant, introduci Matthæum iudices imperarunt; cumque ex eo ſciſcitati eſſent, uſquam ne Thay-hitium vidisset (nam Ignatius *Catechistarum*, qui Matthæo auxilio eſſent, unum appellari confirmarat hoc nomine) eum, propterea quod negasset, graviter accuſarunt. Mirari ſe vehementer dixerunt, quid eſſet, quod cum lege christianorum fas eſſe mentiri nemini ſtatueretur, ipſe ſe implicare mendacio auderet. Atque eſſe ſibi compertum, & cognitum, Thay-hitium eorum aliquem vocari, qui cum eo navi in metropolim advenissent. At Leziniana, ego, inquit, quos Chriſto conciliavi, eo uno, quod ipſis in baptiſmo impoſui, voco nomine; cetera non curo, quæ norim eſſe propria ethnicorum. Nam ſic habetote; video enim vos ſcire de baptiſmo cupere: ſeptem eſſe a Chriſto myſteria inſtituta, quæ Latina Eccleſia merito *Sacramenta* vocat. In his primum eſſe baptiſmum. Servatorem eundem Jeſum, ut ſaluti generis humani conſuleret, auditoribus ſuis, quibus indiderat appellationem *Apoſolorum*, juſſiſſe,

fisse, universum orbem ut peragrarent, docerent mortales, qui se nostra disciplina institui paterentur, eosque mysteriis initiarent. Exactis Apostolis, Sacerdotes eorum exemplum imitatos, id maxime eniti, ac laborare, ut doctrina, sacrisque christianorum imbuant nationes, quæ in rerum divinarum ignorantia versantur. Sed iudex nihil hæc moratus, de loco rursus, in quo noster annis duodecim constitisset, interrogavit. Cum Matthæus nullum sibi stabilem locum umquam fuisse dixisset, tum ille, Luc-thuyensis ne civis, inquit, cujus te in ædibus captum ferunt, quemque Ignatius appellari Thay-hitium affirmavit, legibus ethnicorum paret, an christianorum? Agentem Lezinianam, ut eorum patriam indicaret, qui navi secum in metropolim venissent, hortatus est. Negantem sese indicaturum, propterea quod esse detrimento cuiquam nollet, commonefecit, ut saltem, ubi nam ipse gentium versaretur, cum oriri turbæ, seditionesque in vicis Luc-thuyo finitimis cœperunt, libere confiteretur. Ubi noster in navim se profugisse, Namchanumque vectum, ibi aliquandiu degisse, dixit, fuerunt continuo, qui ex eo percuntarentur, verane prædicarent hi, qui christianos viros, mulieresque una in conventu cubare de-

fenderent ? His Matthæus paucis satisfecit . Veterem hanc esse demonstravit ethnicorum calumniam . Nostros , ut virtutibus ceteris , ita castitatis laude excellere conari . Quamobrem de aliis rebus senator quæreretur . His acceptis responsis , iudex accusationem proponit de veneficii crimine . Ea depulsa accusatione ab Leziniana , qui non veneficiis , sed vi veritatis adduci homines ad religionis christianæ cultum ostenderat , pergit senator , ac multisne libris instituendorum suorum causa nostri uterentur , rogat . Cui Matthæus , multos esse tunquinice libros , multos etiam finice perscriptos , respondet , atque sic se recipere iudicibus confirmat : eum , qui aliquos legere non gravetur , ab inferenda religioni injuria temperaturum . Sciscitatur inde ex eo senator , uxorne eidem sit ulla , quo ex regno sit , quæ sint vicinæ suis popularibus nationes , num apud eas ulla diis templa exstruantur , quam denique omnes observent religionem . Noster , neque duxisse umquam se , neque ducere uxorem velle , respondet . Sacerdos enim , atque ex Ordine quidem Monachorum cum sit , suam se obstrinxisse Deo rerum omnium auctori fidem , pauperem , castumque sese perpetuo futurum . Natum se in regno esse Hispaniarum . Hispanos , Lusitanos , Gallos , Germanos , Venetos , Ita-

Italos denique omnes, quorum omnis esset in Europa ditio, christianis institutis, ac legibus teneri. Deorum templa nulla apud eos reperiri, qui unum esse rerum conditorem Deum contenderent. His datis responsis, omnes ad unum iudices Matthæo, ut regnorum, quæ numeraverat, nomina, Ignatio vero, ut preces, quas Deo adhibere christiani solent, describeret, & postero die ad senatum referret, imperarunt.

XXXIII. Alonfus, Ignatiusque dimissi, atque in carcerem reducti, curandum omni studio putant, ut ab se nihil eorum, quæ nosse iudices averent, prætermisum esse videatur. Itaque nomina regnorum, quæ Lezinianæ succurrerant, *orationem*, quam traditam ab Christo *Dominicam* dicimus, *Angelicam salutationem*, *symbolum Apostolorum*, *decalogum* litteris mandant. Quæ *miseriordiæ opera*, quæ *beatitudines*, quæ *septem vitia capitalia*, quæ his contrariæ *virtutes septem*, qui *actus contritionis*, quæ *litanie sanctorum* a nostris appellentur, describunt. Animadvertunt nullam fere in orbe terrarum regionem esse, in qua uni Deo christianorum ritu cultus, honores, preces non adhibeantur. Postridie ad iudices reversi, factos ab se rerum earum commentarios scribæ tradunt, inauditi- que dimittuntur. Hos commentarios ju-

Matthæus, & Ignatius de iis rebus, quas fuerant interrogati, imprimisque de religione commentarios describunt, & scribæ senatus tradunt. Supremus magistratus in Matthæum penam capitis decernit: Ignatium ad elephantorū curam damnat: res, quæ ad religionē pertinet, cremari; virumque ethnicū, qui illos comprehenderat, præmiis ornari jubet.

dex a scriba acceptos legit, lectosque, ut est etiam apud Tunquineses in usu, eidem restituit. Paucis post diebus ferri omnium fama coepit, Lezinianam inferioris ordinis judicum sententia in exilium esse pellendum. Sed ea sententia a supremo regni magistratu rejecta, senatus consultum ejusmodi descriptum est. Matthæum, quem impiæ, maleficæque superstitionis magistrum esse; annos tredecim Luc-thuyenses mendaciis, fucis, dolis circumvenisse; imagines in regnum importasse, liquet; gladio percuti: Ignatium Quy Matthæi auditorem Giahy in Tuyano natum, ad elephantorum curam damnari: vestes, icones, libros, resque sacras christianorum ceteras cremari; Le-Phoungum Ducem, qui supersticiosum comprehenderit, vinxerit, regique transfuderit, ornari præmio, senatus jubet. Fuerunt deinde qui perfectum jactarent industria viri cujusdam ex ordine senatorio, qui se bene esse in Lezinianam animatum diceret, ut judices sententiam mutarent, nostrumque in carcere perpetuo aservandum decernerent. Sed rei exitus verba ab simulatore fuisse christianis data demonstravit.

Matthæus in eum carcerem, in quo Gilius manebat, con- truditur. Inde in proxi-

XXXIV. Mense majo custodes carceris, quo Gilius detinebatur, cum Matthæum capitis judicum sententia fuisse condemnatum intellexissent, scribam adeunt,

adeunt, eique, quibus pollicitationibus possunt, persuadent, ut ab senatu hunc item alterum Europæorum sibi in custodiam tradi impetret. Eisi qui necandi essent, duci in eum carcerem consueverant, tamen non juris tuendi causa, sed spe lucri custodes ad id petendum commovebantur. Ea re impetrata, III. kalend. junias Matthæum catenis solutum custodes in domum carceri proximam, in qua degere Gilius solebat, adducunt. Quod tum gaudium, quæ significationes amoris, quæ lacrimæ fuerint virorum, qui rati one instituti fratres, qui socii laborum, qui amicitiae lege conjuncti tamdiu fuissent, quique se una martyres futuros confiderent, difficile est existimare. Inde vero, ut iisdem in ædibus una manerent, remque divinam cum vellent facerent, opemque christianis afferre possent, inter eos militesque de duplicanda pecunia, quam nostri quoque mense pro uno Gilio solverent, convenit. Postero die, qui Divinæ Trinitati dicatus erat, præsentem Matthæo, Gilius, quintoque post die Christi Servatoris Corpori sacro, cum CL. christiani advenissent, sacrum uterque peregit. Expiati ea die *pœnitentiæ*, *eucharistiæque* mysteriis viri, mulieresque circiter XL. fuerunt. Post id tempus, quod jam per custodes liceret, quaque die sacrificium offerre, precibus divini nu-

mas ædes ante
bo adeunt,
ibique rem
divinam fa-
ciunt, & chri-
stianis sacra
ministrant.

minis

364 DE MARTYR TUNQUIN.

minis opem implorare, libros de pietate erga Deum legere, virtutem omni studio colere, christianis, qui ad eos concurre-
rent, magno esse adjumento consueve-
runt. Igitur *baptizati* eo anno a Matthæo
mares, feminæque XXXIII., expiati *pæ-
nitentia* DCXX., *extrema unctione* III.

Gilius, &
Leziniana ab
regis avuncu-
lo vocati, li-
bros ei duos
de Deo, de-
que catechu-
menis afferunt;
mox dimit-
tuntur. De
eorum causa
rursum co-
gnoscitur: de-
nique Sena-
tus utrumque
capitis con-
demnat.

XXXV. xiv. kalendas sextiles
in ædes avunculi regis, ipsius rogatu,
venerunt, librosque attulerunt duos, quo-
rum alter de uno rerum omnium condi-
tore Deo sinice, alter de instituendis
Catechumenis tunquinice perscriptus erat.
Hos ille libros ut accepit, cum elegan-
tem in utroque admiratus esset litterarum
formam, tum nostris restituit sinicum,
tunquinensem retinuit. De religione,
immemor eorum, quæ Gilio antea con-
firmarat, paucis dixit, falsam esse, quam
ethnici sequerentur; sed hoc eam chri-
stianæ esse anteponendam, quod ethnica
facilis, nostra difficilis intellectu esset.
Mox utrique, ut *decalogum*, precesque
aliquas christianorum memoriter dice-
rent, imperavit. Cum illi, quæ jussi
fuerant, fecissent, quæsit ex custodi-
bus, num christiani ad carceres inter-
dum, visendorum magistrorum gratia,
accedere solerent. Custodes, quod ho-
minem in nostros præ ceteris esse propen-
siorem cognoscent, annuerunt; Euro-
pæosque in ædibus, quæ proximæ carce-
ribus

ribus essent, versari, atque ad eos sæpe cives, militesque, qui christianis partibus studerent, concurrere demonstrarunt. Mense augusto, quod rex comprimi perduelles non posse, ac cives fame, pestilentiaque absumi, sterilitatemque esse magnam agrorum, videret, metueretque, ne iniquitate judiciorum quisquam condemnatus innocens fuisset, eorumque, qui carceribus detinerentur, causa his tot ærumnis regnum vastaretur, redintegrari quæstiones, infontesque liberari, & remitti aliquantisper nocentibus poenam iussit. Instituta ab iudicibus quæstione, nihil de Gilio novi. De Matthæo decretum est, ut perpetuo carcere detineretur. Rex, qui in viros eodem crimine accusatos tam esse discrepantes sententias latas animadvertit, neutram probavit, ostenditque, jus, ratumque, quod Senatus sanxisset, habiturum. Senatus, ut exitu tandem rerum compertum est, capite utrumque plectendum iudicavit.

XXXVI. Anno MDCCXLV. xii. kal. februaras nostri, qui in proximis carceri ædibus, ita ut sæpe demonstratum est, una morabantur, cum prope meridies instaret, certiores sunt facti, fore, ut insequenti die ob religionem Franciscus capite plecteretur. Eo nuncio accepto, Gilius, qui nihil optabat magis, quam ut sanguinem pro Christo funderet, tanta lætitia perfusus est, ut eam animo com-

Gilius proximi supplicii nuncio accepto, lætitia perfunditur: contra Leziniana, eamdem in se latam esse sententiam ignorans, magno dolore afficitur.

comprimere non posse videretur. Forte fortuna Ceomanensis Episcopi, qui Vicarius erat Apostolicus regionum, quæ ad occidentem solem pertinent, famulus aderat, qui eo ipso die ad Gilium salutandum venerat. Huic revertenti epistolam ad Episcopum in hanc sententiam scriptam committit: Sciret, se die insequenti capite cæsum iri, qui dies S. Vincentii martyris memoria insignis futurus esset. Id sibi optatissimum evenire. Nam pro defendenda catholica religione æquo se, libentique animo, quod jamdiu expetisset, interiturum. Matthæus contra, qui nullum de se iudicium latum arbitrabatur, moleste ferebat, quodque, abeunte jam focio ad martyrium, manendum sibi in vita esse timeret, magno dolore afficiebatur; multisque cum lacrimis factum id sua culpa esse dicebat, quominus sibi etiam mori liceret. Se namque plurimis flagitiis implicatum (nam ita de se demisse humiliterque sentiebat) indignum esse, qui martyrio perfungeretur. Hunc Franciscus consolari, monere, hortari, ut bono animo esset, neque se afflictare pergeret. Nam quod divino consilio accidisset, ut ipse superstes gerere christianorum curam, qui carceribus asservabantur, valeret, utque plura pro Christi nomine perpetiretur, id demum non moleste, sed hilari animo esse ferendum.

Gilius christi-
anos consti-

XXXVII. Interea christiani, qui de
Gili

Gilii supplicio ex regis scriba cognoverant, statim magno numero in carceres convolarunt. Hi, postquam magna vi lacrimarum, fletuque fortissimi viri, deque se optime meriti acerbum, ut ipsis videbatur, casum sunt lamentati, mox illius mortem deprecari ab rege constituerunt. Id ut facilius impetraretur, regis avunculum pecunia alliciendum existimarunt. Itaque decem huic argenti pondo, si impetrasset, pollicentur. Ea re Gilius per domesticos intellecta, gravissime tulit, hortatusque per nuncium majorem in modum homines fuit, ut conatu desisterent. Nam si conari pergerent, magno id nomini christiano dedecori, atque incommodo futurum. Cum enim sacerdotes inculcare christianis soleant, ut quaecumque acciderint adversa, patienter ferant, caveantque, ne quod divina sit voluntate factum, id sibi acerbum putent, absurdissimum esse, si quod ceteris præscribunt, id minus ipsi diligenter servant. Igitur ne committant, ut eorum opera magistri doctrinae, ac religionis apud ethnicos in mendacii veniant suspicionem. Nam quod in se erat decretum ab rege, eventurum numquam fuisse, nisi factum Dei voluntate fuisset. Hoc nuncio dimisso, cum domestici cœnassent, eis iussit, ut preces, quas adhibere ante solebant, persolverent, imprimisque *Rosarium*, quanta maxima pos-

tutum ei supplicium pecunia redimere conantes ab incœptis deterret, seque ad martyrium fortiter ferendum parat. Leziniana una cū Gilio interfici se vehementer cupit. Itaque e carceribus ambo educuntur; mox Leziniana se item capitis esse condemnatum cognoscit.

possent religione, recitarent. Sperare se illorum pietate, ut ne efferatur animo, utque omnia sibi fauste, feliciter, prospereque eveniant, divinitus impetraturum. Ipse cubiculum ingressus Deo se maiorem in modum commendavit. His absolutis precibus, cum novos, magnosque sibi spiritus addi sensisset, atque animo confirmatus esset, e cubiculo egrediens domesticos ad virtutem hortatus est. Ac videor, inquit, me ipsum videre in eum statum deductum, quo Christus pridie ejus diei fuit, quo die perfidia judæorum est interfectus. Itaque quod ille discipulis testamento reliquit, ut Deum colerent, ejusque legibus obtemperarent, seque mutuo diligerent, iisdem vos verbis hortor, moneoque, ut operam excolendæ virtuti detis: Nam quod octavum jam annum subsidio mihi fuistis, maximas vobis, quas possum, & ago, & habeo gratias. Plura loqui conantem lacrimæ, quas plurimas effundebat, impediverunt. Ergo in cubiculum reversus prece sibi munire instituit ad martyrium fortiter perferendum viam. Interea Lezinianam, pugnandi pro Christo cupidum ea cogitatio sollicitum tenebat, quemadmodum migrare ipse quoque una cum Gilio in patriam beatorum posset. Diu deliberanti illud satis commodum visum est, orare, atque implorare militum fidem, qui Franciscum ad supplicium ducere debebant,

bant, ut se etiam eundem in locum deducere ne gravarentur. Id sibi, ac Gilio magno solatio, majorique levationi futurum sperabat, si morienti adesset, eumque, quibus posset officiis, juvaret. Accedebat ea cogitatio, si in conspectum judicum venisset, de se quoque supplicium decretum iri. Nam de Christo dicturum se, iudicesque acriter reprehensurum, quod cum eadem ambo in causa fuissent, iniquo iudicio alterum interficiendum, alteri parcendum statuissent. Ea spe incitatus, collegit continuo se, & ad martyrium una cum Francisco parare coepit. Implorata diuturnis precibus divini numinis ope, multa jam nocte sese mutuo *pœnitentia* expiarunt, deindeque re divina perfecta, actisque gratiis, *cocolatæ* potione, etsi ei Franciscus assuetus non erat, reficiendas vires corporis judicarunt. Prima luce egressi ex ædibus, eos, qui carceribus detinebantur, ut omnibus salutem dicerent, adierunt, iisque, qui rerum inopia premerentur, oryzam distribui fecerunt. Post ad præfectum se carcerum contulerunt, eique gratias, quod se humanissime habuisset, multisque beneficiis cumulasset, egerunt. Quo tempore quum christianus quidam libellum ad Lezinianam detulisset, quo libello ab rege petebatur, ut salvum esse Giliū juberet, huic ille respondit: nihil esse libellis opus, propterea quod ipse quæ

ex usu forent, quæque sibi divinum numen in animum induxisset, coram, itaut ab omnibus intelligeretur, dicere decrevisset. Octava diei hora, ad eos milites venerunt, qui Franciscum deducerent. Hos ubi Matthæus vidit, rogare custodes etiam atque etiam, ut se quoque una eodem ire paterentur. Custodes, qui manere utrumque in carcere malebant, veriti, ne, si postulata fecissent, id forte accideret, quod evenit, concedendum non putabant. Sed victi precibus, opinioneque multorum, qui paratum a christianis supplicem libellum arbitrarentur, quem regi Matthæi nomine traderent, rati rem felicem exitum habituram, sacerdotisque salvos in carcerem reduci posse, quod petebat, facile concedunt, inque supplicii locum comitantur. Pergebant nostri simul, precesque jam institutas persequantur, sed alter, quod se brevi coronam adepturum sciret, lætus, atque alacer, alter, quod dubitaret, tristis, ac mœrens incedebat. Ubi ad Palatium ventum est, christianus, cui datum id negotii fuerat, libellum Matthæo porrigit, quem libellum ut noster in crumenam immisit, mox certior est factus, se etiam ipsum regis decreto esse capitis condemnatum. Quo accepto nuncio Matthæus, re pervestigata, satisque explorate cognita, incredibile dictu est, quantum inde gaudii, lætitiæque acceperit.

XXXVIII. Interim custodes, qui animadverterant, nihil Matthæum de impetranda venia agere, ab eo summis precibus postulabant, ipsis ut libellum daret, quo, sublato clamore, negotium curarent, regemque rogatum mitterent, implorarentque, ut illis ignosceretur. Quibus Matthæus, cum capite, inquit, cæsus fuero, tum demum vobis libelli accipiendi potestas erit. Eodem tempore, Gilio, & Leziniana ante palatii fores sedentibus, precesque fundentibus, ad eos eunuchus quidam accessit, cruceque exiguas duas in terram per summam injuriam projecit. Quas cum nostri suscepissent, veneratique oscularentur, tum ille est homo percunctatus, quid hoc rei esset, quod crucibus cultum adhibendum arbitrarentur. Huic Matthæus, Christus, inquit, e cælo in terram adferturus humanum genus in libertatem descendit, cumque affixus cruci mortuus fuerit, consecrata ita sanguine illius, morteque crux est, ut eam omnes venerari oporteat. Paulo post alius supervenit eunuchus, qui de lato in Alonsum capitis judicio nunciaret. Is cum ex Matthæo quæsisset, loqui ne tunquinice sciret, atque ille annuens affirmasset, tum eunuchus, sic habeto, inquit: quod alieno ex regno tuam legem in nostrum importatum veneris, imperare regem, tibi ut etiam abscindatur caput.

Eunuchus ad martyres designatos accedit, cruceque duas in terram projicit; tum alter eunuchus Lezinianæ sententiā ab rege in eum latam nunciat.

Qua re audita Leziniana, unum modo respondit: ei se, qui nuncium attulisset, gratias agere. Nam quod divina voluntate statutum esset, hoc se hilari animo laturum.

Gilius, & Leziniana capite diminuantur.

XXXIX. His dictis rebus, manus militum in locum supplicii progreditur. Sequebatur virorum, & mulierum incredibilis multitudo, imprimisque christianorum, qui miserandum in modum fletu, ac lacrimis magistrorum casum lamentabantur. Ubi perventum ad supplicii locum est, cum nostri humi prostrati Dei sibi auxilium precibus implorarent, apparitores senatus quatuor secuti Matthæum interrogant, quamobrem proscriptam regis edicto christianorum religionem in Tunquinum inferre conatus esset? Ad hæc Leziniana, veniundicam sibi causam fuisse dicit, ut veram Dei legem latius propagaret, utque Tunquineses de studio colendæ virtutis, deque rebus ceteris doceret, quæ ad æternam beatamque vitam degendam conducere. Atqui rex, inquit apparitorum unus, qui legem istam & odit, & deleri præcepit, capite te cœdi jubet. Tu vero timesne mortem? Huic item Matthæus respondit: se, qui ob eam causam plecteretur, felicem, immortalique vitam in cælo consequuturum. Quare nullo se mortis metu commoveri. Sibi autem persuaderet, eam religionem, quam

quam Tunquinenſes cives averſarentur, poſtremo tempore, quum jam diſſolveretur mundus, notam omnibus, exploratamque futuram. Quæ cum ille dixiſſet, cuſtodes auctores apparitoribus fuerunt, ne interrogando moleſti hominibus eſſe pergerent, utque illis ſpatium precandi relinquerent. Tum noſtri cum ſe rurſum mutuo *pœnitentia* expiaſſent, vinctiſque brachiis alligati ad palum fuiſſent, ad famulum Jeſuitarum, qui eodem advenerat, quique damnatus & ipſe religionis chriſtianæ cauſa ad curam elephantorum erat, ſeſe Gilius convertit, eumque obſecrat, ut ſe, ſociumque chriſtianis, qui in civitate verſarentur, commendatum velit, iſdemque chriſtianis, multoque magis domeſticis, ac mulieri, cujus ipſi domo pro hoſpitio uſi fuerant, gratias agat, curetque præterea, ut ab *Catechiſte* carnificibus argentei nummi DC. ſolvantur. Denique hora poſt meridiem quarta, ſuſpicientibus in cælum noſtris, dato a magiſtratu ſigno, illico capita abſcinduntur. Ea re geſta, magnus continuo chriſtianorum fletus, clamorque ſublatus eſt, unaque omnes voce, *ehēu Patres, ehēu Patres*, lacrimantes, conclamaverunt. Carnifices, milites, magiſtratus, eſſi poſt affectos ſupplicio reos abire celeriter conſueverint, quod, cum ſint maxime ſuperſticioſi, interſectorum animos pertimeſcant,

ta-

tamen admiratione christianorum permoti, qui magno impetu ad cadavera sacerdotum accedere conarentur, deque comparanda sibi aut vestium, aut sanguinis, aut capillorum particula laborarent, diutius ibi, quin ullam conantibus molestiam afferrent, substiterunt, raptique novitate rei, en, ajebant, quanto isti in suos patres amore feruntur!

Martyrum
corpora Luc-
thuyū trans-
lata a Domi-
nicanis sepel-
liuntur.

XL. Jam domestici martyrum custodes sibi carcerum pecunia ante adjunxerant, eisque persuaferant, ut capita, cadavera, vestesque curarent. Sed magno christianorum concursu facto, fatis diligenter res ipsa administrari non potuit, quin ab christiano Matthæi, ab *sortilego* autem quodam ethnico Francisci caput auferretur. Hunc tamen fugientem christiani insecuti, recuperato capite, utrumque (nam alterum christianus libens reddiderat) ad Petrum Xaverium Tunquinensem sacerdotem S. J., qui martyrum supplicio interfuerat, detulerunt. Die insequenti, qui dies fuit ad x. kal. febr. corporibus, capitibusque in navim opera, diligentiaque Xaverii importatis, christiani, qui eam sibi curam susceperant, celeriter solvunt, & Luc-thuyum proficiscuntur. Eo cum venissent, advocatis Ludovico Spinosa, & Pio Sanctacrucio Dominicanis, qui inde prope aberant, eis martyrum corpora transdiderunt, a quibus a. d. vii. kal.

kal. februarias eodem in loco, in quo ab hostibus comprehensi martyres fuerant, post rem divinam magno christianorum, quibus cognita res erat, concursu factam, honorifice condita fuerunt.

XLI. Ejus rei certior factus Petrus Ponsgravius Pro - Præfectus Provinciæ Tunquiniensium Dominicanorum, magnis itineribus Luc-thuyum contendit. Eo ut pervenit, una cum Hilario Coricensium Episcopo, & Laurentio Maria Augustinianis, qui omnes eodem in oppido versabantur, sese ad sepulcra martyrum pietatis causa contulit. Hi quum una omnes convenissent, ab ejus loci principibus viris rogati, ut ex privatis ædibus, in quibus collocata corpora fuerant, in templum commune transferri, altiusque recondi paterentur, propterea quod periculum esset, ne, si forte fortuna de sepultis domi cadaveribus ethnici, qui proxima loca incolebant, hostisque imprimis acerrimus christianorum Thay-tinchus, cognoscerent, & ad magistratum deferrent, de ea re inquirendum statueretur, christianique in summum vitæ, fortunarumque discrimen venirent, consilio probato, rogantibus concedendum, quod peterent, judicaverunt, extractisque corporibus, postquam ipsi, & qui aderant christiani eorum pedes osculati essent, & feretra clausissent, ac nomina utriusque martyris feretris inscrip-

Eadem corpora in templum ex privatis ædibus transferuntur, & solennis supplicatio habetur.

376 DE MARTYR. TUNQUIN.

scripſiſſent, magna pompa, magnoque hominum concuſſu eadem in templum cadavera aſportaverunt. Solemni facta ſupplicatione, eadem ante aram B. Mariæ Virginis *Rofarii* ſepelierunt, atque ita pavimentum complanatum, reſtitutumque eſt, ut ſepulcri, aut ſoſſionis veſtigium appareret nullum. Exaſto menſe, quum tranquillæ, pacatæque res chriſtianorum eſſe viderentur, eſſi multi erant eorum adhuc occupati metu, tamen ſolemniſſor ſupplicatio decreta eſt. Nam eſſe gratias agendas Deo, qui ſacerdotes duos corona martirii ornafſet, intelligebant, ſimulque perſpiciebant magnam ineſſe celebritati ſacrorum vim ad recreandos, confirmandosque illorum animos, quos nece tantorum virorum nimius terror invaſerat. Ergo prid. kal. martias, cum Ponſgravius, Spinofa, & Sanctacrucius Dominicanus, Auguſtiniani Laurentius, & Hieronymus, Præſbyterique Tunquinenſes duo adefſent, Epifcopus Coricenfium, magno chriſtianorum concuſſu, apparatu, rituque Epifcoporum rem divinam fecit. Ea re abſoluta, de laudibus martyrum habita oratio eſt. Denique actis gratiis, dictoque hymno *Te Deum*, finem ſupplicandi fecerunt.

Huc ruruſus pertinet proteſtatio, que deſcripta eſt pag. 234.

F I N I S.

Bremond, Antoninus

De illustrissimis viris PP. Petro Martyre Sansio et Franc. Senano ...
commentarius

Roma 1753

Regensburg, Staatliche Bibliothek -- 999/Hist.eccl.380
urn:nbn:de:bvb:12-bsb11092431-8